

PL
2728
.A1
1876
v.11

曾文正公奏稿

卷之十目錄

恭報起程日期摺

咸豐八年六月十七日

湖口建昭忠祠九江建塔齊布祠摺

八月十二日

湘鄉縣建忠義祠摺

全日

廣豐玉山兩縣解圍摺

全日

遵旨移師援閩摺

全日

調李瀚章來江西片

調喻吉三隨營片

設立轉運糧臺片



攻克安仁縣城摺

八月二十四日

劉本傑陣亡請卹片

胡兼善病故請卹片

請四川協餉片

移師由杉關入閩摺

九月十三日

調派官軍分道入閩摺

十月十六日

各營患病情形片

移軍勦景德鎮股匪摺

十一月二十六日

蕭啟江擒捕潮匪片

陳明石逆情形片

遵 旨斟酌具奏摺 十二月十一日

目疾請假片

通籌全局請添練馬隊摺 咸豐九年正月十一日

李續賓死事甚烈功績最多摺 全日

曾國華殉難三河鎮摺 全日

調饒廷選來江片

謝年終 恩賞摺 二月初九日

謝曾國華追贈優卹 恩摺 全日

蕭啟江在南康勝仗摺 全日

張運蘭攻勦景鎮情形摺 全日

陣亡病故員弁彙案請卹摺

全日

謝曾驥雲 賜封典 恩摺

二月十五日

克復南安府城摺

全日

移駐撫州片

曾國荃保升道銜知府謝 恩摺

二月二十八日

信豐解圍調蕭啟江援湖南摺

全日

江西添濟月餉片

謝曾紀壽及歲引 見恩摺

三月二十六日

景鎮官軍攻勦情形摺

全日

新募楚軍來撫州教練片

恭報起程日期摺

咸豐八年六月十七日

奏爲恭報起程日期仰祈

聖鑒事竊臣於六月初三日准湖南巡撫咨稱承准軍機大臣
字寄五月二十一日內閣奉

上諭前因江西賊匪竄入浙江之常山開化圍逼衢州府城疊
由江南徽州等處調撥援師馳往救援恐官軍無所統屬特加
漳州鎮總兵周天受提督銜督辦浙江防剿事宜嗣因處州失
守并攻陷金華所屬之永康武義二縣恐周天受資望較淺未
能統率眾軍復諭和春前往督辦茲據和春奏現在患病未痊
刻難就道東南大局攸關必須聲威素著之大員督率各軍方

能措置裕如曾國藩開缺回籍計將服闋現在江西撫建均經克復止餘吉安一府有曾國荃劉騰鶴等兵勇足敷剿辦前諭耆齡飭令蕭啟江張運蘭王開化等馳援浙江該員等皆係曾國藩舊部所帶勇丁得曾國藩調遣可期得力本日已明降諭旨令曾國藩馳驛前往浙江辦理軍務著駱秉章卽傳旨令該侍郎迅赴江西督率蕭啟江等星馳赴援浙境與周天受等各軍力圖掃蕩該侍郎前此墨經從戎不辭勞瘁朕所深悉現當浙省軍務喫緊之時諒能仰體朕意毋負委任何日起程并著迅速奏聞以慰廑念將此由六百里各諭令知之欽此伏念浙江完富之區關繫東南大局賊勢方張亟應迅籌援剿遵卽於

初七日自家起程十二日抵長沙與撫

臣

駱秉章會商并一面

飛飭蕭啟江張運蘭王開化等由撫建拔營進駐鉛山縣之河

口鎮

臣

擬由水路至九江登陸遄抵河口大營卽便督率星馳

赴浙蓋由湖南江西陸路赴浙與假道長沙程途遠近相同而

夏令南風順水舟行較速且

臣

軍後路餉需轉運一切亦須與

湖北督撫

臣

面相商榷庶期無悞師行

臣

才質凡陋頻年飽歷

憂虞待罪行間過多功寡伏蒙

皇上鴻慈曲加矜宥惟有殫竭愚忱慎勉襄事以求稍紓

宵旰憂勤所有軍務一切俟行抵河口後再行詳悉陳奏理合

將

微臣

起程日期恭摺由驛覆奏伏乞

皇上聖鑒訓示施行謹

奏

硃批汝此次奉命卽行足徵關心大局忠勇可尙俟抵營後迅將如何布署進剿機宜由驛馳奏可也欽此

湖口建昭忠祠九江建塔齊布祠摺

咸豐八年八月十二日

奏爲湖口建立水師昭忠祠九江建立前提臣塔齊布祠請

旨敕部核議恭摺奏

聞仰祈

聖鑒事竊

臣國藩於咸豐三年在衡州製造戰船設立水師四

年越境勦賊自湘潭以至九江焚燒賊艦萬餘事機甚順旋以

湖口之挫戰船半入內湖半阻外江其在外江者由彭玉麟帶

領回援武昌復經湖南撫

臣製造船礮交臣楊載福募勇會同

援鄂苦戰兩年再克武漢湖北撫

臣胡林翼經營恢廓外江水

師遂增至一十八營其在內湖者初僅戰船百零七號臣國藩

入南昌後會同江西撫臣添置船礮札調彭玉麟來江統帶內

湖水師亦增至二百餘舟七年二月臣國藩丁憂回籍請

旨特派臣載福總統外江內湖水師事務彭玉麟協理仰蒙

聖恩允准九月內會同規取湖口彭玉麟攻其內臣楊載福攻

其外臣李續賓亦以陸師從山後抄擊立將湖口克復自是而

逆舟之精銳略盡九江之賊勢益孤矣仰荷

聖主威福合三省之物力成此一枝水師上下三千里舳艫不

絕旌旗相望臣楊載福復進剿蕪縣一次進剿蕪湖一次肅清

江面之局大致羸定惟是數年以來弁勇出入於礮子如雨之

中挺身殉難鬱爲國殤合計陣亡傷亡不下三千餘人其有雖

死而冊名偶遺及大風覆舟而溺死失火藥箱而焚死者均不
在此數中臣楊載福與彭玉麟會商就湖口石鍾山上建祠一
所合祀水師陣亡各員弁勇丁名曰水師昭忠祠上以體
聖主褒崇忠義之意下以動各營觀感奮發之心彭玉麟畱防
湖口就近監修分別正祀附祀刊刻木主依次列入此湖口建
立水師祠宇之原委也前提臣塔齊布署湖南撫標守備時已
毅然有殺賊立功之志湘潭一役以千餘新集之師當數萬方
張之賊楚軍之勇敢實倡於此大局之轉機亦始於此逮渥荷
聖恩超擢提督涅臂刺字精忠報國轉戰岳州武昌大冶興國
田家鎮廣濟黃梅等處身先士卒所向有功祇以九江一郡未

能速下忠憤填膺鬱憂成疾曰對孤城竟以身殉本年四月水陸諸軍克復九江該處士民及在營弁勇語及塔齊布當時遺憾無不感歎流涕異口同聲公請建立專祠並附祀陸師陣亡各員弁以報功而示勸已就郡城隙地擇期興工名曰塔忠武公祠臣李續賓委員監修其附祀之員弁勇丁確切查明刊刻木主依次列入此九江建立塔齊布祠宇之原委也臣國藩欽奉

諭旨馳赴浙江經歷九江湖口見兩處祠宇俱已將次工竣瞻拜爭趨往來相屬廣

盛世褒忠之典卜斯人向善之忱伏思

皇上眷念盡臣

恩施逾格凡茲效命疆場之士悉本

朝廷鼓舞而成臣等不揣冒昧籲懇

天恩敕下該部九江湖口兩祠宇照各府昭忠祠之例飭地方

官春秋致祭於

聖朝褒忠勸善之道或亦足以裨補於萬一謹會同湖廣總督

臣官文湖北巡撫臣胡林翼江西巡撫臣耆齡恭摺附驛具奏

伏乞

皇上聖鑒訓示施行謹

奏

湘鄉縣建忠義祠摺

咸豐八年八月十二日

奏爲湘鄉縣城捐建忠義祠彙祀陣亡員弁勇丁恭摺奏

聞仰祈

聖鑒事竊臣國藩於咸豐二年十二月奉

旨幫辦湖南團防時長沙解圍未久撫臣張亮基札調湘勇千

人臣國藩率同羅澤南王鑫劉蓉羅信南數人督帶湘勇赴省

仿照前明戚繼光之法編束隊伍練習膽技當經縷晰奏明在

案三年二月衡山土匪曹戴李躍搆亂於草市派劉長佑王鑫

前往剿滅是爲湘勇殺賊立功之始五月十八日江西省城被

圍前安徽撫臣江忠源由九江入省登陴守禦飛書請援臣國

藩會商湖南撫

臣

招募湘勇

二千楚勇

一千配以

三廳兵八百

人赴江救援其監護軍行者則有夏廷樾郭嵩燾朱孫詒羅澤南其管帶湘勇之員則有謝邦翰易良幹羅信南康錦輝楊虎臣等而羅澤南亦自帶一營七月二十日軍至南昌二十四日因進兵太銳先勝後挫謝邦翰易良幹及羅信南之弟羅信東等同時陣亡此湘勇出境剿賊帶勇紳士力戰捐軀之始也臣續賓時在謝邦翰營中幫辦營務謝邦翰沒後遂接帶斯營臣國藩時在衡州聞援軍挫衄之信倡議於湘鄉建立祠宇祀謝邦翰易良幹及在江殉難之人此後如有死事員弁以次附祀名曰忠義祠四年冬間祠工告竣數載以來湘勇援鄂援江援

廣東援廣西幾無虛日今

臣國藩復奉

命援剿閩浙

臣續寶奉

命援剿皖豫統計湘勇之出境征伐者不下六七萬人員弁勇丁之陣亡傷亡者亦不下五千餘人其間死事最著者羅澤南靖節於武昌王鑫盡瘁於樂安劉騰鴻效命於瑞州羅澤南奉諭旨於三省建立專祠王鑫奉

旨於兩省建立專祠自應於本縣各建一祠劉騰鴻奉

旨於瑞州建立專祠亦應推廣

皇仁建祠本縣此外殉難各員如李杏春宣勞最久而勛名未彰鍾近衡死綏最先而卹典尙闕及其他營官幫辦哨弁死難

之人或慷慨以赴敵或力窮而就義均應彙入總祠上以體

聖世褒忠之意下以勵湘人觀感之誠本年六月臣國藩于役

浙省經過縣城周覽舊立祠宇規模狹小附祀之主無可安設

思欲稍加廓大行次黃州晤臣續賓商議意見相同臣等擬卽

倡捐銀兩擇交邑紳就四年所修之祠添購基地重加修葺凡

陣亡將領弁勇分別正祀附祀刊刻木主依次列入合無籲懇

天恩敕下部議湘鄉縣所建忠義祠俯准照各府昭忠祠之例

飭地方官春秋致祭於

聖朝褒忠勵節之道或亦不無小補所有湘鄉縣捐建忠義祠

緣由謹會同湖南巡撫

臣駱秉章恭摺附驛具奏伏乞

皇上聖鑒訓示施行謹
奏

廣豐玉山兩縣解圍摺

咸豐八年八月十二日

奏爲聞賊竄撲廣豐玉山兩縣官軍力戰守禦屢獲勝仗兩城先後解圍恭摺奏祈

聖鑒事竊浦城大股賊匪於七月初十日回竄廣豐縣五都地方平江營營官守備彭大壽候選知縣夏宏江等與在城文武一面稟請援師一面分撥堵禦十一日黎明前隊長髮老賊數百名直犯縣城彭大壽等派三成隊出城迎擊賊稍卻退已刻復繞東門山背而來黃旗殷山喊聲震地數次猛撲猖獗異常彭大壽等以眾寡不敵飭各勇堅守勿動排列垛口以槍礮轟之待賊氣已疲突出不意出城奮擊賊遂大潰退三四里屯踞

未刻候選道李元度續派平江老左營都司銜守備童梅華新
左營千總張詩華右營候選知縣郭式源馳來救援人心稍定
十二日辰刻賊悉銳薄城我師仍堅忍相持未刻分三門出隊
奮擊斃賊百餘名陣斬乘坐紅呢大轎賊渠二人我軍陣亡把
總易金榜李傳綸二員十三四兩日逆賊愈集愈眾三面環攻
並於東南兩門暨小北門外近城房屋加築牆壘另立堅卡圖
開地道又於大北門高嶺時出大隊往來放鎗發喊十四日申
刻彭大壽等商定左營出三百人排立北門嶺上以拒北路援
賊右營前營湘勇營新左營各挑奮勇俱出小北門直撲賊壘
賊列隊屋外鎗礮連施右營冒險衝入斃悍賊十餘人賊仍退

屋內堅拒我軍抄過屋背放火圍殺五六十人燒斃無數當將
小北門外地道填塞時北路接應之賊擁至我左營之三百人
者奮力攔截斃二十餘名賊始敗潰十五日黎明彭大壽等商
定新左營及前營由大南門東門左右兩營由北門分門突出
用劈山礮轟斃守卡之賊合力毀卡奪關擁入哨目彭學仕先
鋒洪文杰及各勇目帶重傷者數名猶復鼓勇繼進賊遂不支
當將南門外賊壘四座焚燒地道填塞乘勝追擊斃賊數百奪
獲旗械無數隔河南岸之賊出援亦經潮勇擊退同時東門外
之火已發殺斃燒斃之賊約二百餘名生擒九名賊遂向北逃
奔左營帶隊尾追一二里餘賊奔過山背是夕二鼓後前營左

營新左營右營各出五成隊乘月色出城分八支前進放礮爲號齊隊向前破賊壘五座餘賊越嶺狂奔城圍立解探聞浦城後至股匪已至五都五鼓時復將守城之五成隊換出直抵毛家村拆毀浮橋沿河列隊拒之賊偵知有備折回北去不敢復窺廣豐此十一日至十六日廣豐縣城力戰解圍之實在情形也其竄玉山縣者十五日至十里塔前搭浮橋渡河候選道李元度率勇扼七里街口該逆三次衝突均經擊退斃賊數十名逼溺二十餘名我勇追過浮橋遇伏陣亡六人酉刻賊忽分兩股從三里街河灘搶渡李元度回軍逆擊對河之賊卽從七里街擁進又分股直撲城下李元度恐城中有失乃帶隊入城登

陴守禦飛調老中營武威軍奇兵彰武等營陸續入城協守十六日辰刻賊圍西北兩門另股登南門塔上俯瞰城內我軍開礮指擊悍賊盡伏三里街民房牆內開挖地道距城僅三四丈十七日我軍趕挖西門濠溝該逆於牆中鑿洞轟礮擊斃我勇二人傷十九人李元度懸賞選募把總劉斗寅等百餘人直開西門援屋而上施放火箭噴筒破卡三處將賊踞各屋焚燬生擒五賊李元度在城上督戰被抬礮子打傷左目之下三分流血數升暈絕撲地半時始甦時城外之賊較官軍多至十餘倍環城掘洞鋤鋏之聲相聞城中米糧缺乏主將又復受傷人心驚惶其勢岌岌李元度傳藥甫畢裹創登城激勵將士安撫居

民飭各勇從城內自挖地洞出城後橫繞城根暗截賊之隧道
又從小西門起至西北角止趕築月城五十餘丈高與城齊日
夜竭力抵禦賊礮向城環擊各營轟害者十一人委員議敘八
品職銜監生李家純中礮殞命百姓多被擊傷十八日賊出隊
犯東門彰奇兵營官丁峻帶隊出擊各營派隊繼之奇兵哨官
龔茂發陣斬偽總制胡先祥一名奪獲偽印偽官照及馬匹等
件逆黨大敗歸巢又在西門四五丈外民房紮卡之處開挖地
道仍穴牆開鎗使人莫敢近李元度復懸賞百金選募劉斗寅
等開城緣屋而上將卡焚燬燒斃挖隧之賊數十人於土穴之
中賊黨退數丈紮卡於北門外添營七座又從東門小港外搭

橋過渡希圖四面合圍二十日辰刻賊在東北城添大小營壘
二座阻我常山來路各營派五成隊出擊丁峻帶彰奇營從東
津橋包抄屈蟠黎獻丁應龍等從中路分進搶近賊營立將二
壘踏毀追擊里許援賊大至漫山遍野不下二萬人丁峻等督
隊相持迴合十餘次黎獻等另從北門橫衝賊陣刀矛相交哨
官張應龍彭飛熊龔茂發龔拱綸等乘勝深入而賊來益眾龔
茂發龔拱綸中礮陣亡張應龍彭飛熊各受重傷張應龍旋亦
身死李元度見時已向晚傳令收隊入城查點各勇陣亡七人
受傷五十一人二十一日黎明賊在西城搭造望樓有賊酋黃
帽黃衣登樓瞭望我軍用兩劈山礮指擊一發下之是日衢州

鎮總兵李定太自江山派寶勝勇千人來援平江左營童梅華
右營郭式源等亦自廣豐會同廣信府防勇祥字豫勝等軍來
援士氣愈壯賊之凶鋒稍斂矣二十二日賊復於東北隅添營
三座常山來路已斷李元度等以此路不可不通令彰奇武威
同字及兩中營從東門出隊直搗新紮之營時近黃昏賊不爲
備立將三營蹋盡殺賊約二百餘名奪獲旗幟六百餘面正鏖
擊時李元度見三里街一帶之賊均往東城救應遂潛飭水師
登岸將南門對河之街房焚燒其地與三里街郭家洲賊館相
連風勁火烈一律延燒該逆撲救不及勢甚慌亂三更候燒及
賊之火藥館煙燄沖霄聲如巨霆各營乘勢開城出擊連破大

西門賊卡三處賊不能支盡棄行李輜重狂竄德興一帶我師
黎明跟追殺賊二百餘名生擒四十七名奪獲軍裝旗幟數百
件騾馬三十一匹窮追三十里始行收隊此十五日至二十二
日玉山縣城力戰解圍之實在情形也伏查廣玉兩城當浙江
福建江西三省之衝與安徽之婺源相距亦不過二百里一有
疏虞則四省震動候選道李元度以一軍分守兩城身受鎗傷
苦戰旬日卒能殺賊解圍保全大局李元度自衡州從軍以來
備嘗艱險百折不回上年臣丁憂回籍該員以孤軍支柱東路
屢能以少勝眾此次力保兩城較之上年之守貴溪厥功尤偉
可否籲懇

賞加按察使銜並

賞給勇號其平江各營可否擇尤保奏之處出自

天恩陣亡之把總易金榜李傳綸龔茂發張應龍外委龔拱綸
八品職銜監生李家純監生黃查請

旨飭部照各該員本職從優議卹以獎忠義而勵將來所有廣
豐玉山兩城力戰解圍各緣由理合恭摺由驛六百里具奏伏
乞

皇上聖鑒訓示施行謹

奏

遵

旨移師援閩摺

咸豐八年八月十二日

奏爲遵

旨移師援閩擬從崇安進剿敬陳現在賊情軍勢恭摺奏祈

聖鑒事竊

臣

自六月十六日長沙拜摺後旋於二十四日行抵

武昌與督

臣

官文撫

臣

胡林翼籌商轉運事宜七月初四日抵

蕪水縣屬之蘭溪晤巡撫銜浙江布政使

臣

李續賓商調所部

總兵銜副將朱品隆前營湘勇五百名副將唐義訓強字營湘

勇五百名隨同援剿十二日抵湖口縣與福建水師提督楊載

福布政使銜廣東惠潮嘉道彭玉麟定議於該處設立轉運局

臣在湖口患病四日二十一日行至南昌與江西撫

臣

耆齡籌

商進剿機宜二十三日疊據廣信探報偽楊國宗帶大股賊數萬從福建浦城竄出二度關圍攻廣豐玉山二縣廣信各屬戒嚴臣卽於二十四日起程馳援東路途次承准軍機大臣字寄七月初十日奉

上諭本日據和春何桂清趙德轍奏福建情形危迫請飭會國藩改道馳援一摺前因浙江軍務緊急諭令會國藩赴浙剿辦現在衢州業已解圍處州等府縣亦相繼克復境內餘匪不難剋日肅清惟閩省浦城崇安建陽松溪政和等處賊勢蔓延亟應趕緊剿辦和春等現飭總兵周天培於援浙兵勇內挑選精銳三千數百名由龍泉一帶進剿饒廷選帶漳州兵勇亦馳往

浦城曾國藩業已奏報起程著卽以援浙之師由江西鉛山直
搗崇安相機進剿迅將閩省各匪一律掃除毋少延悞曾國藩
赴浙援剿所需軍餉著官文等仍遵前旨由湖南北按月籌銀
各二萬兩解赴曾國藩軍營以資接濟將此由六百里各諭令
知之欽此旋接准部咨七月二十日內閣奉

上諭和春奏浙江軍務平定請旨可否毋庸赴浙等語浙江被
陷郡縣經周天受督兵先後克復全境漸就肅清和春著毋庸
前赴浙江總兵李定泰前令幫辦和春軍務此時周天受等會
剿竄閩各匪著總歸曾國藩調度曾國藩未到以前卽歸慶端
調度欽此又七月二十二日內閣奉

上諭周天受奏浙江軍務將次完竣擬卽帶兵前往福建助剿等語署福建漳州鎮總兵周天受著加恩賞還提督銜卽著馳往福建與周天培饒廷選張騰蛟等分路進剿俟前任侍郎曾國藩到後卽歸曾國藩調度欽此伏思浙境旣已肅清其自浦城竄犯廣豐玉山之僞國宗楊逆復經官軍擊敗竄往德興婺源一路而去臣同日另摺具奏其現擾閩境者疊據探報僞翼王石達開尙屯踞崇安縣境之星村黎源一帶地方及建邵各屬總兵周天培等已入浦城又據九江道沈葆楨候選道李元度稟稱訊據賊供僞國宗楊輔清與石逆共帶賊黨十餘萬楊逆先踞浦城石逆自衢處敗竄入閩窺犯延建等郡本年五月

內楊逆仍假楊秀清僞號自稱東殿石逆妒之互相仇殺楊逆遂帶賊六七萬棄浦城而出犯擾廣豐玉山分道而馳石逆尙有七八萬眾盤踞閩省各屬未能測其所向各等語臣於八月初八日行抵河口鎮前奉

諭旨飭調之張運蘭蕭啟江兩軍及臣在湖南帶出之吳國佐一軍在湖北撥出之朱品隆等一軍均已陸續到鎮惟道員蕭啟江前經奏明給假兩月目下尙未回營伏查賊渠以石逆爲最悍其誑煽莠民張大聲勢亦以石逆爲最譎臣謹遵

諭旨卽日親督兵勇由鉛山入分水關直搗崇安由崇安而東北可出小關仙霞嶺仍趨廣豐玉山一路以達於皖境由崇安

而南約有三路東路出建陽葉坊以至延平府西路出光澤龍湖以至建甯縣中路出麻沙挈口而至將樂則可達於汀州而遁入廣東矣現在署督臣慶端駐紮延平東路當可無虞西路各境在在與江西毗連現經撫臣耆齡調派布政使銜江西候補道劉長佑一軍由撫州移防新城瀘溪嚴扼杉關等隘口或無回竄江西之慮其或北歸皖省併入賊黨南回廣東仍返老巢均在意中目前未與接仗不能遽測其所之俟抵崇安後探確賊蹤再行縷晰具奏所有遵

旨援聞卽由崇安進兵並現在賊情軍勢恭摺由驛六百里馳奏伏乞

皇上聖鑒訓示遵行謹

奏

硃批覽奏均悉欽此

調李瀚章來江西片

咸豐八年八月十二日

再湖南補用知府李瀚章向在臣國藩軍營綜理糧台內方正而外圓適辦事結實周詳甚屬得力咸豐五年該員聞訃丁憂經臣國藩附片奏留迨六年十二月裁撤糧台歸併江西省局該員懇請回籍守制臣國藩給咨令其回廬州原籍旋聞安徽撫臣奏請留辦團防捐務七年十二月臣國藩奏明彙辦歷年報銷李瀚章經手最久應飭該員入局核辦欽奉

諭旨飭部議准在案臣糧台前後委員及一切文案多存於湖口水營舟次李瀚章文卷尙存江西省城相應請

旨飭下安徽撫臣卽飭該員迅來湖口水營設立總局辦理報
銷事件俟事竣後令李瀚章仍回安徽卽畱於臣續賓營中幫
辦軍務該員於軍情地勢均所熟悉臣等二人皆得藉收臂指
之效理合附片陳明伏乞
聖鑒施行謹

奏

調諭吉三隨營片

咸豐八年八月十二日

再湖北漢陽營中軍守備儘先游擊喻吉三前經廣西撫臣勞崇光奏調赴粵管帶水師該游擊於咸豐四五等年曾在臣營充當水師哨官本年六月臣至長沙該游擊前來謁見據稱廣西水師早已招募成軍由道員蔣益澧派員管帶業著成效可無須該員前往等語臣以此次援浙尙擬派設水師以保錢塘江之險該員原係水師出身兼係臣之舊部可期得力遂與湖南撫臣商酌札調該游擊隨營聽候差遣理合附片陳明請旨飭下兵部查照辦理謹

奏

硃批知道了兵部知道欽此

奏和卷一

三批

設立轉運糧台片

咸豐八年八月十二日

再臣軍除湖口設立轉運局外目下由江入閩自應於廣信府城鉛山縣城設立糧台遴委大員總司其事以便轉運米糧軍火等件查九江道沈葆楨現在駐防廣信臣已劄委兼理臣軍糧台所有兩湖江西協濟之餉銀軍火均由該道派員轉解又查有運司銜前湖北荆宜施道雷維翰前因告病開缺病痊請咨後旋丁父憂該道籍隸鉛山與閩屬崇安光澤等縣毗連人地均所熟悉現聞崇安等縣搬掠一空米鹽均無購處擬由廣信採辦米石油鹽運至鉛山起岸由該道督同地方官委解赴營源源接濟又候選道李元度在玉山貴溪一帶防守兩年於

閩浙地勢阨塞皆所洞悉該道員自衡州以來從臣最久臣由鉛山進剿已札調該道酌帶平江勇一營隨臣赴閩卽令綜理營務處事件其餘平江勇各營并交九江道沈葆楨接管畱防廣信等處又候選知府王勳係已故道員王鑫之胞兄向在王鑫軍營兄弟協力所向有功臣在長沙已札調王勳來營與李元度會辦營務處所有遴員總理廣信鉛山糧台及辦理營務處各緣由理合附片奏

聞伏乞

皇上聖鑒謹

奏

攻克安仁縣城摺

咸豐八年八月二十四日

奏爲聞賊分股回竄江西擾入瀘溪金谿屯踞安仁官軍移師截剿攻克安仁縣城恭摺奏祈

聖鑒事竊臣軍改道援閩擬由崇安進剿業於本月十二日在河口鎮馳奏在案拜摺後正在料理成行疊接探稟邵武光澤之匪分股萬餘人竄出鐵牛關直犯瀘溪時候補道劉長佑分軍防守瀘界初七日迎擊獲勝以追剿過遠另股賊乘空撲營遂至失利該逆擾入瀘溪初九日竄入金谿十一二等日分擾許灣鄧家埠一帶十三日竄入安仁撫建饒廣處處戒嚴臣以江西腹地并臣軍後路所關必須先行掃蕩方可入閩爰於十

四日飭調道員張運蘭率老湘營自河口拔營往剿臣亦於十五日移駐弋陽以便調度張運蘭等行抵貴溪探報該逆將趨萬年樂平歸併皖南卽與候選知府王文瑞分爲兩支橫截樂萬去路賊遂折回安仁踞城抗拒臣於十七日加派主簿吳國佐帶義字營由弋陽馳往策應并調平江營戰船及水師濟勝軍扼截安仁河面使賊不能南渡十九日卯刻張運蘭等折赴安仁行抵青山鋪命老湘營一二旂伏山之右副湘營吉左營伏山之左自率六旂及侍勇出中路誘賊該逆登陴堅守另以悍賊數千埋伏城外見官軍無多徑犯中路張運蘭鳴鼓爲號伏兵從左右殺出適王文瑞帶隊分三路馳至我軍力戰呼聲

震天該逆敗退入城張運蘭等跟蹤追進藍翎千總擬保守備
周玉田暨外委李益和文春陽首先入城死之逆黨閉關抗禦
矢石如雨各勇遂從兩旁攀堞而登縱火先燒民房以斷街道
水師戰船自南面轟擊該逆無路可逃城內伏尸山積約斃四
千餘賊餘黨奪路狂奔張運蘭等復出東北門分路追殺又斃
賊約二千人溺斃千餘水師轟斃數百生擒一百七十六名奪
偽印二十顆偽官照十一張騾馬百餘匹繡袍繡帽旂幟軍械
之屬數千件內有繡龍紅呢轎一乘爲向來所未見吳國佐一
支因繞道包抄於城破後數刻始到次日仍分路奮追王文瑞
等追二十餘里殪賊無算吳國佐追至萬年境內尙未收隊此

十九日攻克安仁縣城之實在情形也臣查該逆自閩竄出牽制我軍後路往來飄忽幸獲殲除訊據賊供此股人數萬餘係石逆前隊僞經略楊在田所帶逃去者不過二三千名等語惟石逆是否尚在閩境未得確探如無另股竄出臣擬改道由瀘溪入雲際關至光澤進剿延邵各屬惟聞景德鎮尙有大股果否內竄撫建尙未可知臣當專視悍賊所在以定趨向按察使銜卽選道張運蘭從前路兜截遲速攻剿皆合機宜可否賞加勇號候選知府王文瑞可否以道員歸部儘先選用水陸各營出力員弁兵勇可否擇尤保獎之處出自

天恩陣亡擬保守備監劄千總周玉田請照守備陣亡例

飭部議卹以慰忠魂所有官軍移師回剿攻克安仁縣城緣由
謹會同江西撫臣覺羅耆齡恭摺由驛六百里具奏伏乞
皇上聖鑒訓示施行謹

奏

孝和卷一

劉本傑陣亡請卹片

咸豐八年八月二十四日

正繕摺間接據吳國佐稟報十九日追剿敗賊二十日進紮中
村地方二十一日行七十里追過萬年未及午餐正與賊遇各
弁勇奮擊殺賊百餘名適另股接應賊至我軍深入過遠被賊
包抄傷亡五六十人幫辦劉本傑手刃數賊力竭而亡吳國佐
力戰斷後該逆不敢回追仍竄樂平景德鎮而去等語查同知
銜卽選知縣劉本傑屢立戰功此次追賊過猛死事最烈合無
仰懇

天恩准照同知陣亡例

飭部議卹以慰忠魂理合附片奏

聞伏乞

聖鑒謹

奏

胡兼善病故請卹片

咸豐八年八月二十四日

再花翎候選同知胡兼善前年自桂東募勇攻剿龍泉設計克復縣城後隨已故道員王鑫轉戰吉安撫州之間又隨候選道張運蘭防守吉水克復建昌及樂安各府縣城池先後百餘戰所向有功本年七月內以積勞兼受暑濕致患瘡疾八月初九日在軍營病故該員年甫二十五歲膽識俱優方冀更加歷練爲

國家有用之才遽以病終可爲憫惜查該員於克復建昌樂安各府縣案內經張運蘭稟保以知府選用可否仰懇天恩准照知府軍營病故例議卹之處出自逾格

鴻慈謹附片具奏伏乞

聖鑒施行謹

奏

請四川協餉片

咸豐八年八月二十四日

再臣現調各軍計額勇一萬二千人每月口糧及各員弁薪水除兩湖各協濟二萬兩江西奏明接濟蕭啟江添募之營餉銀一萬七千餘兩外尙不敷銀二萬餘兩而臣弟曾國荃克復吉安現擬酌調之營尙不在此數中間浙皆被擾之區難期饋餉合無仰懇

皇上天恩敕下四川督

臣

王慶雲按月協解

臣

軍銀二萬兩由

蜀江運至湖北轉解前進以期無誤軍行目下江西全省肅清

數月後如可就近籌濟

臣

卽飛函告知四川督

臣

止其續解謹

附片具

奏伏乞

皇上聖鑒施行謹

奏請

旨

移師由杉關入閩摺

咸豐八年九月十三日

奏爲閩賊大股回竄江西新城官軍移師建昌由杉關入閩恭摺奏祈

聖鑒事竊臣軍回剿安仁竄賊克復縣城擬改道由雲際關入閩業於八月二十四日在弋陽縣馳奏在案拜摺後於二十七日拔營二十九日行抵雙港節據探報閩賊大股三萬餘人回竄新城道員劉長佑扼守隘口連日苦戰雖疊獲勝仗而該逆愈來愈多更番猛撲又吉安城中八月初十夜乘大陣衝出追殺未盡之賊尙餘數百人沿途裹脅復聚至千餘人連陷崇仁宜黃兩縣令殉難撫建各屬處處戒嚴臣以撫建兩城收復未

久民心易於動搖劉長佑一軍兵力本不甚厚其分防瀘溪各營曾於八月失利堵禦閩賊大股已慮難以支持復聞崇宜之警尤恐軍心不固民間喧傳石逆全股希圖回竄南城等縣飛書請援張運蘭亦稟請先救新城臣遂令張運蘭率所部兼程馳進臣亦改道南行回顧建昌途次接准江西撫臣咨開八月十四日奉

上諭崇安之賊竄出岑陽關現在鉛山河口處處戒嚴石逆又有竄往建甯爲回竄撫建之計是江西軍情亦形喫重曾國藩已於七月二十一日行抵江西省城其前部蕭啟江之兵已至廣信著耆齡飛咨曾國藩飭令該道亟籌堵剿該侍郎迅卽前

進探明賊勢趨向何處卽往策應是爲至要欽此石逆窺伺撫建之說遂已上達

宸聽

聖天子明見萬里無微不照臣督隊趨行初七日馳抵金谿聞劉長佑大獲勝仗自八月十九至九月初五等日竭力痛剿殲擒之賊不下二萬人奪獲騾馬至五百餘匹賊仍由建甯一帶竄去接見各團紳民無不稱爲奇捷鼓舞歡欣現建昌邊界均已肅清崇仁宜黃之賊亦由南豐竄入閩境臣於初九日抵建昌府城擬將撫建甯都各府州防剿事宜咨商江西撫臣妥爲布置卽率師由杉關入閩除劉長佑堵剿獲勝情形應由江西

撫臣奏報外所有臣移師建昌改從杉關入閩緣由恭摺由驛
五百里具奏伏乞

皇上聖鑒訓示施行謹

奏

調派官軍分道入閩摺 咸豐八年十月十六日

奏爲調派官軍分道入閩現在辦理情形恭摺奏祈

聖鑒事竊臣移師建昌改由杉關入閩業於九月十三日在建

昌馳奏在案十四日札派張運蘭一軍向杉關進剿順昌將樂

之賊派蕭啟江一軍向廣昌進剿汀州甯化之賊派吳國佐一

軍赴南豐廣昌石城一帶擇要駐紮以爲蕭啟江後路策應分

派已定值大雨經旬勇夫多病二十四日張運蘭始能拔營蕭

啟江前經奏明給假回籍二十四日馳抵建昌卽於二十七

兩日分起拔營吳國佐二十六日拔營疊接閩省函咨洋口順

昌先後克復順昌將樂尙有餘匪未淨大股賊勢併注汀州分

擾甯化及江西之瑞金等縣據蕭啟江稟稱汀州甯瑞一府兩縣賊勢浩大復有千刀會匪盤踞石城縣屬之迴龍砦臣批飭蕭啟江先將石城會匪剿滅再行進攻瑞金俟江境一律肅清然後進規汀州甯化適准閩浙督臣王懿德緘商請派勁旅由邵武赴援汀州並另撥一旅堵賊由汀回竄瑞金石城之路與微臣意見不謀而合查江閩交界中隔大嶺北自仙霞南至武平一嶺綿亙殆逾千里大關小隘處處可通現派張運蘭由北度嶺蕭啟江由南度嶺中間泰甯南豐等處尙覺空虛該逆仍可伺隙回竄而二年以來賊匪往返蹂躪嶺內如建昌各屬嶺外如邵汀各屬邑井蕭條百物蕩盡今歲疾疫流行居民鮮少

閩中田荒米貴油鹽無從購買且無現錢可換臣駐紮建昌一
面防中路回竄之賊一面轉運錢米等件解赴蕭啟江張運蘭
兩處計臣一軍分爲三起臣距蕭啟江四百餘里距張運蘭三
百餘里而蕭張相距亦在五百里外擬俟張運蘭將順昌將樂
賊匪搜剿淨盡歸併汀州一路臣亦率後隊繼進三軍先分後
合庶無此剿彼竄之虞是否有當伏求

聖慈指授機宜所有調派官軍分道入閩緣由理合恭摺由驛
五百里具奏伏乞

皇上聖鑒訓示施行謹

奏

卷之四

四

四

各營患病情形片

咸豐八年十月十六日

再現在建昌甯都各屬疾疫流行爲從來所未見張運蘭一軍
前拔營之時留八百人在建昌養病啟行之後又續病三百餘
人蕭啟江一軍據開單稟報病者一千三百五十六人吳國佐
一軍病者亦不下八百餘人軍行數日長夫病困鍋帳子藥沿
途拋棄輒遺勇丁回昇病者兼拾棄物以此節節遲延實深焦
灼蕭啟江張運蘭等平日忠勇奮迅最爲出力苟可勉強趲行
斷非肯託故逗留者臣亦不忍催之又道員劉長佑一軍駐守
新城本擬調赴建昌俾臣得以督隊入閩無後顧之慮而該營
積勞過深患病尤眾幾於十人而九不復能以成軍據稟新城

無從覓取醫藥懇請移駐撫州稍資調理已批令暫行赴撫俟
病勢痊愈卽行回駐建昌所有各營患病情形理合附片陳明
伏乞

聖鑒謹

奏

移軍剿景德鎮股匪摺

咸豐八年十一月二十六日

奏爲分調官軍追剿閩省竄賊並移剿景德鎮股匪恭摺奏祈
聖鑒事竊臣抵建昌調派官軍分道入閩及各營患病情形業
於十月十六日恭摺馳奏在案拜摺後張運蘭一軍行抵邵武
府城節據稟稱順昌將樂業已無賊汀州甯化各城次第收復
惟連城尚有餘匪人數聞亦無多大股逆賊併趨江西之甯都
各屬等語接准閩浙督臣函咨大略相同又據蕭啟江及贛南
道汪報閩先後稟稱閩賊回竄江西者約分三起一起長髮係
石國宗統帶一起花旗大半皆南康萬安贛縣之匪係何先鋒
傅檢點統帶一起廣碼係羅都督盧檢點統帶先竄瑞金會昌

雩都等縣近則三縣皆已無賊盡竄信豐及南安府界中意在
窺伺贛州回竄廣東等語又據劉于潯彭玉麟先後稟稱景德
鎮官兵於十月二十八日失利鱖魚山營壘被陷賊氛日熾恐
其內犯廣信下游東流縣復陷恐其合景德鎮股匪再竄湖口
擾及九江各等語稟報到臣伏查臣現駐建昌東有福建連城
之賊南有信豐之賊北有景德鎮之賊以遠近言之去臣營皆
在五百里以外以緩急言之連城之賊其數尙少其勢已衰聞
事不足深慮信豐之賊或圖踞贛南或謀竄楚粵均屬可虞然
愈趨愈南愈去愈遠追逐不及尙有畏避官兵之意景德鎮之
賊無論東犯廣信西犯湖口皆爲莫大之患疊接湖廣督臣等

南客自三河敗潰安慶撤圍大江北岸業已防不勝防若使南岸彭澤湖口復有蹉跌則九江亦且岌岌可危就大局而論景德鎮情形又較重於南路江西撫臣耆齡亦兩次函咨商請撥兵往援適值汀州甯化肅清之後張運蘭自閩折回將赴甯贛臣因調之馳回建昌面商機宜卽日令其赴景德鎮與劉于濬會同勦辦縱不能助江北之勢但使保全饒州湖口卽於九江兩岸不無裨益其信豐南安之賊一面飛咨江西撫臣飭地方官認真防守一面札飭蕭啟江跟蹤緊追以冀痛加勦洗不留餘孽是否有當理合恭摺由驛五百里具奏伏乞
皇上聖鑒訓示施行謹

奏

肅啟江擒捕潮匪片 咸豐八年十一月二十六日

再前據肅啟江稟稱訪聞石城駐紮潮勇恃眾騷擾拆毀民房搶奪財物擄掠婦女無所不至並有暗通賊匪情事當經批令密察實情設法懲辦去後茲據稟該道行抵小松地方所接石城縣紳民控告潮勇荼毒呈詞不下數百紙詢據石城縣知縣張鎔所稟情形與各紳民所控大略相同并稱久思稟請究辦因恐激成事端是以未敢妄動肅啟江卽密諭各營戒備入城本擬誘致勇目誅治首惡數人其餘分別辦理不意官兵入城時潮勇隊目許朝金竟敢率黨持械抗拒官兵分門並入敗其前隊許朝金猶敢踞守縣前典鋪排列鎗礮刀矛轟擊格鬪鏖

戰經時始將典鋪攻破殲其凶黨生擒許朝金及潮勇四十七名搜獲賊旗多面並於辮髮中搜出太平天國暗號又於潮勇所住公館內查出被擄婦女幼孩百餘人隊目盧友道方赴鄉搶掠亦經團眾捆送到縣查潮勇通賊擾民種種不法均已確有實據地方紳民無不切齒痛恨許朝金盧友道應卽立正軍法以快人心除札飭遵照並令安撫居民搜捕土匪外理合附片陳明伏乞

聖鑒謹

奏

陳明石逆情形片

咸豐八年十一月二十六日

再逆首石達開狡悍爲諸賊之冠本年三四月間臣在本籍聞石逆率賊十餘萬竄擾浙江八月初間臣行抵河口聞石逆屯踞崇安之黎源星村一帶九月間又聞該逆回竄新城臣卽馳至建昌並將石逆蹤跡先後馳奏在案入冬以來察看入閩出閩之賊勢亂而無紀氣散而不整迥不似石逆往年情形又據擒獲賊探及賊中逃出之人所供賊目亦只有石國宗敦天燕何先鋒傅檢點羅都督盧檢點等名色無有知石逆所在者前此順昌洋口僉稱石逆在內近日瑞金信豐亦稱該逆在內皆係謠傳恟恍之詞或云該逆已伏冥誅或云中途薙髮潛逃二

說雖不甚確鑿然大約石逆不在此股賊內則事有可信謹附片陳明伏乞

聖鑒謹

奏

遵

旨斟酌具奏摺

咸豐八年十二月十一日

奏爲遵

旨覆奏仰祈

聖鑒事竊

臣

分調官軍追剿閩省竄賊並移剿景德鎮股匪業

將辦理情形於十一月二十六日恭摺馳奏在案二十八日承

准軍機大臣字寄十一月十一日奉

上諭駱秉章奏楚軍失利閩賊漸遠請飭曾國藩移師援皖一摺李續賓一軍進攻三河全軍失陷至今尙無下落都興阿圍攻安慶之師亦經撤回宿松一帶皖北賊勢鴟張楚省邊防喫緊諒曾國藩亦必有探報此時閩省之賊已南趨漳泉距江西

漸遠若照駱秉章所請令該侍郎移師赴皖而留蕭啟江所部
四千餘人防守江西亦未始非權衡緩急之計惟曾國藩所部
各軍多染疾疫前奏尙須休息且景德鎮尙有大股逆匪隨剿
隨進亦非計日可到著曾國藩預爲籌度如果閩省賊匪本省
兵勇足資剿辦而江西邊境防剿有人自以赴援皖省尤爲緊
要不但廬州省城可收南北夾攻之效卽上竄湖北之路亦可
藉資堵扼倘因汀州甯化等處尙須兵力一時不能移軍或須
俟景德鎮股匪殲除再回楚北亦著斟酌具奏將此由六百里
諭令知之欽此臣伏查近日賊勢以皖江南北兩岸爲最重皖
南約分兩路中隔大山如彭澤之浩山祁門之歷山績溪之鄣

山以及黃山九華皆此一山之所綿互自山以北如貴池銅陵下至蕪湖當塗濱江各屬自咸豐三年以來久爲粵匪出沒之區自山以南現惟婺源景德鎮兩處有賊兩處之賊不除則饒廣徽衢四府時時可危若能驅除兩處之賊逐出山外歸併江邊則江浙兩省防務皆鬆而皖南亦有一條鞭之勢辦理較易得手皖北約分兩路中隔一湖周圍四百餘里名曰焦湖自湖以南如安慶無爲巢縣和含各屬久爲粵匪盤據之所自湖以北如廬州鳳陽以及淮北各屬則粵匪與捻匪錯雜紛擾幾至汗漫而不可收拾前此都興阿之師由石牌進攻安慶勢趨湖南卽臣五年二月摺內所稱外一路者也李續賓之師由舒桐

進剿廬州勢趨湖北臣五年摺內所稱內一路者也自十月中旬三河桐城相繼挫敗安慶撤圍湘軍死者逾五千人士氣大傷逆氛日熾皖北賊勢之浩大實倍甚於皖南建十一月初將軍都興阿總兵鮑超屢獲勝仗湖廣督臣官文分派各軍防布要隘撫臣胡林翼聞警起復馳赴李續宜軍中重加整頓楚皖之交人心漸定而皖南白灣沚黃池之變戴文英鄧紹良先後殉難亦恐其悉力上竄合景德鎮之股匪擾及湖口窺伺九江以臣愚見論大局之輕重則宜併力江北以圖清中原論目前之緩急則宜先攻景德鎮以保全湖口臣於前月二十六日奏明後卽札張運蘭一軍於臘月初二日自建昌啟行馳剿景

德鎮計十四五可以接仗臣亦擬於正月初旬移駐鄱陽彭湖等處聯絡水師先固南岸屏蔽九江與宿松都興阿等營不過一江之隔百餘里之遙如果北岸有警亦可就近策應至諭旨垂詢閩省賊匪江西邊防一節查福建之汀州甯化次第收復僅連城有賊爲數無多臣前摺業經奏明本省兵力當足以資剿辦閩賊之回竄江西者臣前次奏明盡入信豐及南安府界中頃接稟報南安被圍信豐之賊亦尚未退蕭啟江所部病勇新愈臣已飭其迅速追剿將來此股賊匪或久擾南贛或分竄楚粵蕭啟江一軍或隨臣北行或留防南路應俟賊蹤既定相機調遣續行具奏所有遵

旨斟酌具奏緣由恭摺由驛五百里馳奏伏乞
皇上聖鑒訓示施行謹

奏

硃批覽奏均悉所擬尙屬妥協欽此

目疾請假片

咸豐八年十二月十一日

再臣自咸豐六年卽染目疾七年正月奏明在案兩載以來迄未全愈本年十月聞三河桐城之挫親友殉節者多大局頓壞憂鬱之餘目光愈蒙難於開視相應奏明懇

恩賞假一月卽在軍營調理伏乞

聖鑒謹

奏

卷之四

七

通籌全局請添練馬隊摺

咸豐九年正月十一日

奏爲遵

旨通籌全局並陳近日軍情仍請添練馬隊以圖進取恭摺奏

祈

聖鑒事竊臣前調蕭啟江一軍赴援贛南張運蘭一軍進攻景德鎮並遵

旨斟酌援皖事宜於十二月十一日恭摺馳奏在案嗣承准軍機大臣字寄咸豐八年十二月初八日奉

上諭王懿德奏請飭曾國藩暫緩移師留張運蘭一軍保衛閩境一摺曾國藩援閩之師前因所部兵勇多染疾疫暫駐建昌

調度徐圖拔隊繼進嗣值李續賓全軍失利皖北賊勢披猖經
駱秉章奏請飭令該侍郎移師援皖留蕭啟江所帶四千餘人
防守江西當經諭令曾國藩尙因汀州等處尙須兵力江西景
德鎮大股匪徒尙未盡殲未能卽日由楚入皖令其斟酌情形
具奏茲據王懿德奏接曾國藩咨稱擬率卽選道張運蘭等軍
赴楚剿辦該督以閩省賊熾兵單連城尙被占踞接壤之饒州
甯郡等府州紛紛告警專賴曾國藩大軍鎮定邊陲其前部張
運蘭一軍已抵邵武轄境正資協剿未可撤回所奏亦係實情
著曾國藩通籌大局如閩省賊匪猶賴援軍卽將張運蘭一軍
暫留攻剿與王懿德會商辦理至湖北防堵現已周備惟皖南

北粵捻鬪聚有須兵力而江西地方尙有大股賊匪該侍郎亦難舍近而圖遠仍著斟酌調度可也將此由六百里各諭令知之欽此臣才識短淺何足以規畫全局就近處數省而論則安徽軍務最爲喫重江西次之福建又次之皖南中界一山皖北中隔一湖兩路賊勢臣前疏已詳悉具奏近聞福建之賊尙踞連城江西之賊竄入南安贛州戒嚴定南崇義相繼失守以臣愚見連城之賊閩省兵力應足了之南贛之賊人數尙多悍者較少非一枝客軍所能猝辦必須本省兵力輔以團練方可徐起有功惟安徽賊黨其氛甚惡其患方長大凡官軍與賊此消則彼長彼消則此長斷無中立之理我能進而剿賊則賊將竭

力禦我不暇他竄我不能進而剿賊則賊將乘隙犯我旁出四
溢皖南無進剿之師則賊必東犯浙江皖北無進剿之師則賊
必北犯齊豫故就一隅觀之則江西之南贛福建之連城均是
賊黨均須兵力不可舍近而圖遠就全局觀之則兩利相形當
取其重兩害相形當取其輕又不得不舍小而圖大舍其枝葉
而圖其本根誠使大江兩岸各置重兵水陸三路鼓行東下剿
皖南則可分金陵之賊勢即可紓浙江之隱憂剿皖北則可分
廬州之賊勢即可紓山東河南之隱憂方今湖北全省肅清然
與皖境處處緊接防不勝防者莫如湖北據上游之勢能制皖
賊之死命者亦莫如湖北臣與官文胡林翼等熟商就現在之

兵力稍加恢廓北岸須添足馬步三萬人都興阿李續宜鮑超等任之中流現有水師萬餘人楊載福彭玉麟任之南岸須添足馬步二萬人臣率蕭啟江張運蘭等任之三道並進夾江而下幸而得手進占十里則賊蹙十里之勢進占百里則賊少百里之糧卽不甚得手而上游之勢旣重卽下游之賊不得不以全力禦我其於金陵廬州兩大營均足以抽釜底之薪而增車外之輔此遵

旨通籌全局宜併力大江兩岸之微意也至臣處近日軍情蕭啟江一軍自石城拔營南赴雩都據稟南贛各屬賊蹤蔓延力難兼顧臣批令專救贛州以保要郡不必旁顧他處張運蘭一

軍自臘月十七日馳抵景德鎮十九日吳國佐小挫一次二十
七日張運蘭大勝一次開仗情形由臣另摺具報贛州居江西
之極南景德鎮居江西之極北相距千有餘里臣駐建昌距兩
軍各五六百里調度不靈轉運不便且兩處皆孤軍深入賊眾
兵單日夜焦思無師可濟臣前次摺尾聲明蕭啟江之軍或留
防南路或隨臣北行容俟續行具奏近日詳加體察顧此則失
彼顧南則失北與其懸心兩地不若專力一方已咨商江西撫
臣耆齡請其另調勁軍以剿南贛兼辦團練以散脅從臣即專
辦北路調回蕭啟江一軍歸併饒州彭湖等處在江西則臣管
北邊耆齡管南邊在皖楚則臣攻南岸都興阿等攻北岸地有

分防斯責無旁貸師有定向斯士無二心免致到處牽掣一無
所成此臣處近日軍情擬調蕭啟江并赴北路之微意臣往
歲在軍未聞賊匪能用馬隊近聞粵匪常以馬隊衝鋒拾匪則
馬匹尤多李續賓三河之敗卽係賊馬數千爲湘軍向來所未
見昨吳國佐景德鎮之挫亦爲賊馬所眩今欲整頓陸軍不得
不添設馬隊東三省馬隊天下勁旅根本所在不敢多爲奏調
臣與湖北督臣撫臣緘商擬由官文等奏調察哈爾馬三千匹
請

旨飭上駟院押解來南潁毫一帶有善騎之勇可募名曰馬勇
應卽添練新馬隊二千餘騎與都興阿之舊隊相輔而行於九

江湖口等處擇平原曠野馳騁而操習之惟以南人而騎北馬以勇丁而學弓箭非倉卒所能奏效臣願竭數月之力朝夕講求從容訓練期於成熟而止練成之後以二千匹交江北隸都興阿舒保等麾下以五百匹交江南隸臣麾下以壯步軍之氣而寒賊黨之膽餘剩馬匹遊牧於黃州鞍轡等具設局於九江以備隨時添補更換之用仰仗

皇上威福茲事若成皖豫等省軍務可期大有起色此添置馬隊臣願自任教練之微意也溯自咸豐六年洪楊內亂河北肅清武漢再克臣方慶幸以爲大難計日可平不謂遷延歲月粵匪未靖捻匪復滋餉項有日竭不支之勢將士有久疲思退之

心若非奮發精神變換局面將有類乎古人所謂情氣歸氣者
不得不改弦更張亟思所以振之區區愚忱謹就近三省軍事
遵
旨通籌全局恭摺覆奏伏乞
皇上聖鑒逐條訓示施行謹
奏

卷之十

七

李續賓死事甚烈功績最多摺咸豐九年正月十一日

奏爲巡撫銜浙江藩司李續賓死事甚烈功績最多恭摺奏祈
聖鑒事竊臣於上年十月間皖北三河鎮官軍失利比念李續
賓剛烈性成必已見危致命惟相距過遠未悉其死事情形茲
據其胞弟李續宜稟稱李續賓自攻克潛太舒桐四縣後遵
旨進攻廬州因三河鎮爲舒廬衝要賊築僞城一座堅壘九座
九月二十八日進紮三河十月初二日親攻九壘下之適粵逆
陳玉成率大股賊自六合廬江來援捻逆張樂行率大股賊自
廬州來援眾十餘萬晝夜兼程直趨金牛鎮連營數十里鈔大
軍後路李續賓所部除留防九江及舒桐外隨征不過五千餘

人又攻壘血戰銳卒損傷過多遂飛調防兵策應未及至而賊已來逼初十日派隊迎擊金牛鎮戰樊家渡已獲全勝忽左路出賊數萬乘霧來鈔我軍迴戈返鬪前後受敵參將彭友勝游擊胡廷槐饒萬福等力戰死之餘皆截阻不能歸營李續賓自領親兵救應而僞城之賊復出與援賊相合我軍四面被圍初更時最後兩營李續燾彭祥瑞越壘衝出於是賊踞其壘斷我軍去路或勸以突圍退保無難再振李續賓曰某在軍前後數百戰每出隊卽不望生還今日固必死此有不願從死者請各爲計各員弁皆跪泣曰某等願從公以死報國不願去李續賓具衣冠望

闕叩首二鼓向盡怒馬直出赴悍賊林立處死之臣胞弟曾國華及何忠駿何裕王揆一李續藝吳立磬萬斛源等皆死之而副將李存漢道員孫守信運同丁銳義等猶督守孤壘以俟桐城援兵至十三日亥刻子藥水米俱盡孫守信等死之十九日賊攻桐城李存漢趙友財謝嗣湘李景均等死之桐城復陷凡湘軍員弁兵役隨李續賓死者近六千人十一月三河附近紳民從賊中覓得李續賓尸骸潛送霍山迎至黃州卽將返葬湘鄉各等情稟報到臣伏查李續賓戰績自咸豐三年赴援江西克復太和安福永興有江西湖南奏報四五兩年攻克岳州武漢廣信等處有臣國藩奏報六七八等年攻克武漢九江皖北

各處有官文胡林翼等奏報各在案此次死事之烈官文等必
詳奏請

卹惟

臣

與李續賓從事較久相知頗深有不得不瀆陳於

聖主之前者李續賓初援江西爲謝夢草營中幫辦嗣隨羅澤
南征勦各處循循弟子退然若無所知不自表異人亦未有以
異之逮岳州大橋之戰塔齊布獨稱湘勇白旗爲無敵賊亦深
畏白旗白旗者李續賓所部右營也旣而田家鎮之役以少勝
眾九江之敗士卒多逃散獨右營勇丁依依不去然後眾稱其
賢得士心矣猶復粥粥無能轉戰江西岳鄂之間經過州縣不
見一客稠人廣坐不發一語自楚軍之興人人皆以節烈相高

或淫臂自盟或歃血共誓慷慨陳詞預相要約李續賓獨默然
深藏初不預作激烈自許之言然忠果之色見於眉閒遠近上
下皆有以信其大節之不苟臣所立湘勇營制編隊立哨略仿
古法計事授精皆有定程行之既久各營時有變更惟李續賓
守法五年始終不變嘗謂臣曰立法者但求大段妥善行法者
當於小處彌縫臣初定湘營餉項稍示優裕原冀月有贏餘以
養將領之廉而作軍士之氣李續賓統營既多厯年已久節省
贏餘及廉俸至數萬金不寄家以自肥概留備軍中非常之需
咸豐六年冬曾寄銀五千兩於南昌濟臣糧台之急七年冬又
寄銀萬兩至吉安濟臣弟曾國荃一軍又寄三千兩至貴溪濟

李元度一軍此外贏餘銀兩亦皆量力濟人不忍他軍饑而已
軍獨飽往者故撫臣江忠源嘗論兵勇利病勇則畛域不分而
患其蹤跡無定此之所革彼之所收兵則尺籍有定而患其界
限太分勝不相讓敗不相救兵則規矩較肅而患無陷陣剛猛
之風勇則銳氣較新而患無上下等威之辨故用兵以和爲貴
用勇以嚴爲貴李續賓馭下極寬終年不見愠色而弁勇有罪
往往揮涕而手刃之甲寅十月在田家鎮斬退怯之勇臣奏牘
稱其有名將之風故刑人無多而歲久無敢弛慢至於臨陣之
際專以救敗爲務以顧全大局爲先遇賊則讓人禦其弱者而
自當其悍者分兵則以强者予人而攜弱者以自隨或攜隨數

次弱者漸強矣則又另帶新營以自隨江楚諸軍每言肯攜帶
弱兵肯臨陣救人者前惟塔齊布後惟李續賓此次三河之敗
亦由所部強兵分留湖北分撥臣處分防九江分駐桐城而多
攜弱者以自隨其仁厚在此其致敗亦未始不由乎此此軍民
所尤感泣不忘者也臣昔觀李續賓厚重少文百戰無挫私心
慰幸以爲可躋

中興福將之列不意大難未夷長城遽隕督臣官文等具奏請
卹想蒙

聖慈矜鑒臣與李續賓同縣姻戚不敢飾辭溢美亦不敢沒其
忠勳謹就夙昔所知瀆陳

宸聽伏乞

皇上聖鑒飭付

國史館查照施行謹

奏

曾國華殉難三河鎮摺

咸豐九年正月十一日

奏爲

臣

弟曾國華殉難三河鎮恭摺奏祈

聖鑒事

臣

自上年十月間皖北三河鎮之敗卽知

臣弟曾國

華同時殉難因道路遙遠傳聞鮮據專丁函詢李續宜及都興
阿鮑超等處又派人至舒城附近查訪旋接各路先後函稟三
河營壘於十月初十日被圍是夜二更後李續賓怒馬赴敵死
之臣弟曾國華與李續賓兒女姻親又謀人之軍義不可以獨
生亦衝騎赴賊中死之同幕諸客如何忠駿何裕王揆一李續
藝吳立蓉萬斛源等同時併殉惟孫守信復堅守兩日至十三
夜乃從容就義等情溯查咸豐五年十月翼賊石達開率眾由

湖北通城竄入江西勾結廣東匪徒周培春等自湖南茶陵州
竄入與石逆會於新昌縣連陷瑞臨袁州三府六年春又陷吉
安撫建三府臣所部諸軍羅澤南既先赴湖北周鳳山又敗於
樟樹鎮臣不得已率水師入援省城而令李元度陸軍進攻撫
州維時人心震驚道路梗阻楚軍不得通鄉書因募死士蠟丸
隱語回楚乞救賊亦懸賞購奸民捕殺湖南致書者無一倖免
臣幾有岌岌坐困之勢臣弟曾國華馳赴武昌乞師以救江西
經湖北撫臣胡林翼奏委國華統領普承堯吳坤修劉騰鴻各
軍赴援遂由咸甯蒲圻沿途迎勦取道萬載攻克新昌上高兩
月之閒連復六縣遂圍瑞州由是江西湖南始通音問而國華

積勞致疾就醫南昌與臣握手相見悲喜交集蓋以新募之眾
千里來援節節攻打摧江西十餘萬之賊鏖戰於酷暑烈日之
中艱險備嘗乃有此兄弟會晤之一日也病痊仍回瑞州督勦
七年正月臣赴瑞州與國華定計合圍掘長壕三十里斷賊接
濟二月丁父憂兄弟奔喪回籍厥後瑞城克復尙未變國華原
定之規模臣叔父曾驥雲無子以國華爲嗣八年二月降服期
滿四月李續賓調赴湖北奏明留營幫辦相與講求戎政晨夕
商酌國華性好讀史頗懷大志於古人艱危之境反復推究其
得失平昔持論過高臣恒誠之近日議論軍事漸歸於精細穩
實與李續賓兄弟意見多合十月初九日猶以家書寄臣稱援

賊鬻至各營意欲退保國華與主帥堅持不退二人謀合必不
爲眾說所搖等語豈料其發信之次日卽爲效命之秋而其堅
持不搖之計卽爲全軍併殉之機也七年五月閒欽奉
恩諭有曾國華帶勇援應一門忠義實深嘉尚之
褒跪讀之下感激涕零今幸臨危不苟仰副

聖慈捐糜以報

生成之德在門戶亦足增榮子弟得附忠義之林在臣心更復
何恨特以臣叔父年齒日高倚闥望切孤姪曾紀壽幼稚何依
臣六載軍中愆尤叢集卽手足私愛亦覺愧負良多建昌去舒
城千有餘里兵力不能遽及山川閒隔日月寢淹骸骨未收遺

恨難雪追思昔年若無國華援救臣無以至今日臣軍無以圖
倖全卽江西亦無以轉危爲安憫念微勞不忍不瀆陳於

聖主之前至於例得

卹典應由湖北督

臣撫臣

彙案具奏

臣不敢妄爲乞

恩伏祈

皇上聖鑒訓示施行謹

奏

孝和名

三

孝和名

孝和名

孝和名

孝和名

孝和名

孝和名

孝和名

孝和名

孝和名

孝和名

孝和名

調饒廷選來江片咸豐九年正月十一日

再臣前摺聲明擬於正月初旬移駐鄱陽彭湖等處比卽咨商江西撫臣耆齡撥兵來建昌換防頃准復函以贛南方棘無兵可撥欲臣暫駐建昌兼防閩賊內竄等語查南路防剿喫緊而連城一股經閩兵阻截難保不回竄江西且臣拔營北行去蕭啟江一軍愈遠聲息難通目下有不能遽行移營之勢自應暫留建昌相機辦理再查建昌甯都各屬別無防兵江閩交界千里空虛贛南鎮總兵饒廷選帶兵在閩前因患病未痊經督臣王懿德另派豫祺接統連城諸軍入春以來饒廷選病體當已漸愈該總兵係江省地方官曾奉

奏稿卷十
旨歸臣調度前守廣信衢州著有成效合無仰懇

天恩飭令饒廷選酌帶所部前來江西或駐紮甯都建昌或卽赴贛州本任應俟臨時酌奪臣與耆齡往返函商意見相合如

蒙

飭調則南路邊陲有備兼可爲閩境聲援所有臣軍暫緩移營及請調總兵來江各緣由理合附片陳明伏乞

皇上聖鑒謹

奏

謝年終 恩賞摺 咸豐九年二月初九日

奏爲恭謝

天恩事咸豐九年正月十三日臣在建昌軍中承准軍機處咨開十一月二十七日由

內交出年終

賞福字荷包銀錢銀鏢食物等項交兵部由驛馳遞等因到臣當卽恭設香案望

闕叩頭祇領臣犀渠謬典豹略多疏虛擲年華空糜歲廩神

馳

北極正殷戀

闕之忱春滿東郊忽荷自

天之寵

奎章曰麗瞻

義畫以迎祥

宸翰星輝備箕疇而

錫羨重以紫羅之佩益叨華袞之榮赤仄朱提傳

內府金刀之式黃封綠乳分尙方

玉食之珍疊沛

鴻施重同鼈戴

臣惟有勉驅駑駘迅掃狼烽以期仰答

高厚生成於萬一所有

微臣感激下忱理合繕摺叩謝

天恩伏乞

皇上聖鑒謹

奏

謝曾國華追贈優卹 恩摺 咸豐九年二月初九日

奏爲恭謝

天恩仰祈

聖鑒事竊臣弟曾國華上年十月初十日在三河鎮殉難情形

業經臣專摺奏陳在案昨准湖廣督臣官文恭錄咨會咸豐八

年十二月十八日奉

上諭候選同知曾國華著追贈道員照道員例從優議卹欽此

臣聞

命之下悲感難名伏念臣弟國華一介書生滿腔熱血鵲原急

難虎穴孤行爲畫救趙之謀曾作乞秦之舉轉戰千里連下六

城東道始通西江無恙乃長圍之甫合適銜恤以遄歸梓里言
旋筠州亦克嗣以降服期滿重赴皖營與李續賓共濟艱危誓
同患難逮三河之失利竟一蹶而偕亡田橫之客俱從先軫之
元未返幸邀

恩卹得備哀榮

贈秩監司延光苗裔魂招千里淚滴九泉昔荷一門忠義之
褒今叨百世馨香之典執干戈以衛

社稷聊攄自靖之忱聽鼓鼙而思將臣渥荷非常之

澤闔門銜感累葉增榮

臣仰沐

殊施愴懷同氣志不忘乎溝壑名已重於泰山在胞弟黃壤有

知敢忘結草銜環之報在微臣素餐無狀永矢卧薪嘗膽之誠

所有感激下忱理合繕摺附驛叩謝

天恩伏乞

皇上聖鑒謹

奏

卷之十

七

蕭啟江在南康勝仗摺

咸豐九年二月初九日

奏爲蕭啟江一軍在南康大捷攻克新城墟及池江等處賊巢
現在馳救信豐以期力解城圍恭摺奏祈

聖鑒事竊

臣

於上年十一月檄調蕭啟江由石城赴援贛州業

經奏明在案接據該道稟報本年正月初五日行抵贛州其時
南康喫緊兼署南安府周汝筠所帶各勇不敷堵剿遂於十六
日抵南康查探得前陷南安之賊一支爲僞翼府宰制陳亨容
傅忠信何名標一支爲僞渠帥蕭壽鎮蔡次賢一支爲僞尙書
周竹岐李遇隆一支爲僞軍略賴玉新黃玉發一支爲僞承宣
劉逸才張遂謀眾至七八萬希圖由南康直犯贛州在新城墟

地方築立僞城開壕列柵設望樓百餘座占踞村莊二十餘里其首逆則踞池江地方爲第二巢傳聞石達開尙在此路勢甚披猖十七日蕭啟江抵賢女埔因賊眾兵單可以智勝難以力取遂傳令偃旂息鼓商令管帶田勇之知縣周慶榕府經歷周慶夏等先行出隊誘賊楚軍設伏待之十八日出隊銜枚疾走埋伏赤石塘地方周慶榕帶田勇三千直逼新城墟誘賊出巢田勇者贛南團練按田派出之勇也賊素輕田勇鳴角出隊約六七萬人漫山遍野田勇開鎗數次佯敗誘之賊不虞楚軍之驟至也猛追七八里蕭啟江聲礮爲號伏兵四起先將去路截斷前營參將梁萬貴左營參將胡中和奇勝軍都司黎得盛由

左路截擊右營游擊毛治祺後營知府劉嶽昭新果營都司唐
星照由右路截擊蕭啟江率親兵及中營游擊秦華祝副果營
縣丞戴齡由中路迎擊賊見楚軍旂號天外飛來敗後丟棄軍
械狼狽就戮伏尸徧地煙燄迷天田勇亦乘勢截殺南岸之賊
該逆退過浮橋死拒胡中和梁萬貴率隊衝入正酣戰閒忽到
悍賊七八千旂色鮮明與前迥異我軍殊死戰賊又敗北追過
數里接應賊復至適我軍接應亦到追過新城墟十餘里踰麻
布隴至小溪界申刻分番收隊往返九十餘里除田勇斬獲不
計外楚軍斃賊二千餘名生擒二百一十名陣斬僞渠帥統戎
檢點慶天候指揮將軍之屬搜獲僞印四十二顆大小旂五百

零八面均解建昌老營此十八日大獲全勝攻克新城墟之實在情形也二十日蕭啟江進攻池江賊巢謀報賊數甚少恐有詭謀行過麻布隴列陣以待蕭啟江自率數騎登高瞭望知有賊伏傳令勿進正收隊閒田勇之在前者忽蜂擁奔回先是十八之勝田勇奪獲賊賊最多遂益放膽是日集者約四萬人與楚軍隊伍相閒雜田勇見賊即進被賊轟斃二人旋即返奔伏賊大起官軍隊伍爲田勇所亂該逆愈撲愈眾胡中和毛治祺劉嶽昭黎得盛唐星照梁萬貴秦華祝等力戰斷後鎗斃殺斃二百餘賊都司龍復勝把總洪復勝等戰死各路無兵接應退至麻布隴仍卓旗迴馬衝擊數次返追二里斃賊百餘名斬僞

官二騎賊始退奔是役斃賊三百有餘生擒十九名奪偽印二
顆我軍亦陣亡二百六十四名各將士憤欲再戰二十二日仍
出伏麻布隴沿河一帶而以二三旂誘賊賊竟不出僅出數百
人往來不定我軍奮迫生擒三人而返據供十八二十兩役賊
中死者逃者甚多蕭啟江等遂於二十四日再攻池江仍埋伏
小溪一帶誘賊竟無影響久之對岸村莊出四五千賊捲旂而
前我軍進擊轟斃多名田勇亦到賊黨奔逃我軍離營太遠遂
末窮追立將池江小溪鳳凰墟長江墟等處賊巢焚燬敗賊均
竄近南安府城一帶正欲跟追適接周汝筠函稟信豐被圍數
月軍米告竭岌岌可危不能不先其所急且信豐崇義未靖遽

以孤軍進逼南安亦虞後路鈔截蕭啟江遂飭周慶榕等嚴紮
新城墟要隘而潛率所部由龍迴一帶馳赴信豐西路總兵遮
克敦布現紮信豐北路紂定環攻冀可迅解城圍然後會合遮
克敦布進攻南安庶兵力厚而無牽綴之慮此二十日小挫二
十四日焚燬池江小溪鳳凰墟長江墟賊巢及現援信豐之實
在情形也據蕭啟江節次稟報前來臣查南安各屬賊勢浩大
經蕭啟江設伏制勝雖二十日小挫旋即鼓勇進攻該逆棄壘
遁逃其氣已奪惟信豐官民苦守圍城數月若不竭力救援何
以勸守土之吏且信豐崇義不能埽蕩亦未便孤軍深進臣現
批飭如稟辦理一俟解圍後會合遮克敦布再圖南安庶剿辦

更易得手所有陣亡之都司龍復勝藍翎把總洪復勝陶泰益
歐得勝朱源魯再高譚懷玉蕭清元把總謝明高藍翎外委涂
清貴外委張連陞余鳳山蕭品南李春元章隆泉謝仁四陳高
陞等十七員應請

飭部各照本職從優議卹以慰忠魂除飛咨湖南撫臣派兵從
郴桂各屬以剿爲堵合力夾擊外所有十八日大捷攻克新城
墟賊巢二十日小挫二十四日攻破池江等處賊巢及現援信
豐各緣由理合會同江西巡撫臣耆齡由驛六百里馳奏伏乞
皇上聖鑒訓示施行謹

奏

張運蘭攻剿景鎮情形摺

咸豐九年二月初九日

奏爲張運蘭一軍攻剿景德鎮小挫兩次大勝一次現仍守隘相持濟師助剿恭摺奏祈

聖鑒事竊上年十二月

臣

調張運蘭等進剿景鎮賊巢節經奏

明在案該道等於臘月十五日由樂平拔赴柳家灣探得鎮賊三四萬人與婺源賊相爲犄角其輜重屯集浮梁悍賊盡聚鎮上將各要路挖斷築卡開壕設望樓煙墩數十座近鎮之上李村下李村橫互二十里皆踞爲巢地勢散漫港汊紛歧進攻不易十九日道員王文瑞主簿吳國佐出隊由崖角嶺吳開嶺兩路進攻鎮之中路張運蘭由黃泥嶺雞腳嶺兩路進攻鎮之右

路派第五旂紫牛角嶺堵截鎮之左路行抵勝梅亭見左路老
鴉灘出賊千餘當卽迎擊敗之斃賊數十追至下李村騎賊復
出迎戰亦爲我軍所敗忽景鎮及上李村小港嘴回子墓各巢
之賊一擁皆出約二萬人下李村賊欲愈肆守備扶正元等力
戰死之王文瑞飛往接應擊殺數十賊賊甫敗退而小港嘴回
子墓兩股斜鈔將我軍圍困守備何長庚等戰死其時吳國佐
兩營爲老鴉灘伏賊所牽首尾不能相應張運蘭之營又相距
數里派援之吉左營正遇伏賊鏖戰守備李冠羣等死之賊遂
直撲王文瑞所占山岡都司朱寬義等力禦之迴合十數次併
力衝突殺賊數十名守備朱正魁等皆沒於陣幸吉左營接應

時已日暮賊亦不敢進逼二更收隊是日斃賊四五百名副湘
營陣亡四十八人義字營九十四人吉左營十二人緣各營均
出六成隊賊益十倍於我也自後雨雪泥濘賊不敢出二十七
日稍晴張運蘭預派第五旂紫牛角嶺六旂守湖角嶺吉左營
守崖角嶺王文瑞派隊會同團勇站立中左右三路高嶺賊至
則搖旗擊鼓以疑之布置定後張運蘭自率四旗從雞腳嶺進
攻上下李村隨分一旂專斷浮梁援賊約副湘營兩面包鈔行
抵李村該逆寂無聲響旋見白旗搖漾數十騎出站河岸我軍
渡河迎擊賊已飛遁良久寂然申刻收隊忽角聲四起回視則
賊隊已出萬餘四路來撲馬隊當先我軍轉隊列陣忽有賊目

奏和名

八騎涉水衝來中路勇礮擊一賊落馬眾起逐之八騎皆殪張
運蘭等遂乘勢分三路過河衝擊賊黨敗奔旋復回拒王文瑞
等包鈔截擊呼聲震天時第一旗已將浮梁援賊擊敗又從北
路橫截而來該逆棄械狂奔伏尸枕籍追至上下李村賊遂棄
巢而遁縱火焚巢追至鎮市時已昏黑雨雪交加傳令收隊是
日破上下李村二巢殲賊二千名解散脅從千餘名奪劈山礮
八尊陣斬僞指揮楊大鵬郭正雲張明萬僞東殿後營將軍李
正隴鄧見光陳金隴等尸邊搜出僞照自後我軍屢出賊不敢
動本年正月十一日復出六成隊進攻列隊河岸自辰至午對
面寂然惟墩台上烽煙四起浮梁來賊七八百鎮賊亦出千餘

倚山排陣馬隊隱約林間我軍知有埋伏申刻收隊忽接探報
是日大股賊圍犯道員劉于潯饒防各營旋忽退去始悟日中
舉火者調賊回鎮也劉于潯一軍距張運蘭等六七千里而張
運蘭派紮牛角嶺之第五旂人止三百名距老營又十六里是
日我軍趨鎮藉解饒防之圍而回鎮之賊必從牛角嶺下經過
竟以萬餘賊來撲嶺卡游擊王華國等出卡迎戰賊來益多遂
回卡堅拒王華國等血戰終夜被賊撲去營卡陣亡四十一人
張運蘭派第三旂往援已無及矣十二日辰刻加隊馳援將賊
擊退賊亦回鎮不敢再犯第三旂仍紮牛角嶺堅守原卡此十
二月十九日小挫二十七日大捷正月十一夜小挫之實在情

形也據張運蘭等稟報前來臣查鎮賊狡猾異常多而且悍避
我朝銳擊我情歸楚軍現紮柳灣人止四千有奇距鎮三十里
出隊六成進剿則眾寡主客勞逸飢飽之勢既已懸殊又爲地
勢所阻易進難退劉于濬一軍屢不得手與張運蘭等相隔太
遠呼應不靈而張運蘭王文瑞分紮要隘備多而力益分臣現
添派九江道沈葆楨所統之平江前營新中新左營由玉山赴
鎮又調祥字營由弋陽赴鎮助剿並批飭張運蘭等以靜待動
無庸遠出攻堅徒傷精銳除陣亡員弁現已片摺請
旨賜卹及劉于濬一軍應由江西撫臣耆齡奏報外所有楚軍
攻剿景德鎮情形恭摺由驛六百里馳奏伏乞

皇上聖鑒訓示施行謹
奏

卷之十

七

陣亡病故員弁彙案請卹摺 咸豐九年二月初九日

奏爲水陸各軍陣亡病故各員弁彙案奏請

恩卹以慰忠魂事竊照打仗陣亡及因傷身故軍營病故各員例應分別請

旨賜卹臣所部各軍除隨案請卹外其道員王文瑞之副湘營上年十二月十九日進攻景德鎮陣亡候補守備何長庚等十九名主簿吳國佐之義字營同日攻景德鎮陣亡藍翎都司張良清等八名積勞病故訓導黎宗銘一名道員張運蘭之老湘營上年八月十九日克復安仁陣亡外委李怡和等六名積勞病故遇缺知縣劉開昀等六名又上年十二月二十七日該營

及吉左營攻景德鎮陣亡藍翎都司朱華清等二十二名道員
蕭啟江之湘果營上年攻建昌陣亡都司黃日勝等二名積勞
病故花翎都司蕭啟淮等三名因傷病故藍翎外委徐萬春等
二名此皆現隸臣部下之營也至臣七年丁憂回籍水路死事
人員有漏未開報者其派往廬州之水師亦有陣亡未及議卹
者臣去年回營紛紛來營稟請自應一體補奏邀請

卹典以廣

皇仁謹彙案繕具清單籲懇

天恩飭部查照陣亡傷亡積勞病故例分別議卹以作士氣而
慰忠魂是否有當伏乞

皇上聖鑒訓示施行謹

奏

硃批均照所請分別議卹該部知道單併發欽此

奏和卷十

三

謝曾驥雲

賜封典

恩摺

咸豐九年二月十五日

奏爲恭謝

天恩仰祈

聖鑒事竊

臣弟曾國華在三河殉節經臣奏報後嗣准湖廣督

臣恭錄咨會蒙

恩優卹復經

臣於本年二月初九日專摺叩謝

天恩在案頃准兵部由驛遞回前摺欽奉

硃批另有旨咸豐九年正月二十六日內閣奉

上諭曾國藩奏伊弟曾國華殉難情形一摺候選同知曾國華

在三河鎮殉難當經降旨追贈道員從優議卹該故員歷著戰

功一門忠義著再加恩賞給伊父曾驥雲從二品封典以示褒嘉欽此臣伏讀之下感激涕零竊念臣第一介儒生捐軀報國荷蒙

溫諭頻頒

殊恩疊被既

贈監司之秩復膺

封典之榮存沒均沾哀感無既伏查臣胞叔曾驥雲道光三十

年正月二十七日恭遇

覃恩臣在侍郎任內加一級曾邀

賜封從一品榮祿大夫咸豐二年四月二十日恭遇

覃恩又以臣官加二級得晉

貤封正一品光祿大夫茲復仰蒙

錫類之仁特荷

褒嘉之典臣已肅具家書恭宣

諭旨誥軸則祇領

新綸謹拜此曰

九重之命頂戴則仍從舊秩不忘昔年兩次之

恩惟是

隆施稠疊報稱尤難臣惟有竭盡愚忠代臣弟彌未竟之憾代

臣叔抒向日之忱以期仰答

高厚生成於萬一所有微臣感激下忱理合專摺附驛叩謝

天恩伏乞

皇上聖鑒謹

奏

克復南安府城摺

咸豐九年二月十五日

奏爲蕭啟江一軍協同各勇攻克南安府城現仍馳援信豐恭摺奏祈

聖鑒事竊正月十八二十四等日蕭啟江等攻克新城墟池江一帶賊巢業經馳奏在案蕭啟江本擬由龍迴閒道先援信豐再圖合攻南安臣亦批飭令解信豐之圍以勸守土之吏矣因疊據生擒賊供該逆自疊次痛殲後退保南安極爲惶恐一夕數驚紛紛逃走等供蕭啟江等以機會既有可乘不若趁破竹之勢直取南安免致死灰復熾遂親率所部協同管帶田勇練勇之知縣周慶榕縣丞周慶夏等進紮青隴黃隴一帶地方會

攻郡城二十九日黃隴一路踞匪見官軍大至卽行逃竄追殺
十數名三十日出隊至三角嶺遙望城中煙焰迷天知賊中內
亂卽派營官朱桂秋黎得勝胡中和劉嶽昭梁萬貴督隊會同
練勇進攻東北兩門營官毛治祺秦華祝唐星照戴齡督隊會
同田勇攻剿城外各村賊館賊壘南安原係兩城北爲水城中
有一河之隔逆黨初猶抗拒見我軍銳氣百倍礮斃二百餘名
復梟水進攻北城該逆傾巢西竄且戰且奔我軍衝鋒過猛登
時陣亡七人受傷九人跟追數里聞各村角聲四起慮有埋伏
且時已申正遂收隊仍回黃隴餐宿戒勿入城二月初一探報
西北路烽火相連時有賊旗登山瞭望疑賊故空此城誘我深

入適大庾田勇旗長吳昌餘等在城外被擄我軍窺破賊謀且知城內米糧罄盡亦欲待賊入城再行圍剿是夜陶張兩逆首果率萬餘人回屯城內矣正籌剿閒而信豐告急之稟疊至欲赴援則南安功在垂成欲不赴則信豐萬分危急因定議初三日大舉攻剿期以一鼓下之是日已刻分數路進攻賊亦分路迎敵我軍鎗礮刀矛噴筒火箭同時並舉陣斬悍賊二三百名賊黨奔潰入城我軍跟蹤而入或攀堞而登轉瞬間東北兩門盡插官軍旂幟賊仍由西門奪路奔逃追擊二十里伏尸纍纍敗賊仍分兩路鼠竄一由浮江西坑一由義安內梁等處皆係往粵之路是日克復府城除田勇練勇斬獲不計外楚軍共斃

賊六百餘名生擒五十一名奪獲馬騾旂幟軍械無數我軍陣亡十八人蕭啟江克城後以信豐緊急隨於初五日冒雨親率所部取道龍迴赴援信邑並派奇勝軍都司黎得盛留勇八百人駐守南安會同周慶榕等搜捕餘匪一面飛移該管道府調集各勇堅守嚴防此二月初三克復南安並馳援信豐之實在情形也據蕭啟江稟報前來臣查南安被陷數月賊數十倍於官軍幸仗

聖主天威各將弁及團勇力戰用命自十八日埋伏取勝後該逆膽落氣沮屢次敗奔攻克郡城甚爲得手又據稟報崇義縣城亦於正月二十五日克復目下蕭啟江馳援信豐解圍後江

省南路可冀肅清除管帶練勇田勇之周慶榕及各官紳等應由撫臣耆齡奏報外其楚軍出力員弁兵勇合無仰懇

皇上天恩容臣擇尤保獎以昭激勵布政使銜卽選道蕭啟江久著戰功老成果毅緩急分合之際皆洽機宜可否

賞加勇號之處出自

鴻恩所有楚軍協同團勇克復南安緣由謹會同江西撫臣耆齡恭摺由驛六百里馳奏伏乞

皇上聖鑒訓示施行謹

奏

一

二

三

四

移駐撫州片 咸豐九年二月十五日

再去冬今春以來張運蘭一軍進攻景德鎮未甚得手並聞鎮賊日增將由樂平繞鈔官軍後路圖竄撫州查建昌僻在東隅駐建則不能兼顧撫州駐撫則可以屏蔽建昌正月下旬臣即擬移駐撫州因慮福建連城股匪內竄是以未便移軍昨准閩浙督臣來咨連城已於正月初十克復甯都建昌兩屬可無回竄之虞臣已於二月十二日移紮撫州相機調度撫郡距景德鎮較近即距蕭啟江南安一軍亦較建昌稍近南北兩路聲息易通除俟將景德鎮攻剿情形另摺奏報外所有臣軍移駐撫州緣由理合附片奏聞伏乞

皇上聖鑒謹

奏

曾國荃保升道銜知府謝 恩摺

咸豐九年二月二十八日

奏爲恭謝

天恩仰祈

聖鑒事

竊臣

接准湖南撫

臣

補行咨會克復吉安案內彙奏請

獎奉

上諭候選同知曾國荃著免選本班以知府儘先選用並賞加
道銜欽此竊念臣弟國荃一介書生未嫻軍旅前因咸豐六年
逆匪竄擾江西列郡淪陷其時袁州一路有湖南助剿之師瑞
州一路有湖北乞援之師而賊勢浩大南路空虛吉安一郡尤
上游必爭之地江省兵單未遑攻取國荃與前任吉安府知府

黃冕稟商湖南撫臣建義勸捐募勇親率進攻並經臣奏請空
白執照二千張籌捐濟餉是年十月師次吉安連復數縣七年
二月國荃丁憂回籍六月師復敗退經湖南撫臣嚴檄疊催墨
經復出進紮城下趨挖長壕經江西撫臣奏明總理全軍圍攻
兩載之久上年八月始克堅城仰仗

天威幸摧逆燄本屬因人而成事詎敢貪天以爲功迺蒙

懋賞特頒微勞必錄榮紆銀印忝居二千石之班秩晉冰銜渥
荷

九重天之賜

鴻慈逾格鼇戴曷勝臣弟國荃克吉後於十月內詣臣建昌大

營適聞三河之變臣弟國華死綏當卽馳赴鄂皖訪尋消息倉
皇歸里月前擬束裝來營又值逆匪竄擾郴桂湖南防勦喫緊
暫不及來臣惟有諠飭臣弟虔伸螳惻勉效驚驅切枕戈擊楫
之忱圖墜露輕塵之報以期仰答
高厚生成於萬一所有微臣感激下忱理合繕摺附驛叩謝
天恩伏乞

皇上聖鑒再前奉

恩旨後湖南撫臣漏未恭錄咨行經臣緘詢昨始補行咨會是
以拜摺稍遲合併聲明謹

奏

信豐解圍調蕭啟江援湖南摺

咸豐九年二月二十八日

奏爲蕭啟江一軍力解信豐城圍現在調赴吉安爲湖南援應

恭摺奏祈

聖鑒事竊蕭啟江等克復南安後旋即馳救信豐經臣於二月十五日奏報在案初七日該軍行抵離信豐二十里之大小窩地方查探得城內官民萬餘人糧食止支三日賊黨盡屯城外東門浮橋已被水衝惟吳家嶺浮橋斷而復續逆黨築壘吳家嶺及石子嶺一帶阻截援師蕭啟江約會總兵遮克敦布於初八日進攻傳令果後果右兩營從右路進果前果左兩營從左路進副果新果兩營從中路進蕭啟江自率中營接應商令遮

克敦布之飛虎勇署南安府周汝筠之練勇會同贛勇先行誘賊出巢楚軍偃旂息鼓以待先攻吳家嶺再攻北門辰刻賊果出隊抗拒營官劉嶽昭等由右路沿河而進悉力猛撲連破賊壘四座石子嶺之賊蜂擁來助又經左路胡中和率隊力戰梁萬貴由左路之右繼進是時戴齡唐星照已由中路直擣吳家嶺下蕭啟江見賊牆火起知已得手飛馳督勦正鏖戰間而吳家村忽出賊萬餘各執五色旗前來鈔截各營乘勝壓之直逼河岸紛紛投水浮尸蔽江賊正無路可逃忽大雨如注官軍鎗礮濕不能然窮寇拚命回撲北門外之賊一櫬回戈反鬪混戰一時斃賊數百我軍亦陣亡九十六人營官胡中和劉嶽昭戴

齡均受矛傷蕭啟江卓旗力禦賊始大奔雖因雨未及痛勦而賊已膽落矣初十日分八路進勦蕭啟江行至小溪橋見西北一帶火起知前隊已破賊營呼聲震山谷該逆奪渡奔逃各營併力追殺人馬死者無算城內兵勇亦乘勢出擊伏尸遍野遮克敦布一軍適當去路斬馘尤多楚軍斃賊二百餘名生擒二十八名敗賊悉往東路逃走此初八日鏖戰獲勝初十日力解城圍之實在情形也據蕭啟江等稟報前來臣查信豐被圍三月有餘力窮糧竭經蕭啟江等馳救會合遮克敦布等力戰解圍計楚軍八日之內克府城一解縣圍一死事至四百人之多尙屬踴躍用命除飛虎軍康勇顓勇及力守危城之信豐縣知

縣錢蘭等咨請江西撫臣查明保獎外其蕭啟江一軍可否由

臣併入南安克復案內保獎以示鼓勵陣亡之藍翎外委李先

益李楚文藍翎把總黃龍光外委劉文友均懇

天恩各照本職從優議卹以慰忠魂連日接據咨報南安之賊

竄入湖南連陷桂陽宜章興甯永興等縣及桂陽州頻年以來

楚軍出剿江西湖北廣西貴州安徽等省將士分布各路本省

空虛該逆乘隙竄入驟無應敵之師殊形喫緊臣已飛調蕭啟

江一軍馳赴吉安爲湖南援應如賊犯安仁茶陵一帶卽行橫

出截擊以免蔓延除飛咨湖南撫臣共籌防剿外所有蕭啟江

一軍力解信豐城圍及調赴吉安援應湖南各緣由謹會同江

西撫臣耆齡繕摺由驛五百里馳奏伏乞

皇上聖鑒訓示施行謹

奏

江西添濟月餉片

咸豐九年二月二十八日

再臣去臘因蕭啟江一軍援剿南贛張運蘭一軍攻剿景德鎮相去千有餘里臣在中路存營人數太少倉猝無以應敵因商江西南兩省添招兵勇三千餘人所需口糧卽在江西設法籌措江省欠餉纍纍且前次奏明協濟臣軍月餉一萬六千金本屬拮据萬分撫臣耆齡深惟大局共濟時艱昨准咨復自本年二月爲始再籌萬餘金照兩湖章程合成每月三萬兩之數而所需鎗礮子藥仍於江省隨時取給臣軍藉免空乏之虞得以專力勦辦足慰

宸厯理合附片奏

聞伏乞

皇上聖鑒謹

奏

謝曾紀壽及歲引 見恩摺 咸豐九年三月二十六日

奏爲恭謝

天恩仰祈

聖鑒事本年三月初八日准兵部火票遞回

臣謝

恩前摺奉

硃批另有旨欽此同日並准遞到咸豐九年二月二十六日內

閣奉

上諭前因曾國藩奏伊弟曾國華殉難情形當降旨賞給曾國華之父曾驥雲從二品封典本日曾國藩謝恩摺內聲明曾驥雲曾邀賄封正一品封典等語所有曾國華之子曾紀壽著再

加恩俟及歲時由吏部帶領引見以示朕褒獎忠節有加無已之至意欽此

臣聞

命之餘感激無措竊臣弟國華一身就義闔室銘

恩既邀

錫類之仁復蒙延世之

賞臣姪曾紀壽年甫數歲卽荷

溫綸地望未崇敢冀重申之

命天官引對忝居任子之班計舞象舞勺之匪遙仰爲龍爲光以在望羽林逐隊託餘蔭於孤露之中角卬趨

朝瞻

天威於五雲之上在

聖世褒崇忠節古今無以比其隆在臣家感戴

鴻施存沒均不知所報臣惟有教督臣姪敦品讀書厲名砥節

修文兼以肄武全孝卽以盡忠庶期仰答

高厚鴻慈於萬一所有微臣感激下忱理合專摺附驛叩謝

天恩伏乞

皇上聖鑒謹

奏

麥和卷一

二

景鎮官軍攻勦情形摺

咸豐九年三月二十六日

奏爲景德鎮官軍兩月以來攻勦情形恭摺奏祈

聖鑒事竊張運蘭等進攻景德鎮本年正月二十三日以前接
仗各情形業經馳奏在案二十八日各營約會進攻道員王文
瑞率副湘營出右路黃泥嶺堵禦浮梁援賊張運蘭率親兵及
平江前營由中路雞腳嶺進而以五旂出中路之右四旂出中
路之左並派三旂六旂及吉左營平江新左營協同樂平各局
團勇分守要隘以爲接應已刻抵鎮該逆堅閉不出我軍過河
燒燬望樓二座並焚李村民房賊黨分支出撲各軍亦分途迎
擊迴合十餘次轟斃百餘名吉左新左等營均出隘夾擊其時

浮梁援賊復經王文瑞等擊退自午至酉鏖戰竟日收隊忽另
殷悍賊萬餘從栗樹山後面橫截歸路馬隊尤多我軍苦戰之
後忽遇新賊路隘不能施展雖更番奮擊殺賊三百餘名而老
湘營亦陣亡二百三十八人副湘營十人平江前營二十八人
團勇十五人長夫十三人游擊喻福慶等弁力竭陣亡幫辦王
開琳等因歸途擁遏遂繞道從湘湖街回營臣以景鎮地勢崎
嶇難打行仗且自去冬皖北失利湘勇之士氣未復此次損傷
三百皆係銳卒遂批飭張運蘭等少爲休息堅守隘口賊來則
與決戰無庸輕出進攻庶致賊而不爲賊所致自後賊亦伏巢
不出二月二十四日賊見湖角嶺要隘止紮祥字一營距張運

蘭老營十餘里遂出隊陽攻各隘牽制官軍而以馬步隊萬餘人直撲祥字營守備劉勝祥竭力堅守張運蘭飛飭游擊朱紹輝文恆久馳往救應另派游擊楊虎臣都司張廣勝等截剿湖湘街援賊王文瑞及平江前營彭大壽新中營吳盡臣均出隊援剿其時吉左營都司朱寬義副將陳品南平江新左營張詩華已從牛角嶺鈔擊賊後樂平團勇亦至當殪大旂賊目二名先鋒悍賊十餘名逆燄頗挫劉勝祥見援兵齊集卽出營奮擊陣斬僞官六名奪僞印二顆僞照四張殺斃轟斃二百餘名該逆棄械狂奔自此軍威仍振三月十三日張運蘭等以各營休息月餘可試決戰遂分三支出隊進攻卯刻行近景鎮賊在望

臺舉烽副將黃萬友等將望臺焚燬伏賊四起張廣勝及游擊劉松山等迎擊大路之賊楊虎臣截擊浮梁援賊同知劉生璫往來策應陳品南朱紹輝等搜截栗樹山伏賊三路得手計斃賊百餘名斬賊曰二名日暮收隊十六夜鎮賊忽舉火焚屋執炬北行偽作宵遁之勢旋即折回埋伏黎明時張運蘭王文瑞督隊往追一面查探虛實查悉該逆狡詐之謀嚴陣以待祥字營直入街口伏賊盡起酣戰逾時千總易執圭戰歿張運蘭等整隊接應賊雖數倍亦不敢來撲未刻大雨遂各收隊此正月二十八日二月二十四日三月十三十七等日攻勦景鎮之實在情形也據張運蘭等稟報前來臣查鎮賊狡悍而多地勢散

漫張運蘭等各營分紮要路延袤二三十里距劉于潯饒防各軍較遠中隔一江兩難救應楚軍抵鎮後損折六百餘人眾寡懸殊難遽得手南安克復後本擬調蕭啟江一軍從浮梁夾擊又因郴桂告陷回援湖南目下情形止得扼要嚴防觀隙而動藍翎游擊喻福慶藍翎都司易福陞等五十二員名先後力戰捐軀深堪憫惻謹另繕清單籲懇

天恩俯准各照本職從優

賜卹以慰忠魂除劉于潯一軍應由江西撫臣詳晰奏報外所有兩月以來攻勦景德鎮各情形理合恭摺由驛五百里馳奏伏乞

皇上聖鑒訓示施行謹
奏


新募楚軍來撫州教練片 咸豐九年三月二十六日

再臣正月間因蕭啟江張運蘭兩軍相距太遠老營空虛又有進規皖南之議遂行添募兵勇於上次奏明在案茲據總兵銜竹山協副將朱品隆游擊喻吉三五品銜知縣張岳齡同知銜布政司經歷凌蔭廷等共募南勇三千五百餘人均經陸續成軍其游擊彭山岷回南挑募之營兵四百勇二百及道員王勳添募之湘勇五百則均經湖北撫臣咨留協助本省防務所有新募各營現皆隨臣駐紮撫州親加教練目下賊擾湖南蔓延郴桂蕭啟江一軍已由吉安馳抵茶陵一帶江省吉袁各屬壤地毗連均須預防回竄是南路之賊情較北路之景鎮其喫緊

正復相等一俟湖南賊勢稍鬆卽當調派各營協攻景德鎮理合附片奏

聞伏乞

聖鑒訓示再自婺源賊竄陷建德後知府劉騰鶴進剿陣亡彭湖均甚喫重臣已派候選知府屈蟠帶領平江老中營千人自撫州馳赴湖口協防合并陳明謹奏



PL
2728
A1
1876
v. 12

曾文正公奏稿

卷之十一目錄



添兵助剿景德鎮摺

咸豐九年五月二十六日

調饒廷選防廣信片

李鴻章留營襄辦片

陳明服闋日期片

覆陳防蜀緩急摺

六月十八日

攻克景德鎮及浮梁縣城摺

六月二十二日

調張運蘭會剿寶慶片

恭報兩路拔營日期摺

七月初六日

覆陳四次 諭旨摺

七月二十五日

謝交部優敘 恩摺

全日

會商大略摺

九月十二日

遵旨悉心籌酌摺

十月十七日

特保賢才請記名簡放摺

全日

請浙江協餉片

李續宜請假片

恭報入皖日期摺

十一月十九日

謝年終 恩賞摺

咸豐十年二月初六日

目疾請假片

謝交部優敘 恩摺

閏三月初五日

覆陳未能舍安慶東下請 簡用左宗棠摺

四月十三日

調張運蘭來皖片

謝署兩江總督 恩摺

五月初三日

通籌全局並辦理大概情形摺

全日

請起用道員沈葆楨摺

全日

察看海漕並保鹽場片

擬設江西糧臺及牙釐局片

催調張運蘭軍片

李元度另募新勇片

奏稿卷十一
報銷歷年軍需摺

五月初六日

遵旨覆陳並報起程日期摺

五月十七日

預籌三支水師摺

全日

彭玉麟統水師李瀚章會辦牙釐片

請查京倉存米片

請毋分撤鄂軍片

飭吳全美師船赴防江北片

妥籌辦理並擬變通章程摺

六月初三日

恭報行抵祁門日期摺

六月十六日

皖南軍務暫未便接辦片

請畱左宗棠襄辦江皖軍務摺

全日

遵旨調遣水師摺

全日

斟酌進兵兼顧皖南軍務摺

七月初三日

興辦淮揚水師派員先往籌辦摺

全日

黃翼升堪勝淮揚鎮總兵片

平江縣建忠義祠摺

全日

行營采訪忠義第一案片

...

...

...

...

...

添兵助剿景德鎮摺

咸豐九年五月二十六日

奏爲楚軍進攻景德鎮逆巢連獲勝仗現在添兵助剿恭摺奏
祈

聖鑒事竊張運蘭一軍自正月二十八至三月十七等日攻剿
情形業經馳報在案三月二十日張運蘭等攻入下李村吉左
營及祥字營接應平江三營迎擊回子墓之賊計共斃賊百餘
名二十八日張運蘭王文瑞約水師夾擊一由河面攻鎮一進
小河攻回子墓賊牆陸軍沿河護之破賊卡數重賊黨別出一
路直犯平江三營迴合六七次祥字營吉左營馳往策應殺賊
百餘賊始奔潰已革皖南道石景芬率各團截擊斃賊四百餘

人我軍亦陣亡十七人自後屢次進攻賊皆堅匿不出四月二十四日張運蘭王文瑞約會劉于潯及水師遊擊任星元等乘水漲進攻將沿岸守卡賊轟斃無數內有黃衣賊目五六名惟街口堅卡數重難破兼有一港之隔二十八日復合諸營進攻參將文瑞一軍專防河岸石景芬督團丁分守各隘我軍誘賊出卡用劈山礮排轟當者糜碎立斃數十賊賊遂敗奔是日劉于潯等攻破西瓜洲賊壘江楚兩軍互爲聲援此三月二十日至四月二十八日楚軍攻勦景鍾獲勝之情形也屢據張運蘭等稟報前來臣查鎮賊屢敗勢已衰各軍打仗亦不爲不力惟地勢散漫路徑紛歧逆黨多且穩江楚兩軍相距數十里

呼應不靈

臣

久欲濟師往剿因湖南永寶被擾防賊回竄故未

敢將撫州各營調出致南路過於空虛目下湖南賊蹤盡趨西

路卽派駐撫之湘前營強中營王字營振字營岳字營護衛軍

共五千八百人於五月初九十一等日分起拔營助攻景鎮交

臣弟曾國荃督率以行與張運蘭劉于濬等面商進取機宜總

期迅掃逆巢肅清江境現駐撫山者僅撫臣所募之昇字營六

百餘人又湘後營千餘人蓋劉睦馬兒弟之舊部撫臣調赴撫

州交臣爲之整飭者也除劉于濬一軍由撫臣耆齡詳悉奏報

外所有楚軍連月進攻獲勝及添兵助剿各緣由謹繕摺由驛

五百里馳奏伏乞

皇上聖鑒訓示施行謹

奏

調饒廷選防廣信片

成

豐九年五月二十六日

再臣疊准江西撫臣耆齡來函九江道沈葆楨現擬飭赴本任
惟廣信係東路要郡景德鎮尚未克復防務不可稍鬆須得威
望夙著之大員前往接辦擬商調贛南總兵饒廷選赴廣信接
防等因查饒廷選現已由閩來江臣前因甯都建昌各屬空虛
擬令該總兵駐守又或酌量緩急令赴贛南本任均經奏明在
案茲查贛甯一帶賊氛已遠廣信地屬要區自應先其所急卽
令該總兵率所部閩省兵勇駐紮廣信其信屬防兵均歸節制
俟景德鎮克復信防稍鬆再行酌量辦理所有現調饒廷選接
防廣信緣由理合附片陳明伏乞

聖鑒訓示謹
奏

李鴻章畱營襄辦片

咸豐九年五月二十六日

再按察使銜記名道翰林院編修李鴻章咸豐三年正月奉

旨隨同工部侍郎呂賢基辦理安徽團防嗣經提

臣

和春安徽

撫臣福濟奏畱軍營襄辦一切在事日久懋著勤勞七年九月

福濟奏報該員丁父憂服闋俟經手事件料理完竣給咨回京

供職欽奉

俞旨_{在案}該員皖營經手事竣於上年冬閒來江西省母後卽

欲回京

臣

因該員久歷戎行文武兼資堪以畱營襄辦昨因添

兵助攻景德鎮檄李鴻章會同曾國荃等前往督勦理合附片

奏

聞伏乞

皇上聖鑒謹

奏

陳明服闋日期片

咸豐九年五月二十六日

再臣於咸豐七年二月十一日在江西瑞州軍營聞訃丁父憂
回籍本年五月十一日服闋例應入

京叩請

聖安茲因辦理軍務不及赴

京謹已遵

制釋服理合將服闋日期附片陳明謹

奏

覆陳防蜀緩急摺

咸豐九年六月十八日

奏爲奉到防蜀

諭旨恭摺覆奏仰祈

聖鑒事竊

臣

添調五千餘人協攻景德鎮並商派總兵饒廷選

換防廣信業於五月二十六日馳奏在案六月初五日承准軍

機大臣字寄咸豐九年五月二十一日奉

上諭官文奏探知湖南賊眾勢將入蜀請飭曾國藩帶兵迅赴

夔州一摺逆首石達開竄擾湖南大股萃於祁陽與官軍相抗

復分竄邵陽新化武岡等州縣據稱該逆蓄謀已久欲逞志於

四川由湖南入蜀道路紛歧若由資江沅江遽窺常澧則湖北

之荆宜兩郡俱危或由辰沅走秀山酉陽或由黔中假道皆可
蔓延川境湖北水陸各軍全力施之於皖省卽再分撥亦僅能
近防洞庭常澧不能再顧西路詳覽該大臣所奏各情實爲通
籌大局起見本日已諭令有鳳派兵扼要嚴防惟該省兵力恐
不能當此悍賊曾國藩前派蕭啟江帶兵援剿湖南現在湖南
喫重此一軍自未能調回此外如江西湖北湖南四川等兵均
素稱得力著曾國藩卽日統帶由楚江前赴四川夔州扼守以
據兩湖上游之勢倘賊蹤竄至卽可有備無患至江西景德鎮
之賊尙未剿平據官文奏請飭李定太守饒州饒廷選守撫州
彭玉麟守九江著曾國藩斟酌情形咨商耆齡妥爲布置俾得

迅掃賊氛不至顧此失彼是爲至要將此由六百里諭令知之
欽此仰見

聖主思患預防熟計兼權之至意伏查臣部下除蕭啟江之五
千人援勦湖南外其張運蘭之三千七百人上年臘月卽調攻
景鎮屈蟠之平江營千人本年三月復調防湖口昨派臣弟曾
國荃帶五千八百人赴鎮協勦臣身邊並未畱一卒一兵撫州
老營惟湘後及昇字兩營二千餘人均由省局發餉不歸臣處
調遣聊假虛聲以坐鎮要郡耳曾國荃等抵鎮後移營進逼五
月二十六二十八六月初二等日均獲勝仗雖賊多且悍能否
卽破堅巢尙無把握然兵屢添而愈多營屢逼而愈近以機勢

而論可期得手今若改圖入蜀將楚軍全行撤退則饒防僅劉于潯一軍不能扼截東路賊必乘虛內竄北而彭澤湖口南而撫州建昌均慮難支是未保將危之四川先棄甫定之江西臣畱商巡撫耆齡撫臣覆書囑畱朱品隆王文瑞屈蟠三千人助攻景鎮臣所部僅此數將若畱以防江更難入蜀再四思維實覺顧此失彼有礙大局

諭旨飭令李定太守饒州饒廷選守撫州彭玉麟守九江等因查彭玉麟現紮湖口尚可兼顧九江饒廷選初赴廣信係屬三省要區礙難他調李定太專防衢州係屬浙省門戶能否來江應由撫臣耆齡奏咨俟一月以後始可定局景德鎮能否攻克

一月以後亦可定局目下尙當竭力攻勦不宜徑退以長凶鋒
此_臣處一軍難遽拔隊西行之情形也自本年賊擾湖南永祁
被圍湘勇在江西者各懷內顧之憂近日寶慶危急距湘鄉不
過百里弁勇瞻顧身家歸思尤切徒以景鎮喫緊不准告假一
旦拔隊征蜀道經楚境必且紛紛請假勢難禁止凡勇之弊敗
挫則不知歸伍久征則常思還家不獨湘勇爲然各省均坐此
弊勇之不如額兵者在此_臣丁巳年奏疏深以弁勇不能補都
守千把實缺爲慮者亦職此也今攜湘勇直上夔州水路三千
餘里風濤之惡三峽之險程途太遠人地太生竊恐弁勇未必
樂從卽使多方開導樂於西征而粵賊現在湖南號稱二三十

萬若果竄蜀裏脅更多臣以區區萬人入蜀勦固不敷防亦不足孤軍客寄傷亡難補以勢度之恐無裨於大局若遵

諭旨據兩湖上游之勢則臣現在之兵力略加水師駐紮宜昌等處即可穩占上游固湖廣之西門若必徑趨夔州則不以兼顧湖廣爲重而以籌防全蜀爲重不特蕭啟江一軍必須調集同行且當添調水陸湊齊三萬人乃可攜以入峽此又由鄂赴蜀應俟兵力略厚之情形也自軍興以來川陝兩省最爲完善而蜀中財力雄厚百物豐饒木多足以立舟師馬多足以備騎隊尤爲逆黨所涎羨我

皇上睠焉西顧防患未形洵屬刻不可緩之至計惟景德鎮目

下難遽抽動及臣處兵力單弱情形不得不縷陳於

聖主之前除景德鎮開仗情形即日另行奏報外理合恭摺由

驛六百里覆奏伏乞

皇上聖鑒訓示施行謹

奏

官軍攻克景德鎮及浮梁縣城摺

日咸豐九年六月二十二

奏爲官軍攻克景德鎮及浮梁縣城江西全省肅清恭摺奏祈
聖鑒事竊臣於五月十一日派道銜候選知府曾國荃帶領五
千餘人助攻景德鎮二十二日抵鎮約會張運蘭等移營雞腳
嶺一帶層層進逼二十六日辰刻營壘未成賊出三大支過河
來撲各營梟水鈔擊殺賊百餘逼溺無數賊敗回巢未刻浮梁
援賊大至僞楊國宗悉銳來犯計二萬餘人各營分三路截擊
鏖戰兩時陣斬黃衣騎賊及先鋒賊十數名賊始奔潰經劈山
礮截路排轟擊斃溺斃約四五百名我軍陣亡五人帶傷四十
五人二十八日賊復來犯過河直撲老湘營餘皆埋伏對河我

軍用鎗礮扼港迎擊未刻賊氣已疲始大呼衝出殺賊百餘名
六月初二日賊仍傾巢來撲馬隊三四百匹排列對河而以一
支犯老湘營一支犯岳字營張運蘭帶隊將賊擊退直衝過河
與岳字營逼李村逆巢窮追過猛賊從旁路包鈔我軍陣亡五
十三人都司李印典守備向其昌陳玉才均沒於陣經朱品隆
唐義訓蕭孚泗等各營接應回合數次賊始大敗自是三戰皆
勝圍逼愈緊賊糧垂盡知其不能久踞矣適天雨江漲劉于濤
水師與彭玉麟派來之水師游擊任星元緊逼西瓜洲晝夜轟
攻排牆倒壁楚軍陸師派隊將湖湘街黃港臧家灣等處賊卡
焚燒斷賊接濟署浮梁縣事柴維翰亦帶團將羊塢街賊卡焚

燬賊益窮蹙遂趕造火礮火船圖襲下游水師劉于潯等探知嚴加準備十三夜賊果出火礮四十餘架夾岸輔以陸賊焚攻水師我軍排礮對轟楚軍亦出隊轟勦兩岸之賊擊斃多名血尸盈岸賊計不行十四日夕水陸各營施放噴筒火箭風大火烈延燒鎮市民房該逆忙亂遂於是夜子刻乘黑暗潛竄浮梁曾國荃親率參將張勝祿游擊蕭孚泗都司周惠堂副將朱品隆知縣張岳齡等由中路黃泥渡進張運蘭親率參將文恆久劉松山朱紹輝游擊王萬友都司張廣勝易開俊等由左路李村羊塢街進道員王文瑞偕副將唐義訓游擊朱寬義藩經歷凌蔭廷游擊喻吉三游擊銜彭大壽都司吳盡臣守備劉勝祥

張詩華等由右路湖湘街進一面焚燒各卡斬馘追奔十五日辰刻抵浮梁縣該城有一河之隔賊搭浮橋上下三道礮船十餘號轟護歸路其殿後之賊尙有數千未過浮橋我軍窮追緊逼溺尸滿河賊用鎗礮扼橋傷我弁勇十數人守備銜高成春死之抵敵良久中路難進城內忽出悍賊三四千人回過浮橋直衝中路朱品隆張岳齡等方分翼鈔擊適左路張運蘭等已追至下渡浮橋邊右路王文瑞等已追至上渡浮橋邊劉子潯所派之江軍亦到曾國荃等遂奮擊中路立斃悍賊二百餘名該逆自相踐踏落水死者近千人當卽跟蹤入城張運蘭從西門外鈔入王文瑞從東門外鈔入所有斷後悍賊殄殲殆盡已

革皖南道石景芬前浮梁縣楊錚署浮梁縣柴維翰率浮樂各團勇由東鄉追捕前來隨同克復縣城敗賊奔竄祁門建德一帶我軍仍分三路追剿追過縣城四十餘里伏尸盈路戍刻收隊是日追逐七十餘里斃賊二千餘名生擒二百零七名奪獲旂幟軍械之屬將二千件楚軍陣亡四十九人帶傷百三十餘人此五月二十六二十八等日疊獲全勝六月十四五等日攻克景鎮浮梁縣城之實在情形也據張運蘭曾國荃等稟報前來臣查景德鎮爲江西皖浙三省要衝去臘派張運蘭帶領楚軍與劉于濤之江軍會剿前後數十戰互有勝負楚軍陣亡至七百餘人之多今幸濟師助剿力戰成功仰仗

皇上天威江西全省一律肅清除曾國荃係臣親弟不敢仰邀
議敘及江軍出力人員應由撫臣奏獎外按察使銜卽選道張
運蘭治軍堅忍艱險不渝可否

賞加布政使銜候選道王文瑞勇敢明練候補游擊任星元忠
實勤能可否均

賞加勇號其餘楚軍出力員弁可否由臣擇尤保獎以勵戎行
出自

天恩陣亡之都司李印典守備向其昌陳玉才守備銜千總高
成春請照各本職從優

賜卹藉慰忠魂所有官軍攻克景鎮逆巢浮梁縣城江境肅清

各緣由恭摺由驛六百里馳奏伏乞

皇上聖鑒訓示施行謹

奏

調張運蘭會勦寶慶片

咸豐九年六月二十二日

再臣前奉防蜀

寄諭業將景鎮喫緊難遽撤動據實覆奏在案今幸景德鎮克復情形又自不同竊思防蜀之行原係防湖南之賊也儻能於湖南協力痛殲豈不事半功倍現在大股賊圍寶慶湖北已派李續宜帶兵赴援臣擬檄調張運蘭等一軍四千人先行馳赴寶慶併力會勦在楚多殺一賊卽入蜀少去一賊乘景德鎮得勝之氣用弁勇迫救桑梓之情或可得力臣部署定後卽由湖口武昌而上或先扼駐宜昌等郡使湘賊不敢渡江窺伺荆宜以保湖北之西路如賊果入川再行酌量調齊蕭啟江張運蘭兩

奏
軍督同赴蜀防剿除兩路拔營各日期續行馳報外合先附片

聞伏乞

皇上聖鑒謹

奏

恭報兩路拔營日期摺

咸豐九年七月初六日

奏爲恭報兩路拔營日期仰祈

聖鑒事竊

臣自景鎮克復後檄調道員張運蘭一軍回援寶慶

臣擬率各營先赴湖北宜昌等郡扼防已於六月二十二日附

片具

奏並聲明兩路拔營各日期續行馳報在案茲據張運蘭稟報
已於六月二十八日自景德鎮拔營由南昌臨江袁州一路回
湘臣亦擬於初七日自撫州拔營由江西省城至湖口泝江而
上所有前派往會攻景鎮之湘前強中護軍振字岳字五營已
飭令由饒州至湖口過江先赴小池口一帶等候其吉字中營

現來撫州因令其由湘潭雇船至荊州取齊除俟抵鄂後察看
各處情形再行馳報外所有兩路拔營各日期恭摺由驛五百
里具奏伏乞
皇上聖鑒謹
奏

覆陳四次

諭旨摺

咸豐九年七月二十五日

奏爲欽奉四次

諭旨恭摺覆奏仰祈

聖鑒事竊

臣

自撫州啟程已將兩路拔營日期專摺馳報在案

七月初九日行至荏港途次承准軍機大臣字寄咸豐九年六月二十九日奉

上諭前因官文等奏湖南賊勢蔓延意圖窺伺川省當卽諭令曾國藩帶兵由湖北入川防堵茲據該侍郎奏稱楚軍進攻景德鎮正在喫緊難遽抽動擬就現在兵力駐紮宜昌等處以固湖廣西門等語自係熟籌江西湖北兩省大局起見惟昨據耆

齡奏景德鎮業經克復江西軍務稍鬆該侍郎應將景德鎮善
後事宜妥速辦理酌畱防兵仍遵前旨統帶所部兵勇由楚赴
川至蕭啟江一軍赴援湖南該侍郎兵力較單可至湖北與官
文胡林翼商酌撥兵帶往以壯聲威原摺所稱駐紮宜昌等處
即可穩占上游是但爲鎮守湖北起見尙未能籌防蜀省曾國
藩當熟思大勢應如何定計之處詳悉馳奏毋得遷延等因欽
此十一日在南昌省城承准軍機大臣字寄七月初二日奉
上諭曾國藩奏攻克景德鎮並浮梁縣城一摺尤爲出力之張
運蘭等已降旨先行給獎並將曾國藩交部優敘伊弟曾國荃
以道員用矣該侍郎檄調張運蘭一軍先赴寶慶會剿如能在

湖南界內將該逆協力痛殲使其不至西竄自與該侍郎入川無異所恐賊勢散漫路徑紛歧未能攔截曾國藩雖先駐宜昌等處仍當偵探賊情如寶慶一帶未能遏其入川之路卽當親督兵勇赴蜀以便調度堵剿機宜未可遷延貽誤著曾國藩仍遵前旨俟到楚後與官文等妥商進紮地方並酌撥兵勇以備帶往設或賊犯四川則蕭啟江張運蘭兩軍皆可調赴防剿該侍郎隨時酌辦可也等因欽此十三日承准軍機大臣字寄七月初四日奉

上諭張芾奏浮梁景德鎮敗匪悉竄祁門邊境請飭援師合剿一摺曾國藩因江西肅清調張運蘭一軍赴援湖南該侍郎亦

卽日拔營由武昌前往宜昌等處乃浮梁景鎮敗匪竟傾巢東竄突至祁門邊界延及箬坑禾沙坑口一帶建德之軍旣隔於外祁門之兵復絀於內徽州勢處甚迫亟應由江西就近撥兵援應曾國藩能否暫畱兵勇前赴徽州越境會剿或以兵力已單須親自帶往湖北則江西一省必尙有可用之兵著耆齡卽行抽撥勁旅赴祁門一帶協剿著該侍郎與該撫會同商辦以免蔓延等因欽此二十日湖口縣途次承准軍機大臣字寄七月十二日奉

上諭前因浮梁景德鎮敗匪竄入祁門邊境曾諭知曾國藩耆齡會商撥兵援應茲據張芾奏祁門竄匪業經擊退惟石埭建

德兩路喫緊請飭景德鎮帶兵大員移兵會剿等語現在祁門之匪經副將余永椿等並該處兵團疊次擊敗後復竄入石埭之七都勢甚猖獗各營被圍數重先後被陷貴池青陽之賊乘機蠢動建德城賊又傾巢撲營情形極爲緊迫亟應由江西就近撥兵援剿曾國藩如可酌撥兵勇暫畱江西著卽飭令移紮建德會同該處官兵合力剿賊其普承堯一軍兩月來株守彭澤並未出境援應著耆齡飭令該總兵迅卽帶兵前往夾擊等因欽此仰見

聖主明燭萬里權衡緩急訓示諄諄委曲周詳伏查江西雖全省肅清而防務未可稍弛南則防湖南廣東之賊北則防皖南

徽池之賊前此江軍之在北路者饒州有劉于潯一軍彭澤有
普承堯一軍臣昨經過省城撫臣耆齡與臣熟商擬畱饒廷選
在江添領一軍又令吳坤修出省另領一軍皆防守北路九饒
各屬普承堯一軍自建德敗挫士氣未復只能謹守彭澤不能
進圖皖境其劉于潯饒廷選吳坤修三人擬以二軍分防北邊
以一軍助攻皖南稍濟徽州兵力之所不逮至南路吉甯等屬
如係粵中小股來犯本省兵力足以禦之如係寶慶大股回竄
仍須奏調蕭啟江一軍攔頭迎剿與湖南追擊之師共收夾攻
之效至臣隨身所帶各營人數無多不特不能抽撥赴皖並不
能酌畱防江且商調湘後營之千六百人攜以赴鄂除江西分

防布置應由耆齡詳悉奏報外此臣處兵單不克分勦皖境之
情形也臣以初十日抵省十七日至吳城鎮十九日行抵湖口
與楊載福彭玉麟會晤臣所設之報銷局各員亦隨至湖口其
中有須親爲核對者約須三四日乃能清釐就緒前自景德鎮
調來之朱品隆等五營由饒州來至九江途次感受暑熱病卒
甚多紛紛請假醫調溯查上年七月張運蘭等軍冒暑遄征未
得少休厥後九十月間疾疫大作屢次陳奏上煩
聖廑竟不能剋期入閩今年鑒前此之失不能不少與休息已
飭各營給假十日多者給假半月趕緊醫調一俟暑病稍愈卽
當趲程西上輜重病卒概由水路各營隊伍仍由陸路臣督率

通志卷十一
遄行由鄂入川籌防全蜀仰副

皇上弭患未形之至意斷不敢稍事遷延致有貽誤除俟抵鄂後察看賊勢與官文胡林翼會商再行馳報外所有欽奉四次諭旨恭摺由驛五百里覆奏伏乞

皇上聖鑒訓示施行謹

奏

謝交部優敘

恩摺

咸豐九年七月二十五日

奏爲恭謝

天恩仰祈

聖鑒事七月十一日准兵部遞到咸豐九年七月初二日內閣奉

上諭曾國藩奏官軍攻克景德鎮及浮梁縣城一摺現在江西全省一律肅清勦辦甚爲得手曾國藩調度有方著交部從優議敘在事出力之道銜候選知府曾國荃著免選知府以道員用等因欽此當卽恭設香案望

闕叩頭伏念

臣

知識短淺韜略未嫻昔年督帶水師曾乏寸功

之足錄去歲重來江右尤無成效之可言臣弟國荃疊承
恩惠未報涓埃迺蒙

闔澤並頒

鴻施下逮同拜九天之

詔寵賁絲綸愧無百戰之功榮齊璘玠臣惟有督同臣弟勉効

駑驅深求豹略恆臥薪而嘗膽冀捍患而禦災庶以仰荅

高厚生成於萬一所有微臣感激下忱謹率同臣弟曾國荃繕

摺附驛恭謝

天恩伏乞

皇上聖鑒謹

奏

會商大略摺

咸豐九年九月十二日

奏爲欽奉

諭旨會商大略由鄂省回駐巴河恭摺覆奏仰祈

聖鑒事竊臣行抵湖口已將清釐報銷休息病卒各情馳報在

案在湖口小住十日八月初一日解纜出江十一日行抵黃州

與撫臣胡林翼晤商一切十八日由黃赴鄂陽邏途次承准軍

機大臣字寄咸豐九年八月十三日奉

上諭官文奏皖省賊勢日張籌議由楚分路勦辦一摺皖省粵

匪與捻匪勾結蔓延日甚勝保圖攻懷遠翁同書退守壽州廬

州以外並無一旅之師前此楚軍東下復以深入失利以致匪

勢漫無牽制肆意竄擾官文以寶慶解圍敗賊悉數南竄川省
已有備無患請飭曾國藩緩赴川省暫駐湖口俟湖南大定分
軍四路步步爲營進剿皖省所籌實於大局有益曾國藩前奏
尙在湖口清釐報銷並休息病卒此時如已起程赴鄂著與官
文商酌如湖南大局已定川境可保無虞卽暫駐湖口俟調回
湖南各軍爲分路進剿皖省之計設湖南敗匪尙未免有入蜀
之虞只可從緩酌量辦理軍情變幻靡常該大臣等近在鄰省
偵探較確必能相機籌畫力顧全局至皖省糜爛已極勝保自
護城挫敗後其勢不可復振非由楚省派援不能牽掣賊勢該
大臣等務須亟籌協剿預爲布置一俟湖南定局卽照所議調

撥水陸各軍分路進剿實深盼望另片請飭催四川等省餉銀已諭令各該督撫迅解等因欽此仰見

皇上權衡大局熟計兼籌尤以援皖爲急務令臣等相機酌辦

虛衷委任感悚曷勝臣於八月二十三日行抵武昌晤商督臣

官文維時探聞湘賊大股全竄粵西前隊已趨義甯距黔省邊

界甚近或由龍勝懷遠一帶入黔以遂其竄蜀之謀亦未可定

固不敢謂川境可保無事此賊必無入蜀之虞惟以道里計之

賊蹤離蜀尙隔三千餘里粵黔兩省萬山叢雜賊多食少勢難

遽達蜀境查皖北粵捻各匪蔓延日廣南爲金陵蕪湖之援北

爲齊豫數省之患自安慶至宿亳千餘里人民失業田廬蕩然

火熱水深迫切待救勝保翁同書兩軍相隔既遠兵餉并絀東北各路亦無協勦之師誠如

聖諭非由楚省派兵馳援不能牽掣賊勢官文胡林翼擬將援湘馬步各軍調回分路進發皖鄂接壤途徑紛歧上年李續賓銳意深入連克四城因兵數太少有戰兵無守兵有正兵無援兵是以中道挫衄今懲前此之失須合全力圖之多添一兵得一兵之力早辦一日救一日之難中原腹地莫要於皖生民苦厄莫甚於皖就大局緩急而論臣自應回軍援皖先其所急以期速蘇民困仰慰

宸廑

臣

於九月初三日由武昌回駐黃州下游四十里之巴河

簡校軍實詳考入皖形勢進兵須分四路南則循江而下一由宿松石牌以規安慶一由太湖潛山以取桐城北則循山而進一由英山霍山以取舒城一由商城六安以規廬州南軍駐石牌則可與楊載福黃石磯之師聯爲一氣北軍至六安州則可與翁同書壽州之師聯爲一氣臣所部不及萬人僅足自當一路若將援湘之蕭啟江調回則臣處可分爲兩支若並將張運蘭調回則臣處可分爲三支一支之力僅能會剿皖北三支之力則可專任皖南臣於正月十一日曾經縷晰具奏在案此時湘事雖紓邊防尙緊臣擬酌畱張運蘭一軍協防湖南咨調蕭啟江帶勇五千先行來鄂相應請

旨飭下湖南撫臣檄催蕭啟江剋日前來會同鄂省各軍陸續東下以期廓清皖境蕩平寇氛除進剿事宜另行會商馳報外所有遵

旨商籌全局並回駐巴河各緣由恭摺由驛五百里覆奏伏乞皇上聖鑒訓示遵行謹奏

遵

旨悉心籌酌摺

咸豐九年十月十七日

奏爲遵

旨悉心籌酌恭摺覆奏仰祈

聖鑒事竊咸豐九年九月二十八日承准軍機大臣字寄九月
二十一日奉

上諭曾國藩奏遵旨籌勦皖匪機宜現已由鄂回駐巴河一摺
皖省賊氛甚熾必須楚師東下方可掃蕩曾國藩奏稱以兩軍
循江而下規取安慶桐城兩軍循山而進規取舒城廬州各軍
所部兵勇自卽照官文前奏派撥該侍郎獨任一路尙擬將蕭
啟江調回派張運蘭畱湘協防但蕭啟江一軍已入粵西現當

桂林危急萬分全恃此軍援應急切未能調回至湘中防堵尙有兵勇可派著該侍郎斟酌情形卽將張運蘭調取回鄂亦可補蕭啟江之缺再本日據袁甲三庚長奏現聞官文等籌議進兵勦辦皖逆並議令勝保等於東北路截勦惟勝保傳振邦兵力單弱一經楚師大舉深恐驅賊北竄請飭由光州固始潁州一帶繞赴北路進勦等語曾國藩所奏北路一軍由商城前進本去潁州不遠惟須折赴六安規取廬州則蒙亳等處已難兼顧此時捻粵勾結設因南路不支竟圖北竄恐傳振邦翁同書等不能堵遏袁甲三等所慮亦不爲無見著官文曾國藩胡林翼再行悉心籌酌所有東下四軍內應如何派出一軍取道光

固潁州繞出懷蒙以北與勝保等官軍會合南剿俾逆匪不致北犯是爲至要袁甲三等原摺著鈔給閱看至此次官文等會籌大舉關係全局利害總須計出萬全不妨稍遲時日謀定後動也將此由六百里各諭令知之欽此仰蒙

皇上籌維全局指示機宜曷勝欽感伏維自古辦竊號之賊與辦流賊不同辦流賊法當預防以待其至堅守以挫其銳辦竊號之賊法當翦除枝葉併搗老巢今之洪秀全據金陵陳玉成據安慶私立正朔僞稱王侯竊號之賊也石達開等之由浙而閩而江而湖南而廣西流賊之象也宮張諸捻之股數眾多分合無定亦流賊之類也自洪楊內亂鎮江克復金陵逆首

兇燄久衰徒以陳玉成往來江北勾結捻匪廬州浦口三河等處屢挫我師遂令皖北之糜爛日廣江南之賊糧不絕臣等竊以爲欲廓清諸路必先攻破金陵全局一振而後江南大營之兵可以分剿數省其餉亦可分潤數處欲攻破金陵必先駐重兵於滁和而後可去江甯之外屏斷蕪湖之糧路欲駐兵滁和必先圍安慶以破陳逆之老巢兼擄廬州以攻陳逆之所必救誠能圍攻兩處略取旁縣該逆備多力分不特不敢悉力北竄齊豫並不敢壹意東顧江浦六合蓋竊號之賊未有不竭死力以護其本根也現擬四路進兵自江濱而北第一路由宿松石牌以規安慶臣國藩親自任之第二路由太湖潛山以取桐城

多隆阿鮑超等任之第三路由英山霍山以取舒城臣林翼親自任之先駐楚皖之交調度諸軍兼籌轉運第四路由商固以規廬州調回李續宜一軍任之袁甲三等原奏恐驅賊北竄請由光固潁州繞赴北路等語查湘勇久戰江濱於淮北賊情地勢不甚熟悉能否繞出懷蒙以北應俟李續宜軍至固始後察看情形再行奏明辦理至蕭啟江一軍臣國藩前於奏明後卽經檄調來鄂嗣聞桂林解圍又經飛札催調計日內當已由粵回湘張運蘭一軍經湖南撫臣派防郴州該道久勞於外適值防務稍紓稟請給假三月暫予休息臣國藩與駱秉章皆經批准難遽北來應懇

皇上天恩仍飭蕭啟江來皖俾臣等少收臂指之助除俟各軍取齊再行馳報外所有遵

旨悉心會籌緣由謹合詞恭摺由驛五百里覆奏伏乞

皇上聖鑒訓示施行謹

奏

硃批另有旨欽此

又摺內攻陳逆之所必救旁奉

硃批惟恐言之甚易行之甚難

又李續宜軍至固始後旁奉

硃批誠恐緩不濟急欽此

特保賢才請

旨記名簡放摺

咸豐九年十月十七日

奏爲特保賢才請

旨記名簡放以示鼓勵而昭激勸恭摺奏祈

聖鑒事竊維求才必試以艱危用人當責以實效湖北軍務迭興兵事餉事惟在辦理得人而得人於凋敝殘破之區尤非易易查有四品卿銜禮部員外郎胡大任於咸豐三年奉

旨回籍幫辦團練四年閏七月

臣

國藩率師入鄂委辦捐輸轉

運接濟軍餉

臣

林翼於五年正月由九江援鄂胡大任同在籍

紳士倡率董勸辦理釐金奮勉出力奏奉

諭旨以員外郎用並

賞戴花翎嗣復委辦荆沙牙帖釐金計籌解錢五十餘萬串七年三月奏請加四品卿銜俟軍務告竣送部引

見聽候

簡用該員感激奮興以後又籌解銀錢鉅萬軍餉藉以接濟查四年五年賊屢上犯全省糜爛當烽煙四逼之時紳民遷徙殆盡胡大任獨能於萬難措手之際奮不顧身經營籌畫不獨穩固軍心實足激發士氣蓋其沈毅果決力濟時艱悉本忠藎之誠乃能任艱危而不變歷險阻而不渝此後責以事功必收大用該員前已奏請

簡放現在楚境肅清給咨赴部可否籲懇

天恩以四品京堂記名遇缺題奏之處出自逾格

鴻施又鹽運使銜湖南湖北補用道厲雲官咸豐三四兩年

國藩委辦發審及糧臺事務五年十月

臣官文臣林翼奏畱鄂

省總理水陸各軍糧臺七年三月奏奉

諭旨免補知府遇有湖南湖北道員缺出儘先補用並加鹽運使銜該員勤慎廉明每月軍餉三十餘萬兩出入勾稽絲毫不苟加以採辦製造晝夜辛勤自畱鄂以來歷五年如一日現在大軍東指兵分則事愈繁餉多則責愈重必得辦理熟習之員近在本省籌畫度支方使糧餉軍火四應不竭湖北征皖正當喫緊之際擬請

奏
特恩將厲雲官交軍機處記名遇有道員缺出請

旨簡放俾得就近一手經理更於軍務有裨所有特保緣由謹

合詞恭摺具奏伏乞

皇上聖鑒訓示謹

奏

請浙江協餉片

咸豐九年十月十七日

再湖北水陸各軍併力圖皖鄂餉不敷供支臣官文已於八月初五日附片瀝陳欽奉

諭旨飭令四川陝西山西江西等省各按月協濟臣國藩軍餉三萬兩在案除江西按月撥解外僅陝西報解一萬兩四川山西並未報解緣該督撫但知鄂中近年稍就寬裕不知此次圖皖人數甚眾不敷甚鉅臣等再四商籌萬分焦慮查浙江撫臣羅遵殿前任鄂藩通省出入款項經手已久其艱難情形實所深悉浙江完善之區該撫公忠夙著諒能勉力代籌仰懇皇上天恩飭下羅遵殿按月協撥援皖餉銀四萬兩徑解湖北

總糧臺由臣官文分撥臣國藩軍中同辦皖事飢飽均分不致
稍有歧視謹合詞附片具陳伏乞

聖鑒訓示謹

奏

李續宜請假片

咸豐九年十月十七日

正繕摺聞接據布政使銜荆宜施道李續宜稟稱日內料理由
湘起程帶勇回鄂接家信知伊母病篤心緒已亂等情臣等查
該道胞兄李續寶殉難後其母憂傷致疾該道乞歸省視自應
給假以示體卹現令李續宜所部各營先行回鄂由商城固始
一路進發俟該道假滿來至楚豫之交再由臣等相機調度奏
明辦理謹附片奏聞

和名

三

一、
二、
三、
四、
五、
六、
七、
八、
九、
十、

恭報入皖日期摺

咸豐九年十一月十九日

奏爲恭報入皖日期仰祈

聖鑒事竊楚軍分路援皖

臣

由第一路循江而進業於十月十

七日會奏在案拜摺後卽於十月二十四日由巴河拔營十一

月初三日行抵黃梅小住八日十三日進駐皖省之宿松縣紮

營東北門外所有蕭啟江張運蘭二軍遵

旨均不調回

臣

目疾醫調尙未痊愈就現在兵力勉強支持進

剿實虞不足防守或尙可恃除遵

旨另籌一軍繞赴淮北由

臣

官文會奏辦理外所有拔營入皖

進駐宿松緣由恭摺由驛五百里馳奏伏乞

皇上聖鑒訓示謹

奏

謝年終 恩賞摺 咸豐十年二月初六日

奏爲恭謝

天恩事咸豐十年正月十九日 臣在宿松軍中准湖廣督 臣官

文咨稱承准軍機處咨開九年十一月二十七日由

內交出年終

賞福字荷包銀錢銀鏢食物等項交兵部由驛馳遞等因轉賚

到 臣當卽恭設香案望

闕叩頭祇領竊 臣謬典犀渠未嫻豹略愧涓埃之莫報實兢惕

之彌深乃蒙

宸翰遙頒

鴻恩下逮值

天子萬壽之年錫

皇極九疇之福雲封錦軸江淮之草木生輝日麗

奎章蛇鳥之旌旗變色加以雙魚紉佩荷囊則錦燦七襄百鹿

呈珍榆莢則金登三品蓮分西液杞采南山頌尙方

玉食之珍甘流綠乳噉

禁籞瓊林之果矢報赤心臣惟有殫竭愚誠講求戎政以惜寸

惜分之志致已干已百之功庶期仰荅

高厚鴻慈於萬一所有微臣感激下忱理合專差恭摺叩謝

天恩伏乞

皇上聖鑒謹
奏

卷之四

四

目疾請假片

咸豐十年二月初六日

再逆酋四眼狗陳玉成於去臘上援太湖前敵各軍禦之於小
池驛危險萬狀至正月二十五六等日疊獲大勝蹋平賊壘七
十餘座克復太湖潛山兩城業經臣咨明督臣官文等會奏在
案目下擬分路進兵惟臣於正月初閒肝氣作痛目疾復發頃
得家信臣叔曾驥雲病故涕泣之餘眼光益蒙合無籲懇

天恩賞假四十日仍在營次調理所部各營可飭令先赴前敵
會剿謹附片具奏請

旨

易和

三

謝交部優敘

恩摺

咸豐十年閏三月初五日

奏爲恭謝

天恩仰祈

聖鑒事准督臣官文咨鈔咸豐十年二月十四日內閣奉

上諭官文胡林翼曾國藩奏官軍大破援賊克復太湖城池一摺曾國藩督師進剿調度有方著先行交部從優議敘等因欽此當卽恭設香案望

闕叩頭伏念臣才識迂拘未諳方略前此下游剽悍之賊實有

傾巢深入之虞賴督臣官文撫臣胡林翼調度應機副都統多

隆阿總兵鮑超等驍勇善戰皆同心以戮力遂掃穴而摧堅微

臣本無尺寸之功

聖主不遺涓塵之助

恩榮特被感愧獨深

臣

惟有勉率偏師力襄全局矢憂勤於夙

夜策奠定於江淮以期

仰荅

高厚鴻慈於萬一所有

微臣

感激下忱謹繕摺附驛恭謝

天恩伏乞

皇上聖鑒謹

奏

覆陳未能舍安慶東下請

簡用左宗棠摺

咸豐十年四月十三日

奏爲遵

旨覆奏仰祈

聖鑒事竊

臣

承准軍機大臣字寄咸豐十年四月初一日奉

上諭前因金陵大營官軍不支退守鎮江當諭令曾國藩等傳旨令都興阿馳赴江北將如何進取之處悉心籌酌茲據瑞昌王有齡奏上游悍賊麇集金陵鎮常處處喫緊請飭曾國藩會同楊載福分勦蕪湖並入甯境以分賊勢等語金陵大營退守鎮江軍威不振而逆賊分踞句容溧水等處圖犯蘇常江浙安危在於呼吸曾國藩現紮安慶若與楊載福率領所部水陸各

軍迅由東流建德一帶分剿蕪湖並入甯境以分賊勢而顧蘇
常於東南大局實有裨益惟安慶賊勢頗眾曾國藩能否舍安
慶而東下著酌度情形相機辦理迅速奏聞如該侍郎兵力不
敷未能前進卽飭楊載福統領水師進攻蕪湖扼賊之吭並與
李德麟等梭巡江路亦足以牽掣賊勢是爲至要等因欽此伏
查臣軍共計一萬數百人現正圍攻安慶多隆阿一軍現攻桐
城李續宜一軍現駐青草壩援應兩路均屬喫緊之際前奉
寄諭命臣等傳

旨令都興阿酌帶馬步隊四
五千人馳赴江北當經飛咨該將
軍並咨商督臣官文撫臣胡
林翼悉心籌酌計都興阿之軍須

從皖北各營中抽調兵力已不能不分此刻安慶賊勢尙强臣若盡撤以赴蕪湖甯國則桐城之師不能獨立該逆若再乘機上犯楚疆必將應接不暇臣處自蕭啟江張運蘭撥赴楚蜀後不獨將領無獨當一面之才且兵力亦太單薄難當巨寇目下賊勢全趨常蘇如常州不支斷非進攻蕪湖一著之所能牽綴此臣軍不能舍安慶而趨蕪湖之實情也

諭旨又以左宗棠熟習湖南形勢戰勝攻取調度有方目下賊氛甚熾兩湖亦所必欲甘心應否令左宗棠仍在湖南本地襄辦團練等事抑或調赴該侍郎軍營俾得盡其所長以收得人之效並著曾國藩酌量辦理等因欽此查左宗棠剛明耐苦曉

暢兵機當此需才孔亟之際或飭令辦理湖南團防或飭赴各路軍營襄辦軍務或破格

簡用藩臬等官予以地方俾任籌兵籌餉之責均候聖裁無論何項差使惟求明降

諭旨俾得安心任事必能感激圖報有裨時局除飛咨楊載福欽遵

諭旨迅巡下游江面並俟都興阿成軍由督臣官文主稿會奏外所有遵

旨覆奏各緣由理合專摺由驛六百里馳奏伏乞

皇上聖鑒訓示施行謹

奏

奏稿卷一

三

調張運蘭軍來皖片

咸豐十年四月十三日

再_臣目疾迄未痊愈每作字一二行卽須閉目少停閏三月中旬肝氣復痛一次本擬奏請回京調理因皖北甫經進兵未敢掣動大局現在安慶各營派記名總兵竹山協副將朱品隆員外郎李榕爲統領_臣弟曾國荃照料一切宿松老營派道員李元度綜理營務雖可勉力支持而_臣以病軀將事又乏著名統將殊不足以當大敵上年_臣奏調蕭啟江張運蘭兩軍未蒙俞允蕭啟江現在援蜀勢難調回張運蘭駐防郴州現尙無賊_臣已飛咨湖南撫_臣駱秉章商調該軍如果軍事棘手擬再奏調張運蘭一軍前來以厚兵力合先據實附陳伏乞

聖鑒謹

奏

奏和卷一

序

謝署兩江總督 恩摺 咸豐十年五月初三日

奏爲恭謝

天恩仰祈

聖鑒事竊臣於本年四月二十八日承准軍機大臣字寄咸豐

十年四月二十一日奉

上諭曾國藩已有旨署理兩江總督自應統帶各軍兼程前進

等因欽此臣雖尚未接准部文將欽奉

諭旨恭錄行知聞

命之下謹已恭設香案望

闕叩頭謝

恩訖伏念

臣

從戎七載未展一籌既無橫草之功兼有采薪之

患迺蒙

龍光曲被虎節遙頒膺

九陞之

殊恩畀兩江之重寄

鴻慈逾格感悚難名查江督統轄三省兼理鹽政河漕江防諸務地大物眾任重事繁在平時已才力之難勝況目下實艱危之尤甚建業久淪爲異域蘇常又失於崇朝臣忝任兼圻仍司九伐祇自慙其棉薄詎有濟於涓埃惟

國家多事之秋豈

臣

懷安之日計惟有殫心奉職嚙指誓師

攬轡而志澄清盡收疆土下車而問疾苦速拯瘡痍庶幾仰蒼
高厚生成於萬一除另摺陳報一切軍情外所有微臣感激下
忱理合專摺附驛叩謝

天恩伏乞

皇上聖鑒謹

奏

御製

通籌全局並辦理大概情形摺

咸豐十年五月初三日

奏爲欽奉疊次

諭旨通籌全局並辦理大概情形恭摺覆陳仰祈

聖鑒事竊臣於四月二十五日承准軍機大臣字寄咸豐十年

四月十八日奉

上諭本日據喬松年奏常州城外各營已潰郡城被圍無錫鄉

間已有賊蹤等語爲今之計自以保衛蘇常爲第一要務著官

文曾國藩胡林翼熟商妥議統籌全局卽令曾國藩統領所部

各軍赴援蘇常或未能深入救援亦可扼截江面以杜北竄等

因欽此四月二十八日准官文咨開二十五日准軍機大臣字

寄四月十九日奉

上諭現在常州岌岌可危無錫又有賊蹤可以徑犯蘇城江南大局幾同瓦解曾國藩接奉此旨卽統率所部兵勇取道甯國廣建一帶徑赴蘇州相機兜剿以保全東南大局毋稍遲誤等因欽此同日承准軍機大臣字寄四月二十一日奉

上諭本日據徐有壬許乃釗奏賊逼蘇州和春受傷身故張玉良在無錫一帶駐紮請催各路援兵現在江南情形萬分危急亟待援兵速集以冀挽回大局曾國藩已有旨署理兩江總督自應統帶各軍兼程前進等因欽此仰見

聖主睠懷南服移緩就急之至意臣於四月二十二日准張芾

來留蘇州於十三日失守旋接王有齡咨留常州於初六日失
守無錫於初十日失守張玉良於十四夜回抵杭州等語接閱
之下駭憤莫名竊以爲蘇常未失卽宜提兵赴援冀保完善之
區蘇常旣失則須通籌各路全局擇下手之要著求立腳之根
本自古平江南之賊必踞上游之勢建瓴而下乃能成功自咸
豐三年金陵被陷向榮和春等皆督軍由東面進攻原欲屏蔽
蘇浙因時制宜而屢進屢挫迄不能克金陵而轉失蘇常非兵
力之尙單實形勢之未得也今東南決裂賊燄益張欲復蘇常
南軍須從浙江而入北軍須從金陵而入欲復金陵北岸則須
先克安慶和州南岸則須先克池州蕪湖庶得以上制下之勢

若仍從東路入手內外主客形勢全失必至仍蹈覆轍終無了

期

臣

所部萬餘人已進薄安慶城下深溝固壘挖濬長濠若一

撤動則多隆阿攻桐城之軍亦須撤回卽英山霍山防兵均須

酌退各路皆退則軍氣餒而賊氣盛不但鄂邊難以自保卽北

路袁甲三翁同書各軍亦覺孤立無援是安慶一軍目前關係

淮南之全局將來卽爲克復金陵之張本此

臣

反覆籌思安慶

城圍不可遽撤之實情也

臣奉

恩命權制兩江必須帶兵過江駐紮南岸以固吳會之人心而

壯徽甯之聲援無論兵之多寡將之強弱

臣

職應南渡不敢稍

緩現定於十日內拔營渡江駐紮徽州池州兩府境內擬於江

之南岸分兵三路第一路由池州進規蕪湖與楊載福彭玉麟之水師就近聯絡第二路由祁門至旌太進圖溧陽與張芾周天受等軍就近聯絡第三路分防廣信玉山以至衢州與張玉良王有齡等軍就近聯絡目下安慶之圍不可驟撤臣商官文胡林翼酌撥萬人先帶起程一面分遣員弁回湘添募勁勇陸續趕赴行營以資分撥約須七月方能到齊八月方能進剿此臣移師皖南擬募新勇分途剿辦之情形也從前金陵大營以蘇常爲根本餉糈軍械源源取給故能支拄數年臣今自皖南進兵應以江西爲根本昨據安慶營中盤獲逆首陳玉成自金陵發來僞文內稱現派賊目楊輔青李世賢李秀成等直取

蘇常再攻徽浙以竄江西又擬派賊目吳如孝張樂行由定遠
壽潁六霍以竄湖北四路大舉等語蘇常已失則該逆所稱各
狡計均屬意中之事急須先事預防湖北各軍有官文胡林翼
調度堵遏諒可無虞江西兵力單弱實不足以折新勝之燄禦
百倍之賊必須湖南勁旅越境協防湖南撫臣駱秉章素顧大
局爲

聖主所深知此次賊若窺伺江西所有兵勇餉械仍當借資湖
南_臣等往返咨商竭五六兩月之力辦江楚三省之防仰仗
皇上威福能待兵勇漸齊布置漸定然後賊眾始至與之力戰
所以保固江西兩湖者在此所以規復安徽三吳者亦卽在此

目今賊蹤方熾人心大震但求立腳之堅定無論逆氛之增長此臣聞賊計大舉上犯擬先防而後剿之情形也臣才識短絀夙乏遠略姑就近處籌畫略陳梗概其松江等屬是否尙存蘇省文武殉難若干暨淮揚完區如何設法保全應俟查明熟籌陸續陳奏其起程日期亦俟另疏具報謹將遵

旨統籌全局並辦理大概情形先行繕摺由六百里覆奏是否有當伏乞

皇上聖鑒訓示謹

奏

夢稿卷十

望

請起用道員沈葆楨摺

咸豐十年五月初三日

奏爲請

旨起用告養回籍之道員以固東防而資熟手恭摺奏祈

聖鑒事竊

臣

擬三路分兵進取業經同日奏明

臣

由徽池一路

前進賊必由衢廣等處窺犯江西爲牽制馳突之計江西之東防卽浙江之上游亦卽福建皖南之關鍵是衢廣一路防兵最爲喫重非得威惠素著之大員不能得力查告養按察使銜九江道沈葆楨明而能斷咸豐六年在署廣信府任內堅守郡城保全東路嗣蒙

簡用監司仍畱防務籌兵籌餉吏畏民懷八年春石逆自撫建

傾巢竄浙卒不敢直犯郡城其後李元度守廣豐玉山均因該道接濟得全其去廣信也士民遮道攀轅來臣處遞呈請畱者凡十數次該道以二親年老又事多掣肘力請告歸現當時局艱難聞該道雙親尚健自應先

國後家共勵澄清之志合無仰懇

天恩俯准

飭下福建撫

臣

傳諭該道迅由本籍馳赴江西由

臣

會商撫

臣

奏委署理地方官仍辦廣信防務節制在防文武將來再請

簡補司道各缺以期呼應靈通於大局必有裨益至該道器識

才略實堪大用

臣

目中罕見其匹謹會同江西撫

臣

毓科合詞

附驛具陳伏乞

皇上聖鑒施行謹

奏請

旨

卷之十一

四

察看海漕並保鹽場片

咸豐十年五月初三日

再蘇常爲財賦之區

京倉根本所繫一日不復則海運無可漕之粟重大之事以此爲最臣有地方之責引領東望憂心如焚而遠隔賊氛又苦鞭長莫及目下江蘇巡撫想已

簡放有人若係駐紮江南能與署

欽差大臣張玉良力保松江上海將來尙有辦漕之基若係駐紮江北能力保淮揚下河州縣亦不失爲產米之區臣移營南渡卽當派員至松江淮揚兩處緘商新任巡撫察看海漕事件兼保鹽場之利謹先附片陳明伏乞

皇上聖鑒謹

奏

擬設江西糧臺及牙釐總局片

咸豐十年五月初三日

再臣蒙

恩簡署江督與平時事勢不同江南舊治旣被久踞皖南皖北均屬殘破之區目下蘇常新失徧地賊氛幾無下手之處自應以兩湖爲籌兵之源而以江西爲籌餉之源查臣自咸豐三年至今均係自設糧臺自辦報銷以本無地方之責也今擬札委江西藩司總辦糧臺仍添委道府數員幫同辦理其自咸豐三年至十年五月由臣分作三案造冊報銷自臣接總督印務以後卽由江西藩司衙門報銷以專責成而免牽混至江西歲入之款除錢漕外專恃牙稅釐金臣現咨商撫臣毓科仿照湖南

章程牙釐另設一局遴委道府大員專管不歸作藩司收款復
仿照湖北章程督撫臣分辨牙釐錢漕各臻踴躍仍互相通
融互相稽考以期無誤餉需此後江西通省錢漕應歸撫臣經
收以發本省綠營及各防兵勇之餉通省牙釐歸臣設局經收
以發出境征兵之餉似此眉目分明庶官吏各有職守銀錢出
入滴滴歸源杜絕影射浮冒諸弊除酌派會辦糧臺及專司釐
局各員俟與撫臣商定開單會奏外所有現設江西糧臺及牙
釐總局各緣由理合附片陳明伏乞
皇上聖鑒訓示施行謹

奏

催調張運蘭軍片

咸豐十年五月初三日

再臣軍現止一萬六百人不特兵力極單而將領實乏獨當一面之才臣前札調布政使銜道員張運蘭一軍業經附片奏明在案目下渡江由徽池兩路進剿應請

勅下湖南撫臣駱秉章迅催張運蘭由湖南取道江西至饒州一帶聽候調遣此外可徵之兵可調之將容臣與兩湖江西督撫諸臣咨商檄調隨時陳奏謹附片具

奏請

旨

卷之九

九

李元度另募新勇片

咸豐十年五月初三日

再按察使銜記名道李元度向充

臣

軍營務處現經撫

臣

王有

齡奏調奉

旨飭令赴浙差委查該道舊帶之平江勇五營早經交卸業由
饒廷選帶赴浙江勦辦淳安股匪該道若單騎往浙無濟於事
臣處又別無兵可撥現札委該道馳赴湖南另募平江新勇三
千人與饒廷選之平江五營合爲一軍擬卽令防勦廣信玉山
衢州一路以資熟手其沈葆楨如奉

旨起用亦令駐防該處與李元度饒廷選三人聯絡一氣保障
一方於浙江則固上流之咽喉於江西則保東北之重鎮卽於

奏稿
福建皖南亦均有裨益所有李元度無兵赴浙另募新勇緣由
理合附片陳明伏乞

皇上聖鑒謹

奏

報銷歷年軍需摺

咸豐十年五月初六日

奏爲歷年軍需支給官兵弁勇鹽糧等款查照例案造具總散各冊恭摺奏銷事竊

臣自咸豐三年節次欽奉

諭旨辦理軍務所有水陸兩營軍需報銷因與湖南湖北江西三省總局相交涉恐有轆轤難清經

臣酌擬報銷大概規模分

爲數款查明各營在

臣

處領餉月日與他省領餉月日劃清界

限於咸豐七年十二月內在籍具摺先行奏明在案九年駐軍

江西設局辦理報銷

臣

督同承辦各員逐款稽核計收到湖南

湖北廣東四川陝西江西各省協濟餉銀並

臣

行營勸辦捐輸

等項自咸豐三年起至六年十二月底止共收銀二百八十九

萬一千四百九十五兩九錢二毫八絲收湖南解到漕米二萬
八千七百四十石八斗一升四合三勺收江西協濟米二萬五
千八石二斗六升九合自咸豐三年九月起至六年十二月三
十日止共發過官兵勇人等鹽菜馬乾駝折夫價水腳工食
等項銀二百六十六萬七千三百七十一兩六錢九分六釐三
毫五絲九忽五微口糧米三千七百九十九石五斗八升二合
三勺列爲初案報銷尙應存軍需銀二十二萬四千一百二十
四兩二錢三釐九毫二絲五微米四萬九千九百四十九石五
斗一勺入於二案舊管接續造報合將支給兵勇鹽糧各正款
列爲初案按照軍需例案造具簡明總冊分目細冊蓋用安徽

宿松縣印除將各冊專差分送部科外理合恭摺具奏伏乞
皇上聖鑒敕部核銷施行謹

奏

寿和卷十一

七

遵 旨覆陳並報起程日期摺

咸豐十年五月十七日

奏爲欽奉

諭旨先行覆陳並恭報起程日期仰祈

聖鑒事竊

臣奉

命權督兩江已將辦理大概情形於五月初三日專摺馳奏在案正在料理起程閒初八日承准軍機大臣字寄四月二十九日奉

上諭前因蘇常危急疊次諭令曾國藩帶兵迅速馳赴兩江總督署任昨據巴棟阿李若珠等奏常州江陰相繼失陷本日復據瑞昌等奏蘇州於本月十三日失守文武不知下落請飭曾

國藩來浙督辦等語覽奏實深憤懣本日已降旨將張玉良革職留營並命瑞昌總統各軍江長貴幫同辦理軍務辭煥暫署兩江總督矣江南軍務自和春身故大營兵勇全行潰散不獨不堪任使並且擾害民間非有勁旅不足掃盪賊氛張芾派江長貴帶兵二千七百名蕭翰慶帶兵四千名周天受派劉仁福帶兵二千名毓科派文瑞劉芳貴帶兵三千八百餘名皆係赴援蘇常之軍據瑞昌等奏江蘇潰散兵勇紛紛南下已諭令該將軍等飭張玉良截留認真簡汰惟賊勢飄忽異常官兵能否抵禦尚未可定著曾國藩卽遵前旨兼程前進由浙赴蘇會同瑞昌調度各軍昨據張芾奏溧陽股匪復陷建平進犯甯國此

路如有梗阻務當設法繞道前進以免耽延逆匪前撲鎮江巴棟阿等尙能固守江陰失陷南北梗塞昨已諭令李若珠調吳全美師船二百號赴狼山福山以通南北水路本日復催令都興阿迅赴揚州督辦江北軍務並諭官文等籌給曾國藩都興阿軍餉矣將此由六百里加緊諭令知之欽此仰見我皇上籌慮全局備極憂勤聞

命之餘寢食俱廢連日與官文胡林翼商撥兵勇安慶之圍業已奏明勿撤臣所部萬人暫交臣弟曾國荃畱皖統帶但於安慶圍師中抽出記名總兵朱品隆副將唐義訓之二千人從征而飭臣弟另募二千以補其缺又於鄂師中咨調綏靖鎮總兵

鮑超靈字營五千游擊楊鎮魁禮字營一千合之現駐宿松馬步隊約共萬人隨臣先行過江又遵

旨檄調開歸陳許道張運蘭一軍並咨商湖南撫臣駱秉章俟補四品京堂左宗棠在湖南募勇萬餘人挑選將佐配齊軍械陸續由江西以達皖南會合進剿惟鮑超因傷疾舉發於二月間奏准給假回蜀計須六月乃可趕到張運蘭遠在郴州計須七月乃可趕到左宗棠續募之勇到皖更需時日臣目下南渡兵數甚單統將未齊應先駐紮祁門縣境東以聯張芾徽州之聲援西以保江右饒州之門戶俟鮑超張運蘭趕到時卽令分赴徽甯蕪湖兩路俟李元度五千人趕到時卽令由廣信赴浙

蘇一路計三人到營之期先後不甚相遠臣已於十五日自宿
松起程便道至安慶水師營次與楊載福彭玉麟面商後卽由
建德以趨祁門倘下游軍情愈迫鮑超等到營稍速臣當隨時
策應不敢稍涉拘泥所有奉到

諭旨覆陳並起程日期恭摺由驛六百里具奏伏乞

皇上聖鑒訓示謹

奏

卷之八

預籌三支水師摺

咸豐十年五月十七日

奏爲預籌三支水師俟皖南賊勢稍定卽行分投試辦恭摺奏
祈

聖鑒事

竊臣

自聞蘇州失守之信卽以京倉無漕爲慮旋奉

命署理江督海漕係職分中事日夜焦灼猝無良策曾於本月初三日附片具奏在案迄今又踰旬日不知新任江蘇巡撫簡放何人駐紮何地其力能設法辦漕以濟京倉與否無從商查淮揚之裏下河產米最多而鹽場爲大利所在若改爲就場征課經理得宜較之近年所入可多得銀百萬兩以外如果蘇松久陷不能辦漕或於裏下河辦米解京或於鹽課中籌巨

款實銀解京專供京倉買米之用亦足以濟權變而固根本然
欲保下河之米場竈之鹽非於淮安多造戰船急辦水師實有
岌岌不可保之勢昨淮安徽撫臣咨到奏稿亦以保裏下河爲
言湖北撫臣胡林翼七次寄函皆勸臣奏辦水師以保鹽場淮
揚二郡自古稱爲澤國北有長淮南有大江中有洪澤邵伯高
郵寶應諸湖運鹽串場人字芒稻諸河巨浸支流互相灌注一
片汪洋若能造戰船二三百號多購洋礮精選將弁則不特可
以保下河之米場竈之鹽亦且可以輔揚州之陸軍使逆賊不
敢北犯助臨淮之陸軍使川路不至梗塞此淮揚水師急宜籌
辦之情形也賊之守金陵也以安慶廬州爲犄角以太平蕪湖

爲護衛蕪湖之南有固城南漪丹陽石臼諸湖上則通於甯國之水陽江青弋江下則止於東壩掘東壩而放之則可經太湖歷蘇州以達於婁江古之所謂中江者也蕪湖孤懸水中賊匪守之則易官軍攻之則難是以五年血戰不能得手而黃池灣汴屢次失利皆以全無水師之咎臣愚以爲欲克金陵必須先取蕪湖欲取蕪湖必於甯國另立一支水師徧布固城南漪等湖之中甯國水師攻其內大江水師攻其外如七年攻破湖口之例庶幾蕪湖可克而東西梁山可期以次恢復此甯國水師急宜籌辦之情形也逆匪堅忍善守各路奏報皆有同辭官兵圍攻屢年往往因水路無兵不能斷其接濟從前武昌九江臨

江吉安等城之拔實亦舟師之功居其少半側聞紅單師船體質笨重非大江狂風不能起旋又不能接應陸戰不能巡哨汊河金陵所以久而無功亦由水師一面始終不得絲毫之助今蘇州既失面面皆水賊若阻河爲守陸軍幾無進兵之路城外幾無紮營之所臣愚以爲欲攻蘇州須於太湖另立一支水師浙江無事宜於杭州造船浙江有警亦宜於安吉孝豐等處造船必使太湖盡爲我有而後西可通甯國之氣東可拊蘇州之背而陸師亦得所依附此太湖水師急宜籌辦之情形也此三者皆目前之急務如力不能兼則先辦淮揚及甯國二支如力仍不逮則專辦淮揚一支蓋蘇省財賦之區淪陷殆徧僅畱下

河之米場竈之鹽若不設法保全則東南之利盡棄矣臣自咸豐三年奉

旨辦理水師閱歷頗久而三處皆臣管轄之地鹽漕皆臣應辦之事義無可辭責無可貸頃已專丁至

欽差大臣袁甲三軍營函詢淮安等處尙有木料可以造船者否其甯國安吉亦當派人前往察看木料之多寡船工之難易至礮位一宗擬卽日派員賫銀至廣東購買洋礮五百尊由大庾嶺過山以達江西而出湖口又由英霍等縣過山以達固始而出長淮計往返須五月有奇程途雖遠而期限必嚴搬運雖艱而志在必行是否有當伏乞

聖慈詳明指示屢據探報逆首陳玉成欲由徽州竄擾江西臣
進駐徽境與張芾一軍聯絡防剿俟鮑超張運蘭及左宗棠新
募之勇次第到齊將皖南布置稍定立腳粗穩臣或輕騎馳赴
淮安監辦水師或奏派大員赴淮辦理屆時再行奏明請
旨遵行所有預籌三支水師俟皖南賊勢稍定分投試辦緣由
恭摺馳奏伏乞

皇上聖鑒訓示謹
奏

彭玉麟統甯國水師李瀚章會辦牙釐片

咸豐十年五月十七日

再治軍籌餉均以得人爲要查在政使銜廣東惠潮嘉道彭玉麟管帶水師身經數百戰艱險備嘗咸豐五年冬江西各郡縣俱陷於賊湖南北音問不通該道帶礮船在鄂由賊中間道來江徒步七百里遂令整理內湖水師逐漸擴充分攻各城以次收復至七年九月克復湖口始與楊載福外江水師會合現在協剿安慶晝夜督戰其任事勇敢勵志清苦實有烈士之風臣至皖南後察看甯國一帶如須添辦水師再行斟酌緩急奏請簡派又湖南儘先補用道李瀚章廉正樸誠吏事精核咸豐三年由湖南善化縣任內調赴臣營襄辦糧臺遇有戰陣亦督隊

指麾七載以來寵辱不驚夷險一致湖北撫臣胡林翼屢爲臣言欲奏畱鄂省以備任使臣處實有乏才之患過江以後兵數漸增餉需尤迫前經奏明派員專辦江西牙釐接濟軍餉該道隨營年久於江省情形尤熟擬派署江西藩司督糧道李桓會同該道辦理通省牙釐事務可期漸有起色惟隔省人員恐其呼應不靈仰懇

聖恩將李瀚章改歸江西以道員遇缺開單請

簡俾臣得收指臂之助再聞皖南吏治久未整飭臣行營所經畱心察看如現任州縣有不稱職容臣揀員委署若無安省合例之員隨時奏明辦理是否有當謹附片具奏請

和久

請查京倉存米片

咸豐十年五月十七日

再臣擬辦淮揚水師保裏下河產米產鹽之利查打造戰船必須料厚工堅不可借用民船漁划遷就誤事江北久被賊擾木料想亦艱絀約計赴粵買礮赴淮安設廠造船三百號采買油鐵棕纜各具自皖楚起程以至船礮配齊下水之日共須一年之久駛至各河湖港汊分別防剿與賊接仗數次立定腳根然後梭巡鹽場疏通引地又須數月之久果能在淮揚辦米解京或辦買米之銀解京屈指已在咸豐十二年矣其十一年辛酉應辦之漕尙屬毫無著落功效太遲憂灼實深不知部臣另有變通之方籌備京米否然無論效驗之遲速此事要在必行仰

奏
卷一
三
懇

皇上聖恩寬臣期限俾得辦成水師庶鹽漕俱有把握卽防勦
亦有裨益仍懇

勅下戶部查明京倉米石存餘若干是否足支辛壬等年之用
咨行到臣俾得斟酌籌辦伏乞

聖鑒訓示謹附片具

奏

請毋分撤鄂軍片

咸豐十年五月十七日

再鄂省爲各路用兵之樞紐自古有事於大江南北者必爭此上游形勝湖北但有重兵卽足制賊死命臣於九年正月十一日曾經詳奏在案此次臣過江兵單而不敢撤動安慶一軍者實因欲圖三吳宜於上游厚集其勢不敢專顧目前之私計也然臣調去鄂兵已分七千都興阿帶赴揚州又分數千人兩處各撥餉數萬湖北之力甚形竭蹶設愈分愈薄鄂省一有疏虞則南六省之奏報不能達於京師矣據探逆首陳玉成悉眾上犯捻匪亦思竄突鄂疆捍禦良不易易應請

皇上俯念全局攸關嗣後他處喫緊無再抽撥鄂省兵勇俾官

文胡林翼等得以勉力支持不致蹈金陵大營覆轍鄂省幸甚
天下幸甚臣細察大局苟有所見不敢緘默是否有當伏乞
聖慈垂鑒謹

奏

飭吳全美師船赴防江北片

咸豐十年五月十七日

再欽奉寄

諭江陰失陷南北梗塞昨已諭令李若珠調吳全美師船二百號赴狼山福山以通南北水路等因欽此臣查蘇常既失南岸沿江州縣恐難自保尤恐賊匪乘勢擄船徑渡北岸其江北通州泰興各口內河汊分歧脈絡皆貫一經闌入裏下河卽無完土此實目前至要至急之務現在蕪湖上游江面有楊載福彭玉麟水師足資防剿總兵吳全美李德麟全軍皆可調赴下游分扼狼山福山以至焦山瓜洲一帶江面與揚州陸軍就近聯絡無任賊船偷渡北岸責成該鎮等總以防堵各江口保全裏

下河爲主除一面飛飭該鎮等卽日起旋下駛外理合附片具

陳伏乞

皇上聖鑒訓示謹

奏

妥籌辦理並酌擬變通章程摺

咸豐十年六月初三日

奏爲遵

旨妥籌辦理並酌擬變通章程恭摺覆陳仰祈

聖鑒事竊臣於五月十五日由宿松起程十七日於湖口縣境

專摺馳報在案旋准軍機大臣字寄五月初九日奉

上諭本日有人奏安慶一城經曾國藩水陸布置聯營圍困賊已援絕勢窮剋日可復如舉建瓴之師直搗金陵急攻東壩踞蘇之賊必回顧巢穴卽以援蘇之兵乘勢夾攻則蘇州可復常鎮可圖較之由長江取道赴蘇似爲便捷各等語蘇常爲東南財賦之區且係數省咽喉自應以急籌攻復爲上策現在賊勢

奏稿卷一

直趨杭湖勢將糜爛兩省尤爲刻不可緩如果安慶一城指日可復正不妨先復安慶沿江而下乘金陵賊眾空虛之時直搗巢穴一面調派援兵併力夾攻蘇州使賊首尾不能相顧曾國藩旣膺重任責無旁貸其安慶是否可以卽復金陵是否可以進攻不致牽制兵力久頓堅城抑或設法先解蘇常之厄均著酌量緩急妥籌辦理原摺著鈔給閱看等因欽此十九日又准兵部火票遞回臣五月初三日具奏辦理大概情形一摺奉上諭曾國藩現在進兵安慶已薄城下驟難撤動而蘇常一帶望援孔亟亦須帶兵過江先固人心所稱平江南之賊必踞上游之勢現擬駐紮徽池境內分三路一由池州進規蕪湖一由

祁門至旌太進圖溧陽一分防廣信以至衢州俟湖南協防江西兵勇布置妥協約須八月方能進剿各情通籌全局甚合機宜卽著照所擬辦理等因欽此仰見

聖主明燭萬里虛懷委任欽悚莫名臣疊次奏報以安慶之圍

不可撤動蓋取以上游制下游之勢爲進攻蕪湖克復金陵張

本淮揚水師要在必行蓋取以北岸制南岸之勢爲保護鹽漕

協剿江淮張本連日淮浙江撫臣王有齡函咨稱蘇州各屬多

爲賊陷又陷松江郡縣太倉嘉定失而旋復張玉良督兵萬餘

進攻嘉興兩次獲勝廣德州業經收復統計浙省兵勇現有六

萬餘人等語是兵力已厚有瑞昌等商籌調度不獨杭城可保

浙省不至糜爛且能由嘉興以漸圖蘇松

諭旨慮及賊勢趨杭一節當不至上勞

宸厯至安慶一城西南瀕江有楊載福彭玉麟水師扼紮東北倚山有臣弟曾國荃陸軍扼紮并令韋志俊協守樅陽城外之接濟漸斷城內之賊糧尙足北面雖挖長壕東面尙未合圍逆酋四眼狗母妻宗族皆在城中秋閒援賊必至如能與多隆阿李續宜各軍合力擊退則城賊勢窮可期得手卽不能遽拔堅城但使陳逆全股與安慶桐城官軍相持亦足分下游之賊勢紓蘇浙之兵力

諭旨垂詢安慶指日可復一節應俟援賊戰退之後乃能確有

把握至南岸三路進兵之說臣前月兩奏業已具陳其略目今

賊燄彌盛占地愈廣我軍挾全力以進攻不患賊之逼我前而

患賊之鈔我後故須廣布局勢穩立腳根適准王有齡函開中

路不宜遽進溧陽恐其驅賊南犯臣擬俟左宗棠李元度鮑超

張運蘭等先後到齊北路則直趨池州南路則直趨廣德中路

則暫不深入先守徽甯要縣庶免鈔我後路之患亦無逼賊南

竄之虞此臣注重安慶皖南不敢先圖蘇常一隅之微意也臣

昨陳淮揚水師一摺奉

旨後當卽奏派大員先往籌辦臣俟將皖南布置稍定再行輕

騎馳往監造並督同藩司運司經理鹽漕以期濟京倉而裕軍

餉頃復接奉四月二十日

奏和名

諭旨曾國藩現署兩江總督軍務地方均屬責無旁貸等因欽
此是地方公事未可盡置之緩圖臣在皖南則於徽甯一帶駐
紮行營在江北則於淮揚一帶駐紮行營仍於安慶水次設立
老營規模與行省衙署相似臣前此歷年文卷概存水次官署
後此地方文卷亦歸水次官署臣兩岸往來均於安慶水師小
住免致蹤跡無定案卷遺失惟三省事務較繁必有責任司道
數員隨同襄理從前總督駐劄金陵本有江甯藩司糧巡各道
同駐一處每年督臣往淮揚駐紮數月又有漕河鹽各屬供其
差遣自咸豐三年以後歷任督臣因金陵賊踞專駐常州不復

偶駐淮揚亦不復經營江皖殊非

朝廷設官之本意亦非近年通行之常例

臣思整復舊規爲因

時變通之法擬請

聖恩飭派蘇藩司隨江蘇撫臣同駐一處蘇臬司江甯糧道巡

道隨臣同駐一處聽臣酌量派委其江甯藩司兩淮運司仍駐

揚州等處分管丁漕鹽務以專責成臣赴淮時就近督飭辦理

臣衙門文卷遞寄安慶水次者專委司道大員經管其地方尋

常事件卽令代拆代行緊要者彙封送營以憑核辦如此明定

章程俾各屬有所稟承而地方公事亦不至久遠廢閣此臣兼

管地方擬變通辦理之大概也臣舟次阻風於二十日行抵黃

石磯晤楊載福彭玉麟商籌添辦各路水師之法二十七日抵東流二十八日抵建德其湖北調來之霆字各營尙在北岸連日南風過大不能渡江臣在建德略候數日卽馳赴祁門駐紮除到祁後續行奏報外所有遵

旨妥籌並擬變通章程恭摺由五百里覆奏伏乞

皇上聖鑒訓示謹

奏

恭報行抵祁門日期摺

咸豐十年六月十六日

奏爲恭報行抵祁門日期仰祈

聖鑒事竊

臣

於六月初三日在建德縣行營將安籌辦理情形

專摺覆陳在案拜摺後卽於初四日由建德啟程初九日箸坑

途次承准軍機大臣字寄五月二十六日奉

上諭曾國藩現已抽調兵勇萬人由宿松進駐祁門俟鮑超張
運蘭李元度到後卽由徽甯蕪湖廣信分路進兵具見胸有成
竹謀定後戰惟蘇省待援迫切該署督惟當催令鮑超等迅速
來營會籌進剿但能援師早到一日卽早一日救民水火實深
殷盼該署督現統兵勇較單未可輕率前進宜加持重爲要等

因欽此仰蒙

宸慮周詳

聖慈愷惻無任欽感

臣

冒雨遄行於十一日先抵祁門所帶宿

松馬步各營及由安慶撥來之記名總兵朱品隆副將唐義訓

兩軍合共四千餘人皆隨

臣

到祁扼要紮營惟朱品隆積受暑

溼途間患病請假醫調未能同來霆字各營紆道較遠旬日內

方可到祁節次飛催鮑超張運蘭等迅速來皖據鮑超稟稱五

月十二日由夔州起程適江水陡漲峽內行舟維艱略守數日

卽兼程由鄂赴營張運蘭稟稱本擬五月二十二日由郴州拔

營因探報廣東花旗股匪竄近宜章縣界該處防剿喫緊須

替有人方能起行各等語是該鎮道等均難剋期而至左宗棠
李元度新募之勇則須七八月間陸續前來目下蘇省待援迫
切極欲提一旅之師相機進剿以期速解倒懸無如兵力過單
將領尤乏恐不足以當大敵自應謹遵

聖慈指示宜加持重未可輕率前進一俟鮑超張運蘭暨新募
各勇無論何軍先到卽先行派撥前往援剿以仰副我

皇上睠懷南服拯民水火之至意所有行抵祁門日期恭摺由
五百里馳報伏乞

聖鑒訓示謹

奏

孝和

皖南軍務暫時未便接辦片

咸豐十年六月十六日

再欽奉五月二十六日

寄諭昨有人奏張芾等任賊長驅以致大局決裂現徽甯兵勇
尙有三萬餘名若統歸曾國藩節制卽可簡其精銳以資攻剿
不必專俟新募之勇等語張芾督辦皖南軍務於賊匪入浙不
能堵禦咎無可辭徽甯等府本曾國藩兼轄地方該處軍務如
併由該署督督辦自覺事權歸一惟地方遼闊能否控馭得宜
著曾國藩於抵徽後察度情形奏明辦理等因欽此仰見
皇上嚴覈軍實詳慎用人之至意臣沿途接見官紳畱心訪問
皆謂張芾所部兵勇近來甚不得力周天受駐守甯郡餉項久

虧軍心渙散

臣

竊計該二郡兵勇

如果足資攻勦則本年不至

臣

現駐祁門距

如此決裂若其積習太疲

臣

亦未能遽使用命

臣

現駐祁門距

徽州近二百里距甯國約五百里初到此間情形尙未深悉且

值徽甯喫緊之際

臣

處兵將未齊勢難前進卽未便接辦皖南

軍務張芾所部各軍應暫由該副都御史統籌調度俟左宗棠

張運蘭等新軍到皖後再行悉心察看詳奏請

旨酌辦合先附片密陳伏乞

皇上聖鑒謹

奏

請畱左宗棠襄辦江皖軍務摺

咸豐十年六月十六日

奏爲請將四品京堂左宗棠仍畱臣曾國藩軍營共維江皖大局恭摺覆陳仰祈

聖鑒事竊臣等承准軍機大臣字寄五月十一日奉

上諭四川軍務關係緊要本日據胡林翼陳奏各情業經降旨令東純前往署理四川總督並令暫時接辦軍務曹澍鍾已令回籍終制矣該撫所保之左宗棠一員前已有旨賞給四品京堂令其襄辦曾國藩軍務若令督辦川省軍務能否獨當一面於大局有無裨益卽著妥速籌商如可勝任卽一面令該員迅赴川省一面奏聞再降諭旨等因欽此仰見我

皇上用賢無方慎重軍務

虛懷若谷下逮芻蕘

臣

等曷勝感悚伏查蜀省居長江之上游

形勢險固財力豐饒藍李各股匪蔓延雖廣究係初起之賊烏合之徒果得有威望者爲川督事權歸一辦理裕如卽石逆亦不敢再萌窺伺候補四品京堂左宗棠前在湖南贊助軍事肅清本境克復鄰省上年石逆大股竄湘幫同撫

臣

駱秉章指揮調度不數月閒遂收廓清之效其才可以獨當一面固已歷有明徵雖其求才太急或有聽言稍偏之時措辭過峻不無令人難堪之處而思力精專識量閎遠於軍事實屬確有心得前奉諭旨命左宗棠襄辦軍務該員感激圖報聞

詔之曰卽在湘募練五千餘人選擇甚嚴鉅細必躬專俟秋閒
成軍率以東下今若改東師以西行則臣國藩頓少一枝勁旅
恐不足當皖南之逆氛而左宗棠獨往川省亦恐人地生疏或
致呼應不靈且以吳蜀之事論之蜀省土匪倡亂占地少而撲
滅差易江皖狂寇披猖占地多而掃蕩甚難蜀爲鄂秦兩省之
根本吳爲

京師及東南數省之根本蜀有可籌之餉項吳無可靠之協款
事勢旣分難易情形亦有重輕不待智者而可決左宗棠素知
大局勇敢任事必不肯舍難而就易避重而就輕合無籲懇
聖恩俯念臣國藩奏助需人仍令左宗棠督勇來皖實於江楚

等省大有裨益如將來蜀氛日熾江南軍情稍鬆再由臣國藩隨時酌量奏明請

旨定奪臣等再四籌商意見相同謹合詞據實覆陳是否有當伏乞

聖鑒訓示施行謹

奏

遵 旨調遣水師摺

咸豐十年六月十六日

奏爲欽遵

諭旨調遣水師恭摺覆陳仰祈

聖鑒事竊臣於六月初二日在建德縣行營承准軍機大臣字

寄五月二十日奉

上諭前據曾國藩奏剋期渡江俟兵勇到齊卽分三路進兵當經諭令照擬辦理因思將來由池州蕪湖進攻金陵必須水陸兼籌方能得力所有楊載福彭玉麟水師均著歸曾國藩調遣此時楊載福攻破蠟磯賊巢業已得手著曾國藩卽飭令該提督與彭玉麟李德麟吳全美等師船聯爲一氣進攻沿江賊巢

以牽賊勢而壯聲威將此由六百里諭令知之欽此臣查北岸
安慶無爲和州各城南岸池州蕪湖太平各城皆濱臨大江將
來陸軍進攻金陵沿江掃蕩必藉水師夾勦之力吳全美李德
麟等師船本駐魯港現因下游喫緊遵

旨將吳全美調往前經臣飭李德麟全軍併赴狼山福山焦山

瓜洲一帶以資分布於五月十七日附片具奏在案厥後臣至

黃石磯李德麟前來謁見因其餉需軍火缺乏由臣借發銀五

千兩火藥二萬觔俾利遄行所有蕪湖以上江面臣卽商令楊

載福彭玉麟派營接防目下蕪湖縣城未復東西梁山未破吳

李二鎮下駛後與上游相隔過遠未易聯爲一氣至楊載福彭

王麟等本係臣之舊部第楊載福係在湖北領餉彭玉麟係在江西領餉臣自前年出統陸軍久已水陸分途不相爲謀茲復奉

命調遣水軍自應欽遵辦理查臣現駐祁門距安慶江面已三百餘里此後或進駐徽甯或馳赴淮揚距安慶近者數百里遠或二千里軍情瞬息變更機宜固不可遙度奏報尤不可太遲若概由臣處轉奏誠恐稽延貽誤楊載福統率水師身經數百戰雖積勞致疾身體稍弱而謀勇器識度越諸將其江面戰守事宜似應仍令該提督會同彭玉麟妥辦並由該提督自行具奏以期秉承

聖訓無誤事機所有遵

旨調遣水師仍由楊載福自行奏報緣由繕摺覆陳是否有當

伏乞

皇上聖鑒訓示謹

奏

斟酌進兵兼顧皖南軍務摺

咸豐十年七月初二日

奏爲欽奉

諭旨斟酌進兵暨兼顧皖南軍務恭摺覆奏仰祈

聖鑒事竊臣於六月十六日業將行抵祁門日期恭摺馳報在

案嗣於二十四日承准軍機大臣字寄六月十二日奉

上諭瑞昌奏請催曾國藩兼程赴浙一摺據稱浙省援師及收
集兵勇除由張玉良調攻嘉興外尙須分扼孝豐於潛嘉善等
處現在存兵無多急盼援師方能進規蘇州松江聞曾國藩已
由東流抵徽請飭兼程赴浙會商進剿等語已諭令該將軍卽
將現有兵勇統帶迅速起程進取蘇松不得稍涉觀望惟該將

軍兵力較單亦屬實情曾國藩前奏於行抵徽州後尙須待新募勇到再行前進自爲持重起見第蘇松常等府均屬財賦之區果能早爲規復或可不至糜爛著曾國藩酌度情形如所帶官軍萬人合之瑞昌兵勇足敷勦辦卽著星馳前進將蘇州等府縣城池速籌克復不必再俟新勇其如何取道浙中以便與瑞昌面商各務並著斟酌辦理至張芾督辦皖南軍務不能得力前諭曾國藩以徽甯本該署督兼轄地方如將該處軍務歸併辦理自覺事權歸一令於到徽後察度具奏曾國藩現已渡江著仍遵前旨卽將能否兼顧之處據實奏聞將此由六百里加緊諭令知之欽此又於二十七日承准軍機大臣字寄六月

十五日奉

上諭據曾國藩奏妥籌辦法所稱中路不宜遽進溧陽恐其驅賊南犯擬俟左宗棠李元度鮑超張運蘭等先後到齊北路則直趨池州南路則直趨廣德中路則暫不深入先守徽甯要縣庶免鈔我後路之患自係老成持重之見本日據薛煥奏松江府城於五月二十七日克復現在會督兵團進攻青浦是蘇省軍情漸有起色若得該署督所派援軍分道並進早與瑞昌等軍會合進剿更可大振軍威迅復各城免致東南財賦之區久遭蹂躪該署督務當兼權緩急毋得坐失機宜是爲至要等因欽此仰見

聖謨廣運籌畫精詳曷勝欽悚臣自行抵祁門後浙江撫臣王

有齡派道員孫觀前來催臣赴浙將軍瑞昌亦咨催臣由浙赴

嘉興而甯國被圍緊急張芾屢函屬臣撥兵赴援臣以所部萬

人內僅四千七百人係久戰之士其五千餘人皆係新募之卒

未經見仗不敢輕於一試又以鮑超爲水所阻尙未旋鄂朱品

隆患病未痊不能帶隊張運蘭雖入江西境內撫臣毓科咨商

暫畱袁州以防南贛之賊臣以不援則甯國有坐困之勢赴援

則統將無可派之人正在萬分焦灼忽於六月二十九日接將

軍瑞昌咨稱二十日賊逼杭州省城當經調集各軍奮力擊退

據奸匪供稱賊股回竄徽甯等語又接張芾函開甯國亦獲勝

仗協餉已於二十四日送入府城等語臣前奏八月進勦欽奉
恩旨俞允今浙江逼城之賊業經擊退若鮑超等陸續到齊甯
國保全無恙當可與初次原奏相符至進兵之路凡浙中來信
皆勸臣先赴杭州注重嘉興凡江北來信皆勸臣先攻池州注
重蕪湖欽奉

諭旨飭臣斟酌辦理以臣愚見由杭嘉以至蘇州處處阻水兵
從一路而入必難得手目下張玉良三萬餘人頓兵一面已屬
失勢若臣與瑞昌再以重兵繼之愈覺窘束而不能施展不特
進兵蘇州毫無把握抑且地隘兵多久必生變臣現以統將未
至新軍未齊若往返商辦徒屬虛語卽再三陳奏亦託空言且

待兵將齊集察賊勢最重之處疾趨而痛剿之屆時再行專摺
詳奏仰慰

慈廑

諭旨垂詢徽甯軍務能否兼顧一節

臣前奉五月二十六日

寄諭徽甯軍務如併由該署督督辦自覺事權歸一著曾國藩
於抵徽後察度情形奏明辦理等因欽此當將皖南兵勇甚不
得力俟左宗棠張運蘭等到皖再行詳細奏明請

旨酌奪緣由附片具奏在案茲復奉

諭旨催詢

臣

入徽境已

逾半月畱心察訪張芾自咸豐五年籌

辦徽池防務屢挫賊鋒使不至深入浙境於大局不爲無益惟

所部各軍紀律太寬近日多住民房或帶婦女張芾於各嶺設卡之處並未親出查閱一次卽徽州城守之具亦無預備觀其軍心之懈實已難期再振周天受向以能戰著名本年二月不能扼守廣德致有杭州之變三月不能扼守建平致有東壩之失徽甯兩防歷年取用浙餉約計千萬浙中恃爲長城故本省別無防守之師一旦藩籬盡撤任賊長驅杭人慘遭浩劫百物蕩盡以故浙江官紳士民莫不恨周天受貽誤大局而張芾有督辦之責亦當分任其過

諭旨以賊匪入浙不能堵禦張芾咎無可辭臣固不敢爲之寬解也臣與張芾在京素識近來同歷戎行書問常通稔知該副

都御史學養深沈操行廉正尙爲老成宿望惟治兵非其所長
用人或受朦蔽應如何位置得宜之處

聖主自有權衡非臣下所敢妄擬已革提督周天受貽誤浙省
情罪較重惟從前打仗出力現在甯郡被圍尙能督率將士忍
飢困守其胞弟周天培亦以忠勳殉難相應請

旨可否將周天受仍畱臣營差遣以觀後效出自

聖主鴻裁至徽甯池太等府處處與江浙毗連地方遼闊袤延
七八百里一片逆氛幾無完區臣卽調募齊集人數不滿三萬
正當狂寇壓境之時不敢遂謂調度得宜漸有起色惟係臣兼
轄地方且目下駐師將來進兵皆不離乎皖南自應力籌兼顧

責無旁貸特是徽甯兩防兵數尙眾銅習已深舊欠過多新餉尤缺不裁汰則口食無資一裁汰則變態百出辦理棘手一言難罄臣才力短絀深懼弗勝如奉

旨歸併臣處督辦臣兼顧皖南卽斷不能更顧浙江區區微忱不敢不縷陳於

聖主之前所有欽奉

諭旨斟酌進兵及兼顧徽甯軍務各緣由謹繕摺由五百里具奏是否有當伏乞

皇上聖鑒訓示謹

奏

王叔子

王叔子

王叔子

王叔子

王叔子

王叔子

王叔子

王叔子

王叔子

興辦淮揚水師派員先往籌辦摺

咸豐十年七月初三日

奏爲遵

旨興辦淮揚水師揀派大員先往籌辦並請

簡授實缺恭摺具陳仰祈

聖鑒事竊

臣

於五月十七日奏請預籌三支水師一摺奉

上諭所稱擬設淮揚水師以保裏下河之米各場竈之鹽兼輔淮揚陸軍均屬目前要務應卽興辦等因欽此查蘇省財賦之區淪陷幾徧僅畱裏下河之米各場竈之鹽若不設法保護則東南之利盡棄裏下河通泰各口瀕江南岸之賊時欲乘閒北渡卽運河以內如三汊河萬福橋邵伯鎮等處均係裏河門戶

揚州一軍兵力單薄亦難處處置守必須設立水師專營上下
梭巡協力防剿以輔陸軍所不逮臣前奏聲明江北須造戰船
三百號臣將皖南布置稍定或輕騎馳赴淮安監造或奏派大
員赴淮辦理欽奉

諭旨允准現在甫抵祁門徽甯軍情日緊調募未齊布置未定
暫難分身前往而淮揚水師關係重大必須趕緊籌辦該處久
被賊擾戰船所需木料及油鐵棕纜各具聞俱短絀事屬創始
締造維艱非數月所能集事臣已派都司成名標赴廣東購買
洋礮約冬間可以回營明春可以繞運出淮應卽遴委大員先
行馳往淮揚一帶察度辦理查有按察使銜福建延建邵遺缺

道李鴻章自咸豐三年正月在編修任內奉

旨派同前工部侍郎呂賢基回皖辦理團防在皖北軍營六年
歷著戰功於淮揚情形聞見較確上年五月閒經臣奏赴江西
軍中會督兵勇克復景鎮浮梁因其力辭保舉是以未經奏臚
嗣隨臣周歷鄂皖各處十月閒蒙

恩簡授福建遺缺道臣因襄贊需人未令赴任該員勁氣內斂
才大心細與臣前保之沈葆楨二人並堪膺封疆之寄而李鴻
章研覈兵事於水師竅要尤所究心擬請

旨飭派該員前往淮揚興辦水師擇地開設船廠由兩湖酌帶
委員工匠並由臣商令楊載福彭玉麟於水師營中選派打仗

得力之將弁交該員帶往以資練習抑臣更有請者江北水師設立專營一切饟需費用尤鉅聞江北糧臺供給揚州陸軍已形支絀若水師經費再由該臺籌給誠恐力難兼顧此項水師兼爲保護鹽場疏通引地而設必水師辦成鹽務方有把握二者相輔而行尤須一手經理始則暫分鹽課之銀供水師辦船辦礮之用繼則全仗水師之力爲淮鹽護場護運之兵李鴻章係隔省人員呼應不靈應請

旨改授江北地方實缺乃可措手倘蒙

皇上天恩破格擢授兩淮鹽運使俾得整頓鹽課以濟舟師之餉實於軍務鹽務兩有裨益其現任運司喬松年久任蘇省才

識卓著早邀

聖明洞鑒或可另予

簡擢之處

聖主自有權衡非臣下所敢妄擬凡興舉大事必才與事相副人與地相宜李鴻章籍隸廬州洞悉皖北及兩淮艱苦於袁甲三王夢麟等亦素相投洽如奉

旨允准當飭該員束裝由臨淮繞道前進臣俟皖南各軍到齊立腳漸穩規模漸定明年再親赴淮揚監造水軍並督同該員等辦理鹽漕各事宜以期濟京倉而保重地所有派員興辦淮揚水師並請

奏
簡授實缺各緣由繕摺馳陳伏乞

皇上聖裁訓示謹

奏

黃翼升堪勝淮揚鎮總兵片

咸豐十年七月初三日

再臣於七月初一日承准軍機大臣字寄六月十八日奉

上諭本日據載垣等奏遵旨會議裁撤江南河道總督添設總兵一員請飭酌保候旨簡放一摺江南河道總督既經裁撤添設總兵一員已明降諭旨作為淮揚鎮總兵暫駐清江俟軍務平靖改駐揚州清江地方為南北咽喉最為緊要現在粵捻各匪均未肅清難保不再行窺伺必須久歷戎行深諳韜略之員方堪勝任著袁甲三曾國藩各於所部將領中詳加揀選擇其才略素著曾經出兵打戰謀勇兼全者酌保數員迅速具奏候旨簡放以期防剿得力等因欽此仰見

皇上慎重要地博訪將材莫名欽感遵卽於楚軍水陸各將領中逐加揀選查有總兵銜直隸河閒協副將黃翼升湖南長沙縣人咸豐元年由協標兵丁出師廣西三年六月經臣調營當差嗣派充水師哨官營官身經百戰現管帶水師右營協剿安慶該員治軍嚴整廉勤自矢臣本擬奏派與李鴻章同赴淮揚管帶戰船如蒙

皇上天恩簡授淮揚鎮總兵一缺將來水師辦成更易聯絡一氣以保要區查清江地方眾流環匯河湖襟帶既有河標陸兵駐防亦須水師相爲依附乃可力遏寇氛是否有當伏乞聖主裁酌施行所有遵保堪勝總兵緣由謹附片覆奏請

三

平江縣建忠義祠摺

咸豐十年七月初三日

奏爲平江縣城捐建忠義祠彙祀陣亡員弁勇丁請
旨列入祀典恭摺具陳仰祈

聖鑒事竊惟取義成仁舍生之極軌旌忠表烈厲世之微權我
皇上褒崇節義凡疆場殉難之員莫不

贈官廕爵

予諡建祠其有一軍一邑死事獨多如湖口之水師湖南之湘
鄉均蒙

勅廷專祠列諸祀典所以激勵人心維持風化洵屬無微不至
自粵逆倡亂以來湖南士民戰功特著卽如平江一縣當江鄂

之衝爲省垣之蔽四鄰皆陷一邑獨完計自守界禦賊出境荷
戈如湖北江西皖吳閩浙黔粵川中凡屬楚軍閒多平勇前後
力戰死事者約二千六百餘人茲據統領平江營按察使銜浙
江記名道李元度稟稱該縣本有忠義祠附學宮之外惟地位
頗狹不足以妥眾靈咸豐六年署知縣陳鳳舞勸捐籌款詳准
特建平江忠義祠在武廟之右工未及竣該道上年假歸復籌
集捐費因已成之局完未竟之功廓其規制峻其垣墉旁立官
廳後爲僧舍所購祭田歲可入租三百石爲祭祀牲牢之用遴
派公正紳耆輪流經理以期垂久祠之中龕專祀曾任營官之
贈太僕寺卿知府銜湖北候補同知直隸州何忠駿

贈總兵謚壯節候補參將童添雲五品銜卽選知縣李原濬從
九黃錫宇四員東西龕祔祀武生候補把總李傳綸等六十七
員東西廊祔祀陣亡勇目劉匯湘等二千五百五十三名繕冊
籲懇查照湘鄉忠義祠之例

奏請列入祀典飭地方官春秋致祭以妥忠魂而昭激勸等情
前來臣覆查無異合無籲懇

天恩勅部將湖南平江縣所建忠義祠俯准照各府昭忠祠及
湘鄉縣忠義祠之例列入祀典飭地方官春秋致祭於

聖朝褒忠勵節之道實有裨益除將名冊咨部外所有平江縣
捐建忠義祠緣由謹會同湖南撫臣駱秉章恭摺附驛具奏伏

奏稿卷十一

奏

乞

皇上聖鑒訓示施行謹

奏

行營采訪忠義第一案片

咸豐十年七月初三日

再江蘇安徽各省歷年勦賊陣亡殉難官紳因省垣失守案卷被焚未經隨時查辦者計必不少此次蘇常之陷變起倉卒其遇害官紳士女尤不忍令其湮沒

臣奉


命署理江督後卽於行營設立忠義局委員采訪詳覈事實兼考世系出示徧行曉諭或由司道具詳或由府廳州縣彙報或由該家屬徑稟臣隨時具奏請建總祠總坊其死事尤烈者另建專祠專坊以慰忠魂而維風化茲據甯國縣紳士廩生周文吉等聯名稟稱原任貴州都江通判程枚現年七十四歲原籍舒城縣人因避寇寄居甯國縣方村地方本年二月初二日賊


陷該邑入村擄脅該員端坐厲聲罵賊媳女等矢志不屈賊遂縱火圍燒該員程枚與其胞姪文童程星軫女婿監生高浚並第四媳程高氏第五媳程高氏第三孀媳程張氏親女高程氏等男婦七人同時焚歿其子文生五品軍功程耀甫自外歸集練撲救奮身殺賊連受重傷旋因傷重殞命該員之第二媳程高氏與其孫文童程壇亦於咸豐七年在舒城原籍罵賊被害各等情稟懇請卹前來臣查該員程枚子姪媳婦等先後殉難共十人忠孝節烈萃於一門殊堪嘉憫應懇


聖恩俯准敕部從優議卹並分別

旌表以褒忠節嗣後凡兩江殉義之官紳男婦臣當按詳報之

先後隨時彙奏卽以此次爲第一案理合附片具陳伏乞
聖鑒施行謹奏請
旨







PL
2728
.A1
1876
v.13

曾文正公奏稿

卷之十二目錄



覆奏統籌全局摺

咸豐十年七月十二日

謝授兩江總督

欽差大臣

恩摺

全日

李元度調補皖南道缺摺

全日

欽奉四次

諭旨覆陳摺

七月二十三日

派宋夢蘭辦皖南團練片

收復廣德州片

保毛鴻賓任蘇藩片

恭報進兵日期摺

八月初三日

上海情形已鬆未能卽圖金陵片

請駱秉章暫緩入蜀片

援軍甫進甯郡被陷現籌堵剿摺

八月二十三

皖南立腳稍穩卽分軍先趨蘇境片

欽奉 訓飭懍遵覆陳片

請撥江陝兩省協餉片

覆奏勝保請飛召外援摺

九月初六日

徽州被陷現籌堵剿摺

全日

周天受殉節請卹摺

九月十六日

皖南北近日軍情片

請飭蔣益澧帶勇來皖片

統籌緩急機宜摺

十月初四日

金壇殉難官紳請卹摺

全日

會攻休甯勝仗片

截畱江西漕捐銀片

展緩兩江營員舉劾片

進攻休甯立復黟縣摺

十月二十六日

宋國永等請補實缺片

蕭啟江功績最多摺

全日

覆陳洋人助剿及採米運津摺

十一月初八日

查覆蕭盛遠實蹟片

近日軍情片

左宗棠軍克德興婺源摺

十一月二十八日

建德失守旋經克復摺

全日

近日南岸軍情賊勢片

水師保守湖口克都昌縣摺

十二月十三日

皖南江西全局片

楊載福救拔南陵縣軍民摺

全日

上溪口江灣兩營失陷摺

全日

彭澤軍勝仗摺

全日

終

覆奏統籌全局摺

咸豐十年七月十二日

奏爲欽奉

諭旨統籌全局恭摺覆陳仰祈

聖鑒事竊

臣於七月初七日承准軍機大臣字寄咸豐十年六

月二十四日奉

上諭前據曾國藩奏酌擬變通進兵章程北路趨池州南路趨
廣德中路先守徽甯俟布置稍定後卽親赴淮揚籌辦鹽漕大
江南北兼顧統籌尙爲周妥本日已明降諭旨將曾國藩補授
兩江總督並授爲欽差大臣督辦江南軍務矣上海官軍自攻
克松江以後進攻青浦惟薛煥僻處海隅兵力單弱勦辦恐難

得手瑞昌尙在浙省張玉良收集潰軍進攻嘉興雖獲勝仗亦未收復郡城此時蘇常一帶並無重兵攻剿前因李若珠已患痺疾在江北帶兵未能得力是以命都興阿馳往督辦本日據該將軍奏稱湖北無兵可撥尙在英山駐紮業經寄諭官文等派撥精兵刻卽馳往惟都興阿未到以前江北各軍無人總統深恐賊勢北趨剿辦愈難措手曾國藩現授爲欽差大臣事權歸一責無旁貸大江南北均應妥爲布置著卽飛催左宗棠李元度鮑超張運蘭等到齊由池州廣德分路進兵規復蘇常其江北一帶尤爲緊要應如何布置之處並著先行籌畫免致臨事周章該大臣膺茲重任務當統籌全局迅掃逆氛以副委任

將此由六百里諭令知之欽此仰蒙

聖主委任至重指示周詳欽感之餘祇深悚懼臣自奉

命署理江督所籌進取規模迭經詳晰奏報在案茲

諭旨飭催左宗棠等到齊分路進兵規復蘇常一節查左宗棠之勇選練未齊聞須八月朔日始由湖南起程李元度擬於七月初帶勇由平江起程尙未報行抵何處鮑超因江水封峽不能行舟六月十六日始由夔州起程張運蘭六月二十七日行抵萍鄉適江西撫臣毓科以南贛有警札飭該軍暫紮袁州尙未接臣後二次飛催來皖之札屈指約計李元度張運蘭鮑超等到徽當在七八月間左宗棠到徽當在九月中旬臣前奏由

池州廣德進兵維時廣德有江長貴扼守我軍由此進攻冀與嘉湖各軍聯絡頃接張芾函稱竄杭之賊由安吉孝豐回撲廣德該州城竟於七月初四日失陷江長貴不知下落賊必踞此要地使皖浙之師聲氣隔絕又甯國被圍一月雖經周天受督兵固守而賊仍未退接據探報僞輔王楊七麻子帶池州之賊將自北路往撲甯國新破廣德之賊將自南路往撲甯國甯郡糧少援孤竊恐周天受力難久支軍情變幻旦夕不同鮑超不能於六月趕到皖境既與臣原奏不符江長貴不能一日堅守廣德尤非臣意料所及目下皖南固危乎其危浙江亦防不勝防臣軍調齊以後須一攻廣德一援甯郡甯廣之間又須有一

枝重兵往來策應勢不能繞越皖境而逕趨蘇常此蘇常急難規復之實情也

諭旨又念上海兵力單弱嘉興亦未收復一節前准薛煥咨函松江上海等處水陸人數無多欲由張玉良處分撥三千人未知果調得勁旅否臣相距過遠援應不及近因浙西多事文報阻滯雖彼此各致數函均尙未接覆書據探報僞忠王李壽成帶領賊眾由金陵往犯上海頃聞松江復陷上海舟師大挫危迫殊甚至張玉良嘉興一軍與臣處信息罕通但聞二十九日地道挖城轟塌數丈旋因賊眾堵禦未能成功又微聞將帥不和文武不協相持過久恐生事變臣新膺督師江南之

命本有統轄該軍之責惟現值皖南阤危勢不能舍近而圖遠
且廣德復陷浙事日棘臣與兩處文報動多梗塞此嘉興上海
暫難兼顧之實情也

諭旨垂詢江北一帶如何布置一節臣前於五月十七日奏飭
總兵吳全美李德麟師船全數下駛駐泊焦山瓜洲等處以通
鎮揚兩府之氣而扼逆匪北渡之路又於七月初三日奏派道
員李鴻章興辦淮揚水師以護鹽場而輔陸軍無非爲力保江
北起見惟水師庀材鳩工赤地新立非數月所能就緒臣俟皖
南各城立腳粗穩乃能繞道馳赴淮揚亦非數月所能成行側
身東望焦憤實深都興阿迭奉

諭旨督辦揚州軍務日夜焦灼謀所以速行之法官文胡林翼亦百計經營謀所以資送之法無如事多窒礙迄不能就不特三千勁旅五月口糧鄂省之力一時難以撥付卽弁勇之心亦實不願遠行蓋自湘省至揚州繞道五千餘里上游一水可通人多而氣聚下游百物昂貴人少而勢孤同一應募之勇同一額定之糧其願就鄂就皖而不願赴揚州者情也勢也以臣愚見淮徐等處風氣剛勁不患無可招之勇但患無訓練之人擬卽函商官文都興阿等酌帶楚師千人先行馳往仰慰

聖懷到江北後用楚軍之營制練淮徐之勇丁嚴其禁約寬其期限李鴻章往辦水師亦照此法行之臣明年馳赴淮揚亦照

此法行之餉絀而不改其常戰敗而不變其度期於有成而後止若仗

聖主洪福得一二名將出乎其間則兩淮之勁旅不減三楚之聲威此江北先行籌畫之微意也臣素性愚拙本無長駕遠馭之才力所能勉者惟思勤懇以收得尺得寸之功力所不逮者何敢欺飾以失顧言顧行之義除函商都興阿自行陳奏外所有遵

旨通籌全局緣由謹繕摺由驛六百里覆奏伏乞

皇上聖鑒訓示謹

奏

謝授兩江總督 欽差大臣 恩摺

咸豐十年七月十二日

奏爲恭謝

天恩仰祈

聖鑒事竊

臣

於七月初七日准兵部火票遞到咸豐十年六月

二十四日內閣奉

上諭兩江總督著曾國藩補授並授爲欽差大臣督辦江南軍務欽此當卽恭設香案望

闕叩頭謝

恩訖伏念

臣

材質駑下重遠難勝愧攝篆於兼圻未妥籌夫全

局迺荷

絲綸疊沛節鉞眞除拜

三錫於師中忝專征於閫外處大江南北水火日深之地值各

路軍民雲霓望切之時臣自顧何人謬兼斯任

寵榮非分惶悚莫名惟是戡亂無才分憂有志凡微臣思力所

能及職分所應爲益當殫竭血誠勉圖補救擬漢臣之二表少

酬

聖主高天厚地之恩賡周雅之兩篇願佐

熙朝北伐南征之業所有微臣感激下忱理合專摺附驛叩謝

天恩伏乞

皇上聖鑒謹

奏

硃批知道了卿數載軍營歷練已深惟不可師心自用務期虛
己用人和衷共濟但不可無定見耳欽此

李元度調補皖南道摺

咸豐十年七月十二日

奏爲皖南道員缺緊要請

旨迅賜簡放以重職守事竊

臣

接據署徽甯道江南鹽巡道福

咸稟稱奉浙江巡撫王有齡批示新放皖南道郭志融已於春

間在蘇病故該署道久患痺症雖日就痊可精力尙未復元皖

南道事務殷繁郭志融旣已病故員缺未便久懸懇奏請另行

簡放以重職守等情前來

臣

查皖南道一缺自咸豐五年經部

臣

議定照台灣道之例如府縣委署參撤地丁漕糧等項應由

藩司主政者命盜案件勘解審結應由臬司主政者概歸該道

就近覈辦遇有緊要軍務並准專摺馳奏責任綦重相應奏明

請

旨迅賜簡放以重職守臣尚未接印所有本衙門案卷無從查

閱聞皖南道缺向由督臣酌保請

簡今臣駐軍徽州尤須得人相助爲理查有按察使銜新授浙

江溫處道李元度血誠果毅練達戎機每遇艱危之際獨能貞
固不搖前在江西疊著戰功皖南地勢講求亦熟仰懇

聖恩可否卽以溫處道李元度調補皖南道缺於軍務地方均
有裨益該道玉山守城案內蒙

恩加按察使銜於此缺加銜之例亦屬相符如蒙

俞允應俟廣信布置稍定卽令該道馳赴新任至江南鹽巡道

福咸臣已於六月初三日奏明調營欽奉

諭旨著照所擬辦理該員現署皖南道應俟李元度到任後卽將福咸調營差委所有皖南道缺緊要揀員請

旨簡放緣由謹會同安徽撫臣翁同書恭摺馳奏伏乞

皇上聖鑒訓示施行謹

奏

欽奉四次

諭旨覆陳摺

咸豐十年七月二十三日

奏爲欽奉四次

諭旨恭摺覆陳仰祈

聖鑒事竊

臣

於七月十四日承准軍機大臣字寄七月初一日

奉

上諭周天受奏旌德等處賊匪竄犯甯國郡城被圍急盼援師一摺甯國爲江浙屏蔽倘有疎失則蕪湖等處之賊得與蘇常聯絡剿辦愈難著手曾國藩已抵祁門著卽調派勁旅前往甯國與周天受內外夾擊藉解城圍其蘇常等屬應如何速籌進剿一俟鮑超等到營並著卽行籌辦等因欽此又於七月十五

日承准軍機大臣字寄七月初三日奉

上諭王有齡奏逆匪竄入於潛勢將內犯省城請飭該大臣迅速赴援等語曾國藩若由淳安嚴州轉戰而東先將此股逆匪剿除則皖浙可以保全然後進兵削平江蘇諸郡縣如曾國藩尙未能督兵前往卽催調張運蘭鮑超等迅速到齊兼程前進以顧全局等因欽此又於七月十七日承准軍機大臣字寄七月初五日奉

上諭龐鍾璐奏由浙至蘇必須先復吳江由滬至蘇必須先復崑山由江北至蘇必須由常熟進兵再由丹陽溧陽追躡其後庶可殲除賊匪請飭曾國藩迅速統師南下等語蘇常等郡縣

被匪蹂躪民團尙能殺賊亟望官軍援剿若任久陷賊中恐民心易懈賊守益堅辦理愈難措手著曾國藩體察情形應由何路進兵迅圖規復地方並將辦理情形迅速具奏至所稱常昭兩縣捐餉已竭請飭協濟等語並著曾國藩飭令該地方官就附近完善之區勸捐接濟庶使民團踴躍得以相機攻剿該大臣務當統籌全局迅掃逆氛以慰朕望等因欽此又於二十一日承准軍機大臣字寄七月初九日奉

上諭據瑞昌等奏於潛大股賊匪疊陷臨安餘杭二縣並由餘杭塘竄逼省垣雖經總兵劉季三一軍擊退而省城兵勇能守而不能戰張玉良攻剿嘉興之軍正在得手亦難撤調福建江

西之兵雖經催調到尙需時待援情形自屬非常緊迫著曾國藩仍遵前旨迅速取道入徽卽由淳安嚴州轉戰而東先將此股逆匪撲滅保全浙省再圖規復江蘇諸郡設或該大臣不能親往亦須先派得力之兵前往救援以冀挽回大局等因欽此仰見

聖謨廣運籌示精詳曷勝欽感

臣

於七月十二日遵籌全局摺

內業將甯國危急廣德失陷等情覆奏在案伏查目下軍情自以規復蘇常爲要而由皖南進兵必須能保甯國能復廣德乃有進兵東下之路則必以急援甯國急攻廣德爲要二者力不能兼辦則又以專救甯國爲要然由祁門徽州而入甯郡須分

走旌德涇縣石埭等處現已一片賊氛必須節節掃蕩以分賊
勢而清後路則欲援甯郡又以先勦旌涇石埭三縣爲要臣自
聞甯國被圍之信續撥銀五千兩由張芾派弁轉解因無路可
達中途折回臣催調各軍急切難來日夜旁皇莫知所措茲幸
接據鮑超稟稱已於七月初五日行抵宜昌府張運蘭稟稱十
一日行抵江西省城李元度於十二日亦抵江省計七月底均
可趕到祁門臣擬俟該鎮道等到齊派鮑超率霆營六千由黟
縣以攻石埭張運蘭率老湘營四千由太平以攻涇縣又飭李
元度先往廣信布置防務仍由徽州旌德前進必俟涇旌石三
路肅清直抵甯郡然後臣軍之立腳始定皖南之局勢始安皖

南安則浙江亦安而蘇常亦有可圖若使皖南不安則臣軍且
岌岌自保之不暇又何能屏蔽浙江更何能規復蘇常臣之棉
力必俟八九月閒大戰數次然後視打仗之利鈍定入蘇之遲
速目下兵力未齊上不能慰

聖主宵旰之憂下不能答蘇人雲霓之望此臣之寸心負疚惶
悚無地者也至龐鍾璐所稱由浙至蘇先復吳江此張玉良一
路之事必先克復嘉興然後能達吳江由滬至蘇先復崑山此
薛煥一路之事必先克復松太然後能進崑山由江北至蘇取
道常熟此李若珠一路之事必先分兵過江然後能趨常熟此
三路者聞方自保之不暇未必能遽圖進取若臣軍南赴吳江

仍須由皖南下手北赴常熟仍須從淮揚下手行軍本有次第
賊情時有變更既難僥倖於不可必成之功又豈敢臆斷於不
可逆料之事臣惟有嚴督皖南諸軍速戰一日速進一步以期
仰副

聖厪至常昭捐餉已竭應飭該地方官勸捐妥辦惟祁門距常
熟等處相隔過遠文報不通臣當札飭州縣兼函商紳士設法
籌捐以資接濟至月前竄杭之賊當經擊退由原路退回竄陷
廣德臣已迭次奏明淳安嚴州現俱無事臣自無庸分兵赴援
所有欽奉四次

諭旨恭摺由六百里覆奏伏乞

皇上聖鑒訓示謹

奏

派宋夢蘭辦皖南團練片

咸豐十年七月二十三日

再承准軍機大臣字寄六月二十七日奉

上諭現在各省舉行團練皖南地方緊要自應一律辦理著曾國藩察看情形擇其諳練軍務素繫人望者酌保一員迅速奏聞候旨簡派卽令督辦皖南團練事宜等因欽此伏查團練本是良法然奉行不善縣官徒借以歛費局紳亦從而分肥賊至則先行潰逃賊退則重加苛派轉爲地方之弊政臣自咸豐二年奉

旨辦團初次摺內卽奏明自行練勇一千是臣所辦者乃官勇非團丁也嗣後經過各省從未見有團練能專打一股專守一

城者不過隨官兵之後勝則貪財敗則先奔常藉口於工食之
太少而辦理歧異者往往多給錢文團丁所領之餉與臣之官
勇例價相同且或有過之者其取之民間無非勸捐抽釐之類
是於團練已失其本義於軍餉又大有妨礙本年五月臣奉
命署理江督卽曉諭官民團練之事當擇地而辦之擇人而辦
之蓋欲得其利不得不去其弊也茲復欽奉

諭旨舉行皖南團練查皖南嶺隘紛歧若築礮設卡一夫當關
萬眾却步臣俟進兵後擬委賢員於徽甯各要隘擇地築礮以
資防守必須地方廉正紳士會同督勸過江以來畱心訪察聞
有丁憂在籍之翰林院編修宋夢蘭徽州歙縣人本年春間賊

由太平縣圖竄箬嶺該員督帶練丁協力嚴守品行膽識眾論翕然相應請

旨飭派宋夢蘭辦理皖南團練事宜會同委員董勸各屬紳民興築碉寨其未經克復者官勇攻剿概不令團丁隨往已經克復者紳耆修碉團丁守之庶幾軍民兩利名實相符如蒙俞允可否將宋夢蘭

賞加翰林院侍講銜以示優異之處出自

皇上天恩所有遵

旨酌擬皖南團練人員附片覆陳伏乞

皇上聖鑒訓示謹

奏

奏

四

收復廣德州片

咸豐十年七月二十三日

再正繕摺閔淮張芾函稱據江長貴來信廣德州城於十四日寅刻收復賊向建平束壩溧陽一帶竄去周天受來信甯廣仍爲賊阻又報探有賊二萬由池州竄併石埭各等語臣查廣德收復暫由浙軍戍守俟左宗棠新軍一到卽由廣德先入蘇境目下救援甯國仍應由石埭涇旌三路前進理合附片具陳伏乞

皇上聖鑒謹奏

一、
二、
三、
四、
五、
六、
七、
八、
九、
十、

一、
二、
三、
四、
五、
六、
七、
八、
九、
十、

一、
二、
三、
四、
五、
六、
七、
八、
九、
十、

一、
二、
三、
四、
五、
六、
七、
八、
九、
十、

一、
二、
三、
四、
五、
六、
七、
八、
九、
十、

一、
二、
三、
四、
五、
六、
七、
八、
九、
十、

一、
二、
三、
四、
五、
六、
七、
八、
九、
十、

一、
二、
三、
四、
五、
六、
七、
八、
九、
十、

保毛鴻賓任蘇藩片

咸豐十年七月二十三日

再承准軍機大臣字寄六月二十三日奉

上諭江蘇省垣陷後藩司一缺尙未簡放有人現在籌畫餉需撫恤地方最關緊要必得賢能素著克理繁劇之員方能勝任著曾國藩薛煥於所屬司道各員內秉公簡擇會同酌保二員迅速具奏候朕簡放等因欽此查蘇省官員多往上海臣尙未接見不能周知江西各員現多派有軍務緊要事件欽奉

諭旨飭於所屬司道秉公揀擇查有安徽按察使毛鴻賓樸實廉正練習吏事忠愛之忱鬱於中而溢於顏面昨經官文等會奏請飭該臬司赴皖北總理楚軍營務兼辦皖南北地方事宜

業荷

恩准在案

臣

前奏明江蘇藩司隨撫

臣

同駐臬司隨

臣

同駐欽

奉寄

諭臬司湯雲松已令幫同龐鍾璐辦理團練飭

臣

酌量調派等

因欽此

臣

查湯雲松幫辦蘇屬團練勢難繞赴

臣

營如蒙

皇上天恩將毛鴻賓升授蘇藩卽飭該司隨

臣

同駐一處俾

臣

得專心軍務而地方事件之應恪遵成法者交毛鴻賓綜理庶

紀綱不至久弛臬司湯雲松卽隨撫

臣

同駐一處就近團練一

轉移閒實屬兩有裨益是否有當伏乞

聖裁再祁門距上海過遠文報隔絕未及與撫

臣

薛煥會商

臣

保一人仍商令薛煥另保一人冀與會保二員

諭旨相符除移咨外謹附片覆

奏請

旨

恭報進兵日期摺

咸豐十年八月初三日

奏爲恭報進兵日期仰祈

聖鑒事竊甯國府城圍困日久未解臣俟各軍到齊擬由涇旌
石三縣分路進援各情業於七月二十三日覆奏在案旋據布
政使銜河南開歸陳許道張運蘭於二十四日馳抵祁門所部
各營除畱防郴州兩隊尙未報到外其餘三千人均陸續到祁
阻雨三日於二十八日拔隊由徽州進旌德以援甯郡又據綏
靖鎮總兵鮑超稟已於七月十八日自武昌開船東下八月初
旬必抵祁門因飭令代統該軍之副將宋國永先帶靈字營六
千餘人於八月初三日拔隊由太平進攻涇縣如鮑超日內趕

到卽令赴營督率無論涇城能否速下均令張運蘭直赴甯國
速解郡城之圍以安萬眾之心其石埭池州賊眾往來時圖內
竄現尙無得力大隊可以派往臣須暫駐祁門兼籌扼守李元
度所部三千人行抵江西貴溪縣境緣皖南進剿喫緊已改調
來徽再飭陸續進發先清腹地若欲規復蘇常須待左宗棠一
軍到皖扼駐廣德始能漸入蘇境所有調派進兵日期理合繕
摺由驛六百里具陳伏乞

皇上聖鑒謹

奏

上海情形已鬆未能卽圖金陵片

咸豐十年八月初二日

再承准軍機大臣字寄七月十八日奉

上諭上海關係甚大薛煥嬰城固守專待援兵曾國藩相距較遠兵將未齊誠恐緩不濟急著瑞昌王有齡張玉良迅速派員帶領精銳四千人前赴上海竭力救援據薛煥片奏江南賊匪滋蔓難圖惟以重兵直搗金陵該逆必回顧根本等語著曾國藩體察情形或卽先搗金陵亦可牽制賊勢等因欽此

臣前

聞上海被圍正增焦急旋准張芾鈔寄王有齡來函滬賊業經擊退併股南趨是上海情形已鬆當能自保至直搗金陵一節

臣本有此意五六兩月疊次奏報皆注意專重金陵亮蒙

聖明鑒察惟目前徧地賊氛須鮑超張運蘭等節節攻勦先解甯國之圍左宗棠軍至廣德後再添大隊由宜興溧陽而入庶可漸圖金陵謹附片覆陳伏乞

皇上聖鑒謹

奏

請駱秉章暫緩入蜀片

咸豐十年八月初三日

正封摺聞接准王有齡兩次咨留張玉良嘉興大營於七月二十三日後路爲賊所包遂至全軍潰退張玉良受傷退至石門賊復攻陷石門距省甚近杭城圍急請分隊救援等語臣奉旨接辦皖南軍務甯郡被圍兩月周天受困守孤城屢次求援臣亦屢次應允現派鮑超張運蘭由涇旌兩路赴援甫經拔隊成行斷不能失信於甯國而改援浙江且浙省賊勢浩大亦非三五千人所可能救全臣處別無大隊可撥必須左宗棠新軍抵徽配足萬人乃可赴杭援剿特駱秉章奉督辦四川軍務之命奏明抽調湖南防兵又奏請左宗棠入蜀湖南官紳因吳蜀

兩處征調本省空虚人心驚恐是以左宗棠遲遲未能成行臣聞逆賊石達開尙在廣西并聞久無其人四川縱或危亂尙在半年以後浙江之貼危則在一月以內卽皖南江西之安危亦在兩三月之內緩急情形迥殊合無仰懇

天恩敕令駱秉章暫緩入蜀湖南防兵暫不抽動俾左宗棠晝夜兼程來皖合兩湖江西官紳之全力共救浙而攻蘇或有補於萬一臣冒昧干請不勝惶恐之至除會商張芾先派徽防各軍援浙外謹附片具奏請

旨

援軍甫進甯郡被陷現籌堵剿

咸豐十年八月二十三

奏爲

臣

軍甫經前進甯國府城被陷徽郡戒嚴現在籌辦堵剿

情形恭摺奏祈

聖鑒事竊張運蘭鮑超兩軍由祁門進兵日期業於初三日專摺馳報並聲明鮑超尙未到營暫令副將宋國永代統該軍在案張運蘭於初八日帶隊行抵旌德探聞涇縣之賊竄踞東岸長興建平之賊又乘虛竄襲廣德州逆酋四眼狗竄踞甯國縣該道防賊抄後暫紮旌德與宋國永一軍東西援應宋國永於初六日行抵長園探聞石埭大股賊竄入鐵家嶺三叉嶺所有徽軍原防太平甘棠之副將余永椿參將袁國祥等營盤被陷

宋國永卽派五營紫山口兩營紫烏泥關三營當前敵初七日辰刻見余永椿等潰兵及難民絡繹上擁逆眾繞過太邑約三四千人直撲我營當卽派隊迎戰該逆紛紛潰退初八九日宋國永督隊追賊至太平山口一帶旋卽進紮甘棠分布各嶺自廣德再陷四眼狗踞甯國縣賴裕新踞涇縣僞輔王楊七麻子攻圍甯郡八月初一以後周天受與徽州祁門文報不通臣深爲焦急飭張運蘭宋國永捲塘疾進十六日忽接周天受十一日戌刻密書稱郡北四十里竹塘地方副將朱景山營壘於初九日申刻失陷城北廟埠順勇營盤於十一日失陷城內糧藥俱盡勢將不支等情正在飛催馳援十七日接探報則甯郡已

於十二日戌刻失守旋據張運蘭稟稱有副將熊廷芳自甯郡潰圍退至旌德面稱十一日廟埠失利糧路阻絕城外尙有營壘十餘座十二日於北門外出六成隊互有殺傷未刻大雨如注火藥不燃賊乘勢撲入各營同時潰散賊分踞我營拋擲火器入城周天受令百姓上城守禦各隊兵勇開南門衝出千餘人城池遂陷周天受及道府以下各官不知下落等語伏查甯防兵勇近七千人堅守七十餘日屢經擊退賊匪乃自七月底至八月初旬陳楊古賴各逆目四面麇至糧盡援絕軍心離散一朝潰決實堪痛惜臣迭次奏明調募各軍擬七月取齊八月進剿原冀速援甯郡先解城圍再圖進取乃調募三月之久尙

宋史紀事本末卷之二十二
未畢集僅張運蘭三千人於七月底來祁祁門距甯郡五百餘里張運蘭馳抵旌德甯邑狗賊伺其右涇縣賴賊阻其前兵力過單勢難獨進宋國永馳抵太平因徽州有余永椿之敗西路未清該二員尙非赴援不力應免置議李元度於八月十六日帶平江勇三千抵徽已在甯郡失事之後暫令接辦徽防事務鮑超於春閒請假三月乃六月閒始由蜀起行踰期已久七月二十六日自英山經過至八月二十日始到祁門使該鎮如期抵營督率進攻卽未必速解甯圍尙可以牽制悍賊遷延貽誤咎實難辭姑念其苦戰六年驍勇罕匹相應請

旨將綏靖鎮總兵鮑超革去勇號以示薄懲仍責令督軍進剿

力圖克復至浙江記名道廖士彥本係周天受文案委員飭令赴浙催餉嗣浙省撥餉一萬臣處撥銀五千兩由張芾委該道協同營員護解餉銀迅往接濟該道深知甯郡危迫原可乘甯邑無賊之時輕賫閒道速解至郡乃沿途逗遛復聞警折回致甯軍因飢敗潰尤屬畏葸無能應請

旨將廖士彥卽行革職以示懲儆臣甫經奉

命接辦皖南軍務兵將未齊派援未至甯郡卽已失守亦有應得之咎併請

旨將臣交部議處甯郡之陷已逾十日周天受捐軀殉節自無疑義惟未接確實稟報應俟專員查明另摺奏請

賜卹其竹塘廟埠營盤被陷及城陷之時文武殉難員弁亦俟查明另案開單請卹皖南鎮陳大富駐紮南陵堅守半年今甯國既失南陵孤懸賊中萬難獨守臣已三次飛書囑其自拔出城潛至江邊由水師接送上游以圖再振甯郡既失嶺外各股悍逆乘勝內撲徽績祁黟處處交警臣仍駐扼祁門飭李元度防守徽州添派禮字及河溪等四營馳往績溪協防張運蘭仍駐旌德鮑超一軍仍駐太平堅守靜鎮以伺逆賊之隙飛催左宗棠新軍倍道來援共圖克復甯廣進規蘇常以慰宸廑而符原議所有援軍甫進甯郡失陷現籌布置各緣由專摺由驛六百里具奏伏乞

皇上聖鑒訓示謹
奏

卷之十一

四

皖南立腳稍穩卽分軍先趨蘇境片

咸豐十年八月二十三日

再臣前奏通籌大局不撤安慶之圍以取上游之勢調募兵勇原擬七月取齊八月進剿翼從廣德一路疾趨蘇境庶幾以後之速補前之遲或可求諒於人不料廣德再失甯國又陷八月將盡兵將尙未畢集不特不能救浙圖蘇並皖南亦岌岌可慮上無以紓

聖主宵旰之憂下無以慰吳人雲霓之望寸心愧憤無地自容然細察地勢舍此別無下手之方但使陳楊諸悍賊盡來皖南分救安慶則於臣處雖日形竭蹶於下游或稍得蘇息亦臣之所至願總之臣身在皖南心懸江浙財賦菁華之地蹂躪日甚

一日卽餉源日絀一日生靈困苦所不待言

聖主軫念東南

臣

何敢不以

聖主之心爲心蘇人痛深水火

臣

何忍不以蘇人之患爲患俟

皖南立腳稍穩卽當分派一路先趨蘇境以慰宸廑而符原議爲此瀝情附片陳明伏乞

皇上聖鑒謹

奏

欽奉

訓飭懷遵覆陳片

咸豐十年八月二十三日

再臣於八月初五日准兵部火票遞回恭謝

天恩一摺奉

硃批知道了卿數載軍營歷練已深惟不可師心自用務期虛已用人和衷共濟但不可無定見耳欽此仰蒙

皇上啟牖愚蒙指示親切跪聆之下感悚莫名

臣

賦質迂拘近

年閱歷漸多竊見兵興十載而軍政吏治二者積習未改甚或日趨日下何以挽回劫運是以痛心疾首深自刻責與將士約先求勿騷擾百姓然後能殺敵致果與官吏約先求勿沾染壞習然後能潔已奉公臣以困勉自勵亦以勸誡僚屬而才智短

紕措施失當誠恐有師心自用之處茲奉

聖諭惟有敬謹省察不敢師心而務要虛心以收集思廣益之

效勿存成見而須有定見貴審輕重緩急之宜至與各省相交

際兩湖江西督撫四人與臣水乳交融實屬和衷共濟足慰

慈庠浙江屢次請援情詞迫切臣既不能自往又不能撥兵期

望之極未免疑怨近日漸知臣兵力之薄亦已坦然相諒至江

蘇撫臣暨各官紳則但有期望並無疑怨每次請援之信呼籲

之聲耳不忍聞口不忍讀臣忝竊高位又竊虛名但有自責自

勵求濟時艱斷不敢稍存意見上貽

君父之憂所有欽奉

訓飭懍遵感激下忱附片覆陳伏乞
皇上聖鑒謹
奏

請撥江陝兩省協餉片

咸豐十年八月二十三日

再臣自奉江督之

命久思奏請部撥鉅餉因念時事艱難各省窘絀是以不敢具奏仰勞

聖慮茲復接辦皖南軍務合

臣

處楚軍與徽甯兩防原兵共五

萬餘人月需三十餘萬兩

臣

所收江西牙釐七月分不滿九萬

不敷之數太多江西係

臣

兼轄之省自應循照部議隨時通融

商辦至皖南徽防之餉歷奉

諭旨江西每月協解八萬近來僅解三萬少或二萬甯防之餉

歷奉

諭旨飭湖北湖南協解尚未解過一次該三省庫藏支絀皆臣

素所深知江西撫臣毓科新膺疆寄每思力顧大局以報

聖恩無奈本省南北兩路用兵入款日減欠餉日多京餉協餉

皆難周轉日夜憂灼與臣謀裁江西之兵以湊解京之款湖北

督臣撫臣前數年籌餉最旺本年因江浙路梗蜀鹽不通釐務

迴不如昔甚至安慶一軍反向臣處索餉臣本管無可籌之地

鄰省無實協之銀皖南軍務實難支持合無籲懇

天恩飭令江西每月將漕折銀協解五萬兩內三萬撥濟徽防

仍仿張芾之舊例二萬兩撥濟甯防以收目前之潰兵仍懇

聖恩飭下陝西每月協濟銀二萬兩解至湖北交官文等專發

安慶一軍解三箇月卽行截止臣具有天良斷不肯妄行籲請
罔恤時艱至湖南奉部撥解甯防之餉臣遵

旨自行嚴催俟實在解到再行奏聞謹附片請
旨

卷之二

三

覆奏勝保請飛召外援摺

咸豐十年九月初六日

奏爲欽奉

諭旨恭摺覆奏仰祈

聖鑒事竊

臣

於八月二十六日承准軍機大臣字寄咸豐十年

八月十一日奉

上諭本日勝保奏夷氛逼近闕下請飛召外援以資夾擊一摺據稱用兵之道全貴以長擊短逆夷專以火器見長若我軍能奮身撲進兵刃相接賊之鎗礮近無所施必能大捷蒙古京旗兵丁不能奮身擊刺惟川楚健勇能俯身柔進與賊相搏逆夷定可大受懲創請飭下袁甲三等各於川楚勇中共挑選得力

若干名派員管帶卽行起程剋日赴京以解危急等語逆夷犯順奪我大沽礮臺占據天津撫議未成現已帶兵至通州以西距京咫尺僧格林沁等兵屢失利都城戒嚴情形萬分危急現在軍營川楚各勇均甚得力著曾國藩袁甲三各選川楚精勇二三千名卽令鮑超張得勝管帶並著慶廉於新募彝勇及各起川楚勇中挑選得力者數千名卽派副將黃得魁游擊趙喜義管帶安徽苗練向稱勇敢著翁同書傅振邦飭令苗沛霖遴選練丁數千名派委委員管帶均著兼程前進剋日赴京交勝保調遣勿得藉詞延宕坐視君國之急惟有殷盼大兵雲集迅掃逆氛同膺懋賞是爲至要將此由六百里加緊各諭令知之

欽此跪讀之下神魂震越痛憤無地是日又聞徽州失守之信旋又接勝保咨敬悉

聖駕巡幸熱河臣既自恨軍威不振甫接皖南防務旬日之間兩郡失陷又值夷氛內犯憑陵郊甸東望吳越莫分

聖主累歲之憂北望灤陽驚聞

君父非常之變且愧且憤涕零如雨而以新軍敗潰又不得不強顏撫慰鎮定人心鮑超一軍自甯國失後漸紮太平自徽州失後又令其回駐漁亭以遏寇氛欽奉

諭旨飭鮑超赴京交勝保調遣竊計自徽州至京五千餘里步隊趲程須三箇月乃可趕到而逆夷去都城僅數十里安危之

幾想不出八九兩月之內鮑超若於十一月抵京殊恐緩不濟
急若逆夷凶頑猶豫相持果至數月之久則楚軍入援豈可僅
以鮑超應

詔應懇

天恩於臣與胡林翼二人中飭派一人帶兵北上冀效尺寸之
勞稍雪敷天之憤非敢謂臣與胡林翼二人遂能陷陣衝鋒殺
敵致果也特以受

恩最深任事日久目前可帶湘鄂之勇途次可索齊豫之餉呼
應較靈集事較速鮑超雖號驍雄之將究非致遠之才兵勇未
必樂從鄰餉尤難應手縱使卽日飭令起程而弁勇懷觀望之

心途次無主持之人必致展轉濡滯本年四月初五日將軍都興阿奉馳赴揚州之

命卽於初十日拜摺起程厥後因楚勇憚遠行之勞途中虞餉項之缺遷延至八月十九日乃果成行今若令鮑超率師北上卽再四嚴催亦不免於遷延度才審勢皆懼無濟如蒙

聖恩於臣與胡林翼二人中飭派一人督師北向護衛

京畿則人數稍多裨益較大惟臣若蒙

欽派北上則當與左宗棠同行皖南暫不能進兵祇能退守江西境內胡林翼若蒙

欽派北上則當與李續宜同行皖北暫不能進兵祇能退守湖

北境內俟該夷就撫之後仍可率師南旋再圖恢復皖吳臣等雖均有封疆之責而臣國藩本未接印胡林翼尙有督臣經理皆無交卸事件一經

派出數日即可就道區區微忱伏乞

聖慈垂鑒所有欽奉

諭旨恭摺由驛六百里加緊覆奏伏乞

皇上訓示施行謹

奏

徽州被陷現籌堵剿摺

咸豐十年九月初六日

奏爲大股悍賊由績溪竄入徽州府城猝被攻陷現籌堵剿情形恭摺奏祈

聖鑒事竊甯郡失守案內臣奏明僞英王陳玉成帶大股悍賊屯踞甯國縣旋經探確踞甯邑者非陳玉成乃僞侍王李世賢也八月十八日由胡樂司竄叢山關及樓下各隘口皖南道李元度於十六日帶勇三千抵徽接防聞叢山關告警卽於十七日派肅字平字二營由績溪前進十九日出隊分兩路進剿一走叢山關一走樓下各行五里許而原防兵勇已潰肅字營營官同知童梅華督隊猛擊賊敗該營追出關外伏賊突起從嶺

欽定四庫全書

三

尖翻下包抄我後童梅華身受鎗傷登時陣亡弁勇傷亡百餘人平字營將到樓下各卡已破數重該營大呼衝陣追至卡上斃賊百餘正酣戰間聞肅字營失利而止是夜間道趨回賊乘勢竄過績溪張運蘭嶺外旌德之軍與李元度嶺內徽軍中間已被賊隔斷矣二十一日張運蘭探知大股賊進踞楊溪一帶派一三四旗從中邀擊行五十餘里望見賊卡整隊穩立少頃有黃衣騎馬賊十餘名步賊數百衝出街口餘眾迤邐分路來撲約二萬餘人我軍鎗礮並施鏖戰數時斃賊馬數十匹悍賊一千餘名賊紛紛潰走墜崖落澗死者無算追過板橋收隊次日仍回旌德

臣

因徽州賊勢浩大李元度兵力甚單先由祁門

抽派禮字河溪各營二千餘人倍道馳援飭於徽城外堅築濠壘以靜制動乃李元度以賊逼城下逐日出隊搦戰修築不及又張芾於二十日由徽起程北上兵勇率開口糧力爲排解糾結不清營壘未成賊已大至二十四日僞侍王李世賢同掄天義通天義贊天義諸逆首共帶四萬餘人直撲徽城更番誘戰李元度親督各營出城接仗自辰至午斃賊數百嶺後伏賊併出抄我兩翼眾寡不支禮字河溪各營由西門大路退回休甯李元度率平江四營入城固守賊卽跟蹤圍攻四門因西門城垣坍塌又無堞口是夜三更乘陰雨黑暗專攻此門勢極危險李元度身臥城頭竭力堵禦天明賊退二十五日申酉之間賊

伏西門民房鑿牆對城施放火鎗守陣弁勇站腳不住賊眾卽緣梯直上李元度趕調各門隊伍來救賊已四面扒城而入府城遂陷迄今十日因賊氛隔阻尙未聞李元度下落臣自接李元度圍城中飛書求救卽調張運蘭由旌德入援鮑超由太平入援無如城大而圯紳民搬徙一空兵勇僅二千有奇不敷分布又係新募之卒由湖南遠來甫經到徽竟不能支持數日以待援師實堪痛惜臣調度無方咎無可辭應請

旨將

臣

交部議處現在各股悍賊盤踞徽郡休甯及嶺外旌涇

太石各縣有分竄浙江上犯祁門之意不得已檄調鮑超回駐漁亭張運蘭回駐黟縣以遏狂寇而定人心並咨商左宗棠迅

督所部赴樂平婺源一帶以防徽州竄江西之路俟賊勢稍定再行合力進剿除查明徽城文武下落並殉難員弁再行彙報外所有徽州失守現籌堵剿各情謹繕摺馳陳伏乞

皇上聖鑒訓示謹

奏

卷之八

七

周天受殉節請卹摺 咸豐十年九月十六日

奏爲查明提督周天受殉節情形請

旨賜卹並徽甯在事人員分別陳奏仰祈

聖鑒事竊甯國府城失陷 臣於八月二十三日奏報聲明已革

提督周天受必已殉難嗣據候補副將林保參將熊廷芳都司

潘樑柱鄧在綸暨紳士湯敏等先後自甯國逃出來至 臣營均

稱八月十二日甯國城中糧米罄盡已無生理周天受囑各將

弁帶兵勇自南門衝出親策馬送之將弁及道府各官跪請周

天受出城徐圖再振周天受誓以身殉不肯出城黃昏時羣賊

蠶人旋即遇害又據署皖南道福咸之家丁宋林稟稱郡城破

時家主福咸出戰於南門街上遇賊身受二傷吟付宋林速行
奔至祁門稟告總督行營然後至泰州迎接眷口送京旋卽殉
難等情並據面稟稱甯國府知府顏培文宣城縣知縣王乃晉
均已殉難臣伏查已革湖南提督周天受堅守七十餘日援盡
糧絕軍民愛戴城破身殉大節凜然其胞弟周天培去年在江
北殉節胞弟周天孚本年七月十六日在金壇殉節亦係堅守
孤城力竭不屈一門忠勳貞烈可風周天受應請開復原官照
提督例從優

賜卹並請於甯國府建立專祠仍於四川省城及本縣建立周
天受周天培周天孚三人祠宇以褒忠義而昭激勸江甯巡道

福咸所署皖南道缺業已另放有人猶復同守危城效死弗去
應請與甯國府知府顏培文宣城縣知縣王乃晉暨竹塘營內
初九日殉節之永州營游擊副將朱景山均照本職從優
議卹附祀周天受甯國祠內以慰忠魂其餘甯國文武員弁數
十人俟確切查明續行具奏請卹至徽州之陷皖南道李元度
躁擾愾諫旣不穩修營壘又不堅守待援僅守一晝夜而潰貽
誤大局責無可辭道銜徽州府知府劉兆璜歙縣知縣羅德隆
徽州營參將文芳身任地方均有應得之咎相應請
旨將李元度革職拏問以示懲儆劉兆璜羅德隆文芳均行革
職其打仗不力之候補參將鎮筓右營游擊楊鎮魁候補游擊

蕭以德守備鄒良佐都司姚才立均請革職都司銜孔旭日千
總余大勝管帶親兵敗不歸隊輕棄主將請

旨卽行正法以肅軍律至十九日叢山關力戰陣亡之同知童
梅華二十四日力戰陣亡之守備張斐文二員均請交部從優
賜卹其餘殉難官紳查明續行奏咨辦理所有提督周天受殉
節情形及徽甯在事人員分別陳奏伏乞

皇上聖鑒訓示施行謹
奏

皖南北近日軍情片

咸豐十年九月十六日

再皖南軍務近日因天雨連綿鮑超張運蘭兩軍均未進兵左宗棠於九月初五日自南昌開船亦因風雨阻隔尚未據行抵樂平其徽州休甯之賊盤踞兩城聲言以大股來犯祁門臣處老營兵力雖單營壘尙堅或可無虞所慮者不由婺源以竄江西卽由嚴州以竄浙江耳皖北軍情聞定遠官軍三四萬人概行潰退壽州六安俱形喫緊據探報逆首四眼狗欲分軍兩大枝包襲楚師之後以解安慶之圍計九十兩月南北兩岸俱有大戰仰託

聖主威福若能大捷數次痛挫兇鋒庶可振南服之軍威卽可

奏
分兵北上理合附片具奏仰慰

聖廑謹

奏

請飭蔣益澧帶勇來皖片

咸豐十年九月十六日

再自金陵師潰嘉興復敗下游羣賊毫無瞻顧全力上犯皖南徽甯迭陷岌岌可慮皖北自定遠挫失楚師亦有難支之勢現

經臣奏請

諭旨帶兵北上護衛

京畿如果奉

旨派出則抽撥北行愈分愈單不特不能規復皖南皖北並恐難以保全兩湖江西日夜焦思殊乏善策查前任廣西布政使降補道蔣益澧英勇果毅饒有識畧往年隨臣勦賊屢著戰功現在廣西大股經湘粵官兵痛勦之後繼以解散已就蕩平相

應請

旨敕下廣西撫臣劉長佑卽飭蔣益澧率所部三千人迅由江西入皖會合左宗棠一軍併力東征以期共濟時艱其餉項軍火入江西後卽由臣處總糧臺支應以利軍行是否有當謹附片具奏請

旨

統籌緩急機宜摺

咸豐十年十月初四日

奏爲欽奉

諭旨統籌緩急機宜恭摺具陳仰祈

聖鑒事

臣於九月十八日承准軍機大臣字寄八月二十九

日奉

上諭據薛煥奏蘇省民團可用惟無官兵爲之倡率請飭曾國藩分撥精銳五六千人統以謀勇兼全之大員取道浙境以達松江得此生力軍固守海隅辦理較有把握現在蘇省常昭已陷上海岌岌援兵不至亦恐難支著曾國藩酌量情形速籌援救是爲至要等因欽此又二十八日承准軍機大臣字寄九月

十三日奉

上諭巴棟阿奏蘇常大股逆匪攻撲鎮江請飭曾國藩迅速統
師來南會合進攻等語據稱賊於八月二十七日圍撲鎮城經
巴棟阿督率馮子材等出城奮擊江面艇船亦開礮協剿相持
三晝夜不退等語江蘇自常昭失守以後惟有鎮江一城孤懸
江岸必須竭力保全以爲進規蘇常之地雖經巴棟阿等勉力
支持無如餉絀兵單金陵之賊亦有下竄之信甚屬可慮前閱
曾國藩奏摺知該大臣刻刻以蘇常爲念鎮江倘有疎虞則江
南賊勢聯爲一片異日進兵更爲費手著該大臣統籌兼顧迅
撥勁旅馳往援救務須設法保全等因欽此

臣查規復蘇常分

救鎮江上海皆臣職分最要之事亦臣志所欲爲而不能卽副

刻刻難安之事仰荷

聖慈塵慮指示方略至再至三欽佩之餘彌增愧悚臣前疊次

奏明調募兵勇由皖南取道入蘇彼時徽甯二府廣德一州皆

尙無恙擬八九月間各軍齊集卽可分路進取不料鮑超張運

蘭之師未至而廣德再失臣接防皖南十日而甯國卽陷李元

度抵任八日而徽郡休甯繼失事機不幸殊非臣始意所及其

故由於嘉興潰而浙中無牽制之師金壇常昭陷而江左有長

驅之勢各股悍賊無所顧忌遂得全力上犯阻我進兵之路適

值連旬淫雨萬難進戰賊分踞徽休兩城並聲言抄撲祁門後

路臣正在竭力布置間又聞夷逆竄逼京城義應率師入衛旁
皇四顧日夜憂憤而皖賊之分竄浙江者又迭陷嚴州淳安各
城浙江之衢州江西之廣信紛紛告急屢接瑞昌王有齡咨臣
請分軍繞出浙境與張玉良前後夾剿又搜獲僞文逆首陳
玉成糾合李壽成各賊由北岸廬六一帶上犯楊雄青李世賢
各賊由南岸徽池一帶上犯急救安慶之圍計甚兇狡查東流
建德毘連饒州景德鎮賊若乘虛竄入則江西大局俱爲掣動
幸左宗棠一軍於九月十五日行抵樂平臣飛函商令暫紮該
縣如饒州有警則赴西北截剿如廣信有警則赴東路截剿先
布遠勢伺賊所向而後應之並飭鮑超張運蘭乘雨霽拔營進

攻休甯已於二十九日獲一勝仗以目前情形而論必須將各路防兵安置稍穩仍分一軍由開化華埠橫出外則與張玉良等夾擊嚴州之賊內則與鮑超夾擊徽州之賊使之復退出嶺外然後江西可保浙省可安而皖南之立腳可定臣處止左宗棠鮑超張運蘭三軍尙爲得力已有應接不暇之勢如奉

旨派臣入援則此三軍中必須抽出一軍隨同北上力量更單臣之愚見俟奉到

批摺若責令專謀皖吳卽將皖南設法經營苟立腳粗穩臣當於今臘明正親率馬步數千由皖北繞赴淮揚就近與薛煥巴棟阿會合聯絡相機策應仍一面嚴防江賊北竄之路以維全

局而符原議至由徽繞浙江以至松江東有嚴州之賊西有嘉興之賊節節梗阻實難繞越薛煥勇畧素裕兵數雖少當能力扼海隅以待臣至淮揚時商籌辦理鎮江兵勇尙有萬餘人江面又有吳全美李德麟艇船新往果皆奮勇用命似亦可爲數月之守所有統籌緩急機宜各緣由恭摺由驛五百里覆陳伏乞

皇上聖鑒訓示謹

奏

金壇殉難官紳請卹摺

咸豐十年十月初四日

奏爲江蘇金壇縣被陷查明守城殉難官紳恭摺奏請

恩卹仰祈

聖鑒事竊據鎮江府知府師榮光詳稱金壇縣自四月初一日復被大股逆匪圍攻經駐守該縣前高州鎮總兵蕭知音參將艾得勝周天孚同知銜署金壇縣知縣李淮督同總局董事吳秉禮等激勵軍民竭力抵禦晝則開門接仗夜則縋城劫營數月以來任賊百計環攻堅守不退屢募死士潛出重圍詣各大營求救柰圍久援絕藥盡糧匱仍復搜括婦女釵環以助餉需剗削草根樹皮以資民食迨七月十六日守備馬得勝外委王

文榮率奇勝勇投入賊營暗約川奮勇爲內應是日大霧川奮
勇遂乘霧於北丹陽門投布懸賊上城當將周天孚戕害並擊
殺守堞百姓百餘人城中兵勇潰亂知縣李淮仍督同縣丞蕭
騰龍同知馮繼蕃短兵巷戰官董均經陣亡其餘兵勇遂帶同
百姓潰圍逃出沿途經過該逆營卡復被截殺其得至鎮江者
兵勇不過千餘百姓僅六七百名其陷在城內之官紳軍民男
婦大小被屠戮者約八萬餘名口據金壇紳士馮肇蕃等聯名
具稟並開具殉難官董清冊請詳會奏前來臣查金壇彈丸小
邑陷在四面賊巢之中官紳兵民同心固守一百六日殺賊無
算糧盡力竭各以身殉忠孝節義萃於一城實屬可敬可憫謹

開列官紳銜名清單仰懇

聖恩敕部查照各原銜從優賜卹其有處分者並請開復原官將來克復後請於金壇建立總祠專祀此案各員以慰忠魂其投賊之守備馬得勝於金壇陷後赴張運蘭旌德行營謀爲內應八月十六日業經該道盤獲訊明正法五品藍翎外委王文榮請

旨革職俟拏獲卽行正法其由金壇衝出之游擊朱正華等念其固守已久可否

加恩寬免處分出自

天恩所有金壇殉難官紳請卹緣由恭摺具陳伏乞

皇上聖鑒訓示施行再江蘇撫臣

薛煥相隔過遠未及會銜合

奏

會攻休甯勝仗片

咸豐十年十月初四日

再九月二十九日鮑超張運蘭各軍會攻休甯鮑超於卯時出隊行抵碕庭橋飭余大勝唐仁廉張玉田鄭陽和婁雲慶熊鐵生等分路抄擊踏毀賊卡三座斃賊四五百人乘勢追至城下賊分股出東門繞北門迎戰復出一大股接應婁雲慶抄其歸路將賊截作兩段余大勝等督隊圍殺又斃七八百人鮑超派兩營憑高堡對城開礮賊由南門衝出鄭陽和等左右抄擊又斃多賊遂堅伏不出張運蘭是日先派左右翼及第六旗穩紮潭口以防旌太來路令陳青雲劉松山由南塘埭清左路劉光明易開俊由藍田埭清右路該道自率中軍馬步與諸將會於

榔市攻破馮家嶺賊卡一座又進攻榔市賊卡賊憑河拆橋踞
守藍翎千總朱得勝猛撲中鎗死之守備張添錫奮力直前面
中一傷立將該賊刺倒奪馬二匹遂破第二卡其卡前有兩壘
一村適劉光明易開俊攻破龍源賊卡大呼齊至夾擊遂將村
壘燬平追至城邊觀音閣斃賊三四百名生擒十三名解散脅
從無算日暮收隊而回探聞僞輔王楊雄青由池州至旌德僞
忠王李壽成由青陽至太平意圖救援休歛除飭該鎮道等逼
城緊攻兼防後路並蓄銳以擊援賊外所有接仗獲勝情形附
片具陳伏乞

皇上聖鑒謹

奏

孝
和
卷
一

吳

截留江西漕捐銀片

咸豐十年十月初四日

再准部咨奉

上諭淮揚鎮總兵著黃翼升補授等因欽此該員先奉寄

諭飭赴淮揚管帶戰船

臣聞江北地方木料短絀因於江楚上

游設法先造船百餘隻俟廣東洋礮購到添募水勇卽令黃翼

升管帶候風由長江下駛約計明春船礮配齊

臣當親往江北

督籌防剿並令福建遺缺道李鴻章隨

臣前往黃翼升帶水師

由金陵賊中穿過

臣帶陸師由鳳陽繞越而行均於淮揚會齊

惟此項礮船專備淮揚協防之用正苦製造無資准江西撫

臣

毓科咨稱遵奉

諭旨飭江省有漕州縣已捐集江北餉銀二萬兩將解往署漕
臣王夢麟糧臺交納適值定遠軍潰壽州六安被圍委員無路
繞越臣思以江北之餉辦江北之事應將漕捐二萬通融截畱
以濟急需除分咨查照外附片具陳伏乞

皇上聖鑒施行謹

奏

硃批依議辦理惟明春汝帶兵親往淮揚尙須臨時斟酌欽此

展緩兩江營員舉劾片

咸豐十年十月初四日

再查江南江西兩省咸豐五年屆當二年半薦舉因各營官兵多在江甯鎮江廬州九江等處防剿經前督

臣怡良

奏請緩俟軍務告竣再行辦理在案茲准江西撫

臣毓科

咨准

部咨本年已屆二年半薦舉之期等因惟賊匪現在粵東及皖浙二省滋擾江西界連各屬均應加意嚴防各將弁斯時未便調考請展緩前來

臣

查蘇常淪陷將弁多無下落刻下皖南逆

醜鴟張急須籌辦堵剿所有江南江西二省屆當二年半舉劾之案應請仍展俟軍務告竣再行查辦謹附片陳明伏乞

聖鑒訓示謹

奏

奏稿卷十一

奏稿

進攻休甯立復黟縣摺

咸豐十年十月二十六日

奏爲進攻休甯疊獲勝仗大股援賊由羊棧嶺竄入黟縣我軍迎剿大勝立復黟城追賊出嶺恭摺具陳仰祈

聖鑒事竊鮑超張運蘭進攻休甯

臣

於十月初四日已將僞忠

王李壽成由青陽至太平圖撲我軍後路各情附片聲明在案初二日鮑超移營西館張運蘭移營迪祥湖距休城皆十餘里初四日賊四五千欲由榔市撲迪祥營張運蘭派隊出擊陣斬僞將軍汪懷忠及衝鋒賊百餘鎗傷數百名侍講銜宋夢蘭帶安勇協剿亦多斬獲初六日攻城賊伏不出探知徽州援賊麴聚休東萬安街與城賊相犄角鮑超張運蘭會齊於十五日出

其不意夾擊大破之追十餘里殺賊二千有奇僞侍王李世賢因休甯圍攻甚緊由嚴州退徽州十六日解子藥大礮進休城十七日霆湘各營乘勝攻之北門出賊數千張運蘭揮兵直前鮑超督馬步左右包抄殺賊千餘復圍攻東門賊營賊棄壘逃竄斬馘殆盡立燬賊壘二座將弁兵勇受傷一百三十三名陣亡八名此十月初四至十七日進攻休甯縣城之實在情形也僞忠王帶三萬餘人由蘇州蕪湖而來經過南陵時提臣楊載福見賊大隊上犯卽飛函告臣預爲防備十九日該逆約二萬人突由羊棧嶺竄入圍解休甯之圍斷鮑張兩軍之糧路游擊趙廷貴受傷黥嶺各防皆潰賊遂由盧村闌入黥縣二十日張

運蘭先分老湘營二五旗迎勦小挫午後鮑超派副將宋國永帶副中營後營右營禮前後並張應超各營趕至迎頭痛擊斃賊千餘會同老湘營各旗追入黟縣立將城池克復賊仍退踞盧村一帶二十一日鮑超添派兩營張運蘭添派各旗進勦賊由盧村出隊而來大戰於柏莊嶺我軍十盪十決賊眾大潰狂奔出嶺積屍遍山谷生擒三百十八名斃賊約四千餘人都司楊雲貴守備鄭德亮射中僞檢點艾逆落馬把總羅紫亭刺死僞丞相吳桂先該把總旋亦受傷身死訊據賊供李壽成亦受傷而遁此二十日二十一日大破羊棧嶺股賊克復黟縣之實在情形也伏查僞侍王李世賢由嚴州回徽僞輔王楊雄清穩

踞旌德環徽郡二百里羣賊極多而僞忠逆復由蘇常上援竟
欲攻破黟縣直犯祁門窺伺江西計殊狡毒我軍急馳百餘里
兩日之間連獲大捷驅出嶺外實足寒賊膽而快人心提督銜
湖南綏靖鎮總兵鮑超調度神速前甯國失守案內經臣奏參
革去勇號尙未奉到

諭旨部文可否仰懇

天恩另行

賞加清字勇號出自

聖主鴻施布政使銜河南開歸陳許道張運蘭布置周妥擬請
旨交部從優議敘花翎參將湖南鎮筵右營游擊楊鎮魁於徽

州失守案內奏參革職亦未奉到

諭旨部文擬請開復原官毋庸開游擊原缺副將銜儘先參將
婁雲慶擬請免補參將以副將遇缺儘先卽補副將張玉田余
大勝均擬請

賞加總兵銜其餘在事出力員弁兵勇可否准其開單擇尤請
獎之處出自

皇上天恩除飭派三營嚴防羊棧嶺並飭鮑超張運蘭蓄銳以
待援賊圖攻休甯外所有迭獲勝仗並擊退大股悍賊各緣由
專摺由六百里馳陳伏乞

皇上聖鑒訓示謹

奏

奏和名

三

宋國永等請補實缺片

咸豐十年十月二十六日

再鮑超所帶霆字各營在鄂皖苦戰多年此次調撥過江攻剿
休甯連獲大勝又剿敗黟縣大股援賊立復城池各營官多係
著名驍勇其已保升儘先班次者日久未經選補臣處亦無遺
缺可以請補殊不足以示激勵查有儘先副將俟補缺後以總
兵簡用之宋國永此次擊退羊棧嶺大股卽以該副將爲首功
總兵銜儘先副將黃慶陳由立亦屬尤爲出力仰懇

聖恩敕部將該三員先行拔補副將實缺俾勵戎行是否有當
伏乞

訓示謹附片具奏請

旨

奉和

五

蕭啟江功績最多摺

咸豐十年十月二十六日

奏爲已故統兵臬司蕭啟江功績最多據實奏懇

加恩賜諡建祠仰祈

聖鑒事竊布政使銜記名按察使蕭啟江統帶湘軍赴四川協
剿本年四月二十七日在營病故經前四川督臣曾望顏奏奉
上諭蕭啟江著追贈巡撫銜照軍營病故例從優議卹以慰忠
魂等因欽此仰蒙

篤念盡臣

恩施逾格伏讀之下欽感莫名茲據記名總兵胡中和儘先副
將蕭慶高何勝必候補同知王沐等自四川聯名具稟據稱記

名臬司蕭啟江自咸豐三年奮袂從戎隨李續賓攻擊郴州岳
州武昌田家鎮等處賊匪所向有功五年江右寇熾竄犯湖南
蕭啟江奉札募帶湘勇果字營九月攻復茶陵州進援江西克
復萬載縣六年十一月克復袁州府城分宜縣城十二月克復
上高縣城七年二月大破賊於瑞州之陰崗嶺進圍臨江八月
破石達開於大坪十二月克復臨江府城八年三月克復崇仁
縣城四月克復撫州府城十月勦滅石城潮匪招安脅從數百
寨九年二月克復南安府城解信豐縣城之圍八月追勦石達
開股匪收復東安興安靈川三縣破賊於大溶江九月初十日
解桂林省城之圍數年來身經數百戰馳驅四省所至克捷本

年帶勇入川在營溘逝實屬忘家忘身盡瘁以歿縷陳戰績仰懇據情奏請

賜諡給予世職並懇於湖南江西省城暨湘鄉縣城建立專祠以慰忠靖等情具稟前來臣等伏查記名臬司蕭啟江性情果毅平日粥粥若無能及其臨敵決策英鷺無前年來江西失陷九府蕭啟江一人獨克四府厥功最偉上年援湘援粵援蜀一歲之內奔走萬里積勞身故實堪憫惻該部將胡中和等具稟陳請臣等往返商意見相同合無籲懇

加恩賜諡並於湖南江西省城及湘鄉原籍建立專祠以表忠藎出自

逾格鴻施至該部將等稟請給予世職之處該臬司既奉
特旨追贈巡撫從優議卹照例應得蔭襲毋庸更議所有據情
奏懇

恩施緣由謹合詞恭摺具陳伏乞

皇上訓示施行謹

奏

覆陳洋人助剿及採米運津摺

咸豐十年十一月初八日

奏爲遵

旨覆陳仰祈

聖鑒事竊

臣

於十月二十五日承准軍機大臣密寄十月十一

日奉

上諭本年秋間嘆咈兩國帶兵撲犯都城業經換約退兵俄羅斯使臣伊格那替業幅亦卽隨後換約該酋見恭親王奕訢等面稱髮逆在江南等處橫行請令中國官軍於陸路統重兵進剿該國撥兵三四百名在水路會擊必可得手又稱明年南漕運京恐沿途或有阻礙伊在上海時有咪國商人及中國粵商

情願領價採辦臺米洋米運津如令伊寄信上海領事官將來
洋船沙船均可裝載用俄咪旂幟卽保無虞等語中國勦賊運
漕斷無專借資外國之理惟思江浙地方糜爛兵力不敷勦辦
如借俄兵之力幫同辦理逆賊若能早平我之元氣亦可漸復
但恐該國所貪在利藉口協同勦賊或格外再有要求不可不
思患預防拂郎西在京時亦有此請著曾國藩等公同悉心體
察如利多害少尙可爲救急之方卽行迅速奏明候旨定奪至
代運南漕一節江浙地方淪陷明歲能否辦理新漕尙無定議
然漕糧爲天庾正供自不可缺該酋所稱採辦運津之說是否
可行應如何妥議章程辦理之處並著曾國藩薛煥王有齡酌

量情形迅速具奏將此由六百里各密諭知之欽此具仰
皇上聖慮周詳馭夷之方達變之畧無微弗至欽服莫名臣就
俄酋所陳二事思之其請撥夷兵三四百名助剿金陵髮逆一
節查大西洋喫啡咪各國恃其船堅礮大橫行海上俄羅斯國
都緊接大西洋所用船礮及所習技藝均足相抗近始由重洋
以通中國該夷與我向無嫌怨其請用兵船助剿髮逆自非別
有詭謀康熙年間進攻臺灣曾調荷蘭夾板船助剿亦中國借
資夷船之一證惟長江二千餘里上游安慶蕪湖等處有楊載
福彭玉麟之水師下游揚州鎮江等處有吳全美李德麟之水
師臣現又在長沙吳城等處添造師船爲明年駛赴淮揚之用

是皖吳官軍之單薄在陸而不在水金陵髮逆之橫行亦在陸而不在水此時我之陸軍勢不能遽進金陵若俄夷兵船卽由海口上駛亦未能遂收夾擊之效應請

飭下王大臣等傳諭該夷酋獎其效順之忱緩其會師之期俟陸軍克復皖浙蘇常各郡後再由統兵大臣約會該酋派船助剿庶在我足以自立在彼亦樂與有成俾即西亦有此請亦可獎而允之許其來助示以和好而無猜緩其師期明非有急而求救自古外夷之助中國成功之後每多意外要求彼時操縱失宜或致別開嫌隙似不如先與約定兵船若干隻雇價若干每船夷兵若干需月餉若干軍火一切經費若干一一說明將

來助勦時均由上海糧臺支應庶可免爭競而杜弊端至所稱
咪商領價採米運津一節江浙各郡縣地方淪陷旣多明年新
漕勢難趕辦咪商粵商情願領價採辦臺米洋米由海道運至
津沽實亦濟變之要著俄酋旣以此爲請似卽可因而許之除
粵商採辦之米應由該商自行經理毋庸插用俄咪旗幟外所
有咪商採辦運津之米亦請

飭薛煥在上海就近與該商訂明粵商領價須取保戶咪商則
聽咪酋經理當可無誤要需爲時局計似亦舍此別無良策伏
乞

聖明察酌行之抑臣竊有請者馭夷之道貴識夷情以大西洋

諸夷論之嘆咭喇狡黠最甚。佛郎西次之。俄羅斯勢力大於嘆
咭。嘗與嘆夷爭鬪。爲嘆所憚。咪喇嚙人性質醢厚。其於中國素
稱恭順。道光十九年。嘆夷因鴉片肇釁之始。兵船闖入廣州省
河。咪酋曾於參贊大臣楊芳處遞稟。願爲居閒調處。嘆酋義律
旋出親筆。有只求通商。不討別情等語。是並煙價亦不敢索也。
楊芳曾據以入奏。而不敢專主其議。會官軍燒搶洋行。誤傷咪
夷數人。其事遂寢。而夷患遂熾。咸豐三年。賊踞金陵。聞咪酋亦
曾於向榮處託人關說。請以兵船助剿。未知向榮曾據以入奏
否。嘆咭兩夷犯廣東省城時。咪酋未嘗助逆。上年天津擊敗夷
船時。咪酋卽首先赴京換約。並無異詞。是咪夷於中國時有效

順之忱而於嘆咈諸夷並非固結之黨已可概見此次俄夷既稱咪商情願領價採米似可卽

飭薛煥與咪酋面訂章程妥爲籌辦庶幾暗杜俄夷見好中國市德咪夷之心而咪夷知中國於彼毫無疑忌或且輸誠而暱就於我未可知也此次款議雖成中國豈可一日而忘備河道旣改海運豈可一歲而不行如能將此兩事妥爲經畫無論目前資夷力以助勦濟運得紓一時之憂將來師夷智以造礮製船尤可期永遠之利區區愚慮所及合併陳明伏乞

皇上聖鑒訓示謹

奏

卷之二

七

查覆蕭盛遠實蹟片

咸豐十年十一月初八日

再十月初四日承准軍機大臣字寄九月二十日奉

上諭前因安徽廬鳳道蕭盛遠在江南大營內辦理文案聲名
平常當將該員撤任諭令薛煥查明實蹟奏參本日據薛煥奏
蕭盛遠性情稍傲疎於交接營中來往員弁欲與識面者投刺
拜謁往往託故不見自此每招物議此外並無實在劣蹟等語
朕聞蕭盛遠前在和春軍營與已故提督王浚把持公事納賄
營私以致軍心不服金陵大營潰敗實由於此若如薛煥所奏
未免意存開脫著曾國藩再行嚴密訪查據實具奏等因欽此
臣歷年來在江楚辦理軍務與江南大營相隔較遠而隨時畱

心訪問道員蕭盛遠聲名平常早有所聞茲奉

諭旨飭查

臣

復嚴密訪察蕭盛遠係湖北書辦隨和春由廣西

至江南軍營辦理文案保至監司大員軍中奏咨公牘出其一

手其親信實非他員可比前在廬州有和春與巡撫會保之員

蕭盛遠私自刪去逮至金陵此風尤甚往往各營應保之人開

單轉有遺漏各營未保之人開單或得混入江南將領如王浚

張玉良李定太等聞皆與蕭盛遠至好均無卓著戰功迭膺保

擢雖蕭盛遠之納賄營私無實蹟可指要其巧猾把持已可概

見今和春戰敗身殉蕭盛遠以一書辦出身忝竊至此猶得覲

然偷生人世律以謀軍僨事之咎亦復何辭可否請

旨將前任安徽廬鳳道蕭盛遠卽行革職發往新疆以爲軍營
取巧干進者戒出自

聖裁所有遵

旨密查覆陳緣由伏乞

皇上聖鑒訓示謹附片具奏請

旨

孝和名

近曰軍情片

咸豐十年十一月初八日

再近日軍情僞忠王李秀成自羊棧嶺擊敗之後已入休甯縣城僞侍王李世賢仍踞徽州僞輔王楊七麻子率黨攻撲建德自十月二十六日以後至十一月初二三連日鏖戰初四日普承堯一軍敗挫建德失陷其另股賊匪自南贛竄出者於十月二十五日擾陷德興十一月初一日擾陷婺源經左宗棠一軍跟蹤追勦於初一日克復德興初三日克復婺源賊中僞王四人除僞英王四眼狗現在桐城日夜大戰外其三人皆在徽境二百里內實覺防不勝防勦不勝勦仰託

皇上威福若皖南能再支持兩三月則皖北安慶有必克之理

大局有必轉之機除俟左宗棠普承堯將接仗細情咨報到日另行詳奏外合將近十日大概情形先行附片奏報伏乞皇上聖鑒謹

奏

左宗棠軍克德興婺源摺

咸豐十年十一月二十八日

奏爲廣東另股逆匪竄擾樂平貴溪地方迭經官軍馳剿大獲勝仗連復德興婺源二城恭摺具陳仰祈

聖鑒事竊另股逆匪自廣東韶州而來竄擾南贛圍逼建昌占

踞湖口均經江西撫

臣

毓科奏報在案襄辦軍務候補四品京

堂左宗棠一軍前駐樂平曾經

臣

附摺奏明旋因西路有警移

駐景德鎮探報南贛另股由貴溪境內竄過安仁有直撲饒景

之勢左宗棠派游擊王開琳知府王開來分帶四旗兩營由珠

田大橋一帶相機迎剿十月二十日拔隊行抵珠田賊悉於十

九夜竄往貴溪二十一日我軍行六十里至大田坂聞大股賊

屯踞周坊丁家坊等處相距二三十里是夜四鼓派七成隊偃旗息號乘月急馳出賊不意以攻搗之行抵鶴嶺離周坊三里許賊尙不知我軍之至也王開琳等遂分三路翻山而進該逆驚覺搖旗迎敵我軍奮勇直前兩面伏兵并起圍賊垓心斃三百人賊拋棄旂幟軍械衣物甚多我軍皆不之顧正痛勦間忽三馬橋富村各處大股紛來勢甚兇猛喻勝榮丁長勝仍由中路排進王明輝陳明南仍由兩路抄出賊卽大敗我軍乘勝追殺七八里斬馘四五百人該逆敗過小河復有丁家坊一股與之合併隔河猛抵王開琳令各旗哨排整隊伍對施鎗礮另派哨勇出丁家坊上下小港衝入中路正兵過河直搗賊巢趙

勝國右手被鎗子傷穿猶忍痛陷陣賊見我軍勢力更大遂向
高山奔竄是日自周坊追至丁家坊約二十里自晨至夕忍饑
力戰共斃賊二千數百名生擒一百八十餘名陣斬賊酋僞檢
點陳姓僞元帥黃姓僞丞相鄭姓多名此二十二日進剿貴溪
周坊等處大獲勝仗之實在情形也二十四日左宗棠接據探
稟周坊敗匪已由弋陽方家墩竄至德興之黃柏塘地方當卽
移飭王開化楊昌濬督帶中營及前左後三營前往迎剿二十
七日抵香墩二十八日在太白司下河干架造浮橋二十九日
黎明過河比至楓樹嶺賊始知覺遂由三路蜂擁而來游擊羅
近秋都司黃少春副將崔大光各率親兵數十人前往覘賊立

斬悍賊數十各營大隊續至謹呼陷陣王開化楊昌濬率中營
列隊山岡指揮策應該逆驚潰追殺十餘里適老湘各營亦於
是日由弋陽界追賊而來是夜四鼓探知賊畏勦思竄王開化
等會督各營進攻直逼城下賊見我軍旗幟卽由南門竄走我
軍乘勝追擊一面入城安撫難民查點各營受傷者僅十餘名
此十月二十九日十一月初一日攻克德興縣城之實在情形
也賊由德興竄去旋分兩路一走海口一走太白司王開化督
諸軍橫截太白司一路老湘桂勇右營亦躡蹤而至初二日探
知竄賊已陷婺源初三日五鼓諸軍整兵前進辰刻行抵高沙
值賊在該村莊擄糧我軍前隊馳追斃賊百餘名生擒十三名

旋督隊進攻城北城西兩面賊出二千餘人負城列陣我軍兩路齊撲賊潰入城閉門死拒諸將督勇奮力登陴該逆卽奪東南門逃走兩門外河水環繞賊奪橋而過我軍兩面抄擊並派隊由上游截渡攔橋逼賊紛紛墮水我軍乘勝過橋追剿二十餘里沿途尸骸枕藉餘匪由開化竄去此初三日克復婺源縣城之實在情形也臣查左宗棠一軍自移師景鎮駐紮未久一聞貴溪警報分路調撥或迎頭截擊或跟蹤追剿計十日之內轉戰三百餘里連克二城使狼奔豕突之眾喘息不得少定實屬調度神速將士用命自此股勦敗後卽有池州大股撲陷建德直犯浮梁景德鎮亦惟左宗棠一軍獨當其衝左宗棠初立

新軍驟當大敵晝而躍馬入陣暮而治事達旦實屬勤勞異常
惟係襄辦京堂大員應如何優擢獎敘之處出自

聖裁花翎卽選道王開化請

賞加按察使銜候選訓導楊昌濬請以知縣卽選並加同知銜
賞戴花翎候選訓導劉典請以知縣選用並

賞加知州銜花翎副將崔大光請

賞加總兵銜暫革花翎游擊羅近秋請開復原官仍

賞加參將銜從九銜朱明亮張聲恆均請以州同選用並

賞戴藍翎花翎都司黃少春請以游擊歸部推補花翎游擊王
開琳請以參將歸部推補花翎道銜知府王開來請以道員卽

選花翎參將睦金城請仍以參將歸部遇缺先補守備銜千總章榮先請以都司卽補花翎都司張志超請

賞加游擊銜其餘出力員弁可否准臣開單擇尤保獎之處出

白

聖主鴻施所有周坊德興婺源三次大獲勝仗連復二城緣由專摺由六百里馳陳伏乞

皇上聖鑒訓示謹

奏

卷之八

三

建德縣失守旋經克復摺

咸豐十年十一月二十八日

奏爲建德縣城失陷旋經官軍克復恭摺奏祈

聖鑒事竊池州之建德縣自十年正月克復後卽由江西巡撫
派總兵普承堯統帶寶勇五千人駐防該縣臣於五月間率師
渡江經過建德見其營濠柵卡尙屬堅固囑令賊若來撲但宜
堅守卡隘不必出卡接仗八九月間又屢次批飭賊來撲建德
能堅守數日臣卽由祁門派兵星馳救援諄飭各在案十月二
十六二十九日池州逆黨撲犯建德普承堯派隊擊退十一月
初二日寶勇出隊微有斬獲初三日寶勇接仗小挫普承堯卽
於是日酉刻專人來祁門稟請救援臣於初五夜接信卽調祁

門老營親兵令副將沈寶成星速往救詎行至中途已聞普承
堯於初四早未戰而潰建德縣城失陷普承堯退至彭澤旋又
退至湖口九江該逆長驅直入一股西犯彭澤湖口都昌一股
南竄鄱陽浮梁景德鎮建德陷則臣處奏報之路已梗浮梁破
則糧餉之道亦斷臣於十一日派副將唐義訓帶祁門各營馳
勦建德與沈寶成等會合前進十七日行抵利步口賊未知官
軍之猝至也十七日三路出隊唐義訓與陳玉恒葉光岳及馬
隊由西大路進朱聲隆由東小路進沈寶成黃惠清由東大路
進甫行十五里賊卽列隊河洲而以馬隊扼拒各卡我軍東西
兩路緣山而上中路直前迎擊礮斃騎馬悍賊數名卡賊卽退

我軍兩路會合夾擊河洲之賊賊眾大呼衝陣我軍寂靜不應
但以鎗礮轟擊每進愈厲山上各哨蜂擁而下抄賊後路前者
見殺後者墜溺賊乃敗潰退至三里街唐義訓見賊伏街村未
便徑進裹飯傳餐仍分街口及街右街左三路同進搜殺無算
忽見城內及壘中之賊齊出我軍整隊排列河南賊亦列隊河
北鎗礮對放互有損傷相持一時之久忽有金盛馬賊中礮落
地賊似慌亂我軍乘機渡水如牆而進旁抄直擊賊分股竄入
城內大股逃入西北壘中朱聲隆沈寶成由南門追賊入城賊
向東門竄出黃惠清馳至東門攔截其前朱聲隆等追躡其後
其西北賊卡經唐義訓與陳玉恒葉光岳分哨循山上下拋放

噴筒火彈賊壘立破由卡開遁竄卡隘而濠多人馬踐踏尸積山谷東北攻城之軍與西北攻壘之卒各追殺十餘里西正收隊回抵利步口敗賊歸張家灘一帶是役約共殺賊千餘名生擒六十三名奪獲騾馬一百六十一匹鎗礮旗幟無算據唐義訓等稟報前來臣伏查皖南中隔一嶺嶺內爲徽州各屬嶺外爲池州東流建德各屬建德一失則臣與江濱安慶各路聲息不通普承堯以五千之眾在防十箇月之久不能堅守數日以待援師遺誤江皖大局實堪痛恨請

旨將九江鎮總兵普承堯卽行革職拏問以肅軍律總兵銜儘先副將唐義訓應請交軍機處記名遇有總兵缺出請

旨簡放藍翎通判銜州判朱聲隆請免選本班以同知畱於江蘇補用總兵銜江西儘先副將沈寶成請

賞給正二品封典湖南補用副將黃惠清請

賞加勇號湖南補用參將陳玉恒請以副將畱於兩湖補用參將銜選用游擊葉光岳請以參將畱於江蘇補用其餘出力員弁可否容臣擇尤保獎出自

皇上天恩所有建德縣城失陷旋經官軍克復緣由恭摺由驛馳奏伏乞

皇上聖鑒謹

奏

近日南岸軍情賊勢片

咸豐十年十一月二十八日

再自安慶合圍以來偽英王陳玉成大戰於江北之桐城偽忠王李秀成偽侍王李世賢偽輔王楊七麻子萃聚於江南之徽州無非爲救援安慶起見此次南岸各賊約分三大枝環繞祁門作大圍包抄之勢其西一支於初三日陷東流縣初四日陷建德縣初九日陷彭澤縣十二日圍湖口縣十三日陷都昌縣分一小支於十二日陷浮梁縣十三日陷鄱陽縣其東一支於十五日陷江灣王夢齡營盤十六日陷上溪口楊名聲營盤十九日陷婺源縣其北一支於十五日破禾成嶺而入十七日破羊棧嶺而入十八日破新嶺而入二十一日復竄漳嶺實屬危

險迭見應接不暇計祁門之東西南北四面皆賊其中如十二
至十七日各路文報皆斷仰託

皇上威福事機尙順東流彭澤都昌鄱陽四縣均經楊載福等
水師先後克復湖口一城爲江楚鎖鑰經彭玉麟吳坤修水陸
固守幸保無恙浮梁縣經左宗棠陸軍克復建德縣經唐義訓
率師克復今西路大股雖尙未退而各城幸存可望轉危爲安
北路各嶺之賊官軍十七日獲一小捷二十日獲一大勝賊膽
已寒當不敢再來犯嶺惟東路之賊據報已由婺源南竄其或
由德興以犯河口或由樂平以犯景鎮均未可知總之欲斷臣
之糧道掣臣之軍勢以解安慶之圍此則賊計狡謀顯而易見

者也臣之老營仍駐祁門張運蘭仍防黟縣等處抽出鮑超一軍回顧景德鎮與左宗棠會合堵剿以保臣軍之糧路以救江西之北邊能否得手尙未可知目下舍此別無萬全之策除各屬守城克城暨各嶺各營戰事另行專摺奏報外所有近日南岸軍情賊勢理合附片具陳梗概伏乞

皇上聖鑒謹

奏

孝和名

水師保守湖口克都昌縣摺

咸豐十年十二月十三日

奏爲逆匪撲犯湖口經協理水師彭玉麟趕集水陸各軍併力
擊剿得保危城並抽派師船克復都昌縣城各情形恭摺具陳
仰祈

聖鑒事竊自大股賊匪十一月初四日撲犯建德普承堯一軍
潰退賊卽長驅深入連陷六縣而官軍與賊所必爭之地莫如
湖口與景德鎮兩處景德鎮有左宗棠一軍駐紮湖口則并無
陸兵僅有水師後營都司丁義方駐防該縣自建德失守臣卽
派道員吳坤修帶團防營千餘人馳赴湖口保守名城惠潮嘉
道彭玉麟一面派前營都司胡友勝趕赴彭澤隨同楊載福防

鄒一面派左營副將成發翔趕赴湖口會同丁義方合力守禦
十二日賊撲彭澤經楊載福水師擊退賊仍率大股上竄湖口
離城十五里之馬影橋屯踞是日彭玉麟自黃石磯赴援湖口
途次接據成發翔丁義方稟報初九日寶營潰勇紛紛逃至湖
口搶劫錢店當率水勇沿街彈壓將無營官統屬之勇一概驅
逐查有寶護左營金殿安中護軍營談開亮護左營江必勝前
營劉吉慶等所帶之千餘人尙屬安靜當會商知縣及在城紳
董於三營中擇其精壯者酌留五百人每人日給米一升分布
城頭駐守正慮城大兵單適臣前派吳坤修之團防營亦於是
日趕到沿途爲賊所截把總李逢貴六品軍功吳修霖力戰陣

亡營官吳景星熊烜煌督率所部入城當卽抽撥大礮數尊配
給子藥分令寶營團防營陸師駐守東南兩門以防山城而成
發翔丁義方自率水師駐守西北兩門以防水城此初九日至
十二日水師收集陸軍協守湖口之情形也十三日屯踞馬影
橋之賊擁眾萬餘分四股直撲各門均經守城各軍併力轟擊
自卯至午鏖戰四時之久賊始却退湖口一城係咸豐九年彭
玉麟督工新修其南門因溝水浸腳坍塌數丈缺口趕修未成
申刻賊復分四股舁長梯而至前隊鎗礮中隊短刀火球後隊
馬賊排列吶喊之聲山谷皆震其東西南三股先進對城開鎗
子如雨下繼以木梯如潮湧上千總江必勝堵住南門缺口千

總吳景星堵住西面千總談開亮堵住東面鎗礮石子環城齊
下悍賊迄不稍退蜂擁扒城丁義方見賊勢凶悍率領哨官張
三元黃發甲熊殿元楊雲輝彭大田等各帶水勇登陣助戰熊
烜煌金殿安劉吉慶等往來擊殺自申至酉齊力抵禦而城南
缺口已有悍賊數名冒死登城經江必勝手執大刀砍倒突被
賊匪洋鎗擊中頭顱我軍急以大桶火藥擲轟城下斃賊無數
賊始退去我軍開城追殺百餘人奪獲木梯三百餘架賊仍退
踞三里街馬影橋等處十四日彭玉麟周城閱視慰勞將士重
加布置午後謀知賊於村莊搜覓樓梯乘此日風雨夜半復來
扒城當卽飭令談開亮選帶十餘人潛出偵伺見賊負梯送三

里街談開亮出賊不意繞出山凹則驚遁散奪梯多件是夜風雨益大咫尺不辨彭玉麟在城垣督飭各營分頭梭巡二更後見四山僻徑隱隱火光迷漫空谷自遠而近各營哨皆雨立垛口靜以待動夜半雲暗天昏陰風怒號江濤激響燈光慘澹守至天明各營派勇縋城哨探至三里街各館及馬影橋賊巢賊已遠遁詢之民人言該匪竟夜環伺無隙可乘五更倉猝竄去此三十四日夜堅守該逆宵遁之實在情形也彭玉麟麟以賊遁不遠防其回竄一面函商皖南鎮總兵陳大富由東流飛撥千五百人協同吳坤修之團防營妥籌駐守並探知另股賊匪分竄都昌於十四日抽派成發翔左營戰船二十一號赴援成

發翔於十五日趕至都昌城下督飭各哨排礮轟擊城賊抵敵不住我軍乘勝登岸由大南門直追至城根賊眾慌亂放火開東北兩門而竄立將縣城克復此水師分營收復都昌之實在情形也臣查湖口一城爲江楚之關鍵長江之腰膂咸豐五六年間賊目黃文金胡鼎文等踞守該城臣率水陸百計攻之卒不能下厥後七年九月楊載福彭玉麟等以血戰得之至九年議修新城今冬甫經告竣此次黃文金挾賊數萬撲犯湖口尙欲力爭此關以報仇而逞志經彭玉麟派撥將弁星夜赴援於倉皇無備之際復能收集潰卒水師登陴聯絡陸兵用以力捍危城維持大局洵足伐賊謀而壯軍威布政使銜廣東惠潮嘉

道彭玉麟調度有方籲懇

天恩交軍機處記名遇有按察使缺出請

旨簡放副將成發翔樸實果敢擬請

賞加勇號游擊銜都司丁義方膽識過人部署迅速擬請以參

將補用並

賞加副將銜陣亡之把總李逢貴六品軍功吳修霖均請

旨交部照把總陣亡例從優議卹其餘在事出力將弁可否准

其開單擇尤保獎之處出自

聖主鴻施所有水陸擊退大股逆匪保守湖口並克復都昌縣

城各緣由謹會同江西巡撫臣毓科專摺由六百里馳陳伏乞

奏
皇上聖鑒訓示謹

奏稿卷十一

四

皖南江西全局片

咸豐十年十二月十三日

再臣在祁門賊分三大支四面環擾曾於十一月二十八日附片具奏在案旬日以來賊之西支爲僞主將黃文金所帶者臣派鮑超一軍赴景德鎮與左宗棠會剿賊自景德鎮退至石門洋塘一帶仍分賊黨黃萬興再擾建德林世發再擾彭澤卽湖口之賊亦尙屯踞張家嶺一帶其東一支爲僞忠王李秀成所帶者由婺源開化竄至玉山攻撲縣城冬月晦日臘月朔日城中竭力防守未知能迅速解圍否其北一支爲李逆古逆所帶者十一月底屢次痛剿現尙未敢再犯仰託皇上威福能將西路黃文金一股大加懲創然後能分兵援應

東路不使深入江西腹地庶皖南軍務可期日有起色除各處
開仗情形專摺另報外合將皖南江西全局附片具奏伏乞
皇上聖鑒謹

奏

楊載福救拔南陵縣軍民摺

咸豐十年十二月十三日

奏爲提

臣

楊載福統帶水陸踏平賊壘拔出南陵全軍救全百

姓十餘萬人恭摺具陳仰祈

聖鑒事竊自蘇常失陷賊勢愈熾如甯國府城金壇南陵兩縣
城均係官軍堅守被賊重重圍困自金壇甯國先後失陷南陵
一邑孤懸賊中總兵陳大富竭力守禦糧盡援絕勢難久全臣
鑒於金壇被害之慘恐南陵軍民又遭屠戮疊次密飭陳大富
由閒道衝出並咨提臣楊載福督派師船至江濱接應在案十
一月二十九日據楊載福咨稱南陵官軍向與甯國爲犄角自
甯郡失守百姓扶老攜幼多歸此城陳大富一軍久困垓心已

成孤注軍火口糧無由解濟而該軍忍饑固守必須趕緊設法
救援庶免意外之變惟該城四面皆賊悉心妥籌猝難入手正
深焦灼適九月內秋雨連旬江水盛漲沿江小港均可行舟九
月二十七日准陳大富密函知賊勢趨重饑軍萬分危迫城中
餓殍相望待援甚殷因定計潛師往援而留彭玉麟水師圍攻
安慶照料黃石磯老營九月二十九日楊載福親督數營礮船
進次樅陽探聞南陵城外四面賊壘層層密布惟北門一港可
達魯港水程約計百里而近城一帶賊復夾港築壘踞守甚堅
僅右邊沿港一綫之路必須陸師相輔方可進攻當就樅陽調
出千總尹昌景韋以琳各領本營步隊隨同礮船前進揚言往

攻蕪湖十月初二日師次魯港卽派總兵李成謀副將李濟清
正右副中二營扼紮港口使蕪湖之賊不得截我軍出路初三
日督率各營進港沿途見水面窄狹度非步步爲營賊必議我
之後當派參將楊占鼐領親兵後營防守義橋石碓都司郭明
鼐領親兵前營防守小河窰地方其黃木馬仁兩渡有賊把卡
均經我軍擊退遂派副將劉正隆率正後營駐紮並令在月河
口搭駕浮橋以待又派游擊羅進賢率新前營扼堵倉前一帶
初四日卯刻派陸軍登岸依水師並進港左壘賊見我軍掩至
出其不意舢板開礮轟擊賊遂蜂擁出撲副將丁泗濱帶隊先
登副將何瑞祥率師繼進奮力衝突斃賊多名乘勢將近邊一

壘焚燒該逆紛紛驚潰因並港左數壘概行焚燬尹昌景韋以琳領隊直攻港右氣勢壯猛該逆出壘列隊未敢遽戰我軍衝盪賊陣尹昌景縱火燒賊數壘逆眾敗潰韋以琳帶隊沿岸進擊賊之另股截尾橫抄副將李朝斌領各船開礮轟擊尹昌景韋以琳並力衝殺賊盡披靡遂將港右十數壘一併焚燬陳大富知北路援師已至乘勢將東南西三門賊壘攻剿一律掃平追殺十餘里斃賊不可勝計奪獲旂幟鎗械甚多南陵城圍以解陳大富猶思趕緊繕完力圖守禦楊載福見賊雖暫退水師萬難留駐該逆必將復至孤軍固守終成坐困之勢因力勸陳大富同赴上游拔出全軍初五日會督水陸大隊緩緩行走百

姓從者約十餘萬人沿途如月河口岡灣義橋及各處堤埂隘口均經先飭各營搭駕浮橋軍民得以通行無滯高岡鋪雖有賊蹤經我軍擊退均不敢近惟僞忠王李秀成率賊數千並令蕪湖賊划百餘號在小河及石碇地方與親兵前後二營接仗意圖截我師歸路楊占鼇郭明鼇極力堵禦相持兩晝夜賊猶不退楊載福添派親兵左營及新前營助剿將該股賊匪擊退水陸軍民始得徐行出港初八日回次三山夾暫駐二十五日同抵黃石磯十一月初三日將該軍安插東流縣城並與彭玉麟勉籌周恤仍咨臣飭解口糧軍械以濟急需等因前來伏查皖南鎮總兵陳大富駐守南陵四面皆賊城中米糧軍火罄盡

與金壇危困情形無異該總兵忠勇奮發與軍民團結一氣力
保危城以待援師經提臣楊載福統帶水陸節節布置懸軍深
入立掃凶氛拔出全軍保護百姓十餘萬人處之善地一時歡
慶之聲流溢江表實足以固人心而作士氣楊載福氣韻沈雄
出奇制勝可否籲懇

天恩賞賚荷包搬指等物以示旌異出力將弁可否由該提臣
擇尤奏保之處均出自

聖主鴻慈除飭總糧臺撥解餉銀二萬兩並帳房子藥接濟外
合將水師提臣拔出南陵全軍安插東流各緣由專摺由六百
里馳陳伏乞

皇上聖鑒訓示再此案臣曾商楊載福自行具奏楊載福以
水陸援應上下奔馳咨請由臣轉奏又因道梗十餘日文報不
通是以陳奏稍遲合併聲明謹
奏

上溪口江灣兩營失陷摺

咸豐十年十二月十三日

奏爲上溪口江灣兩處營盤失陷現籌收集整理恭摺具奏仰祈

聖鑒事竊臣於九月底調集鮑超張運蘭兩軍進逼休甯分紮西館迪祥湖一帶因上溪口江灣兩處爲賊南竄之路當於徽防內調取凱迭勇義勇安健勇廣武軍果勝軍果敢軍等營飭令已革副將楊名聲整理成軍駐紮上溪口一帶飭令副將王夢齡所帶良勇協同副將程永年所帶池州兵廣威勇各紮江灣一路以資扼守自十一月十四日鮑超一軍由西館撤退前赴景德鎮之急上溪口江灣兩處防營頗形單薄又無可以籌

撥協守之兵正深焦慮旋於十七十八兩日據報上溪口營盤
爲休甯城賊撲陷江灣營盤爲屯溪之賊撲陷而婺源一路警
報迭至矣據楊名聲稟稱十一月十六日賊匪分三路來犯一
由汪溪橋直撲頭敵營盤一由石田小路橫抄廣武軍果勝軍
之右一由迴口祖地山徑攻南岸各營三路賊眾約四五萬人
登山俯瞰吶喊搖旗我軍寂靜無譁相持兩時之久南岸一股
被果敢安勇兩軍鎗礮環施賊勢稍沮旋即涉水過河併力夾
攻北岸營盤都司譚加耀帶隊衝突往返鏖戰斬馘數百人該
逆抗拒自辰至申絕無退意楊名聲俟其氣餒正欲督帶馬隊
前往策應不料該逆突出一股繞街市之後直撲凱勇小隊千

總胡明昭棄營而走各營登時驚擾楊名聲親堵濠邊手刃二
勇眾心稍固而北岸諸軍又被賊圍楊名聲馳馬過橋接應忽
有騎賊五名從後追逐刀矛攢刺腰腿兩處受傷墜馬落水遇
救獲生而各營弁勇傷亡過半不敷守禦持至酉刻南北各營
先後失陷此十六日上溪口營盤被陷之情形也據王夢齡稟
稱十四日撲犯江灣之賊被我軍擊退十五日黎明該逆大股
傾巢而來王夢齡卽飭各軍憑營固守程永年親督守備馬登
榮李金山率領弁勇三百人往來野戰該逆始分三股繼添四
股圍撲我營十餘次經馬登榮李金山帶隊抄擊相持至未刻
逆眾忽退二里餘惟遠近山梁十數股仍未收隊王夢齡當令

各軍趕緊造飯以備飽騰再戰賊忽分十數股由遠山繞赴江灣村市散紮街衢復於村頭各處築卡王夢齡卽督帶馬登榮李金山回村鏖戰該逆死力相持馬登榮怒馬縱橫衝擊忽被洋鎗打穿鼻梁立時陣亡外委鍾洪興楊大榮亦歿於陣李金山肚肋又受矛傷正鏖戰閒忽報賊眾各負門版圍撲我營鎗礮擊之不退王夢齡恐營盤有誤卽帶隊回顧各營時村後街市火光燭天重以木石堆卡欲阻我軍迎擊之路王夢齡卽諭各營奮勉出戰時已交亥賊仍重重更換圍裹不得已密商程永年督率各軍短刀巷戰分路衝出以圖再振此十五日江灣營盤被陷之情形也

臣伏查江灣上溪口兩處當祁門之東路

婺源之北境一有疎失則藩籬盡撤賊得長驅以入江西境內
現在僞忠王李秀成大股卽由此路以犯江西圍撲玉山縣城
已革副將楊名聲候補副將王夢齡程永年駐防數月有險可
扼乃不能堅守待援實屬怯懦無能王夢齡程永年均應請

旨卽行革職不准留營楊名聲係業經參革之員亦不准留營
潰退兵勇交署湖北提督江長貴收集整理陣亡員弁另繕清
單請

旨交部議卹其休甯黟縣各仗陣亡傷亡之將弁暨水陸前後
陣亡病故人員一併開單請

旨分別賜卹以慰忠魂所有上溪口江灣兩處營盤失陷緣由

奏和卷十二
專摺由驛馳陳伏乞

皇上聖鑒訓示謹

奏

硃批王夢齡程永年均著革職與前已參革之楊名聲俱不准
留營單開之徐祚明等均照所請分別議卹該部知道單併發
欽此

黟縣官軍勝仗摺

咸豐十年十二月十三日

奏爲黟縣官軍迭次擊退犯嶺股匪并迎剿竄撲小溪漁亭之賊大獲勝仗各情形恭摺具奏仰祈

聖鑒事竊僞忠王李秀成於十月二十二十一等日糾合大股突犯羊棧嶺防擾及黟縣經鮑超張運蘭合軍痛剿追出嶺外於十月二十六專摺奏明在案李逆敗後卽繞入徽城旋復於十一月十九日竄至婺源二十八日竄至玉山而羊棧各嶺之外賊蹤時復麇集狡計窺伺圖犯祁門北路臣飭參將楊鎮魁游擊蔣信玉分帶禮字前後兩營協同參將張應超之百勝軍合紮盧村盧村者去羊棧嶺十里去黟縣二十五里令其深溝

高壘如有嶺賊闌入壁堅勿戰飛報請援以圖夾擊之勢十一月十七日逆目古隆賢賴裕新糾合大股分三路突犯羊棧桐林二嶺乘霧入卡遠抄盧村諸營之後楊鎮魁等閉壁堅守張運蘭派左翼黃萬友六旗朱紹輝各六成隊馳往援應六旗從左路進左翼從右路進該逆拚命力抵相持一時之久適五旗亦來助剿聲勢彌壯禮字兩營百勝軍開壁齊出與援兵併力猛攻斃賊四五百人賊由新嶺山中遁去是日諸營獲勝以賊遁未遠戒備益嚴十九日嶺外添賊萬餘直於盧村左側築造二壘爲久踞以犯祁門之計維時景德鎮危急臣調鮑超全軍赴援景德鎮雨阻未能拔行賊不知其尙在祁門也因密派升用

總兵副將宋國永率霆字四營河溪營之七成隊并華字營黑龍江兩馬隊馳赴黟縣是日風雨交作不能開仗二十日辰刻諸軍會合盧村老湘營左翼黃萬友四旗劉松山陷陣橫截賊爲兩段二旗張添習六旗朱紹輝繞出羊嶺斷賊歸路宋國永督霆字各營由盧村進攻兜剿禮字兩營百勝軍兩馬隊前後一齊突出爲擊爲抄賊勢大潰諸軍跟蹤追殺賊屍徧野血流成渠餘匪紛竄狂奔器械拋棄殆盡歸路旣斷賊皆緣岩而遁我軍追者反出其前墜岩罨樹渙散哀號逃出嶺外此二十日諸軍合戰盧村大獲勝仗之實在情形也自是嶺外之賊漸覺膽寒不敢入犯而休甯城中之賊因鮑超回剿景鎮張運蘭一

軍退駐葉村步步逼犯由藍田擾及小溪一帶張運蘭見我軍益孤賊勢益張思所以懲創之二十四日派三旗易開俊由中路進四旗劉松山沿山邊右路五旗劉光明沿山邊左路六旗朱紹輝由珠坑搜洗而進未刻行至小溪該逆分途擺列愈聚愈多鏖戰半晌各村賊館如蠡房之齊出劉松山見正路賊數甚厚分兵往應適六旗朱紹輝中軍張恒祥左翼黃萬友均各帶隊趕到賊見我軍大集勢遂不支各旗乘勝追殺斃賊約三百人我軍亦受傷數十名把總賀元峰力戰陣亡此二十四日張運蘭一軍小溪獲勝之情形也休城之賊自小溪敗後餘匪仍退踞藍田其另股在鄧公橋一帶屯聚者約眾萬人探知自

浙而來與休賊互爲聲援逼近漁亭一路臣因鮑超撤退以後
惟漁亭爲前敵最要之區因令張運蘭派一二兩旗宋夢蘭帶
安勇兩營又畱霆字副中副後副左副右四營合紫漁亭以厚
兵力二十五日有賊騎十餘突至安營牆下往返窺伺經我軍
擊斃二人賊卽遁去二十六日該逆合眾萬餘徑犯漁亭騎賊
百餘已駛至安勇壕外霆字營將官婁雲慶會同副左副右副
後三營并湘勇二旗各派六成隊出擊該逆見我軍猝至堅踞
大橋整隊抗拒副中副後二營衝鋒副左副後二營接應安勇
由右邊山下湘勇由左邊山下兩路抄擊該逆不能抵敵奪命
狂奔我軍愈進愈奮追至岩腳殺斃僞宰相黃世瑚僞宣傳吳

斌生僞將軍劉廣僞指揮李逆四名老賊千餘名正追殺閒忽報上溪口之賊從南路來犯我軍自東路收隊回營申刻南路賊眾萬餘衝至漁亭街口霆字四營婁雲慶余大勝劉順隆熊鐵生會同一二旗張添習潘運璋陳青雲分路掩殺追至牌嶺日已向暮副後營衝過牌嶺追至當金街該處山路險窄只能魚貫而進不能排隊衝擊副後營哨官游擊銜儘先都司陳青雲守備胡克勝衝入街內遇伏陣亡婁雲慶熊鐵生各督本隊截殺伏賊數百名更初收隊回營此二十六日早擊休甯賊匪暮擊上溪口賊匪之實在情形也臣查黟縣官軍十日之內凡四大戰其抽隊助打行仗者遠至八九十里近亦四五十里風


雨嚴寒往返馳逐實因賊股眾多不能不東奔西救爲變化莫測之象仰賴


聖主威福有戰皆捷盧村一役該逆精銳殆盡尤足以寒賊膽而快人心陣亡將弁另行彙開清單請

旨交部議卹所有黥縣各軍迭次擊退犯嶺股匪并迎勦竄撲小溪漁亭之賊獲勝各緣由理合專摺由驛馳奏伏乞

皇上聖鑒訓示謹奏

三
一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百





PL
5728
A1
1876
v. 14

曾文正公奏稿

卷之十三目錄

忠義局第二案摺

咸豐十年十二月二十八日



覆陳劉培元金國琛能否赴浙摺

全日

湖南設立東征局請頒發部照摺

全日

近日軍情片

請湖南借銷粵鹽片

派署九江鎮總兵片

請隨批摺鈔發諭旨片

官軍扼守景德鎮會剿洋塘大捷摺

咸豐十一年正月二十四日

逆匪分犯大赤大洪二嶺迎勦獲勝摺

全日

近日江皖賊勢軍情片

請頒關防片

謝年終 恩賞摺

二月初八日

官軍破賊黃麥鋪饒九境內肅清摺

八日

擬移駐東流建德抽出靈軍片

攻破上溪口賊巢進克休甯摺

二月十七日

近日江楚軍情片

官軍分勦婺源樂平大股竄匪摺

三月二十四日

嶺外逆匪竄撲西北兩路分勦大勝摺

全日

進攻徽州未能得手摺

全日

景鎮失陷陳大富陣亡請卹摺

全日

江皖大局片

官軍破賊樂平鄱景浮樂一律肅清摺

四月初二日

請將左宗棠改爲幫辦軍務片

近日軍情片

官軍攻赤岡嶺賊壘悍賊殲除摺

五月十八日

代遞唐鑑遺摺摺

全日

展緩江南鄉試摺

全日

李金陽張光照正法片

收復徽州府城摺

五月二十八日

近日軍情片

揀員署皖南鎮道摺

全日

參鄭陽和等片

覆陳左宗棠軍不能赴浙摺

六月初八日

畱彭玉麟統水師營片

水陸員弁彙案請卹摺

全日

忠義局第二案摺

咸豐十年十二月二十八日

奏爲行營採訪忠義分繕清單爲第二案籲懇

天恩交部分別旌卹仰祈

聖鑒事竊臣自奉

命署理江督後卽於行營設立忠義局凡屬兩江境內剿賊陣亡之官紳並矢志不屈之士民婦女人等派員在局博加採訪詳覈事實並出示徧行曉諭或由司道具詳或由府廳州縣彙報或由該家屬徑稟臣隨時具奏請建總祠總坊其死事尤烈者請建專祠專坊前於七月初三日附片奏明第一案欽奉諭旨著照所議辦理等因欽此仰荷

天恩下逮激勸彌昭茲據委員陳艾等稟稱自七月初設局以來隨時採訪查核事實彙爲一冊合計官紳殉節者共十七員士民殉難者共一百八十三名婦女殉難者共五十九口經臣詳加查核該官紳士女人等或同仇敵愾殺賊捐軀或矢志潔身臨危致命洵屬深明大義相應分繕簡明清單籲懇

天恩俯准交部分別旌卹以褒忠節除將事實清冊咨部查核外所有行營採訪忠義第二案理合專摺具陳伏乞

皇上聖鑒訓示謹

奏

覆陳劉培元金國琛能否赴浙摺

咸豐十年十二月二十八日

奏爲欽奉

諭旨恭摺覆奏仰祈

聖鑒事竊臣於十二月初九日承准軍機大臣字寄咸豐十年十一月二十日奉

上諭瑞昌王有齡奏請飭總兵道員赴浙差委等語浙江礮船
勦賊最爲得力現擬籌款添造以資防勦惟必須有大員統帶
處州鎮總兵劉培元候選道金國琛均於水師情形熟悉該兩
員係曾國藩舊部著卽迅飭馳赴浙江交瑞昌等差遣委用俾
統帶礮船進攻嘉興逆匪以爲規復蘇常之計將此由六百里

諭令知之欽此

臣

伏查處州鎮總兵劉培元咸豐四年隸

臣部

下管帶水師副左

營五年冬間經湖南撫

臣

札飭改帶陸軍救

援江西協剿袁州吉安等處

九年二月賊竄湖南仍令改帶水

師防剿寶慶巡查省河該鎮

現在湖南能否馳赴浙江

臣

飛咨

署湖南撫

臣

翟誥酌核覆奏一面咨會瑞昌等查照辦理候選

道金國琛向在巡撫銜李續賓軍中辦理營務處并未管帶水

師亦未隸

臣部

下現在安徽按察司李續宜軍營李續宜統領

萬餘人總持大綱營務繁劇均由金國琛綜理間或分剿兩處

則金國琛分統一支目下安慶桐城粵捻麇集金國琛斷不能

馳赴浙江改帶水師舍其長而用其短前此浙事稍紓瑞昌王

有齡等奏明以張玉良之師來徽州境內會剿近日僞忠王李秀成帶賊數萬圍撲江西之玉山連陷浙江之常山江山兩縣且有竄擾衢州之信臣與浙江文報不通此時浙中喫緊似又重在水師而不在水師所有欽奉

寄諭恭摺覆奏伏乞

皇上聖鑒謹

奏

湖南設立東征局請頒發部照摺

咸豐十年十二月二十八日

奏爲湖南官紳設立東征籌餉局辦有成效應請仿照江西茶

捐章程頒發部照隨時獎敘恭摺會奏仰祈

聖鑒事竊湖南一省向稱瘠苦之區年來防剿本省援應鄰封兵勇分道四出而餉需猶能爲繼良由經理得人取民有道前此助剿江西協濟黔粵歲費百餘萬兩久在

聖明洞鑒之中本年夏間

臣

與左宗棠在湖南招募勇丁數近

二萬餉項軍裝爲款甚鉅皆由湖南竭力協濟得以從容集事

臣

以一省之物力只有此數協助外省者日多則供給本省者

日少此有所盈則彼有所缺本不欲再用湖南之餉致蒙竭澤

而漁之譏無如添募勇丁添製鎗礮添造船隻在在與湖南相
交涉不得不借資湘中之力挹注皖省之師爰與湖南撫臣熟
商札飭臬司裕麟道員黃冕鄭元璧等會同藩司文格在於長
沙設立東征局凡鹽茶貨物酌抽釐金於商民稅則所增無幾
而於本省釐務兩不相妨臣與官文胡林翼等所統各軍同係
東征之師同值缺餉之際議定東征局所籌餉項以三分之二
解江西糧臺協濟皖南一軍以三分之一解湖北糧臺協濟皖
北一軍又會同遴派翰林院編修黃錫彤員外郎郭徵疇候補
道陶枕知府彭汝琮胡鏞黃廷瓚黃芳知縣馮晟等各官紳設
立分局襄同辦理本年七八月內次第開局臣以隔省籌餉事

涉煩難未敢遽行入奏九月間夷氛內犯該局官紳聞臣有帶兵入衛之奏益復倡明大義急湊東征之餉先犒北上之師由是規模漸定眾情胥協現已報解銀二萬五千兩其在局製械造船所費尤多洵屬力拯時艱著有成效惟是另設一局與本省抽釐不同凡鹽茶各商抽收較多者應仿照江西茶捐之例給與獎敘合無籲懇

天恩飭部頒發執照二千張內監生照一千張從九照八百張各色職銜封典翎枝照共二百張寄至湖南巡撫衙門轉交東征局司道經收填用近歲以來屢蒙我

皇上諭旨褒嘉湖南官紳有裨大局今茲時事彌艱猶能多方

籌措謀及皖吳之師雖出自該局官紳報
國微忱亦足見

聖主仁言感人之深有以激發於不自已所有湖南官紳設立
東征籌餉局請飭頒發部照緣由謹會同湖廣總督臣官文湖
北巡撫臣胡林翼前湖南巡撫臣駱秉章署湖南巡撫臣翟誥
恭摺由驛馳奏伏乞

皇上聖鑒訓示謹

奏

硃批著照所請行該部知道欽此

近日軍情片

咸豐十年十二月二十八日

再近日軍情西路僞定南主將黃文金一股由景德鎮退至鄱
建交界之石門洋塘等處與左宗棠鮑超兩軍相持雨雪連綿
尙未開仗東路僞忠王李秀成一股十一月二十八日圍撲玉
山道員王德榜都司顧雲彩等登陴固守十二月初五日解圍
以去其戰守詳細各情應由江西撫臣主稿具奏北路黔縣休
甯及各嶺之賊日內尙無窺犯情形理合附片具奏仰慰

宸廑謹

奏

請湖南借銷粵鹽片

咸豐十年十二月二十八日

再查湖南一省除郴桂等十二州縣向食粵鹽外餘屬皆食淮鹽額銷二十餘萬引自粵匪滋擾運道梗塞淮鹽片引不行於是湖南之民盡食川私官抽鹽釐以助餉項本年川井被賊蹂躪鹽價驟貴而鹽釐亦頓減若不早爲變通則淮引旣斷蜀私復梗民間將有淡食之虞

國家尤失自然之利惟有借銷粵鹽尙可稍濟目前之急咸豐五年

臣

在江西曾奏請借浙鹽抵作部撥之餉欽奉

諭旨允准通行至今兩省俱有裨益此次借運粵鹽應卽援以爲例浙鹽行至江西僅玉山陸運八十里餘皆一水可通粵鹽

行至湖南僅宜章陸運九十里餘亦一水可通淮鹽以六百六

十觔成引

臣

初案奏請借運三萬引粵鹽以一百五十四觔成

引

臣

此次應請借運十五萬引俟試行有效再行會同續奏現

與湖南撫

臣

往返熟商擬仿照浙鹽成案在於廣州設立督運

局由廣東湖南督撫遴員經理在於長沙衡州設立督銷局卽

由東征局司道經理無論官運商運由局發給護照准赴廣東

省河及高州惠州產鹽之地概用民價採買經過粵境及樂桂

各埠引地不准發賣違者卽以私論鹽爲海濱大利地不愛寶

但患無地可銷不患無產可售但使不侵佔粵引地面卽於廣

東之鹽務無損於湖南之民食有益而

臣

得借抽粵鹽之釐以

抵淮綱之課猶不失爲兩江任內應籌之餉據東征局司道文
格裕麟鄭元璧黃冕等會稟請奏前來合無籲懇

天恩敕下戶部查照并飭廣東督

臣撫臣

轉飭運司及地方各

屬一體遵照辦理是否有當謹會同署湖南巡撫臣翟誥附片
具奏伏乞

皇上聖鑒訓示謹

奏

奏稿卷十三

本

派署九江鎮總兵片

咸豐十年十二月二十八日

再前月逆匪攻撲建德九江鎮總兵普承堯以寶勇五千駐防
一年之久不能堅守待援棄營潰退貽誤大局經臣據實奏參
請

旨將該總兵革職拏問在案查該軍敗潰後退至彭澤湖口又
退至九江譁聚街市經江西撫臣撥解餉銀三萬四千兩清給
欠餉臣出示曉諭將寶勇之精壯者飭鮑超挑選另編入營其
疲弱者資遣回籍並派九江鎮後營游擊儘先副將萬泰暫行
署理九江總兵印務以資彈壓所有九江鎮總兵一缺應請
旨迅賜簡放以重職守理合附片具

奏伏乞

皇上聖鑒訓示謹

奏

請隨批摺鈔發諭旨咸豐十年十二月二十八日

再臣駐紮祁門距京較遠且賊眾麇集常有道路梗塞之時以致部文到營太遲諸多不便卽如周天受請

卹之案久見邸報尙未接到部文米興朝交臣查辦之案亦見

邸報尙未接到部文又如皖南鎮之陳大富水師營之王明山

陳金鼇皆奉

旨簡放總兵實缺事在半年以前至今未接部文致臣無由行

知該員該員等亦無由具摺謝

恩實屬窒礙難行相應奏明請

旨飭下軍機處凡遇臣處奏事奉有

硃批發下之日卽將本日

諭旨隨同

硃批一併鈔發或摺中有保案卹案參案請

旨簡放之案尤須速奉

諭旨乃能隨到隨行是否有當伏乞

聖鑒訓示謹

奏

官軍扼守景德鎮會剿洋塘大捷摺

咸豐十一年正月二十四日

奏爲官軍扼守景德鎮疊獲勝仗旋追賊至洋塘會剿大捷恭

摺奏祈

聖鑒事竊襄辦軍務候補四品京堂左宗棠一軍駐紮景德鎮連克德興婺源二城經臣於十一月二十八日奏明在案左宗棠本擬由婺源進攻徽州因接到臣函知建德不守普承堯一軍潰退逆賊黃文金大股已竄饒州連陷江西數縣飛調各營由婺源回景德鎮十一月十一日探知賊已竄近離鎮五十里之規田街卽於鎮後馬鞍山一帶修築營壘并飭團紳方雪昌等於鎮上之里市渡趕造浮橋十二日卽選道王開化訓導楊

昌濬劉典等各帶親兵十餘人過河至羅家橋洪源等處察看
地勢遇賊前鋒突至王開化等按轡徐歸方過浮橋賊騎亦至
副將崔大光用劈山礮轟斃騎賊數名賊始卻退探報賊之大
隊已逼浮梁縣城隨飭各營循河岸繞出截勦賊眾鼠伏不出
而伺官軍收隊後竄陷浮梁縣城十三日令各營五更出隊進
攻浮梁之賊分兵守里市渡及下游之西瓜洲賊之踞羅家橋
者伺我軍隊伍上赴浮梁卽擁眾至對岸先攻里市渡浮橋復
由中渡駛至西瓜洲均經我軍擊退浮梁之賊亦卽遁去十四
日賊以千餘人列里市渡以千餘人列中渡其大隊直趨西瓜
洲躡淺過河約渡至二千餘人之多排陣如新月之式比派中

營由鎮中街出前營游擊羅近秋由河街出前總哨都司黃有
功繼之左營都司黃少春由後街出後總哨都司李世顏繼之
中營先到列隊洲頭鎗礮排放賊眾伏地不動參將眭金城干
總章榮先都司張志超帶隊衝擊賊復抵死拒敵適羅近秋等
由左右兩路抄出王開化楊昌濬率親兵由中路繼進賊大驚
潰望水狂奔我軍泅水追殺先鋒悍賊百餘生擒數十名溺斃
者無算其對岸之賊復麾中渡以下數股擁至河邊輪放鎗礮
我軍亦分三層排列劈山抬鎗隔水轟擊又值從九朱明亮副
將王明輝參將丁長勝亦各帶隊前來策應賊見我兵層出不
窮遂翻山竄去十六日賊悉回竄洗馬橋珠田界牌等處此賊

匪初次至景德鎮我軍力戰擊退及收復浮梁縣城之實在情形也左宗棠以賊之前股雖退而黃文金大股必將復至遂令老湘桂營堅扼婺源前後兩總哨堅守浮梁縣城又令楚軍四營於觀音閣至西瓜洲沿河挖濠修築水牆嚴飭各營日夜防守灘口自浮城至朱村李邨四五十里間輪流梭巡二十三日洗馬橋之賊果回竄至羅家橋龍頭山一帶二十四日中渡葉家洲西瓜洲老虎灘金魚灘鮎魚山等處各有賊數百躡淺渡河均經我軍擊退是夜探報偽賊目黃文金卽黃老虎率黨二萬餘由湖口鄱陽竄至二十五日賊先出千餘人列里市渡由龍頭山出六七千人至西瓜洲對面層層排列官莊以下直至

鮎魚山分爲五路每路約三四千人旗幟滿山騎賊數十由老虎灘衝過被桂勇轟退各灘口均爲我軍力拒鎗礮連施賊眾披靡傷斃多名賊目李遠繼先以千餘人向葉家洲牽制我師而大隊由上流高家灘過河頃刻間晁水而過者約三千餘人未渡者不下萬餘前數十騎由揚湖街大路直趨景鎮丁長勝帶隊由李村捷徑迎擊立斃騎賊三名丁長勝身受矛傷裹創血戰副將陳明南從衝內小路殺出副將喻勝榮游擊王開琳從浮梁對面山內抄出副將王明輝復帶隊趕到右營後營亦各率隊伍正路衝殺三面圍攻愈戰愈猛該逆大敗返奔過河我軍乘勝追擊斃賊數百名墮水死者不計其數其另股賊攻

浮梁縣城者亦經李世顏等各潛奪獲木梯保全堅城據生擒
賊供是日陣斬僞指揮三名二十七日賊目黃文金擁眾復犯
浮梁又經我軍擊退適臣派綏靖鎮總兵鮑超由祁門回援景
德鎮前隊已到是夜四鼓賊相率遁歸梘田街曹家渡等處此
黃文金大股續犯景德鎮官軍憑河堅守力遏兇鋒之實在情
形也賊由景鎮退後至鄱建交界之石門洋塘等處與左宗棠
鮑超兩軍相持雨雪連綿不能開仗臣於上年十二月二十八
日附奏在案嗣左宗棠由右路進扼梅源橋鮑超由左路進扼
洋塘該逆復從下游添集賊黨麇聚於洋塘對岸之雞公坡并
由謝家灘泥灣街一帶層層築壘聯絡二十餘里我軍因雪雨

阻河未能出擊而賊時由謝家灘跣淺過河聯騎結隊意圖潛撲鮑超營壘之後正月初九日左宗棠派令駐紮洋塘山北之四營游擊羅近秋等排列雞公坡河邊以護鮑營老營并派桂勇楚右營列隊洋塘左邊以防該逆由童家灘抄襲之路鮑超自率所部由洋塘山左前進一意專擊下游之賊詎該逆潛在謝家灘乘夜修搭浮橋三座是日寅刻出有悍賊數千渡河而南伏於村房又有騎賊數百領步隊數千直趨謝家灘中路其旁一支由童家灘過河明突暗抄共分三路復於謝家灘對岸山尖密排賊隊吶喊助勢鮑超派霆中營副將陳由立仁字營守備唐仁廉霆副前營副將蘇文彪進攻中路霆前營副將黃

慶霆左營副將鄭陽和河溪營游擊蕭以德進攻左路以訓導
伍華瀚華字營馬隊輔之霆右營副將陳得勝霆後營副將張
玉田進攻右路以游擊趙廷貴川海營參領明興黑龍江馬隊
輔之正分撥間雞公坡之賊過河徑襲老營經陳得勝張玉田
會合羅近秋等各隊開放連環鎗礮賊即敗退我軍遂於謝家
灘三路并進該逆亦三路迎拒鏖戰二時之久賊勢不支鮑超
督飭各營乘勝猛擊直抵浮橋殺斃悍賊二千餘名該逆奪橋
而走我軍追殺擁擠溺斃之賊數百名有過橋不及鳧水逃溺
者有逃竄下游過河經任星元礮船擊斃者賊之前隊懼官軍
追勦河北已將浮橋斫斷鮑超飭陳由立唐仁廉等由淺灘分

途過河圍殺一時之久賊屍山積內有黃袍賊及紅袍賊目
餘名駢死其中我軍乘勢將謝家灘一帶賊壘全行踏平該逆
後隊山岡之賊突又層層來援我軍愈戰愈奮將賊衝爲數段
該逆狼奔不顧日暮收隊回營是日計斃賊四千餘人溺斃逃
散者不計其數據生擒賊供稱逆首林世發許茂才死於亂軍
黃文金身受重傷奪獲鎗礮器械旂幟數千件初十日黎明鮑
超會合左宗棠所部出隊過河雞公坡之賊已踉蹌宵遁我軍
追至鐵鑪港地方該逆分兩路一由建德回竄青陽一歸併彭
澤另股鮑超與左宗棠分派之營跟蹤追剿以清西路左宗棠
仍回駐景德鎮稍休兵力以防東路此正月初九日洋塘大獲

勝仗之實在情形也臣查逆首黃文金爲著名梟悍之賊自去
年十一月撲陷建德蔓延鄱陽浮梁等縣其時臣在祁門三面
皆賊僅畱景德鎮一綫之路以通接濟該逆盡銳攻撲欲得甘
心賴左宗棠之謀鮑超之勇以守則固以戰則勝用能大挫兇
鋒化險爲夷洵足以寒賊膽而快人心所有出力員弁可否併
入前案彙保出自

鴻施陣亡之游擊周芸亭等三十員名另繕清單請

旨交部從優議卹以慰忠魂所有官軍扼守景德鎮及追賊洋
塘會剿大捷各緣由專摺由驛六百里馳奏伏乞

皇上聖鑒訓示謹

奏

利和



逆匪分犯大赤大洪二嶺迎剿獲勝摺

咸豐十一年正月二十四日

奏爲逆匪分犯大赤大洪二嶺進撲祁門老營官軍迎剿獲勝追賊出嶺恭摺奏祈

聖鑒事竊祁門西北兩路嶺隘紛歧西路之大赤嶺北路之大洪嶺尤爲扼要臣於去年十月內閱視祁黟東北一帶嶺防派副將唐義訓跣看祁西各嶺形勢在於大赤嶺頭修築柵卡並分防大小樺根嶺派撥祁門老營更番戍守大洪嶺向有徽防戍兵近日提臣江長貴駐紮柏溪更於大坦湘源兩處節次設防以固門戶疊經嚴飭諸將慎密扼守正月初六日午未間連接西北兩路探報石埭大股賊匪同日分犯二嶺大洪嶺一股

都司曹貴迎擊受傷退至長排經江長貴派隊援應該逆退伏
嶺脚時已昏暮不能測其蹤跡大赤嶺一股副將黃惠清迎擊
傷亡弁勇多名且戰且退當夜折回祁門賊已竄至厯口臣以
該逆兩路進犯不利分擊當俟其來撲時堅守營壘添調外援
爲夾擊之計初七日探知大洪嶺之賊經江長貴督隊擊退防
兵仍至嶺頭堵塞卡隘北路可保無虞而大赤嶺竄入厯口之
賊乍前乍卻探報歧異臣以北路旣穩於初八日辰刻派副將
唐義訓統領強中湘前及前左前右春字等營馳赴厯口一帶
迎剿詎我軍行至距祁二十里之石門橋賊已距橋不遠唐義
訓與各營官登高瞭望見白旗之匪約二千餘人擁至橋外田

壘見官軍大至排列未動橋外山岡黃旗黑旗花旗諸逆分三大股約計四五層遠山之外遙望旗幟紛紛不見其尾唐義訓與各營官商派哨隊分爲三路以黃惠清一支伏於橋左山衝以副將沈寶成都司張遇春一支伏於橋右山後唐義訓督同通判朱聲隆當中一路排列橋頭及附近山上以候選知縣易潤壇督領接應各隊分派甫定揮令中路過橋白旗之賊徑由田壘猛撲而前我軍鎗礮齊施該逆後隊仍復搖旗大進白旗賊拚命抗拒戰約半時之久我軍伏兵齊起黃惠清由左路衝內突出沈寶成張遇春由右路山後突出易潤壇後隊繼至左右兩路均翻山包出賊後礮斃騎賊一名殺悍賊數十名唐義

訓朱聲隆乘勢揮令猛進中路賊勢不支我軍一齊猛撲聲振羣山該逆且退且拒各軍追殺純從兩旁包抄賊尸縱橫冒林墜石拋棄旗幟鎗械無算窮追三十餘里至武陵嶺外距祁已五十里矣酉刻收隊回紮小路口適前派駐防櫟根嶺之震字營官馬復震亦來會合初九日早唐義訓率各軍出隊過嶺仍分左右中三支并進敗賊之回聚厯口程村者望見官軍掩至驚潰而走我軍追勦直出赤嶺之外是役計斃賊千餘名生擒一百三十五名陣斬賊首麟天豫古得金獲其偽印奪獲旗幟二千一百餘面鎗礮二百三十餘件騾馬百零五匹我軍傷亡百餘名經唐義訓稟報前來

臣查此股逆匪卽去年十一月內

撲犯羊棧嶺竄踞盧村之賊經我軍大加懲創甫歷四十餘日復敢直犯祁門據生擒賊供該逆謀知臣處官軍盡回剿景鎮一帶祁門老營空虛意欲攻我不備計殊狡毒此次擒斬渠魁賊之器械拋棄殆盡足以寒逆黨而快人心副將唐義訓與記名總兵朱品隆二人由李續賓部下調至臣處樸實耐勞心思靜細口不言功去年克復建德及此次保全祁門均能以少勝眾所有出力將士籲懇

天恩併入建德案內開單請獎陣亡各員另摺懇請賜卹以慰忠魂所有逆匪分犯大赤大洪二嶺進撲祁門老營官軍迎剿獲勝緣由理合專摺由驛馳奏伏乞

皇上聖鑒訓示謹

奏

奏稿卷十一

六

近日江皖賊勢軍情片

咸豐十一年正月二十四日

再祁門以北係石埭太平古劉賴各股賊匪去冬以來黟縣漁
亭及羊棧大赤諸嶺屢次大戰迭經陳奏在案祁門以西係僞
主將黃文金大股自去冬內犯江西所有湖口之守景德鎮之
防洋塘之戰亦經上年及此次分別奏報現在賊退下隅坂尙
力拒鮑超一軍相持未決祁門之東係僞忠王李秀成大股上
年連陷皖南之江灣婺源浙江之常山江山本年正月圍攻玉
山廣豐廣信三城均經官軍竭力堅守解圍以去現在竄至鉛
山之吳坊陳坊等處有入擾江西腹地之意距臣祁門老營相
去六百里外兵力實難兼顧臣已飛咨江西撫臣飭劉于潯堅

守撫州府城飭黃鳴珂堅守建昌府城並飛調魏喻義一軍駐紮江西省城預爲籌防或可保全無虞所有江皖交界賊勢軍情理合附片具奏伏乞

皇上聖鑒謹

奏

請頒關防片

咸豐十一年正月二十四日

再上年八月接准江蘇撫

臣

薛煥函稱和春失事以後所用

欽差大臣關防經許乃釗派員送至蘇州撫署城陷之時一併

遺失囑

臣

自行具奏請

旨另頒關防等語

臣

之初意本擬皖南稍有頭緒卽當馳赴淮

揚俟軍入蘇境再行奏請關防曾於十月初四日附片具陳十

一月初五日奉到

硃批明春汝帶兵親往淮揚尙須臨時斟酌欽此仰見

聖主權衡緩急明燭萬里今祁門三面皆賊正在苦戰相持之

際

臣

斷不能舍此而遠赴他處合無籲懇

奏和卷十三
天恩飭部頒給

欽差大臣關防並

敕頒發令箭旗牌等件由江西遞至皖南交臣祇領至臣能否
親赴淮揚應俟安慶克復後斟酌情形再行具奏請
旨所有請頒關防緣由理合附片具奏伏乞

皇上聖鑒訓示謹

奏

謝年終

恩賞摺

咸豐

十一年二月初八日

奏爲恭謝

天恩事咸豐十一年正月二十三日

臣

在祁門軍中承准軍機

處咨開十一月二十日由

內交出年終

賞福字荷包銀錢銀鏤食物等項交兵部由驛馳遞等因到臣

當卽恭設香案望

闕叩頭祇領

臣

謬領東征未戡南服年華易擲歲廩虛糜神

馳金鑰方殷向日之忱春到木蘭忽荷

自天之寵

奎章璀璨妙八法以垂型

天語吉祥綜九疇而

錫福重以雙魚迭佩

恩逾華袞之榮百貝分頒

賞溢俸錢之數餅香風暖飮甘而棗核同懷粉潔雲敷表素而蓮心共挹式飲流酥之乳兼嘗宜麥之珍疊荷

鴻施莫名悚感臣惟有惜此分陰勉圖寸進託

一人之有慶矢每飯而不忘庶冀仰答

高厚生成於萬一所有

微臣

感激下忱理合繕摺叩謝

天恩伏乞

皇上聖鑒謹

奏

多和卷十三

官軍破賊黃麥鋪饒九境內肅清摺

威豐八年

十一年二月初

奏爲官軍破賊於黃麥鋪等處大股下竄江西饒九境內全數肅清恭摺奏祈

聖鑒事竊自上年十一月逆賊黃文金大股由建德入犯江西連陷數縣左宗棠鮑超兩軍堅守景德鎮大戰洋塘各情疊經奏報在案鮑超從洋塘跟蹤追賊至彭澤之下隅坂左宗棠亦派楚軍四營由右路馳追駐紮小麥鋪地方該逆勾結青陽銅陵援賊一支仍踞建德縣城大支盤踞金家村黃麥鋪一帶意圖抗拒復犯景鎮正月二十六日鮑超商令皖南鎮總兵陳大富列隊建德牽制城中之賊而自率大隊馳至黃麥鋪賊見官

軍突至層層密排山谷皆滿不見其後鮑超派靈左營副將鄭陽和靈中營副將陳由立馬隊訓導伍華瀚楚前營游擊羅近秋楚左營都司黃少春靈右營副將陳得勝由左路攻擊又派靈前營副將黃慶靈後營副將張玉田前旗都司黃有功後旗都司李世顏黑龍江馬隊佐領明興靈副前營副將蘇文彪由右路攻擊自率副將宋國永唐仁廉蕭以德等從中路進賊見我軍尙未成列遽來撲犯漫山徧野聲振萬壑鮑超督飭各營三路齊進鎗礮密施刀矛並舉鏖戰三時之久賊陣稍動我軍乘勢壓之如牆而進追奔四十里愈戰愈奮該逆有撲港淹死者有懸岩跌斃者尸橫徧野血濺林谷鮑超復令各營搜山躡

伏追至建德適陳大富與水師萬化林會攻城賊克復縣城約
共斃賊六千有餘淹斃跌斃逃散者共計萬餘生擒偽琳天福
一名偽鼎天侯一名琳天侯一名擎天裕將軍各一名檢點三
名丞相二十二名長髮老賊三百餘名當卽訊明正法奪獲槍
礮旗幟刀矛不可數計據左宗棠鮑超先後咨報前來臣伏查
上年冬月以來逆目黃文金從建德入犯江西連陷數城意在
斷祁門之糧路解安慶之重圍賴前有景鎮之守洋塘之捷茲
又於黃麥鋪獲此大勝江西饒九等屬全數肅清轉危爲安實
屬有裨全局提督銜綏靖鎮總兵鮑超勇冠三軍每戰必克籲
懇

奏稿卷十三
天恩交軍機處記名遇有提督缺出請

旨簡放陣亡之守備曹有餘請交部從優議卹所有黃麥鋪破
賊再克建城緣由恭摺由驛馳奏伏乞

皇上聖鑒訓示謹

奏

擬移駐東流建德抽出霆軍片

咸豐十一年二月初八日

再僞忠王李秀成股匪由廣信內犯意圖竄擾江西腹地臣於正月二十四日附片具奏在案厥後李逆果圍建昌府城晝夜環攻安肅道劉于濤派兵救援正月二十七八九等日屢次開仗尙與城中文報不通無論能否解圍而大股旣入內地則或犯南昌省垣或犯瑞州臨江皆不可不預爲之防必須有大支勁旅馳往援剿庶江西完善之區不至糜爛又皖北四眼狗大股勾結捻匪四路狂竄聞霍山官軍敗挫准撫臣胡林翼函商臣處派兵救援北岸亦須有大枝勁旅渡江援剿庶安慶垂成之功不至中棄臣處兵力祇有此數現在張運蘭一軍防剿徽

州休甯之賊左宗棠一軍防剿新犯婺源之賊此外別無勁旅
可作他處援兵萬不得已臣當移駐東流建德防堵下游池州
蕪湖各股而抽出鮑超一軍作爲游擊之師或馳援江西腹地
或馳援皖北各路視其尤急者而應援之或可少遏凶鋒是否
有當理合附片具奏伏乞

皇上聖鑒訓示謹

奏

攻破上溪口賊巢進克休甯摺

咸豐十一年二月十七日

奏爲官軍攻破上溪口賊巢進圍休甯縣克復城池恭摺馳陳

仰祈

聖鑒事竊自上年八月徽州失守後該逆竄踞休甯縣城經臣

派霆字營老湘營屢次攻剿漸可得手適逆首黃文金一股竄

陷建德連破五縣擾入浮梁景德鎮臣之糧道阻絕不得已調

鮑超統率各營回剿僅畱張運蘭老湘營霆字四營及編修宋

夢蘭所帶安勇駐紮漁亭等處防堵徽州休甯之賊南路上游

口自已革副將楊名聲潰敗後無兵駐守均經隨時奏明在案

臣以休甯不克徽郡旣不可圖卽祁門亦終不甚穩新年以來

屢據探報該逆多聚上溪口意欲抄截漁亭後路撲犯祁門正月十六日曾飭張運蘭攻勦上溪口一次逆眾敗退以兵單未能駐守詎該逆見我軍退後復率大股在於上溪口及河村石田小當等處層層築壘與休城屯溪之逆互爲犄角力抗我師二月初七日臣派記名總兵朱品隆率湘前等營記名總兵唐義訓率強中等營參將葉光岳率親兵營由祁門前赴漁亭會同張運蘭老湘營進攻上溪口令漁亭霆字四營及宋夢蘭所帶安勇約期列隊牽制休甯城內之賊初九日湘前強中各營由牌嶺當金街一路進老湘營由李村凌村一路進均約於上溪口會齊老湘營行抵長豐江潭卽見上溪之逆四山擺列

幟又於各大村房設立埋伏沿河兩岸徧插地鉞堅修重卡張
運蘭揮眾迎擊刀矛并進施放噴筒火箭賊巢火起一面將卡
邊裝板伏行刀砍乃破重卡而入三旗旗官易開俊帶傷追至
河千百長廖定陞殺悍賊數名賊遂大潰時河村之賊復出萬
餘過河迎敵適湘前強中親兵各營先破石田堅卡乘勝而來
并至上溪聲勢彌壯大呼疾進橫出腰擊先將上溪口下面一
帶賊壘燒燬該逆紛竄狂奔我軍沿河分兩路窮追抵石田地
方又有賊營六座合攻夾擊火器齊施遂將河村賊營一併踏
破賊向小當敗走該處復有伏賊接應敗匪回旗抗拒朱品隆
唐義訓等揮令各軍愈前愈奮同知朱聲隆從九禹志漣縣丞

李公選帶領後隊一齊趕至并將小當援賊全行擊敗沿途殺斃逆匪二千餘名墮岩投水者不計其數生擒偽領天豫鄭逆將軍洪天勝檢點李德全等二十八名髮賊八百四十餘名解散難民以數千計奪獲偽印六十餘顆驢馬百餘匹旗幟礮械無算此二月初九日攻破上溪口賊壘之情形也是日漁亭靈營安勇亦出隊至藍渡一帶亦將該處賊卡燒燬直抵休甯縣城該逆負固不出朱品隆唐義訓張運蘭等次日會商該逆經此番痛剿城賊必已膽寒急宜乘勝圍攻十一日各營會抵城下四面環攻該逆但於城上轟放鎗礮我軍亦用噴筒劈山礮對擊傷斃城上悍賊多名唐義訓復令朱聲隆葉光岳胡玉元

等督帶馬隊佯退河干誘賊出城而猛撲之該逆堅不敢出我
軍如牆而進扒城及被礮子傷者不下四百餘名各營銳氣不
爲少卻誓欲拔此堅城張運蘭朱品隆等遂商定暫退詰朝再
來環攻該逆見我軍圍剿甚猛全股已於是夜三更時分路遁
走比及天明各營追近城邊業已退盡當將休甯縣城收復查
視城上更棚五百餘座均各完固拋棄刀矛器械甚多各軍以
半分守各門以半由屯溪徽郡一路追剿此二月初九十一日
攻克休甯縣城之情形也臣查休甯之賊踞城將及半載牽綴
我師不能進取賴上溪口一戰連踏逆壘大挫凶鋒城逆膽寒
遂得一攻而克仰仗

聖主威福士卒用命布政使銜河南開歸陳許道張運蘭平日
苦心訓練臨陣寓節制於奮猛之中籲懇

天恩請交軍機處記名遇有按察使缺出請

旨簡放記名總兵朱品隆唐義訓熟於分合之法勇而能靜籲
懇

天恩簡放總兵實缺江蘇補用參將葉光岳請免補各缺以副
將仍畱江蘇遇缺卽補湖南補用參將胡玉元請免補本班以
副將仍畱湖南補用江蘇補用同知朱聲隆請

賞換花翎候選縣丞李公選請以知縣不論雙單月遇缺卽選
並加同知銜卽選從九禹志漣請免選本班以府經歷畱於江

蘇儘先補用並加五品銜其餘出力員弁容臣擇尤彙奏請獎
受傷人數較多俟醫調後查明陣亡人員另單請卹所有攻破
上溪口賊巢克復休甯縣城緣由恭摺由六百里馳陳伏乞
皇上聖鑒訓示謹

奏

近日江楚軍情片

咸豐十一年二月十七日

再江楚軍情僞忠王李秀成由廣信府內竄圍攻建昌府城撫
州喫緊江西省城亦爲震動僞英王陳玉成由霍山內竄直入
蘄黃湖北省城亦爲震動臣擬自赴東流建德一帶抽出鮑超
一軍援應兩處曾於二月初八日附片奏明在案茲據劉于潯
稟稱建昌之賊開挖地道城中兵不滿千危在呼吸援師敗挫
賊蹤跟至撫州等情臣查撫建去省甚近關繫甚大已飛調鮑
超一軍由九江一帶馳赴江西省城先顧根本臣因援撫建
休甯新克徽州可圖暫緩移營仍駐徽州境內惟鮑超之軍一
動祁門西路建德一帶又將爲賊所踞左宗棠之軍小挫一次

祁門南路浮梁一帶亦恐爲賊所阻臣惟有激勵將士力攻徽
郡以通浙江之氣而開米糧之路所有近日軍情理合附片具
陳伏乞

皇上聖鑒謹

奏

官軍分剿婺源樂平大股竄匪

摺

咸豐十一年三月二十

奏爲官軍分剿婺源樂平等處大股竄匪三次大捷一次小挫
謹將先後接仗情形恭摺奏祈

聖鑒事竊左宗棠一軍自追賊洋塘擊退黃文金大股後卽回
駐景德鎮扼防東路三月十七日據左宗棠咨稱僞侍王李世
賢糾合大股逆匪竄陷婺源分踞清華街左宗棠分派各營相
機防剿親率中營繼進二月初二日飭老湘營右營拔行初三
日進紮傅村探知清華之賊分踞石嶺嚴田一帶意圖由甲路
分犯浮梁景德鎮游擊王開琳與知府王開來從九張聲恆朱
明亮等計商初六日進紮甲路扼之是日黎明各派八成隊已

刻抵甲路甫築營壘賊已由石嶺嚴田揚旂蜂擁而來王開琳
王開來會飭各營嚴陣以待午刻始令前旂由右路捲旂潛出
後旂由左路捲旂潛出號鼓齊發左右兩旂及侍壯勇由中路
衝出桂營右營繼之賊於田壘中層層列陳抵敵各營奮威衝
殺鏖戰一時斃賊四五百名賊始敗走我軍乘勝力追賊忽回
頭猛抵如是者數次我軍陣斬騎賊二百餘名步賊二千餘名
生擒百餘名奪獲刀矛旂幟無算是夕賊退清華街初七早仍
糾大股徑撲甲路營盤我軍奮擊卻之據生擒賊供清華街之
賊實有四五萬人專力攻撲甲路直犯浮梁景鎮王開琳等稟
請加兵助剿左宗棠飭游擊羅近秋都司李世顏各率所部赴

甲路助之旋據探報婺源之賊已竄過中雲初八日左宗棠親率中左後三營及前總哨馬隊營進駐鯉魚橋於是分駐甲路之八營與左宗棠相距漸遠首尾不能相顧初九日逆眾由石嶺分三支直趨甲路兩面山林內層層埋伏以萬餘人由中路搦戰王開琳會商右營與前旂潛伏左邊山內桂營與左旂潛伏右邊山內自率侍壯勇及右後兩旂分列正路壠中之賊張兩翼衝犯而來我軍嚴陣不動俟賊逼營正伏齊出殺賊四五百人其後股悍賊日夕揚旂紛來復經我軍直撲旁抄擊斃者約千餘人該逆大敗而走伏賊亦盡縮退此初六七暨初九等日甲路兩次大勝一次小勝之實在情形也是日探報婺源大

股賊已由中雲竄黃沙入樂平界如蠅如蟻晝夜趲行刻無停趾左宗棠卽率中左二營及前總哨移駐樂平之柳家灣飭後營駐紮黃泥頭橫出截之探報賊之前隊踞湧山後隊踞董門沿溝一帶是夜四更派左營前總哨及順字營馬隊由柳家灣左路進三汊攻勦董門沿溝之賊親率中營由柳家灣中路進分水嶺攻勦湧山之賊又調黃泥頭後營之隊亦由中路繼進十一日黎明齊抵該處始知湧山逆眾甫於四鼓竄過正擬躡蹤追勦忽見下路逆匪漫山徧野由沿溝湧山大路而來我軍返旆突出截之賊不知官軍之所自來蜂擁而至並有零騎由旁路抄出直奔左宗棠馬前卽選道王開化訓導劉典麾諸哨

從中左兩路衝出守備史聿舟率所部躍馬而前斜截旁路守
備蕭仁慈千總張顯榮等各帶隊奮威衝殺賊始退卻黃有功
黃少春馬德順從沿溝兜勦而來賊復大潰追殺十餘里斃賊
近三千人奪獲刀矛旂幟二千餘件騾馬百餘匹解散脅從極
多此十一日橫擊樂平湧山沿溝之賊大獲全勝之實在情形
也是日羅近秋李世顏兩營甫抵甲路忽後面之賊撲犯桂營
當經擊斃悍賊十餘人前面之賊亦經老湘等營擊退該逆連
夜在徽州添糾大股以圖合圍我軍十二日賊黨大至各營前
後右三路面面皆賊王開琳王開來張聲恆合前後右三旂堵
擊正路朱明亮及左旂堵擊右路羅近秋李世顏堵擊後路該

逆三面併力直撲更番迭進勢殊凶猛游擊陳明南大呼陷陣
手刃搖旂賊目三人卽率所部橫躍入陣往來盪決賊眾盡靡
不虞中賊飛礮登時陣亡我軍少卻王開琳等率各營極力堵
截並擊斃騎馬黃袍賊目一名賊方併歸田壠漸漸縮退王開
琳等以賊數愈增包圍愈近各營鏖戰數日子藥米糧已無存
畱共議全師出險之策是夜三鼓各營五成隊居前輜重居後
黎明以五成隊排列徐徐退出十六日乃全師還景德鎮共計
先後陣亡五十餘人受傷者百餘此甲路一軍先大勝後小挫
之實在情形也臣查李世賢股匪實有六七萬眾狡悍過於他
賊經左宗棠一軍屢挫其鋒雖甲路小有疏失猶賴將士同心

全師出險實屬進止有方陣亡之藍翎參將銜湖南補用游擊
陳明南前於克復德興婺源案內擬保花翎副將銜該員樸實
勇敢忠義奮發此次衝鋒殞命實堪憫惻應請照副將例
賜卹以慰忠魂其同案擬保外委陳石台擬保把總趙玉蓮曾
文清喻拔元陳正彪均照擬保各職請卹所有官軍分勦婺源
樂平大股竄匪三次大捷一次小挫各緣由理合恭摺具奏伏
乞

皇上聖鑒訓示謹
奏

嶺外逆匪竄撲西北兩路分剿大勝摺

咸豐十一年三月二十四日

奏爲嶺外逆匪竄撲西路厯口北路禾戍等嶺分投擊剿大獲勝仗恭摺奏祈

聖鑒事竊正月初六日逆匪分犯大洪大赤二嶺提臣江長貴擊退北路大洪嶺之賊副將唐義訓擊退大赤嶺之賊前經奏明在案臣以西路厯口地當要隘卽於祁門抽撥三營駐防厯口以副將沈寶成統之二月二十三曰西路樸根嶺外之賊破卡而入竄至簪坑北路之賊亦破禾戍嶺而入江長貴親督將弁由柏溪馳援堵禦尙爲得手西路簪坑之賊四出焚掠二十五日圍撲厯口營盤麇集河洲約近萬人并有騎賊百餘扼據

石橋橫截我軍歸路後面山林中旂幟密布復有賊八九千人自卯至午迭次猛撲各營將士堅壁固守不稍搖動但以鎗礮擊之斃賊多名前者裏尸後者繼進臣於二十五日派記名總兵竹山協副將朱品隆率湘前親兵等營由祁門赴援厯口賊聞援兵將至解圍以去二十六日黎明朱品隆派同知朱聲隆文童楊德霖藍翎把總朱寶隆率八哨由厯口之右翻山包繞而去朱品隆自與沈寶成易潤壇楊鴻烈李公選副將陳玉恆都司張遇春藍翎從九楊慶春率十三哨由厯口之左沿河夾擊而出以副將胡暉堂都司賀湘洲守備喻賢能各帶哨隊伏後接應朱聲隆等行距汪村二里許正值賊匪大股前來因整

隊不動賊已三次鼓噪始麾各哨猛擊之礮斃黃衣悍賊數名
敗而復進我軍愈戰愈奮賊且拒且走正掩殺間見汪村突出
騎賊百餘經我軍劈山礮擊中十餘人又見村後山中賊眾前
來抵敵適楊德霖朱寶隆已至山上喊聲大震朱品隆等將塘
下陳田葉村各匪擊敗亦追抵汪村左右兩路合而爲一賊遂
大潰我軍乘勝追至櫟根嶺始行收隊計斃賊九百餘名生擒
僞丞相宋先祥等三十七名解散脅從以千計奪獲騾馬四十
七匹旂幟五百餘面敗賊悉遁嶺外此二十五日朱品隆赴援
厯口二十六日會剿簪坑大獲勝仗之實在情形也北路犯嶺
之賊二十三日竄撲禾成嶺卡并分犯湘源楓樹嶺等處江長

貴親督游擊王金鼎江國林守備達金龍等馳往援應已革副將羅承勳抵禦嶺賊正在危急之際見援兵大至軍心始壯適犯楓嶺之賊經都司馬登富守備達玉元二隊由湘源老嶺腳兩路抄截賊遂合股直犯禾成愈戰愈多我軍併力衝殺賊始敗退回巢江長貴防其再逞並慮其避實擊虛分犯方干釣魚各嶺因令達金龍並帶馬隊星夜馳赴黟縣一面設伏備援以杜窺伺旋據參將袁國祥稟報是日已有股匪竄犯方干嶺參將黃朝陞都司謝永發俱已受傷將潰袁國祥分頭抵禦鏖戰三時之久生擒十一名奪獲器械多件當將該逆擊出嶺外二十四日大霧彌漫賊復分犯禾成楓樹大洪三嶺及湘源隘口

江長貴派王金鼎專顧左路羅承勳專顧右路自率親軍及游擊林耀龍等掩旂息鼓以觀其變該逆於濃霧中吶喊三次蜂擁而至我軍舉發號礮伏兵齊出火器斃賊甚多適守備譚加耀千總張連芳率隊由嶺卡衝出賊眾大奔墮岩落澗死者不計其數其犯楓嶺之賊亦經江國林張占元等擊敗惟湘源一股尤爲凶悍分三路來撲馬登富專壓右手山梁馬懷珍扼堵左手山梁相持兩時許達玉元徐國春等從中路憑卡轟擊斷其首尾斃賊無算其時都司曹貴亦由大洪嶺抄出策應賊見我軍厚集大潰出嶺是日犯方干嶺之賊經袁國祥與峯字禮字各營併力擊退犯釣魚嶺之賊經黃勝林達金龍等擊退此

二十三二十四日江長貴分頭擊退北路各嶺竄匪之實在情形也臣查嶺外逆匪屢逞狡謀此次竄撲厯口幸賴三營堅守朱品隆援兵得以從容策應江長貴於賊竄各嶺時尤能多方應變悉合機宜出力員弁應卽附於前案保獎以示鼓勵所有西北兩路各軍擊賊出嶺緣由理合專摺馳奏伏乞皇上聖鑒訓示謹奏

進攻徽州未能得手摺

咸豐十一年三月二十四日

奏爲官兵進攻徽州未能得手恭摺奏祈

聖鑒事竊僞侍王大股賊匪竄擾饒州一帶祁門餉道梗塞勢將坐困二月十二日官軍攻克休甯卽擬力攻徽州以通浙江米糧之路臣於十六日曾附片具奏在案侍講銜翰林院編修宋夢蘭籍隸歙縣尤欲力攻徽州以保桑梓十四日督帶安勇由歙西繞至北鄉將稠墅賊卡富塌賊館勦洗一次回駐汪村十九日徽賊大股圖犯汪村四面包抄我軍鎗礮驟不及施騎賊復從旁繞出將宋夢蘭頭額砍傷三處顛暈馬下經家丁扶救出圍藍翎守備銜儘先千總梅魁員見勢不支勒馬殿後賊

眾大至刀矛攢搗梅魁員回鞭衝突手刃二賊力竭陣亡此十
九日汪村接仗之情形也三月初二日臣派祁門黟縣各防之
兵九千餘人齊集休甯大舉攻徽臣亦親赴休甯就近調度初
四日由休甯分兩路前進西路以副將唐義訓爲主副將沈寶
成同知朱聲隆等輔之是夜駐宿岩市街北路以開歸道張運
蘭爲主副將婁雲慶參將楊鎮魁張應超等輔之途次攻破潛
口賊巢斬馘百餘人是夜駐宿潭木地方初五日西路唐義訓
等營由岩市前進行過七里亭登高瞭望跣看地勢城賊出北
門搗戰各哨不俟號令衝過古虹橋賊匪佯敗我軍搶上山梁
馬賊數百騎由右包抄我軍前阻堅城後隔河水節短勢促不

能施展適值驟雨如注衣服火藥盡溼騎賊皆用洋鎗乘我於
危遂致挫敗營官副將葉光岳胡玉元力戰死之弁勇傷亡二
百餘人北路婁雲慶等因天雨收隊馬賊百餘騎分途包抄我
軍回鞭衝擊且戰且退轉塘收同張運蘭令隊伍植立不動俟
馬賊全退連環收歸此初五日初次進攻徽郡之情形也初六
日各軍仍回休甯稍爲將息初十日再進攻徽專由北路行走
十二日列隊於大李富竭等處賊亦負城排隊相持竟日無隙
可乘是夜唐義訓住宿槐塘張運蘭住宿大里賊於二更忽出
萬餘人由西路包抄而來焚村劫營喊聲震天湘營舊規皆生
營壘不住民房此次村房被燒勇夫大驚隊伍錯亂槐塘村

首先被燒強中等營挫潰惟旗官劉松山力戰時許徐徐收隊
張運蘭婁雲慶等見前村被燒齊出村房列隊山上得以保全
無恙次日同回休甯其祁門黟縣各軍皆回原營此第二次進
攻徽郡之情形也臣查徽郡之賊雖有二三萬眾其精悍者不
過數千本可力戰攻取機緣不順兩次未能得手記名總兵儘
先副將唐義訓初次以號令不嚴過橋輕進二次以哨探不遠
被劫驚潰均難辭咎姑念平日謹慎屢著功績應請以游擊降
補副將沈寶成請以游擊降補同知朱聲隆請以知縣降補聊
示懲儆副將葉光岳胡玉元均請交部從優

賜卹守備銜千總梅魁員力顧主將奮勇捐軀請從優照卹

例

賜卹以慰忠魂所有進攻徽州未能得手各緣由恭摺由驛馳奏伏乞

皇上聖鑒訓示謹

奏

卷之三

三

景鎮失陷陳大富陣亡請卹摺

咸豐十一年三月二十四日

奏爲景德鎮失陷總兵陳大富等力戰殉節請

旨優卹以勵忠貞並水師力扼河道救護糧臺軍械恭摺具奏

仰祈

聖鑒事竊僞侍王李世賢一股前在婺源清華街甲路等處與
左宗棠一軍相拒左宗棠分出別部在甲路小挫退至黃港景
德鎮臣於另摺縷晰具奏二月中旬景德鎮十分喫緊臣卽飛
檄皖南鎮總兵陳大富迅率駐守建德之四千餘人馳赴景鎮
會同左宗棠軍相機防剿二月十五日自建德拔行二十日抵
景鎮防所三月初三日臣在休甯營次接據左宗棠函稱景德

鎮於二月三十日失陷該軍救援不及幸於二十九日埽清峇
丹街一帶賊蹤打開一路現已移駐樂平等語臣以景鎮失陷
祁門糧路斷絕當檄鮑超一軍急赴鄱陽一路會合左宗棠之
師夾擊景鎮其時文報梗塞景鎮之附近一二百里一片賊氛
失陷情形無從查悉三月十四日據糧臺委員湖北補用知府
張秉鈞稟稱二月二十九日賊眾數萬在牛角嶺柳家灣迴龍
嶺三處潛匿距鎮約三十里總兵陳大富於是日辰刻出隊至
湖田渡河未見賊蹤仍復收隊午刻馬賊百餘由景鎮之南雙
鳳橋竄至李村步賊繼之陳大富卽督全軍迎頭截擊賊眾不
戰而退官軍追剿十餘里三十日黎明大霧迷漫該逆趁霧先

行偷過雙鳳橋一伏於都司陳登科營壘之東一伏於游擊胡鳳雛營壘之南陳大富待至霧散督率大隊躍馬當先參將田應科隨其衝鋒將過橋之賊悉行擊退詎該逆大股由景鎮之東面觀音閣抄出我軍分頭截擊隊伍稍散而雙鳳橋之賊卽乘虛蜂擁而入陳大富當先抵禦正中礮子穿過右乳血染馬背猶復裹創呼號眾軍奮力攻擊眾軍見主帥受傷無心戀戰賊復分途拚命抄襲我軍應接不暇未及收隊賊已進營放火陳大富負傷血戰見營盤火起下馬向北叩頭跳入李村河殉節其麾下將領參將田應科游擊蕭傳科胡占鼇都司胡鳳雛熊定邦吳定魁千總羅廷材等亦皆躍馬赴敵同時殉難此二

月晦日景德鎮失事之實在情形也臣自至皖南於江西省城設立總糧臺景德鎮設立轉運糧臺派張秉鈞與同知王順曾通判朱煥文經理軍械子藥概置州次以水師護之三十日陸兵失利商民紛紛擁至河邊爭船競渡騎賊已撲至西瓜洲幸水師營官高寅哨官李廷忠均在西瓜洲下之鷺頸灘齊放礮賊不敢逼張秉鈞與訓導王慶奎將軍裝坐船開至西岸卽令護臺水師哨官謝洪春何勝悅二哨沿河開礮保護軍裝民船千有餘號駛赴下游馬家澗當與各營哨計議分礮船爲前後中三路護衛各船於四更開行駛至鳳岡天尙未明西岸之賊鎗礮子如雨下經水師往返轟擊護出各船天明至古縣渡

詢悉水師中營游擊任星元會合內河水師營官蘇萬福督率
戰船連日苦戰使賊不能造搭浮橋賊匪銳意欲成浮橋冀圖
圍我船隻搶我軍火兩岸十餘里豎旗排陣乘夜趕釘竹木密
樁上用板料搭架中間尙未合攏我軍旣至開放大礮斃賊極
多該逆爭上浮橋兩頭夾放鎗礮民船傷亡者不下百數擊沈
者亦復不少各船衝出浮橋缺口之後賊見前隊戰船去遠飛
開快划趕至經謝洪春楊榮炳督帶礮划三隻拚命堵截且戰
且走各船賴以保全僅失去鉛子帳棚兩船餘船軍器均無損
失此水師保護軍裝衝出賊卡之實在情形也復據水師任星
元稟暨陳大富部下將官胡鳳鳴等具稟前來大略相同

臣查

皖南鎮總兵陳大富以飢軍困守南陵激勵將士鎮撫軍民逆
匪四面環攻閱時六月之久屢挫兇鋒孤城屹立經提臣楊載
福赴援解圍拔出居民十餘萬眾名將風節傳播江表此次景
鎮督軍血戰力竭捐軀尤爲大節凜然應請

旨敕部照總兵例從優議卹並於南陵建立專祠以表忠藎而
畱遺愛所有景鎮失陷總兵等力戰殉節並水師救護軍火各
緣由理合恭摺具奏伏乞

皇上聖鑒訓示謹

奏

江皖大局片

咸豐十一年三月二十四日

再臣自去冬以來歷次奏報均將江皖大局附片陳明各在案大約江皖之賊分四大股一曰定南主將黃文金卽上年十一月攻破建德連陷六縣者也經左宗棠扼之於景德鎮鮑超破之於洋塘黃麥鋪現聞該逆已赴援安慶矣一曰僞右軍主將劉官方盤踞池州涇旌石埭等處去年冬月破羊棧嶺本年正月破大赤嶺大洪嶺二月破櫟根嶺皆係劉逆之黨此股在嶺外距臣軍最近戰事最多除三次大戰外其零交小戰皆未具奏一曰僞侍王李世賢卽去年八月攻陷徽州者也本年二月竄擾景鎮樂平一帶左宗棠一軍二月與侍逆大戰數次該逆

已敗潰鼠竄而去鄱陽景德鎮浮梁樂平一律肅清容臣查明

另行具奏一曰偽忠王李秀成去年十月攻陷羊棧嶺經鮑超

痛剿破之十一月竄陷浙江之嚴州江山常山等處本年正月

攻圍廣信玉山廣豐均以堅守得完二月攻圍建昌撫州亦以

堅守得完現聞竄至吉水永豐一帶距祁門一千餘里文報久

梗莫悉其詳除李秀成一股歷由江西撫臣奏報外其餘三股

環繞祁門四面幾於無路不梗無日不戰仰託

聖主威福疊獲大勝各股悍賊均已退竄皖南軍務日有起色

惟四眼狗救援安慶夾攻官兵營盤十分危急現已調派鮑超

一軍由景德鎮馳援安慶臣亦即日拔營移駐東流就近調度

除各處開仗情形專摺奏報外理合將江皖大局附片陳明伏
乞
皇上聖鑒謹
奏

官軍破賊樂平鄱景浮樂一律肅清摺

咸豐十一年四月初二日

奏爲官軍大破賊於樂平鄱景浮樂等處一律肅清恭摺奏祈
聖鑒事竊左宗棠一軍二月內在湧山甲路等處與僞侍王李
世賢大戰數次經臣專摺具報三月內又大戰數次侍逆敗潰
鼠竄而去鄱景浮樂等處一律肅清並經附片陳明大概情形
在案三月二十三日接據左宗棠咨稱前於二月十六日全軍
回駐景鎮嗣據總兵陳大富於二十日抵鎮接防卽於是日拔
營向鄱陽進發師次鮎魚山聞大股逆匪已由鄱陽故縣渡偷
渡昌江意圖合圍景鎮二十四日移駐金魚橋擊敗袁家灣擄
掠之賊二十六日又冒雨擊敗太園石板橋屯踞之賊二十九

日探報賊之後隊由桃嶺范家墩頭竄聚柞丹街一帶當派前
左右後四營及老湘兩旗順字營馬隊由庵前一帶進剿行抵
太園適與賊遇營官羅近秋首先衝入黃少春躍馬繼至選用
知縣劉典率隊由右路進卽選道王開化率隊由左路墩頭進
比右路至桃嶺賊前隊尙踞庵前追至范家村賊大隊萬餘人
分兩支林立我軍整隊堵擊鎗礮連施賊伏不動適左路之軍
由墩頭過嶺衝殺前來截賊兩段始紛紛潰竄我軍合隊窮追
至柞丹街沿途踏毀賊巢五處計殺悍賊三千餘名陣斬僞謝
天義黃勝才燒天福李佳普等賊目百數十名而奪其印獲騾
馬八十餘匹旗幟礮械以數千計解散脅從五六千人此二十

九日范家村大捷之情形也是日往返八十里晡間回營方擬
乘勝追勦次第剪除詎三十日賊由柳家灣湘湖街竄入總兵
陳大富血戰陣亡景鎮淪陷左宗棠所駐之金魚橋三面皆賊
後路復斷三月初一日乃拔營移駐樂平密詢賊蹤知僞侍王
李世賢分遣賊黨畱踞景鎮親率大股仍由故縣渡凰岡一帶
折回意圖竄攻樂平初五日賊至桃嶺塔前一帶初六日各營
三路進勦兼防柰丹街之賊比抵馬家橋見賊隊排列十數層
旗幟林立山谷皆滿各營整隊前進奮威衝殺賊勢稍卻漸向
桃嶺縮退我軍追至桃嶺賊仍死拒適見大轎賊目從山坳突
出滿髮悍賊百餘各持洋鎗護之營官黃少春麾健卒挺矛叢

刺立斃悍賊十餘人該賊曰棄轎而逸獲其偽印二顆一偽大
佐將裨天義李尚陽一黃勝祥也賊眾大潰我軍追至太園山
口賊復死拒擬保藍翎外委熊清石中礮陣亡日晚收隊而還
計斃賊約三千名生擒百數十名拔出難民不計其數奪獲旗
幟器械千餘件偽印百餘顆初七日探報景鎮之賊一由柳家
灣竄至湧山厚田等處一由團嶺竄至龍珠蔡家等處又於桃
嶺修砌營壘太園屯紮民房初八日黎明飭左營等由中路塔
前進右營等由左路進老湘等營由右路龍珠進比過塔前賊
卽列隊於桃嶺一帶漫山徧野蜂擁而來中營左營左總哨右
總哨自中路直撲鏖戰多時賊勢稍卻旋有另股自兩邊山內

齊出包抄正圍困間適守備馬德順率馬隊橫截而來前營老
湘各營亦由右路抄出後營等由左路抄出轉敗爲功斃賊百
餘初十日早有騎賊數名至橋南窺探旋即退去知大股必將
續至嚴飭各營靜鎮待之仍分三路聽中營發號出隊畱六營
爲接應之兵布置甫畢賊大隊萬餘由龍珠桃嶺一帶湧至擺
列山岡并於附近村莊放火意在搗我軍急戰我軍按兵不動
午初始傳令飽餐賊匪猛撲後營營盤右營州同張聲恆率隊
衝鋒左營游擊黃少春副將崔大光從兩旁夾擊賊仍抵死抗
拒前營桂營老湘各旗兩路繼進而中營及各總哨亦迭出策
應賊見我軍愈戰愈厚紛紛敗潰前營營官擬保副將羅近秋

匹馬衝入賊陣連刃紅衣賊目三人忽右脅被洋鎗洞穿登時陣亡擬保守備李啟昭藍翎守備張致和後總哨都司聶常本外委聶福申藍翎千總孫紹凱均力戰陣亡士心愈憤奮威衝殺窮追二十里至龍珠始還計斃長髮悍賊千數百名奪獲刀矛旗幟礮械千餘件偽印五十餘顆此三月初六初八初十等日大戰獲勝之情形也訊據生擒賊供稱偽京衛軍大佐將裨天義李尙陽等初六日大敗後擬卽退竄景鎮偽侍王李世賢不許調竄撲祁門賊黨由天保塘臧家灣一帶折回並挑選景鎮悍賊親率以來誓與官軍決一死戰本日後隊尙未到齊也左宗棠以賊將復至飭各營傍樂平縣城東南加修外壕周十

餘里令南鄉團練入城固守以作疑兵復引長田畝之水塞堰
爲壕以陷賊騎十二日賊之先鋒已逼外壕是夜南鄉團勇渡
河而歸存城者僅二百餘名比調前營四哨入城代守西北一
面各營勻守外壕十三日賊股麇至距城營六七里層層布陣
寬廣十餘里可數者約四十餘處旗幟林立掩映山谷登高瞭
視遠山炊煙縷縷尙有伏賊未發也各營憑壕植立寂靜無譁
午刻賊撲外壕更番迭至官軍俟其逼近排鎗轟擊逆賊屢卻
屢前官軍再接再厲相持自晝至夜約斃賊數百名樂平縣城
坍塌已久各營於礮石如雨之中漏夜修砌略具城形而該逆
環攻徹夜不息其城外民房燒燬未盡者賊伏其中穴牆開礮

弁勇傷亡者多屹立城頭未敢少避十四日賊之大隊漸由東北環趨紛撲西城前營勇丁傷亡尤多擬保副將丁長勝擬保都司趙克振易谷方等挺立城頭身受重創勢殊危迫王開化劉典以西城地勢太逼搶護殊難請調各營齊越外壕出賊不意擊之計議甫定王開化率隊由南門趨西路王開琳率隊趨右路左宗棠自與劉典趨中路每賊一支以官軍一隊當之遇賊卽斫退者斬未刻各營齊抵壕邊中路發號各躍出外壕大呼殺賊賊駭愕不知所爲我軍縱橫盪決無不以一當百擬保游擊史聿舟匹馬陷陣忽被洋鎗洞中小腹墜馬陣亡各營將士怒不可遏橫衝側擊愈戰愈奮賊屍駢積道旁各路追至高

橋小溪賊之人馬自相蹈藉擠斃溺斃者無算正窮追間忽大雨如注繩藥盡溼乃收隊而還是役計斃賊約四五百人陣斬紅袍黃袍賊目十數名燒燬賊壘二十餘座據生擒賊供僞侍王李世賢自陷景鎮後卽傳僞令犯祁門初六日行至天保塘調令折回親率攻撲樂平初十四兩敗僞京衛軍大佐將李尙陽幾爲官軍所獲李世賢亦於十四日改裝潛遁此十二三賊匪圍城圍營我軍開壁大戰獲勝之情形也據左宗棠咨報前來臣查僞侍王李世賢自上年攻陷金陵營壘繼陷徽州嚴州等處凶燄尤張此次竄擾景鎮樂平祁陽一帶長圍近二百里又破陳大富官軍幾成燎原之勢左宗棠一軍前後轉戰

三十餘日六獲大捷斬馘殆近二萬洵足寒賊膽而快人心陣亡之擬保副將羅近秋請照副將例從優

賜卹擬保游擊之史聿舟請照游擊例從優

賜卹並入祀湖南昭忠祠擬保守備李啟昭補用都司聶常本守備張致和外委聶福申藍翎千總孫紹凱均請照例

賜卹傷亡之擬保都司趙克振擬保守備周崇高把總楊清和均請照例

賜卹以慰忠魂按察使銜卽選道王開化沈毅忠實謀勇兼優請

賞加布政使銜並請

賞給該員父母祖父母兩代二品封典知州銜知縣劉典善審地勢身先士卒請以直隸州知州歸部遇缺卽選並請

賞戴花翎襄辦軍務候補三品京堂左宗棠去冬拒黃文金大股今春破李世賢大股解祁休之圍困振江皖之全局勛績甚偉可否

御賞搬指荷包等物以示旌異其餘出力文武員弁可否准其擇尤保獎之處出自

聖主天恩所有官軍破賊樂平鄱景浮樂等處一律肅清各緣由專摺由驛馳奏伏乞

皇上聖鑒訓示謹

奏

奏和光十三年

請將左宗棠改爲幫辦軍務片

咸豐十一年四月初二日

再候補三品京堂左宗棠往年在湖南撫臣幕中佐辦軍務肅清本省援勦鄰省如江西湖北貴州兩廣常由湖南重兵往援屢奏大功久在

聖明洞鑒之中上年奉

旨襄辦臣處軍務募勇五千餘人馳赴江皖之交方慮其新軍難收速效乃去冬堵勦黃文金大股今春擊退李世賢大股以數千新集之眾破十倍凶悍之賊因地利以審敵情蓄機勢以作士氣實屬深明將略度越時賢可否籲懇

天恩將左宗棠襄辦軍務改爲幫辦軍務俾事權漸屬儲爲大

奏和卷十三
用之處出自

聖主鴻裁理合附片具陳伏乞

皇上訓示謹

奏

近日軍情片

咸豐十一年四月初二日

再自景德鎮樂平等處肅清安慶危急

臣

擬移駐東流援助江

北業於三月二十四日附片奏明在案拜摺後

臣

於三月二十

六日自祁門拔營四月初一日馳抵東流鮑超於二十五日自

景德鎮拔營初一日馳抵下隅坂其所統全軍擬令卽日渡江

救援安慶逆首四眼狗陳玉成於三月十八日逼撲安慶盤踞

集賢關之內外所有安慶官軍曾國荃等各營城賊撲之於前

援賊撲之於後勢殊危急幸自去秋以來久已開掘長濠二道

有前濠以圍城賊有後濠以拒援賊現已相持十三日仰託

皇上威福尙能堅守無恙

臣

與官文胡林翼等熟商賊以全力

救安慶我亦以全力爭安慶以多隆阿鮑超兩軍會剿集賢關
之賊李續宜亦派十營回皖協剿必須攻破狗酋迅克安慶大
局乃有挽回之日金陵乃有恢復之望至徽州布置事宜派令
開歸道張運蘭守休甯記名總兵朱品隆守祁門湖北提督江
長貴守柏溪副將唐義訓等守漁亭沈寶成等守歷口參將楊
正魁等守羊棧嶺均囑以誓主堅守不遽進剿臣至東流僅帶
五百人以行餘皆畱防嶺內其左宗棠一軍自擊破僞侍王股
匪後現已跟蹤追剿無論竄皖竄江均當伺其所向而痛懲之
所有近日軍情理合附片具陳伏乞

皇上聖鑒謹

奏

人子

四

官軍圍攻赤岡嶺賊壘悍賊殲除摺

咸豐十一年五月十八日

奏爲官軍圍攻赤岡嶺援賊四壘悍賊悉數殲除恭摺奏祈

聖鑒事竊逆首陳玉成自三月十八日率黨回援安慶候選道曾國荃會同水師憑濠固守賊不敢逼旋經臣曾國藩飛調總兵鮑超臣胡林翼飛調副將成大吉會合副都統多隆阿之軍進逼集賢關外陳逆畏懼於四月初十日由馬踏石潛竄畱四壘於關外之赤岡嶺以梗我師臣官文胡林翼業已具摺奏報在案茲准鮑超成大吉呈稱四月十一日黎明鮑超率中營副將陳由立新中營副將顏紹榮攻其頭壘左營參將王衍慶副左營參將劉順隆後營副將張玉田攻其二壘右營副將陳得

勝副右營副將余大勝仁字營守備唐仁廉攻其三壘前營副將黃慶副前營參將劉玉堂攻其四壘成大吉自率貞右營及發中營副將張運馥列隊於集賢關中路以防關內之賊派武前營都司曾昭仕武後營參將王名滔搜勦集賢關以東武中營參將胡以章凱前營都司銜守備蕭玉元凱後營都司銜守備吳亮才搜勦集賢關以西其關內十三壘經曾國荃作長濠圍之該總兵等遂得專意攻此四壘之賊詎料壘中皆係多年悍賊官軍窺探闌若無人一近壘邊則鎗礮如雨我軍奮怒拔鐵填濠四面猛撲多被鎗礮傷亡迄不能前時水師提督楊載福飭水師助攻亦有傷亡湖北候補知州周開錫與該總兵等

籌商遂環濠修築礮臺數十座傳令各營兵勇晝夜輪流出隊用鎗礮環攻誓不使一名漏網二十四日成大吉將礮臺進逼賊之第四壘對壘轟擊至二十九日我軍大礮將賊壘轟倒數丈賊勢頓沮然猶踞壘不出五月初一日黎明鮑超成大吉盡派各營列隊四面圍定又命吳亮才入壘傳呼飭令脅從棄械出降於是出降者數百人該逆知勢已渙散萬無生理因皆乞降該總兵等遂傳令各兵勇以次入壘悉數生擒惟劉瑄琳踞第一壘仍然抗拒查點名數三壘之賊除先降之短髮三百餘名釋放外其長髮老賊共二千八百餘名悉皆正法其中有僞屈天豫賈仁富僞傳天安李仕福垂天義朱孔堂首逆三名僞

檢點將軍丞相指揮以下共一百八十五名初二日成大吉奉
調拔營回援鄂省鮑超仍圍攻劉瑯琳之壘該逆卽於是晚三
更後驀衝出壘分股逃竄鮑超卽率馬步沿途追殺至馬踏石
溪河汎漲賊不能渡當經鮑超督率副將陳由立游擊李文益
黑龍江西丹營總明興知縣伍華瀚等將全股六百餘名悉數
生擒其分竄之股沿河而下意欲覓船偷渡水師親兵右營營
官彭楚漢副右營營官趙三元率水勇登岸兜剿適有民船一
隻該逆二百餘人棄馬登舟哨官顏海仙飛槳趕到一併生擒
其中有逆目僞雨天豫月天安略天燕熊里先丞相劉得勝檢
點周子龍暨將軍等九十餘名當卽正法其逆首僞靖東主將

劉滄琳就近解提臣楊載福大營訊明支解并函首送臬安慶城外呼城賊壘賊而告之以寒逆膽而快人心又據楊載福咨鮑超成大吉咨呈劉滄琳李仕福賈仁富朱孔堂等均係廣西老賊與官兵歷年接仗每次首先衝鋒九年踞守太湖數月不下十年二月逆首劉滄琳自安徽渡江充作先鋒破我金陵圍師營壘數十座連陷蘇常等郡邑皆係該逆等爲首肆惡等因臣等查粵逆自滋擾以來雖屢經挫敗然臨陣率新擄之眾以當前敵我軍所斬長髮老賊至多不過數百名此次陳逆見我大軍雲集乘夜潛遁而畱此四壘於集賢關外原欲牽制我師且壘中係其平日第一枝悍黨戰守可恃者希冀憑堅久抗以

便糾合餘黨復來解安慶之圍不料四月十五日陳逆自被多隆阿敗於挂車河四壘之賊雖甚驍悍而孤守二十餘日援絕勢窮無計可脫鮑超成大吉等晝夜環攻仰賴

皇上天威將士用命殲除長髮老賊至四千名之多實爲從來所未有厥功甚偉所有尤爲出力之都司銜守備吳亮才請免補都司以游擊儘先補用

賞換花翎湖北補用知州周開錫請免補知州仍畱湖北以知府儘先補用並

賞戴花翎總兵銜儘先副將余大勝請以總兵

記名簡放儘先副將顏紹榮請加總兵銜並

賞給巴圖魯名號副將銜儘先參將王衍慶請以副將儘先補用並請

賞加巴圖魯名號副將銜儘先參將李文益請以副將儘先卽補儘先補用協領委營總明興請加副都統銜知州銜候選知縣伍華瀚請以直隸州知州不論雙單月遇缺卽選松子關案內已保參將會昭仕請免補參將以副將儘先補用都司銜守備蕭玉元請以都司儘先補用並加游擊銜其餘出力員弁伏祈

皇上天恩准其擇尤保奏其陣亡員弁應開單請

旨交部從優議卹以慰忠魂所有赤岡嶺圍攻賊壘殲除悍賊

奏稿卷十三

李

情形謹會同大學士湖廣總督臣官文安徽撫臣李續宜恭摺

由驛六百里馳陳伏乞

皇上聖鑒訓示謹

奏

代遞唐鑑遺摺摺 咸豐十一年五月十八日

奏爲據情代遞遺摺仰祈

聖鑒事竊臣於四月十三日據原任太常寺卿唐鑑之子唐爾藻具呈到營稱其父唐鑑於正月十八日病故年八十五歲臨歿時諄屬我以無位之人仰荷

聖主恩遇最深今當永訣謹具遺摺以鳴戀

主之忱惟籍隸山東寄居湖南求人代奏均多未便往年出京時曾奉

諭旨仍回江南此摺應交兩江督臣代爲遞奏理合專丁赴營呈請代奏等情并將正摺及草稿賫送前來臣查二品銜前任

太常寺卿唐鑑由翰林院檢討歷官至江南布政使內轉太常寺卿年老致仕主講江南鍾山書院咸豐元年奉

旨進京

召見十五次

皇上特旨褒嘉以唐鑑品學兼優器識安定

賞給二品銜仍

諭令回南主講書院咸豐二年粵匪竄擾湖南唐鑑念切廬墓於三年正月回湘服官三十餘年父子皆位至藩司而家無儋石清苦異常自少至耄好學不倦著書二百餘卷多心得實踐之言近因時事日棘每以

聖主過於憂勞爲慮此次所寄摺稿臣審爲唐鑑親筆字書
謹詞意肫摯以八十有五之年當一息僅存之候猶復晷懷
君國洵屬神明不亂忠愛可風可否籲懇

天恩俯念前太常卿唐鑑宿學忠敬

特旨賜諡出自

聖主鴻施所有代遞唐鑑遺摺緣由附驛馳陳伏乞
皇上聖鑒訓示謹

奏

展緩江南鄉試摺

咸豐十一年五月十八日

奏爲江南軍務未竣本年辛酉科暨補行戊午科兩屆鄉試未能舉行恭摺奏祈

聖鑒事竊臣接准禮部咨稱本部具奏辛酉科鄉試各省能否依限舉行並該考官赴省有無另行繞道行走請

旨飭查各省督撫體察情形先期由驛奏明一摺於咸豐十年十二月十六日奉

旨依議欽此欽遵咨行查照辦理前來臣查蘇皖兩省現未克復所屬各府州縣亦多淪陷科場爲掄才大典未便草率舉行九年間借用浙江貢院鄉試一次現在浙中亦值多事之秋本

省尙難考試江南豈能借辦若託

皇上威福皖城早克當奏請於安慶修造貢院使上下江士子
萃試皖城以遂觀光之願所有本年辛酉科暨補行戊午科鄉
試體察現在情形未能舉行之處除咨會江蘇安徽撫臣外理
合由驛恭摺具奏伏乞

皇上聖鑒謹

奏

李金暘張光照正法片

咸豐十一年五月十八日

再和後營營官李金暘經

臣

咨調來江江西撫

臣

派援建昌二

月初十日見賊即退十二日賊撲撫州危急之際該將不共謀

臣

防守反行撤隊回省旋經撫

守以致府城失陷潰走安福折赴分宜節節退縮直至瑞州之

臣

檄令防勦吉安不能爲一日之

太陽墟地方四月初二日全軍潰散李金暘爲賊所擒其部將

張光照逃至臨江府及江西省指告李金暘率眾降賊逮至四

月十二日李金暘自賊中逃出赴省自首堅稱被擒屬實并無

投逆情事而力陳張光照未戰先逃挾嫌污讎等情撫

臣毓科

因彼此各執一詞關係重大派委知縣夏燮等將李金暘張光

因彼此各執一詞關係重大派委知縣夏燮等將李金暘張光

照二人一幷押解臣營審辦臣督飭委員再四研鞫李金陽前此本係賊黨自湖南投誠之後屢立戰功幷無反覆可疑之跡此次被擒數日卽能自拔來歸赴省投首其非率眾降賊尙屬可信惟屢次失律致府城淪陷又復偷生賊中實已法無可貸張光照未戰先逃誣陷主將尤爲大千軍紀卽於五月初三日按照軍法將李金陽張光照一併處決以肅軍令而儆將來理合附片具陳伏乞

聖鑒謹

奏

收復徽州府城摺

咸豐十一年五月二十八日

奏爲逆匪竄犯各嶺襲陷黟縣官軍合力剿辦旋即克復并乘勝收復徽州府城恭摺奏祈

聖鑒事竊官軍分駐祁黟休甯三縣堅守嶺隘去冬今春石埭太平之賊屢次犯嶺迭經奏報在案臣移駐東流賊疑嶺內空虛欲合股竄擾祁黟以斷我軍糧路四月二十六七五月初一等日羣逆糾踞嶺外琅田美坑余溪等處約二三萬之眾揚言分五路犯嶺五月初二日賊由羊棧嶺蜂擁而入該防所兵勢本單署湖北提督江長貴飭令游擊王金鼎守備張占元率隊往援駐防漁亭之副將婁雲慶亦統軍千餘往援羊棧之賊方

退而樟嶺與方干二嶺外賊眾麕集初三日辰刻各大股賊眾分撲羊棧嶺方干嶺樟嶺其犯羊棧者賊數較少原紮盧村之峯字禮字各營及霆營援兵禦之賊不敢近其犯方干樟嶺者各軍極力迎擊頗有斬獲忽值大雨如注火藥難施暫革副將銜參將袁國祥身受矛傷繞道退至漁亭參將黃朝陞爲賊所包亦卽潰退記名總兵降補游擊唐義訓迎戰正酣奪獲賊械正擬追逐出嶺不知賊之分股繞襲後路業已潛陷黟縣城池唐義訓作偃月陣勢捲塘收隊繞回漁亭老營婁雲慶等之援羊棧者爲賊所隔亦於是夕回至漁亭卽原駐盧村之禮字峯字等營亦因後路已斷拔移漁亭由是黟賊中梗東而休甯

亭西而柏溪祁門四軍不能相通矣江長貴卽飭軍駐西武嶺以顧柏溪門戶賊於陷黟之後果糾眾竄至西武嶺下四五里地方修築牆壘并分駐四都古竹等村意圖窺伺柏溪進擾祁門此五月初三日嶺賊入犯黟縣失陷之情形也初四日西軍駐紫柏溪之提督江長貴駐紫祁門之總兵朱品隆東軍駐紫休甯之記名按察使開歸道張運蘭駐紫漁亭之副將婁雲慶唐義訓四路商定兩面夾攻初五日西路朱品隆率前營知縣朱聲隆前新營知縣易潤壇李公選等江長貴督領王金鼎張占元游擊馬登雲守備傅裔喜等布列西武嶺上分途前進一面圍攻賊壘一面抄擊村莊各壘及各村踞賊始猶拚命抗拒

我軍竭力猛進賊不能支棄壘而遁其伏處各村之賊亦敗走
逃命東路張運蘭派老湘營三旗兩翼唐義訓婁雲慶各率所
部由漁亭分三路進攻黔城老湘營由中路進婁雲慶率霆禮
峯等營由右路進唐義訓率強中等營由左路進至距黔十里
之石山橋悍賊約二千餘堅守二卡老湘營先至正在猛攻唐
義訓急令隊伍馳助卽平賊壘四座婁雲慶繼至併力合擊將
賊卡拆毀乘勝追殺直至城邊並將附城二壘立刻擊破我軍
分段攻城鎗礮齊施勇氣百倍城賊驚慌紛紛棄城遁走比將
縣城克復隨齊隊伍跟追敗竄餘孽翻山越嶺而逃不復成隊
合計斃賊二千餘名奪獲旗械馬匹甚多此初五日西軍攻勦

西武嶺賊卡東軍三路克復黟縣之情形也其嶺外續至之賊希圖復仇分股竄踞羊棧方干及樟嶺三處初六日唐義訓等仍分三路進兵霆字禮字等營從右路剿羊棧嶺老湘營從中路剿樟嶺強中營從左路剿方干嶺賊之大股聚踞三都汪村并於樟嶺口外築卡數座老湘營力擊三都之賊唐義訓亦自左路往助賊踞卡壘希圖由嶺右潛出包抄我軍分途奮擊卽將卡壘概行踏毀追至樟嶺之下初九日仍分三路進剿賊已盡併入盧村十都占踞舊壘二座添築新壘五座守禦愈固老湘強中營圍其五霆營禮營圍其二四面埋伏先攻新壘鏖戰甚久賊黨死拒經噴筒火箭燃著賊棚奮力猛進四新壘以次

悉平其一壘逃聚盧祠之內我兵圍攻生擒四百餘名悉行駢
誅惟餘舊壘二座正擬詰朝合攻該逆等已於三更遁出嶺外
初十日各軍跟追掃蕩諸嶺一律肅清徽郡之賊聞風膽落亦
於十二十三日分兩路遁去張運蘭帶隊至郡搜殺餘賊收復
府縣兩城唐義訓帶隊移守休甯此初六初九日大破賊壘肅
清嶺防十四日收復徽州之情形也據各營稟報前來臣查此
次羣賊犯嶺袁國祥黃朝陞堵剿不力以致嶺防不守賊得襲
入黟縣雖係賊眾兵單究有應得之咎暫革副將銜參將袁國
祥參將黃朝陞均請卽行革職不准畱營以示懲儆記名按察
使開歸道張運蘭於餉竭兵疲之際激厲軍心挽回全局調度

有方應如何優加獎勵之處恭候

聖裁降補游擊之記名總兵唐義訓於徽郡小挫之後振作士氣苦戰卻敵應請開復原官仍請升署皖南鎮總兵缺由臣另摺具

奏總兵銜副將婁雲慶請交軍機處記名遇有總兵缺出請

旨簡放知縣朱聲隆請開復原官以同知歸安徽補用徽州府知府劉兆璜歙縣知縣羅德隆徽州營參將文芳均請開復原官其餘出力人員籲懇

皇上天恩容臣擇尤保奏陣亡員弁查明開單請

旨交部議卹所有賊竄各嶺襲陷黟縣官軍合剿旋即克復并

奏稿卷十三

李

收復徽州府城各緣由恭摺由驛六百里馳陳伏乞
皇上聖鑒訓示謹

奏

近日軍情片

咸豐十一年五月二十八日

再近日軍情僞侍王李世賢一股自三月在景德鎮敗退卽竄至廣信一帶左宗棠追至廣信李逆竄入浙江攻陷金華蘭谿等府縣此次徽州敗退之賊亦係李逆之黨半逃浙江歸併大股半逃甯國踞守下游僞忠王李秀成一股自竄入江西瑞州後旁擾武甯義甯奉新靖安等處近又竄入湖北之興國大冶武昌通山崇陽蒲圻等屬裹脅日多蔓延日廣僞主將劉官方一股四月之季分支由建德擾及鄱陽另支由樟嶺襲陷黟縣竄鄱陽者經左宗棠派隊擊退陷黟縣者經張運蘭等合力擊退此大江南岸三大股之賊情也其大江北岸各賊如陳時永

踞德安賴文光踞黃州暨各縣踞賊均係僞英王四眼狗之黨
狗逆又新從南岸邀僞輔王楊輔清一股及林紹璋黃文金二
股將於近日再攻桐城救援安慶臣處搜獲僞文數十件各處
賊股狂竄千餘里無非欲分官軍之勢解安慶之圍現在胡林
翼力疾回救鄂省臣等往返熟商以安慶賊糧垂盡功虧一簣
必須力爭此城而後大局有挽回之望金陵有恢復之期除各
處戰守細情專摺另報外合將近日賊勢軍情附片具奏伏乞
皇上聖鑒謹

奏

揀員署皖南鎮道摺
咸豐十一年五月二十八日

奏爲遵

旨揀員署理皖南鎮道并請

飭部另頒關防恭摺奏祈

聖鑒事竊臣准兵部火票遞到咸豐十一年四月十一日奉

上諭安徽皖南鎮總兵員缺著曾國藩揀選堪勝此任人員奏
請升署欽此查皖南四府一州羣盜如毛蹂躪殆徧總兵統轄
各營必須熟於軍務忠勤篤實之將方足以資鎮守查有記名
總兵唐義訓戰功卓著精實不浮前次徽州小挫案內奏請以
游擊降補此次克復黟縣肅清諸嶺收復徽郡最爲出力經臣

奏稿卷十三
奏
另摺奏請開復原官如蒙

俞允可否卽將唐義訓升署皖南鎮總兵之處出自

天恩又咸豐十年十一月三十日奉

上諭翁同書奏請將道員整畱署府篆等語新任徽州甯池太
廣道程鈺著整畱潁州府署任所有徽甯池太廣道著曾國藩
揀員署理欽此查有江西候補知府姚體備由進士知縣分發
江西歷著循聲上年經臣札調來皖委辦營務處器識恢宏不
憚艱險現奉

諭旨飭臣保舉道府大員該員堪膺斯選合無籲懇

天恩將江西候補知府姚體備以道員歸於安徽補用如蒙

俞允卽令署理徽甯池太廣道缺於軍務地方均有裨益至皖南總兵印信係陳大富在景德鎮遺失皖南道印信係福咸在甯國府遺失相應請

旨敕部另鑄皖南鎮道關防各一顆由驛遞至臣營轉交該員等祇領以昭信守所有遵

旨揀員署理皖南鎮道并請另頒關防緣由恭摺馳陳伏乞皇上聖鑒訓示謹

奏

參鄭陽和等片

咸豐十一年五月二十八日

再臣接據提督銜綏靖鎮總兵鮑超呈稱霆字左營營官總兵銜副將鄭陽和任性妄爲縱勇索鬧口糧騷擾地方其哨官副將鄧雲貴守備蔣揖讓管束不嚴私放犯罪之勇張貼匿名揭帖均屬有干軍紀應請將副將鄭陽和降爲藍翎守備副將鄧雲貴守備蔣揖讓卽行革職均畱霆營効力以觀後効又據參將張應超稟稱都司鄭元超因裁去營官委以幫辦營務輒敢違抗不遵又復浮開勇數應請將都司鄭元超卽行革職不准畱營各等情到臣伏查軍營積習每因口糧不繼動輒挾制上司自應隨時嚴懲以儆效尤請

旨將總兵銜副將鄭陽和以藍翎守備降補副將鄧雲貴守備
蔣揖讓卽行革職均仍畱靈營効力以觀後効都司鄭元超卽
行革職不准畱營仰副

旨聖主整飭戎行之意謹附片具奏請

覆陳左宗棠軍不能赴浙摺

咸豐十一年六月初八日

奏爲欽奉

諭旨恭摺覆陳仰祈

聖鑒事竊臣承准軍機大臣字寄咸豐十一年五月十八日奉
上諭瑞昌王有齡奏常山江山之賊繞越衢州連陷龍游湯溪
二縣及金華府城請飭催援師救應一摺據稱賊匪自竄陷常
山江山後另股竄踞壽昌縣城分股下竄均經兵練迎擊退回
四月十六日該逆越過衢城十七十八十九等日龍游湯溪二
縣及金華府城先後失守張玉良退守嚴州咨商左宗棠統師
援浙等語該逆以壽昌牽制我師仍從江山一路繞竄而下以

致三日之內連陷府縣三城猖獗已極其窺伺甯紹更在意中
張玉良各軍不能得力藩司林福祥帶勇千名甫抵貴溪弋陽
一帶已革道員李元度新募楚勇八九千人計方抵江西省城
未能剋期趕到浙省情形萬分喫緊必須設法援應以顧大局
前據曾國藩奏左宗棠自擊敗李逆股匪現在伺其所向跟蹤
追剿自下該逆以全股深入浙境果能四面兜剿不難聚而殲
旃左宗棠一軍屢獲勝仗聲勢頗壯卽著統帶所部剋日起程
應援浙江會同瑞昌等所派官兵將失陷城池次第收復以靖
逆氛毋稍延緩等因欽此仰見
聖主厪念東南移緩就急之至計臣查左宗棠一軍四月間追

勦僞侍王大股直至廣信旋因池州之賊於四月十五再陷
德將竄擾鄱陽景德鎮鄱陽失則江西之腹地可危景德鎮失則
祁門之糧路又梗各處紛紛告急臣亦迭次飛咨左宗棠不得
已乃棄東路而回救西路四月之季由廣信冒雨遄返五月初
七日行抵景鎮維時適值嶺賊內犯黟縣被陷祁門建德兩路
同警左宗棠至鎮後派九營由桃樹店進勦二十二日收復建
德縣城而張運蘭等亦已克復黟縣收復徽州於是各路之軍
心民心爲之一定惟徽郡眾嶺盤互羣賊環伺得之非易守之
更難現令張運蘭守郡城唐義訓守休甯朱品隆守祁門而漁
亭爲徽休糧路所關尙無防守之兵其景德鎮爲全徽咽喉之

路臣屢次具奏以爲宜駐重兵者也婺源縣爲皖浙綰轂之區
王有齡等前奏請

旨飭駐重兵者也左宗棠兵僅七千能分爲兩支斷不能分爲
三支能顧景德鎮卽不能兼顧婺源漁亭連日往來籌商正苦
不敷分撥而閩汀大戢頭起二起由德興婺源上竄圖犯徽州
左宗棠已於六月初一二日自統各營前赴婺源一面與張運
蘭等約會夾擊閩汀之賊一面謀所以保守徽州兼保婺源饒
景之策臣暫駐江濱照料北岸其徽嶺內外及饒州廣信各屬
戰守事宜均賴左宗棠就近維持以目下形勢而論左宗棠實
不能分身赴浙浙東賊勢浩大與江皖唇齒相依浙若不支其

患先及于皖次及于江臣雖至愚亦知保浙卽所以自保柰自
鮑超北渡之後南岸僅恃左宗棠一軍縱橫策應七百餘里若
并無此支活兵則張運蘭等孤懸嶺內糧路仍有必斷之日徽
郡終無能守之理欲求保徽之方更無援浙之力顧此則失彼
圖近則遺遠再四籌思且媿且悚除俟湖北江西攻剿得手或
安慶克復有兵可分再與左宗棠力謀援浙會銜具奏外所有
欽奉

寄諭暫難兼顧緣由謹繕摺由五百里馳陳伏乞

皇上聖鑒訓示謹

奏

留彭玉麟統水師營片

咸豐十一年六月初八日

再布政使銜廣東惠潮嘉道彭玉麟奉

旨補授廣東按察使例應具摺謝

恩奏請

陛見赴任查該員統帶水師扼要駐守屏蔽江西去年賊犯湖北統軍上援鄂省分派水營羅列武漢德安黃州等處上下策應刻下攻剿喫緊實屬萬不可少之員且提臣楊載福現已請假回籍如蒙

俞允彭玉麟之責任更重尤難赴廣東新任卽照例迎摺北上由臣派員暫管亦無人可以接辦相應奏明請

旨飭下兩廣督撫將廣東按察使一缺遴員署理一面准

臣行

知彭玉麟俟軍務稍平再行奏請

陛見臣爲軍營得人攻剿喫緊起見是否有當伏乞

聖鑒訓示謹

奏

水陸員弁彙案請卹摺

咸豐十一年六月初八日

奏爲水陸各軍陣亡病故各員弁彙案請

卹以慰忠魂事竊查打仗陣亡及因傷身故軍營病故各員例應分別請

旨賜卹

臣

所部各軍自去冬以來疊次與賊接仗各員弁或力

戰捐軀或傷重殞命以及積年立功後在營病故均屬歿於王事殊堪憫惻除隨案奏請議卹外續經各營查明稟報前來又查上年春間南陵擊退賊匪奉

旨擇尤保奏周天受以軍事倥偬尙未出奏逮十月南陵解圍案內總兵陳大富查明在事出力各將弁呈請奏保正在核辦


間詎景鎮失利陳大富力戰陣亡該營官田應科等七員同時
殉難經臣具


奏請卹在案所有隨同陣亡之營哨各弁均應照擬保官階議
卹相應彙繕清單籲懇


天恩飭部查照陣亡傷亡積勞病故例分別賜卹以慰忠魂而
作士氣是否有當伏乞

皇上聖鑒訓示施行謹

奏







PL
2728
.A1
1876
v. 15

曾文正公奏稿

卷之十四目錄

覆陳華祝三臚奏摺

咸豐十一年六月十八日

近日三省軍情片

左宗棠軍五六兩月戰守情形摺

七月十八日

覆陳購買外洋船礮摺

全日

近日軍情片

調上海輪船片

恭報接印日期摺

七月二十八日

鮑超軍豐城大捷摺

八月初二日



克復安慶省城片

水師克池州府城摺

八月初十日

撥江西漕折片

恭慰大孝摺

八月二十七日

安慶省城酌派司道大員分任責成摺

九月初九日

鮑超軍克鉛山縣摺

全日

請將鮑超等補實缺片

畱張運蘭在徽州軍營片

歷陳胡林翼忠勤勲績摺

十月十四日

克復銅陵縣無爲州等處摺

全日

曾國荃回湘募勇片

請免徽軍前案報銷片

宋夢蘭等請卹片

謝 賞加宮保銜

恩摺

十月二十六日

謝弟國荃貞幹升秩

恩摺

全日

謝弟國華

予謚恩摺

全日

左宗棠定議援浙節制諸軍摺

十一月十六日

李桓保升兩司摺

全日

揀員署安徽司道摺

全日

畱朱品隆攻甯國片

改題爲奏片

力辭節制浙省各官摺

十一月二十五日

查覆江浙撫臣及金安清參款摺

全日

保奏周騰虎等片

苗沛霖應剿彭玉麟難離水營摺

十二月十七日

浙省失守徽郡被圍通籌全局摺

十二月十八日

裁撤江南團練大臣片

王開化請卹片

覆陳華祝三臚奏摺

咸豐十一年六月十八日

奏爲欽奉

諭旨恭摺覆陳仰祈

聖鑒事六月初六日承准軍機大臣字寄五月二十四日奉
上諭御史華祝三奏上年秋閒廣東樂昌仁化之賊由江西南
贛分竄甯都撫建廣信連擾數十州縣本年春閒玉山解圍復
由河口東鄉金谿圍攻撫建由宜黃崇仁竄入臨江府屬之樟
樹鎮新淦縣攻陷吉安圍撲袁州占據瑞郡頃聞奉新靖安豐
城以及新建之生米鎮等處均有賊壘窺伺省垣錢糧釐金來
源俱竭各營欠餉至四五月之多兵勇飢潰降賊有李金暘者

率勇降賊並且爲賊先驅請飭曾國藩速派勁兵赴江西省城並分投剿洗等語粵匪闖入江西肆行竄擾除樂平浮梁鄱陽等處肅清已據曾國藩奏報玉山廣豐撫州建昌廣信等城解圍吉安府城新淦縣城於失守後卽行克復已據毓科奏報外現在各屬匪蹤尙未淨盡曾國藩統轄該省且軍營餉需全賴江西接濟自應亟籌掃蕩以免餉源告竭南昌爲省垣重地尤不可稍有疎失著曾國藩斟酌緩急應如何派撥官軍以及調撥江西原有官兵應援江西省城及將袁臨等處賊匪分別剿洗之處妥爲籌辦毋任賊勢蔓延副將李金暘據毓科奏派令援剿吉安於龍王廟地方失利退保安福是否降賊並著該大

臣查明具奏等因欽此仰見

聖主籌慮全局訓示周詳曷任欽佩臣查去冬以來竄擾江西之賊前後凡五大股其由皖境竄入自北而南者三股一曰僞主將黃文金股匪連陷建德鄱陽六縣經左宗棠鮑超於洋塘擊退一曰僞侍王李世賢股匪連陷浮梁景鎮等處經左宗棠於樂平擊退此二股均未能深入江西腹地一曰僞忠王李秀成股匪正月初間連圍玉山廣信廣豐三城未破又深入內地圍建昌撲撫州亦幸未破三四月間竄入崇仁樟樹鎮吉安峽江并占踞瑞州府城分擾奉新靖安武甯義甯各州縣五月間又竄入湖北之興國大冶蒲圻崇通等屬此北三股也其由兩

廣竄入自南而北者兩股一曰廣東股匪其頭目有周姓許姓上年十月由仁化樂昌闖入江境圍攻信豐南豐建昌各城連陷河口興安德興婺源十一月初經左宗棠攻克德婺兩城該匪遂歸併徽州賊黨一曰廣西股匪其頭目爲朱衣點彭大順等本石達開之餘毒也由廣西竄出湖南經過南贛陷福建之汀州又由汀州回竄江西蹂躪甯都建昌河口等處其前隊已由婺源竄浙後隊尙停畱撫州屬境此南二股也五大股中又各爲三支四支忽分忽合時南時北是以蔓延日廣頭緒迷離御史華祝三奏摺所稱去秋竄擾甯都撫建者廣東周姓等一股也今春由玉山撫建竄陷吉安瑞州者僞忠王李秀成一股

也

諭旨所指臣奏樂平鄱浮肅清者僞侍王一股也毓科奏撫建

解圍吉安新淦失而旋復者亦僞忠王一股也江西本臣統轄

之區臣營餉項全賴江省接濟自應力籌兼顧義不容辭臣處

張運蘭江長貴朱品隆各軍皆駐防徽境斷難移動左宗棠一

軍則久在江西之北境援剿饒州廣信各屬并未入皖六月初

旬始以一半畱江之景德鎮一半移皖之婺源保障五六百里

不能再顧他處惟鮑超一軍爲江皖兩省游擊之師二月間忠

賊由建昌圍撫州臣恐省垣震動卽飭鮑超由湖口赴援省城

旋因撫建圍解樂平危急不得已調鮑超先救景鎮不果入省

迨浮樂肅清而皖北四眼狗大股攻撲安慶圍師之背勢更危

險臣移駐東流不得已又調鮑超援勦集賢關之賊五月初間

始將關外赤岡嶺四賊壘圍勦淨盡臣與胡林翼會商令成大

吉一軍回援鄂省由武昌入興國大冶鮑超一軍回援江西由

九江入武甯瑞州鮑超於五月十五日自集賢關拔營行抵宿

松被紳民苦畱圍攻宿城五日未能得手正擬帶隊西行而狗

逆從兩岸邀僞輔王楊輔清及林紹璋黃文金各股將由桐城

復援安慶下游各軍思畱鮑超仍駐北岸上游九江南康各屬

亦紛紛稟報瑞昌之賊分竄德安建昌境內迫望援師臣現檄

催鮑超迅速南渡由九江直搗建昌先保江西省城不復能兼

顧安慶冀可廓清腹地仰慰

宸廑此

臣

斟酌緩急派援江西之先後節次也瑞州及各縣踞

賊逼近南昌省會前經撫

臣

毓科商畱副將張運桂老湘營千

人并調游擊劉勝祥一營扼紫城外會同江省原有官兵協守

又有內河水師節節布扼數月以來省垣重地尙無疎虞又有

劉于潯二千人紮堵安義寶後營千人紮營生米丁峻二千人

駐守臨江皆爲省垣西路屏蔽此次鮑超由東北進鄂軍由西

北進兩路夾擊賊如敗遁必不敢窺伺省城但恐官軍追急仍

回竄吉安一路

臣

擬飭南贛鎮總兵陳金鼐帶新募千勇移駐

吉郡並添陸軍數百撥水師兩營以資控禦所需勇餉飭江西

藩司於吉安地丁項下按月劃提一萬兩源源濟用又飭贛南道李瀚章固守贛城以杜竄突此又省城無虞及南路籌防之大略情形也至李金暘戰敗陷賊旋即逃出臣已訊明正法於五月十八日附片具奏矣所有遵

旨覆陳各緣由謹繕摺由五百里具奏伏乞

皇上聖鑒訓示謹

奏

近日三省軍情片

咸豐十一年六月十八日

再近日各路軍情皖南之徽州休甯黟縣婺源俱幸平安祁門
嶺外之賊六月初旬連日犯嶺朱品隆連日出隊擊之初九以
後賊遂遠遁皖北僞璋王輔王諸逆從霍山越嶺圖攻太湖四
眼狗盤踞桐城之三塘埂將夾攻多隆阿一軍再撲安慶圍師
之背安慶城外前次援賊營壘十八座經曾國荃於六月初一
日全數踏平將賊眾八千餘人圍殺淨盡此次賊黨悉銳前來
報仇計日內必有大戰數次倘蒙

皇上威福再行擊退則城池可克矣江西之賊西路僞忠王一
股分擾德安建昌去省甚近臣現派鮑超全軍往援必可得手

東路朱衣點一股蔓延金谿鉛山等處本省無兵往剿臣亦無
兵派援荼毒民生深可焦慮湖北之賊南岸蒲圻咸甯崇通均
已肅清惟大冶興國未靖先派成大吉一軍往剿北岸德安黃
州蘄州隨州等城均尙爲賊所踞與下游桐城霍山之賊粘連
一片勦辦實屬不易幸官文胡林翼李續宜俱在鄂省武漢根
本之地深固無虞除戰守情形專案另報外合將三省軍情梗
概附片具陳伏乞

皇上聖鑒謹

奏

左宗棠軍五六兩月戰守情形摺

咸豐十一年七月十八

奏爲左宗棠一軍五六兩月戰守情形恭摺陳仰祈

聖鑒事竊太常寺卿

臣

左宗棠於五月間由廣信回駐景鎮迎

勦建德之賊六月間分軍移駐婺源迎勦閩汀股匪業將大略情形於六月初八日奏報在案先是池州逆首劉官方一股竄入鄱陽楓田街距景德鎮僅六十里五月初七日聞左宗棠全軍至鎮卽夜遁走左宗棠派左右營及老湘營由桃樹店橫出擊截之十七日至桃樹嶺分路入桐樹嶺遇賊前隊副哨張曉林躍馬衝擊立刃先鋒騎馬賊二人後至之賊仍蜂擁環刺張曉林身受重傷正危急間各營自嶺馳下賊眾卽奪路狂奔我

軍蹣跚分追斬滿髮悍賊百餘名生擒三十餘名是夜見山頭火光隱約二十餘里知賊巢相去不遠其地寸步皆山徑險菁密副將王開琳游擊黃少春州同張聲恆會商分進詎賊調官軍抄出歸路將斷卽紛紛向建德後河宵遁十九日黎明派隊搜山僅獲迷路之賊三十餘及墜崖死者十餘人馬數匹二十一日追至建德三里街又斬其落後賊數十訊知劉逆遠遁遂收復建城而還此進剿建德立時收復之情形也惟時徽州甫復後路空虛婺源介皖浙江江西三省之要衝欽奉

寄諭飭

臣

派兵扼守

臣

咨商左宗棠分軍移駐左宗棠卽飭王

開琳老湘營二千五百人及守備方雪昌新募勇五百人畱守

景德鎮而親率五營四總哨及桂勇馬隊各營於六月初移駐婺源縣該軍積勞之餘病疫繁興抵婺城後正值酷暑炎蒸不能不略爲休養乃逆首賴裕新一股糾合閩汀竄出頭起股匪約二萬餘人由常山晝夜遄行二十三日抵德興之白沙關比飭四哨守城總兵銜副將崔大光州同張聲恆率兩營扼王瓜尖嶺二十四日賊前隊已踞德興之九都新建地方距婺城止四十里隨飭州同朱明亮率桂勇繼之二十五日賊後隊大至布政使銜卽選道王開化訓導楊詠春縣丞王室藩周覽地勢擬以王瓜尖下出中路爲正兵而奇兵由小路搗新建左宗棠又派中營哨長及前營鍾南英左營黃少春馬隊營馬德順各

率所部二十六夜潛師悉起赴之是夜三更崔大光張聲恆由左路進朱明亮由中路進天甫明遇賊朱明亮大呼陷陣斬悍賊數人旋有賊從兩旁松林內抄出藍翎外委宋光隆陣亡各勇稍卻崔大光張聲恆突從左路遶出賊後各營乘勢蹙之斬馘數百追及新建王開化率中前左三營會合進搗賊已棄巢紛竄由新建五里外鳧水渡河忽見追軍從谷口馳出盡棄礮械而走馬德順率馬隊衝之賊分由兩岸高嶺攀躋而上手與趾接我軍從下擊之墜崖落澗死者無算追至五林賊復回旂抗拒千總李萬彪都司蕭仁慈首先衝撲均帶重傷猶手刃騎馬賊目眾勇騰躍入陣賊大敗且追且殺直至白沙關共計斃

賊一千一百餘名生擒八十餘名內有布天燕白倫鳳因天福
汪姓及右四提牌余松林等賊目解散以數千計奪獲馬騾二
十餘匹所餘紅旂一股仍向浙江開化華埠竄逸德興婺源境
內一律肅清此迎勦白沙關新建等處大獲勝仗之情形也據
左宗棠咨報前來臣查劉官方一股由建德乘虛深入圖竄江
西腹地幸左宗棠回援神速力保景鎮要道並追賊出嶺收復
建邑至賴裕新一股由江浙邊界內竄欲陷婺源以圖徽郡計
甚狡毒不虞官軍據險以待一敗不支且新建之戰以二千五
百病疫之卒當二萬餘慄悍之賊猶能所向克捷俾婺城危而
復安於全局亦有裨益其出力弁勇仰懇

天恩准其擇尤併入樂平大捷案內分別優獎以示激勸所有
左宗棠五六兩月戰守情形謹繕摺由驛五百里馳報伏乞
皇上聖鑒訓示謹
奏

覆陳購買外洋船礮摺

咸豐十一年七月十八日

奏爲遵

旨籌議恭摺覆陳仰祈

聖鑒事竊

臣

承准軍機大臣字寄咸豐十一年五月三十日奉

上諭前因恭親王奕訢等奏法夷鎗礮現肯售賣並肯派匠役
教習製造當諭令曾國藩薛煥酌量辦理本日復據奕訢等奏
請購買外洋船礮一摺據稱大江上下游設有水師中間並無
堵截之船非獨無以斷賊接濟且恐由蘇常進剿則北路必受
其衝據赫德稱若用小火輪船十餘號益以精利鎗礮不過數
十萬兩至駕駛之法廣東上海等處可雇內地人隨時學習亦

可雇用外國人令其司舵司礮其價值先領一半俟購齊驗收
後再行全給並稱洋藥一項如照所遞之單征收華洋各稅四
十五兩之外於進口後無論販至何處銷售再由各該地方官
給予印票仿照牙行納帖之例每帖輸銀若干如辦理得宜除
華洋各稅外歲可增銀數十萬兩此項畱爲購買船礮亦足裨
益現在赫德已回天津令其將船礮洋鎗價值分晰開單呈遞
等語東南賊氛蔓延果能購買外國船礮剿賊必能得力惟各
路軍餉不足必須預籌銀款以資購辦并訴等現擬於上海廣
東各關稅內先行籌款購買俟將來洋藥印票稅收有成數再
行歸款並給赫德劄文令其購買運到時卽交廣東江蘇各督

撫雇內地人學習駕駛著勞崇光耆齡薛煥並傳諭毓清卽按照所奏預爲籌計其應酌配兵丁并統帶大員及陸路進攻各事宜并著官文曾國藩胡林翼先行妥爲籌議一俟船礮運到卽奏明辦理內患旣除則外國不敢輕視中國實於大局有益該督撫等務當悉心妥議期於必行不得畏難苟安奔訴等摺著鈔給閱看等因欽此仰見

皇上聖慮周詳安內攘外之至意臣查髮逆盤踞金陵蔓延蘇浙皖鄂江西等省所占傍江各城爲我所必爭者有三曰金陵曰安慶曰蕪湖不傍江各城爲我所必爭者有三曰蘇州曰廬州曰甯國不傍江之處所用師船不過舢板長龍之類其或支

流小港岸峻橋多卽舢板小划尙無所施其技斷不能容火輪船想在

聖明洞鑒之中傍江三城小火輪船儘可施展然亦只可制水面之賊不能剿岸上之賊卽欲阻其北渡斷其接濟亦恐地段太長難於處處防遏目下賊氛雖熾然江面實鮮礮船不能與我水師爭衡臣去冬覆奏一疏有云金陵髮逆之橫行在陸而不在水皖吳官軍之單薄亦在陸而不在水係屬實在情形至恭親王弈訢等奏請購買外洋船礮則爲今日救時之第一要務凡恃已之所有誇人以所無者世之常情也忽於所習見震於所罕見者亦世之常情也輪船之速洋礮之遠在英法則誇

其所獨有在中華則震於所罕見若能陸續購買據爲己物在中華則見慣而不驚在英法亦漸失其所恃康熙雍正年間雲南銅斤未曾解京之時皆給照商人採買海外之洋銅以資京局之鼓鑄行之數十年並無流弊况今日和議旣成中外貿易有無交通購買外洋器物尤屬名正言順購成之後訪募覃思之士智巧之匠始而演習繼而試造不過一二年火輪船必爲中外官民通行之物可以勦髮逆可以勤遠略

諭旨期於必行不得畏難苟安仰見

聖主沈幾獨斷開物成務曷勝欽服至於酌配兵丁及統帶大員應俟輪船駛至安慶漢口時每船酌畱外洋三四人令其司

柁司火其餘卽配用楚軍水師之勇丁學習駕駛礮位亦令楚
勇司放雖不能遽臻嫻熟儘可漸次教習其統帶大員卽於現
在水師鎮將中遴選臣與官文胡林翼商定屆時奏明辦理惟
期內地軍民智者盡心勇者盡力無不能製之器無不能演之
技庶幾漸摩奮興仰副

聖主深遠無窮之慮所有遵

旨籌議緣由恭摺由驛覆陳伏乞

皇上聖鑒訓示謹

奏

近日軍情片

咸豐十一年七月十八日

再近日軍情皖北四眼狗糾合偽輔王璋王玕王等十餘萬眾
救援安慶曾國荃一軍但主堅守不主迎勦務使援賊與城中
之賊聲息不通庶皖城可期克復多隆阿一軍糧路已斷現擬
由水路繞道接濟皖南徽州六屬除左宗棠在婺源擊退賴逆
股匪另摺具奏外其餘各縣各嶺均尙安靜江西偽忠王一股
六月底竄至生米萬壽宮一帶距省城僅三四十里總兵鮑超
率師赴援賊眾仍退瑞州奉新等處閩汀一股盤踞鉛山瀘溪
境內廣信兵單情形喫重湖北南岸八屬一律肅清北岸德安
府城亦於十一日克復上游已有轉機若移得勝之師併力下

游則安慶之克尤有把握理合附片略陳梗概伏乞

皇上聖鑒謹

奏

調上海輪船片

咸豐十一年七月十八日

再王大臣等原奏內稱南省舊有洋船二隻詢據赫德則稱並非打仗之船且已有一隻敗壞是利器已廢未免可惜等語伏查前督臣於咪喇堅租得火輪船二隻一名土只坡一名可敷其土只坡一隻現泊上海黃浦江供護餉護運之用赫德所稱一隻敗壞如果屬實想即係名可敷者聞此二船頭尾兩旁皆有礮位若操練得人未必不可用以打仗現在遵

旨購買洋船據原奏云船礮配齊須明年四月始到臣擬先調現泊上海之土只坡輪船一隻由長江上駛安慶一帶就近察看勘試用督令楚軍水師將弁預爲練習俟明年洋船購到庶易

收駕輕就熟之功惟_臣處缺餉日甚該輪船駛赴上游弁勇工匠口糧仍照向章在於上海支領其損壞輪船一隻如可修理亦令速修完好駛赴安慶一帶兩船一上一下輪替更換遇有軍務要件_臣與撫_臣往返函商數日可達不致如現在文報阻滯數月難通一信相應請

旨飭下江蘇撫

_臣

薛煥迅派幹員刻日押令上駛以資演習是

否有當伏乞

聖鑒訓示施行謹附片具

奏

恭報接印日期摺 咸豐十一年七月二十八日

奏爲恭報

微臣

接印日期仰祈

聖鑒事竊

臣

於咸豐十年六月二十四日欽奉

諭旨補授兩江總督當卽具摺恭謝

天恩茲於十一年七月初六日在安徽東流營次准前署兩江

督

臣

薛煥委署督標中軍副將富勒渾泰等賫捧

欽頒咸字十號兩江總督銀關防一顆兩淮鹽政印信一顆前

來

臣

恭設香案望

闕叩頭祇領任事除地方一切政務容

臣

次第查辦外所有

微

臣接印日期理合專差恭摺

奏報伏乞

皇上聖鑒再

臣

前於四月初四日准兵部遞到

欽頒咸字四百二十一號

欽差大臣關防一顆

臣

當於四月初七日祇領開用維時因聞

總督關防將到未及疏報茲值履任之始理合一併奏

聞又接印到任日期例應恭疏

題報緣軍務倥傯兼以皖豫道途多阻所有書吏及文卷等項

概行折回上海由浙江繞道行走尙未到營是以改題爲奏合

併陳明謹

奏

鮑超軍豐城大捷摺

咸豐十一年八月初二日

奏爲鮑超一軍進援江西在豐城西北岸大獲勝仗情形恭摺
馳報仰祈

聖鑒事竊僞忠王李秀成竄擾江西瑞州奉新等郡縣蔓延甚
廣逼近省垣經臣派記名提督綏靖鎮總兵鮑超督軍赴援於

六月十八日

奏明在案鮑超於七月初三日行抵九江拔營前進瑞州奉新
靖安安義一帶踞匪卽聞風退去由臨江過河盤踞樟樹沙湖
豐城一帶綿亙百餘里鮑超於十九日由瑞州拔赴豐城過河
兜勦二十三日行抵豐城對河正在飭令各營修築營壘間據

水師報稱該逆業在樟樹搭造浮橋於二十二日過河至西北岸圍撲我軍後路未刻離我營二十餘里一帶放火鮑超以兵士修築營壘人馬疲乏天色傍晚未便出隊二十四日辰刻該逆出大股排列山岡鮑超卽飭總兵陳由立率霆正中營副將顏紹榮率霆新中營副將李文益率霆副右營由中路進兵總兵黃慶率霆正前營副將王衍慶率霆正左營副將劉玉堂率霆副前營候選直隸州知州伍華瀚率華字營馬隊由左路進兵以副將羅運昌游擊翦炳南輔之副將易昌煥率新右營副將吳騰芳率新前營副將熊鐵生率副後營副都統銜委營總額外協領明興率黑龍江馬隊由右路進以副將馮標副將段

大貴輔之又飭總兵宋國永副將婁雲慶游擊唐仁廉副將張玉田劉順隆等由山後進逆賊見我軍至排列大隊膽敢搖旗吶喊前來交鋒鏖戰一時之久鮑超督飭各營分途齊進鎗礮齊施刀矛並舉該逆抵敵不住紛紛大敗豕突狼奔我軍追殺五十餘里傍晚始行收隊該逆尸橫遍野血流成渠其赴港赴河溺斃者不計其數約共斃賊七八千名奪獲僞印六十五顆鎗礮刀矛旗幟馬騾不計其數據擒賊供稱僞忠王李秀成懼大軍之威退去瑞州奉新等處盤踞樟樹豐城一帶先分萬餘人竄擾撫州二十三日在樟樹傳令以僞豫王等挑悍賊二萬餘一面圍攻豐城一面直衝水師僞忠王自率大隊過河猛撲

鮑超一軍不料官兵精銳抵敵不住遂致大敗等供此七月二十四日在豐城西北大獲勝仗之實在情形也臣查李秀成擁眾十萬竄擾江西湖北連陷二十餘城盤踞瑞州附近各州縣數月於茲意在斷我餉源以急解安慶官軍之圍鮑超督師進援該逆聞聲先遁至豐城西北岸復被鮑超追及經此番痛剿洵足快人心而寒賊膽記名提督綏靖鎮總兵鮑超盛暑鏖兵所向克捷積勞最久立功最偉可否籲懇天恩賞賚荷包搬指等物以示旌異出自逾格鴻慈其在事尤爲出力之記名總兵宋國永陳由立黃慶驍勇血戰奮不顧身均請

賞加提督銜總兵銜儘先副將婁雲慶總兵銜兩江卽補副將張玉田總兵銜儘先副將馮標均請以總兵記名請

旨簡放副都統銜委營總額外協領明興請先行拔補協領員缺副將顏紹榮李文益易昌煥吳騰芳羅運昌劉順隆劉玉堂段大貴均請遇有副將缺出儘先拔補副將銜儘先參將熊鐵生請以副將儘先補用四川卽補副將鮑濟學四川卽補游擊陳永康均請遇有四川參將游擊缺出先行拔補游擊唐仁廉請以參將儘先補用並請加副將銜候選直隸州知州伍華瀚請以本班畱於四川儘先遇缺卽補並請

賞加知府銜其餘出力文武員弁著有微勞可否准

臣

擇尤請

獎之處出自

天恩陣亡之運同銜安徽候補直隸州知州袁觀豐儘先都司
殷雄亮仰懇

敕部從優議卹以慰忠魂除飭東渡贛河迅速追勦外所有鮑
超一軍進援江西在豐城西北岸大獲勝仗緣由謹繕摺由六
百里馳奏伏乞

皇上聖鑒訓示謹
奏

克復安慶省城片

咸豐十一年八月初二日

再正在繕摺間接到統領安慶全軍卽用道曾國荃稟稱八月初一日卯刻官軍用地雷轟倒北門城垣隊伍踰濠登城該逆仍用鎗礮抵死拒敵經我軍奮勇直前立將安慶省城克復殺斃長髮老賊二萬餘人該逆情急赴江內湖內鳧水遁竄又經水師截殺實無一人得脫其老弱婦女暫時擒縛俟訊明分別斬釋四眼狗及僞輔王璋王玕王各股援賊屯紮我軍後濠之外當破城時列隊遠望其膽已落漸漸退去各等情前來臣伏查安慶省城咸豐三年被賊陷踞九載以來根深蒂固自去冬合圍至今逆酋四眼狗迭次拚死援救我軍苦守猛戰卒得克

此堅城圍殺淨盡軍興十載惟五年之馮官屯八年之九江此
次安慶之賊實無一名漏網足以伸

天討而快人心至楚軍圍攻安慶已逾兩年其謀始於胡林翼
一人畫圖決策商之官文與臣並徧告各統領前後布置規模
謀勦援賊皆胡林翼所定除臣即日前往安慶部署一切及詳
細情形另由官文胡林翼李續宜會銜具奏外所有克復安慶
省城大概緣由謹附片馳陳仰慰

宸懷伏乞

皇上聖鑒訓示謹

奏

水師克池州府城摺

咸豐十一年八月初十日

奏爲水師克復池州府城現擬進攻銅陵恭摺奏祈

聖鑒事竊安慶省城於八月初一日經水陸官軍克復業經附片奏明在案先是臣與福建水師提督楊載福會商如安慶克復卽乘勢進圖沿江各府縣初二日提臣楊載福派總兵王明山黃翼升率水陸各營進攻池州王明山卽令趙三元帶副右營先發而自率正前營及嚴定國之正左營萬化林之副前營唐學發之副左營蔡定發之正中營郭明鼈之親兵前營繼之黃翼升率親兵營並鄧萬林之右營王東華之新左營蔡東祥之後營自安慶北岸載周萬倬所帶陸師東下初五日寅刻趙

三元帶副右營先到卽繞城攻擊萬礮雷轟子如雨注該逆猶以鎗礮抵拒趙三元率水師奮勇登城賊不能支遂開西北門而遁適王明山黃翼升率水陸各營趕到截殺之賊甚多立將該府城克復奪獲鎗礮旗幟無數現派韋志俊帶陸師四營守之仍畱水師二營相爲倚護王明山黃翼升卽日進攻銅陵此初五日克復池州府城之實在情形也臣查僞右軍主將劉官方盤踞池州與安慶相爲犄角九年老巢屢攻不破內則堅守石埭太平阻徽師進兵之路外則上犯建德鄱陽爲江西北邊之患今幸克復安慶而池州亦相繼而下從此皖省軍務當日有起色足以仰慰

聖懷再桐城縣城亦於初三日經福州副都統多隆阿克復其
詳細情形應由官文胡林翼奏報所有八月初五日水師克復
池州府城現擬進攻銅陵各緣由謹繕摺由驛六百里馳奏伏
乞

皇上聖鑒訓示謹
奏

撥江西漕折片

咸豐十一年八月初十日

再

臣

於去年八月接辦皖南軍務奏請

飭令江西每月協撥漕折銀五萬兩解濟徽甯兩防軍餉經部議准奉

旨遵行在案目下安慶池州均已克復南北兩岸正須進兵之際而各營欠餉至七八月之久兵勇負債過多裹糧無資竟不能拔營成行坐失事機實爲可惜合無籲懇

聖恩仍飭江西從八月起每月將漕折銀批解五萬兩作爲徽甯協餉由臣分撥各軍積欠至江西今年被賊竄擾蹂躪甚廣入款甚絀屢據總局司道開呈缺餉清單詳請奏撥鄰餉前來

臣以現在各省皆窘無可指撥批令自行籌畫不敢瀆奏惟江西係臣兼轄之地亦未敢任其決裂匱不上

聞相應請

旨飭下該部查照凡江西應撥之款除京餉仍源源籌解不敢稍遲外此外浙江及各省協餉一概停解所有地丁入款先清本省守兵欠餉漕折釐稅先清臣處征兵欠餉俟局勢稍穩入項稍紓再行奏明辦理所有續提漕折及籌清欠餉各緣由理合附片具陳伏乞

聖鑒訓示施行謹

奏

恭慰 大孝摺

咸豐十一年八月二十七日

奏爲恭慰

大孝仰祈

聖鑒事

臣

接准兵部咨稱咸豐十一年七月十八日奉

上諭道光三十年

皇祖宣宗成皇帝太事

皇考仍遵嘉慶二十五年成例停止各省將軍督撫提鎮藩臬

鹽關織造等來京叩謁

梓宮今

皇考大行皇帝在山莊升遐恭奉

梓宮回京除熱河都統本在熱河直隸總督已諭前來熱河叩
謁

梓宮外其餘直隸各大員俱不必前來各路統兵大臣各省將
軍督撫副都統提鎮城守尉並盛京侍郎奉天府尹西北兩路
將軍大臣及學政織造關差等均不必奏請前來致曠職守各
該大臣將軍督撫提鎮等受

皇考深恩惟當竭誠盡職以期無負委任不在儀節虛文也將
此通諭知之欽此痛惟

大行皇帝臨御寰宇十有二年無日不在戰兢惕厲之中值時
局之多艱惟貞持以宏濟

聖德之憂勞堅忍蓋從古所未有亦薄海所共知迺事機之方
轉遽遏密而興悲臣以愚陋忝膺重任不克進兵金陵大伸天
討卽克復安慶亦不獲早奏捷音博

玉几末命之歡悲痛之餘彌深愧憾亟思叩謁

梓宮一展哀忱欽奉

諭旨停止入謁瞻望

闕廷神魂震愴理合專弁進京恭慰

皇上大孝伏冀

節哀順變珍重保衛遠師訪落小愆近法

世祖

聖祖沖齡繼序匕罔無驚以答中外臣民之望臣不勝哀戀懇切伏乞

皇上聖鑒謹奏

安徽省城酌派司道大員分任責成摺

咸豐十一年九月初九日

奏

爲安徽省城酌派司道大員分任責成恭摺奏祈

聖鑒事竊安慶克復以後

臣

移駐省城諸務紛集無一司道大

員分任其責實有叢脞不勝之虞查向來定例隨總督駐紮江

甯者有布政使一員糧道一員鹽道一員隨皖撫駐紮安慶者

有布政使一員按察使一員近因兩省淪陷本缺各員僑駐淮

揚泗潁等處

臣

忝任江督年餘無司道一人相隨雖佐雜微員

必須親自劄委刑名錢穀必須親自綜覈不特體制不合亦且

精力難周若不急爲部署深慮親細務而誤大局再四籌思擬

於安慶省城酌派司道數員分任其責如江甯布政使王夢齡

現在署理漕運總督駐紮淮安應另派一人署理該缺隨臣同駐安慶管轄上游印委各員凡蘇省官員來營稟到者由該司查照班次酌量委用凡皖省官員距潁州太遠者升遷調署由該司權代詳辦又如安徽按察使張學醵現在駐紮臨淮聲息不通應另派一人署理該缺隨駐安慶管理安池徽等郡刑名驛傳事務又如江安糧道王朝綸現在代辦江北糧臺駐紮揚州應另派一人署理該缺隨駐安慶專管皖省七府漕糧事件該缺之職向章本管蘇糧三府皖糧七府也又如江甯鹽巡道邢春第現未到任亦應另派一人署理該缺隨駐安慶專管淮鹽事件此四缺者分別署置庶幾職有專司思不出位臣得官

盛任使之效庶幾專心軍旅用志不紛閒或馳赴各府巡察營務亦不至拋廢公事實於軍務地方兩有裨益理合先行具奏除俟遴選得人再將四缺陸續奏派署理請

旨遵行外所有安徽省城酌派司道大員分任責成緣由恭摺附驛馳奏伏乞

皇上聖鑒訓示謹

奏

鮑超軍克鉛山縣摺

咸豐十一年九月初九日

奏爲鮑超一軍追剿僞忠王股匪於湖坊河口等處大獲勝仗克復鉛山縣城恭摺奏祈

聖鑒事竊鮑超一軍在豐城西岸大獲勝仗臣於八月初二日具奏在案該逆退出豐城後大股盤踞白馬寨小塘墟西竹墟等處分股竄小江口大江口一帶鮑超於二十七日過河進剿白馬寨小塘墟一帶之賊沿山抄擊分途齊進該逆紛紛敗竄我軍連日追剿該逆前有另股圍攻撫州經撫州府知府鍾峻縣丞劉于浚暨闔城官紳登陴固守八月初四日鮑超一軍追至城下撫州之圍立解該逆望許灣大路而逃此豐城捷後全

軍東渡追賊至撫州之情形也先是七月下旬安慶援賊多而

且悍

臣調鮑超馳援江北該鎮於初五日兼程回援初十日行

抵距省四十里之武陽渡始知安慶業已克復乃遂星夜折回

於十四日再抵撫州查得該逆大股已竄往貴溪雙港湖坊河

口一帶會合湖坊之花旂廣匪三股賊眾號稱二十餘萬蔓延

數百里層層築壘意圖回竄并分股竄往弋貴廣信一帶鮑超

於十五日自撫郡進兵冒雨遄行二十日馳抵貴溪貴溪之賊

聞風逃遁人心稍定二十二日五鼓鮑超率隊進剿卯刻行抵

雙港該逆首僞忠王李秀成於先日由河口率眾至湖坊勾結

孝天豫朱逆觀天燕童逆勤天福余逆享天祿黃逆并花旗廣

匪等股整隊迎敵洶湧如潮鮑超飭宋國永顏紹榮王衍慶劉
玉堂等由中路進飭陳由立熊鐵生易昌煥明興等由左路進
飭黃慶吳騰芳翦炳南伍華瀚等由右路進又飭婁雲慶劉順
隆李文益等由東路抄擊張玉田譚勝達唐仁廉等由西路抄
擊五路齊舉自卯至巳鏖戰三時該逆紛紛大敗拋棄器械翻
山越嶺奪命狂奔我軍追殺六十餘里該逆尸骸相藉沿途斃
賊一萬餘名墜巖落澗死者尤多將雙港九思巖同田河田湖
坊一帶賊壘七十餘座全行踏平生揜長髮老賊近二千名內
有保天安豫天福曉天燕成天豫頂天侯中天侯檢點丞相指
揮監軍司馬等官訊明正法奪獲偽印一百四十一顆鎗礮刀

矛旂幟山積追至河口該處踞賊一併驅逐卽在河口駐宿少
爲休息此二十二日掃清雙港湖坊河口等處踞賊大獲勝仗
之實在情形也是夜探馬回稱湖坊河口之賊敗往鉛山者皆
盤踞於東門外三十里之梓墟一帶意欲勾通城內之賊抗拒
官軍四更初轉鮑超率領馬步全軍進攻鉛山卯刻已抵城外
該逆於北門外堅築七壘與城內之賊相爲犄角猝見我軍之
至施放鎗礮憑牆堵禦鮑超飭令陳由立譚勝達分投攻壘拔
開鹿角擁入濠邊該逆鎗礮如雨我軍勇氣百倍一擁而登先
將左路賊壘踏平旋將右六壘踏毀壘中之賊盡數殲除各營
乘勝揭水過河分段攻城賊於城上施開鎗礮相持兩時之久

鮑超親執桴鼓如牆併進火箭然燒城內藥桶賊眾慌亂副將
譚勝達卽緣梯登城該逆見勢不支潛開東門逃走我軍先登
者立開北門迎各營一齊入城登將鉛山縣城克復追殺六十
餘里該逆屍橫遍野生擒老賊八百餘名奪獲偽印四十三顆
將梓溪一帶踞賊全行勦洗馬隊追過廣信立解郡圍此二十
三日踏毀城外賊壘克復鉛山縣城之實在情形也伏查閩賊
三起與花旗廣匪先後由建昌竄至廣信盤踞雙港九思巖河
口湖坊鉛山一帶兩月有餘蔓延極廣又加僞忠王一股由撫
州回竄該處併聚一路聲勢浩大經鮑超痛勦兩日掃平賊壘
八十餘座克復鉛山縣城周圍追擊二百餘里風馳電掣洵足

彰

天討而快人心所有陣亡之花翎都司王友得儘先都司黃友
勝儘先守備周有勝守備銜千總趙勝武千總封樂善儘先把
總高林芳藍翎外委李安旺方祥應儘先外委鄒富友蕭於成
周鳳祿等力戰捐軀深堪憫惻應請

旨交部從優議卹以慰忠魂尤爲出力之儘先副將譚勝達請
加總兵銜并

賞加巴圖魯名號副都統銜協領明興請以副都統記名

簡放并請

賞加巴圖魯名號儘先副將李文益劉玉堂二員均請

賞加總兵銜儘先副將王衍慶熊鐵生二員均請

賞加總兵銜知府銜四川卽補直隸州知州伍華瀚請免補直隸州以知府仍畱四川遇缺卽補并請

賞加巴圖魯名號知府銜湖北卽補直隸州知州鮑繼高請免補本班以知府仍畱湖北遇缺卽補副將銜儘先參將李定貴請免補參將以副將儘先補用并請

賞加巴圖魯名號副將銜儘先參將唐仁廉翦炳南二員均請以副將儘先補用其餘出力文武員弁籲懇

天恩容臣查明保獎所有鮑超一軍於湖坊河口等處大獲勝仗克復鉛山縣城各緣由恭摺由驛五百里馳奏伏乞

皇上聖鑒訓示謹

奏

奏和卷一四

奏

請將鮑超等補實缺片

咸豐十一年九月初九日

再記名提督綏靖鎮總兵鮑超驍勇罕匹轉戰安徽湖北江西三省所向克捷本年正月破黃文金大股於洋塘四月破劉瑯琳大股於安慶厥功甚偉其部下各營官如豐城案內隨摺請保加提督銜之記名總兵宋國永陳由立黃慶請保記名總兵之婁雲慶張玉田等皆陷陣衝鋒戰功卓著此次克復鉛山縣城連解撫州廣信兩郡重圍當口糧久缺之候行烈日驟雨之中竭力奔馳不得少休未滿兩月將江西腹地各賊一律掃除全省肅清實屬勞苦功多可否籲懇

皇上特恩將鮑超補授提督實缺抑或另有

恩獎之處恭候

聖裁其所部之記名總兵宋國永陳由立黃慶婁雲慶張玉田
等均請以次補授總兵實缺以示懋賞而勵戎行是否有當伏
乞

聖鑒訓示謹

奏

畱張運蘭在徽州軍營片

咸豐十一年九月初九日

再布政使銜河南開歸陳許道張運蘭奉

旨補授福建按察使例應具摺謝

恩奏請

陛見赴任查該司統帶湘勇駐紮徽州逼近羣賊巢窟刻下偽
侍王股匪在浙之嚴州偽輔王股匪在皖之甯國距徽州僅二
百里內外防剿喫緊張運蘭實屬軍中不可少之員勢難令其
卽赴福建新任卽照例迎摺北上由臣派員暫管亦無人可以
接辦相應奏明請

旨飭下福建督撫將福建按察使一缺遴員署理一面准臣行

知張運蘭俟軍務稍平再行奏請

陛見臣爲軍營得人攻勦喫緊起見是否有當伏乞

聖鑒訓示謹

奏

歷陳胡林翼忠勤勲績摺

咸豐十一年十月十四日

奏爲湖北撫

臣

忠勤盡瘁勲績最多恭摺奏祈

聖鑒事竊前湖北撫

臣

胡林翼由翰林起家洊歷外任咸豐五

年三月蒙

先皇帝特達之知由貴州道員不及半載擢署湖北巡撫當是時武漢已三次失陷湖北州縣大半淪沒各路兵勇潰散殆盡胡林翼坐困於金口洪山一帶勞身焦思不特無兵無餉亦且無官無幕自兩司以至州縣佐雜皆遠隔北岸數百里外一錢一粟皆親作書函向人求貸情詞深痛殘破之餘十不一應至發其益陽私家之穀以濟軍食士卒爲之感動會湘勇自江西

援鄂軍勢日振六年十一月攻克武漢以次恢復黃州等郡縣
論者以爲鄂省巡撫可稍息肩矣胡林翼不少爲自固之計悉
師越境圍攻九江又分兵先救瑞州督撫之以全力援勦鄰省
自湖北始也九江圍剿年餘相持不下中間石達開自江西窺
鄂陳玉成自皖北犯鄂者三次胡林翼終不肯撤九江之圍回
救本省之急或親統一軍肅清蘄黃或分遣諸將驅歸皖豫卒
能克復九江殺賊淨盡爲東南一大轉機潯功甫蕲復奏明以
全鄂之力辦皖北之賊迨李續賓覆軍於三河胡林翼先以母
喪歸籍未滿百日聞信急起痛哭誓師不入衙署進駐黃州論
者又以李續賓良將新逝元氣未復但可姑保吾圍不宜兼顧

鄰封胡林翼不以爲然驚魂甫定卽派重兵越二千里援解湖南寶慶之圍援湘之師未返又議大舉圖皖是時臣國藩方奉入蜀之

命胡林翼畱

臣

共圖皖疆先滅髮匪

保三吳之財賦雪夷天之

公憤繪圖數十紙分致

臣

與官文暨

諸路將領晝夜諮謀十年

春閒大戰於潛山太湖相繼克之遂定圍攻安慶之策親駐太

湖督勦本年五月回援鄂省病中猶屢寄

臣

書縷陳勿撤皖圍

力勦援賊之策故安慶之克

臣

前奏推胡林翼爲首功此非

微

臣私議蓋在事文武所共知亦

大行皇帝所洞鑒也大凡良將相聚則意見紛歧或道義自高

而不免氣矜之過或功能自負而不免器識之偏一言不合動成水火近世將材推湖北爲最多如塔齊布羅澤南李續賓都興阿多隆阿李續宜楊載福彭玉麟鮑超等胡林翼均以國士相待傾身結納人人皆有布衣昆弟之歡或分私財以惠其室家寄珍藥以慰其父母前敵諸軍求餉求援竭蹶經營夜以繼日書問餽遺不絕於道自七年以來每遇捷報之摺胡林翼皆不具奏恆推官文與臣處主稿偶一出奏則盛稱諸將之功而已不與焉其心兢兢以推讓僚友扶植忠良爲務外省盛傳楚師協和親如骨肉而於胡林翼之苦心調護或不盡知此臣所自媿昔時之不逮而又憂後此之難繼者也軍興以來各省皆

以餉絀爲慮湖北三次失守百物蕩盡乙卯丙辰之際窮窘極矣自荊州推鹽各府抽釐鄂中稍足自存胡林翼綜覈之才冠絕一時每於理財之中暗寓察吏之法咸豐三年部定漕米變價每石折銀一兩三錢而各省州縣照舊浮收加至數倍鄂省竟有每石十數千者上下因之交困胡林翼於七年春開創議減漕嚴裁冗費

先皇帝硃批獎諭謂其不顧情面祛百年之積弊甚屬可嘉統計湖北減漕一項每年爲民間省錢一百四十餘萬串爲帑項增銀四十二萬兩又節省提存銀三十一萬餘兩利國利民但不利於中飽之蠹向來各衙門陋規臺局浮費革除

殆盡州縣征收正課不准浮取毫釐亦不准借催科政拙之名
爲猾吏肥私之地各卡委員日有訓月有課批答書函娓娓千
言以爲取民贍軍使商賈皆知同仇而敵愾是卽所以教忠多
入少出使局員皆知潔己而奉公是卽所以興廉貞白之士樂
爲之用欺飾之徒譴責亦重故湖北瘠區養兵六萬月費至四
十萬之多而商民不疲吏治日懋斯又精心默運非操切之術
所得與也自頃八月以來安慶克復江鄂肅清方幸全局振興
便可長驅東下不圖大功未竟長城遽頽湖廣督臣官文奏請
將胡林翼

敕部優卹諒蒙

聖慈矜鑒

臣

與該故撫共事日久相知頗深咸豐四年曾奏稱

胡林翼之才勝

臣

十倍近年遇事諮詢尤服其進德之猛不敢

阿好溢美亦不敢沒其忠勲謹將該故撫以死勤事大略情形

據實瀆陳伏乞

飭付國史館查照施行胡林翼之子胡子勲讀書聰慧可否

加恩之處出自逾格

鴻慈所有湖北撫

臣

忠勤盡瘁緣由恭摺附驛馳奏伏乞

皇上聖鑒訓示謹

奏

克復銅陵縣無爲州等處摺

咸豐十一年十月十四日

奏爲水陸各軍克復銅陵一縣無爲一州並攻奪沿江泥汊神塘河運漕鎮東關各要隘恭摺奏祈

聖鑒事竊總兵王明山黃翼升等克復池州府進攻銅陵臣於八月初十日具奏在案八月十二日王明山率水師正前營並萬化林嚴定國唐學發郭明鼐蔡定發趙三元等六營黃翼升率淮揚水師親兵營並蔡東祥王東華鄧萬林等三營暨柳壽田之內江親兵營分載陸師周萬倬劉祥勝二營自池州下勦先派內江親兵哨船於十一日將銅陵縣東北門外隄埂決開我水軍卽於決口駛入是日已刻王明山督水師攻東門黃翼

升督水師與周萬倬等陸師攻西門各軍相繼登城殺賊近千
人餘匪由北門竄逃遂於申刻克復追勦十餘里天晚收隊奪
賊糧千餘石軍械鎗礮無算派周萬倬等兩營陸師守之仍畱
水師相爲倚護此八月十二日克復銅陵縣城之實在情形也
先是安慶得手桐城舒城廬江相繼收復桐舒經副都統多隆
阿分兵置守廬江由臣處派兵扼守臣查皖北形勢惟濱江之
無爲州爲蕪湖金陵援賊所必經之路利在速攻使南北之氣
中斷攻無爲則須水陸并進陸師由廬江進水師由泥汊口神
塘河進該逆先於泥汊神塘各紮石壘以阻我水師進路因派
候補知府陳湜記名總兵李寶賢帶安慶陸師六千餘人於九

月初一日由廬江進無爲候補道劉連捷帶二千人於初二日往守廬江記名臬司曾國荃帶親兵及蕭孚泗彭萬全陸師兩營密用礮船裝載會同王明山帶外江水師黃翼升帶淮揚水師順流下駛九月十五日抵泥汊口登岸見賊壘高據口內倚水爲險礮眼層列勢難仰攻遂令陸師修壘水師分紮要路以鎗礮火箭火彈近賊壘轟之十六日曾國荃率親兵至楊家橋黃翼升率礮船至鳳皇頸開挖隄埂該逆恐我軍合圍斷其歸路王明山蕭孚泗等乘賊膽怯徹夜轟打賊遂於十六夜四更向無爲州遁去各軍追殺並奪獲礮械甚多弁勇受傷僅二十人十八日黃翼升由泥汊進襄安黃姑閘搜查白湖一帶餘

匪王明山曾國荃復帶水陸各營進攻神塘河賊壘賊以鐵練攔截河口負隅不出王明山以大礮置兩岸晝夜轟擊十九日萬化林唐學發郭明鼐蕭孚泗等均帶隊直撲壘濠賊益不支遂於二更時向無爲州遁去我軍俘獲尤眾此九月十六夜克復泥汊口十九夜克復神塘河之實在情形也神塘河克後是夜王明山率水師尾追乘勝進無爲州節字智字等營陸師亦坐船同進二十日尙未黎明均抵城下先是無爲州賊目馬玉堂之妻子在安慶城內曾國荃執而不殺以密諭招降之馬玉堂感激投誠其機已於十九日漏洩僞頂王朱王將馬玉堂鎖拏意圖堅守州城馬酋黨羽在城中鬨亂人聲鼎沸我軍突至

因其內亂而攻之賊遂大驚王明山令節字智字兩營旱隊潛
伏南門外而自率萬化林唐學發等攻大東門李朝斌李濟清
張得友等攻小東門王遠和郭明鼈等攻倉北門萬礮雷轟子
如密雨逆眾大潰遂於北門竄出水陸各營登岸追擊殺斃二
千餘人又入城搜殺五六百人陳湜劉連捷等亦率馬步大隊
從盛家橋而來截勦竄賊此九月二十日攻克無爲州城之實
在情形也無爲含山之交有運漕鎮者外瀕大江內通巢湖自
咸豐三年後賊糧皆聚於此土而接濟安慶廬州下而接濟金
陵老巢實爲南北之鎖鑰僞巨王洪酋僞佐將何雅林帶五六
千人並李酋礮船數十號在彼駐守曾國荃偵知賊勢驚惶二

十三日會商王明山派水師三營泊黃雒河以遏巢湖出路曾國荃自率親兵偕黃翼升李朝斌鄧萬林等水師進取運漕並派蕭孚泗張勝祿周惠堂彭萬全各隊坐船隨水師繼進未刻行抵該鎮逆船數十號與水師迎敵鄧萬林李朝斌黃翼升等排礮轟擊賊勢少卻鄧萬林同各師船飛槳而進奪賊礮船十號焚燒賊船數十號船上之賊梟水奔竄鎮上之賊見水路賊敗陸師登岸抄截遂捲旗而退各軍分途猛追共殺斃淹斃賊近三千人獲賊糧二千餘石奪賊馬十餘匹礮位軍械無數餘賊向銅陵聞一路而遁二十九日黃翼升與陳湜會商派水陸各營進取東關賊眾傾巢出迎水師以排礮轟擊陸師列陳

數里鎗礮甫施該逆大奔不復歸壘我軍併力抄殺奪取石壘
獲礮位米糧甚夥此九月二十三日克復運漕鎮二十九日克
復東關之實在情形也臣伏查江北之無爲州與南岸之蕪湖
相對賊南踞金陵則蕪湖在所必爭北踞廬州則無爲在所必
爭東關之險運漕之富尤該逆所恃以爲奧區三國用兵時於
東關濡須口苦爭不休卽此地也茲幸仰仗

天威水陸各軍旬日之間連復兩城一鎮要隘三處殺賊甚多
從此廬州巢縣三河踞賊糧援路梗勢必漸漸搖動擬畱陸軍
九千分守無爲運漕及蒼頭東關等處添調淮揚水師數營分
布協守可期穩固所有尤爲出力之提督銜壽春鎮總兵王明

山擬請以提督記名請

旨簡放淮揚鎮總兵黃翼升擬請

賞加提督銜記名總兵萬化林李朝斌李濟清蕭孚泗張勝祿均請

旨簡放總兵實缺李朝斌并請

賞加提督銜總兵銜副將唐學發請以總兵記名

簡放副將郭明鼐周惠堂均請

賞加勇號候補參將彭萬全鄧萬林均請免補參將以副將遇缺卽補鄧萬林并

賞加勇號擬保參將蔡東祥王東華均請免補參將以副將儘

先推補候補知府陳湜請

賞加道銜五品銜卽選知縣彭椿年請以同知直隸州知州畱
於江蘇補用游擊郭松林程學啟均請以參將遇缺卽選都司
倪桂請以游擊遇缺卽選守備伍維壽請以都司遇缺卽選員
餘水陸出力員弁兵勇可否由臣查明開單奏獎以示鼓勵

白

天恩所有官軍連復銅陵縣無爲州及北岸沿江各要隘各緣
由繕摺由驛六百里具陳伏乞

皇上聖鑒訓示謹

奏

曾國荃回湘募勇片

咸豐十一年十月十四日

再水陸各軍攻克無爲州運漕鎮後距江甯僅二百里本可乘賊情驚惶之際直搗金陵老巢無如曾國荃一軍深入賊之腹地得一處須守一處現分守安慶樅陽廬江無爲運漕東關六處人數尙嫌單薄別無進取之兵坐失機會實屬可惜應令曾國荃趕緊回湘添募六千人來皖替守各城抽出現在守兵進剿巢縣和州等處冀與下游都興阿揚州之師聯爲一片庶剿辦易於得勢理合附片陳明伏乞

皇上聖鑒謹

奏

請免徽軍前案報銷片

咸豐十一年十月十四日

再前辦皖南軍務都察院左副都御史張芾於上年八月交卸時奏明徽池糧臺自咸豐八年正月起到十年七月止收支總數並兵勇欠餉數目由原辦各員分款報銷在案徽州府城旋於八月二十五日失陷據原辦糧臺委員浙江補用道陳泰來前徽州府知府劉兆璜稟稱該臺向設徽城賊眾猝來夫役逃散冊籍重件勢難搬移各委員或受傷被擄或隻身衝出其文卷簿領等件未能保護出城各款細數無憑造報請附奏等情前來臣當以軍需報銷不容藉延俟徽州克復查獲冊籍再行趕辦本年五月間郡城收復灰燼之餘徧尋前失糧臺案卷實

皆燬棄無存查

臣所派

前皖南道李元度之兵於八月十七日

抵徽州甫經八日

郡城遽失

實出意料之外迨至倉皇城陷該

委員等欲將冊籍救護

出城勢所不能今克己已經五月有奇

臣

飭令再三搜尋片紙無獲所有張芾督辦徽州軍務二三兩

案報銷細冊礙難臆造之處理合據實附陳伏乞

皇上聖鑒勅部查照謹附片具

奏

宋夢蘭等請卹片

咸豐十一年十月十四日

再侍講銜督辦皖南團練翰林院編修宋夢蘭公正樸誠不避艱險因本籍徽境被害最慘帶勇協勦義憤填膺本年二月間在休甯接仗頭額受重傷三處臣於三月二十四日奏明在案該員醫治未愈延至六月初七日因傷身故又江西候補知府張韶南咸豐八年九月間經臣調營委辦糧臺四載以來竭力籌畫自去冬迄今春祁休各營屢被圍困糧餉俱匱運道亦梗該員設法騰挪接濟食米俾飢軍不至潰散實屬有裨全局其子江西補用知縣張同生隨營辦理支應兩月之間該員父子先後以積勞病故殊堪憫惻相應請

奏
旨敕部將宋夢蘭照傷亡例從優議卹張韶南張同生並照軍
營病故例議卹以慰忠魂再皖南各屬團練事宜應卽責成署
皖南道姚體備就近督辦合併聲明伏乞

皇上聖鑒訓示謹

奏

謝 賞加宮保銜 恩摺 咸豐十一年十月二十六日

奏爲恭謝

天恩仰祈

聖鑒事竊臣接准兵部咨稱咸豐十一年八月二十五日內閣

奉

上諭曾國藩調度有方著加恩賞加太子少保銜等因欽此當
卽恭設香案望

闕叩頭謝

恩訖伏念臣謬膺疆寄兼統師干謂吳越之上游以皖城爲雄
鎮會同臣官文等熟籌圍剿力禦外援值

一人訪落之昌期復九載陸沈之重地上託

聖皇鴻福下賴僚友同心出謀以胡林翼爲先苦戰以多隆阿爲最如臣碌碌何功可言迺蒙

鴻慈曲逮寵錫頭銜陪侍

青宮忝附前疑後丞之列仰承

丹詔彌切臨深履薄之懷臣惟有運甓習勤投鞭勵志勉已百

已千之學圖得尺得寸之功庶冀仰答

高厚生成於萬一所有微臣感激下忱理合繕摺叩謝

天恩伏乞

皇上聖鑒謹

奏

卷之八

三

謝弟國荃貞幹升秩

恩摺

咸豐十一年十月二十六日

奏爲恭謝

天恩仰祈

聖鑒事竊

臣

接准兵部咨開咸豐十一年八月二十五日內閣

奉

上諭官文等另片奏曾國荃等於圍攻安慶智勇兼施道員曾

國荃著賞加布政使銜以按察使記名遇缺題奏並加恩賞穿

黃馬褂以示優獎候選訓導曾貞幹著免選本班以同知直隸

州知州儘先選用並賞戴花翎等因欽此

臣聞

命之下感悚莫名當卽恭設香案率同

臣

弟國荃貞幹望

闕叩頭謝

恩訖伏念

臣

弟國荃從征江楚累擢監司茲值

聖主當陽皖城告捷

溫綸渥被

寵兼師錫之三章服榮加吉協坤爻之五

臣

弟貞幹亦以微勞

遽膺

懋賞綰魚符而佐郡戴翠羽以舒翹同產三人均乏涓埃之報

鴻施九陛並霑

雨露之恩

臣

惟有督率

臣

弟等益矢忠誠共圖埽蕩叶墳簾以

奏凱無忘汗馬之勤荷戈歿以偕征冀免濡鵠之刺所有

微臣

感激下忱理合繕摺率同_臣弟等叩謝

天恩伏乞

皇上聖鑒謹

奏

卷之十四

謝弟國華 予謚 恩摺

咸豐十一年十月二十六日

奏爲恭謝

天恩仰祈

聖鑒事竊

臣

接准兵部咨稱咸豐十一年八月二十五日內閣

奉

上諭官文等奏請將殉難道員予謚等語候選同知曾國華前
在三河殉難追贈道員今其兄曾國藩其弟曾國荃曾貞幹率
師剿賊克復安慶一門忠義深堪嘉尙曾國華著加恩予謚以
彰忠烈欽此

臣聞

命之下感泣難名當卽恭設香案望

闕叩頭謝

恩訖伏念

臣

弟國華夙抱愚誠未嫻遠略從戎兩載乏虎頭食

肉之容殉難三河遂馬革裹尸之志荷蒙

先皇帝予以蔭襲贈以卿銜褒親父以榮封許孤兒以入

覲至三至再疊沐高天厚地之

恩有弟有兄愧無墜露輕塵之報茲因克復皖省光賁泉臺更

邀逾格之

鴻施畀以易名之令典河山無恙重弔國殤畢命之場魂魄有

知永感

聖主憐才之意

臣

惟有督率同懷誓殲醜類餐冰厲節運甓習

勤萬眾一心同堅破釜沈舟之志闔門百口共矢銜環結草之誠所有感激下忱理合繕摺叩謝

天恩伏乞

皇上聖鑒謹

奏

妻和卷十四

五

左宗棠定議援浙節制諸軍摺

咸豐十一年十一月十六日

奏爲左宗棠一軍定議進援浙江請將廣信徽州饒州諸軍統歸節制以一事權恭摺奏祈

聖鑒事竊近年以來江西屢被賊擾粵閩之賊由撫建北出而入浙皖浙皖之賊由信饒南竄而擾腹地皆以廣信爲必經之路本年三月七月僞侍王李世賢僞忠王李秀成先後由江入浙皆以廣信爲出奔之途是欲保江西宜於廣信設防欲援浙江宜從廣信進兵必然之勢也自紹興失守杭州危急臣等日夜憂皇以浙境一日不靖則江西一日不安而大局亦終不能轉屢次函商謀所以救浙之策無如地廣兵單不專分布而浙

中賊勢浩大亦非數千人所能救解臣國藩現令鮑超一軍由

青陽前進卡品隆一軍由石埭前進會剿甯國欲以分掣浙中

賊勢第恐僞輔王悉眾堅守勢不能遽拔甯郡之城卽不能少

解浙江之阨惟幫辦軍務太常寺卿臣左宗棠久駐廣信距賊

較近其平日用兵取勢甚遠審機甚微近日屢與臣等書函毅

然以援浙爲已任督臣慶端撫臣王有齡亦奏請左宗棠統軍

入浙臣等往返熟商卽請左宗棠督率所部進援浙江並將駐

防徽州之臬司張運蘭駐防廣信之道員屈蟠駐防玉山之道

員王德榜參將顧雲彩駐防廣豐之道員段起各軍及副將孫

昌國內河水師均歸左宗棠就近節制調度兵力稍厚運掉較

靈於援剿浙皖之時仍步步顧定江西門戶庶於三省全局有裨左宗棠現駐廣信距臣國藩安慶行營相隔千餘里若一入浙境相去彌遠聲息難通遇有轉奏請

旨之件誠恐耽延貽誤以後該處一切軍情應由左宗棠自行奏報以昭迅速是否有當伏候

諭旨遵行至其所部各營與信防各軍欠餉太多難遽用命臣等擬將信郡各屬本年錢漕撥歸經收以清廣玉各軍積欠并將河口景鎮婺源釐金撥歸徵收以清左宗棠所部各營積欠俟各軍整飭就緒卽行分途進發內防外剿進止遲速均由左宗棠相機辦理所有左宗棠一軍定議援浙暨廣信徽州饒州

各軍統歸節制並自行奏報各緣由謹合詞繕摺由驛馳陳伏
乞

皇上聖鑒訓示謹
奏

李桓保升兩司捐

咸豐十一年十一月十六日

奏爲請畱道員署理江西藩司總辦糧臺暫緩送部引見並懇

加恩獎勵恭摺仰祈

聖鑒事竊

臣

國藩於上年四月署理兩江總督統兵進剿欽奉

諭旨著令江西布政使總辦

臣

處糧臺其時江西藩司卽係督

糧道李桓署理江西通省牙稅釐金奉

旨由

臣

國藩徵收充餉又經奏派該署司李桓會同贛南道李

瀚章經理嗣藩司張集馨到任暫令李桓將糧臺交卸本年春

間張集馨赴九江辦理通商事宜又經

臣

國藩札派李桓接辦

奏稿卷十四
糧臺七月間張集馨因案革職又經臣等會奏派李桓署理藩

司五月間臣毓科遵

旨保舉道府以督糧道李桓等才猷出眾據實奏保八月二十

二日奉

旨著吏部調取引見等因欽此遵卽轉行去後茲據該署司李
桓詳請給咨赴部等情臣等查按察使銜江西督糧道李桓廉
幹勤敏吏才精覈咸豐五年以道員揀發來江旋授今職在任
七載歷署藩臬兩司皆值軍務紛煩餉糈支絀之際該員任勞
任怨竭蹶經營卒能保全大局於通省軍政之原委錢漕之利
病屬吏之賢否靡不深知舉措合宜輿論翕然實爲江省必不

可少之員辦理糧臺釐局詳慎出納無誤要需目下調派各軍
進剿皖江南北亟須籌餉接濟本年江西州縣大半被擾民力
拮据所有額徵地丁漕米不容藉詞蠲緩臣等援照近年湖南
北減價徵收成案飭令藩司嚴定章程禁斷一切浮收規費勒
限徵解以濟餉需而紓民困該署司實力奉行百年積弊痛加
掃除從此餉事吏事可期日有起色現值更張之始條目繁多
整頓督催必資熟手除將丁漕減收新章俟辦有頭緒再行專
案具奏外相應請

旨仍畱督糧道李桓署理江西布政司總辦糧臺暫緩送部引
見並懇

俯念該員在任日久勞績最著

敕交軍機處以江西藩臬兩司遇缺題奏出自

皇上逾格

天恩於軍務吏治皆有裨益

臣

等爲要缺需人起見謹合詞附

驛具陳伏乞

皇上聖鑒訓示謹

奏

揀員署安徽司道摺

咸豐十一年十一月十六日

奏爲揀員署理安徽臬司江甯鹽巡道兩缺隨駐安慶恭摺奏
祈

聖鑒事竊臣於九月初九日奏明擬於安慶省城酌派司道數
員分任責成奉

旨依議欽此除江甯布政使江安糧道兩缺咨臣另選賢員請
旨飭署外查安徽按察使向隨皖撫駐紮安慶該臬司張學鵬
現署布政使在泗州一帶隨辦防剿其臬司篆務本係廬鳳道
才字和兼署嗣才字和告病尚未據委署有人應遵

旨由臣派員署理隨駐安慶責令籌辦該省善後事宜查有按

察使銜前任湖北督糧道萬啟琛江西豐城人咸豐五年選授是缺經臣奏畱江西軍營辦理濟楚餉鹽六年委赴浙省招商督運先後運鹽三萬五千餘引嗣經浙江撫臣晏端書奏准畱浙差委又籌運餉鹽六萬七千餘引統計浙西兩局該員經手征收餉鹽銀八十餘萬兩十年正月委赴江西會議鹽餉章程旋奉

旨畱辦江西團練本年八月經臣調赴安慶委辦牙釐總局該員廉明幹練敏而不浮籌餉察吏尤擅專長合無籲懇

天恩將前任湖北督糧道萬啟琛畱於蘇皖兩省以道員請旨簡放卽令署理安徽按察使於軍務地方皆有裨益又江甯

鹽巡道邢春第尚未到任經臣奏准派員署理查有江蘇候補道李榕四川進士由庶吉士改歸禮部主事咸豐九年經臣奏調軍營差遣升員外郎本年六月於克復黟縣建德出力案內請畱江蘇以道員補用奉

旨允准旋經吏部議駁以知府分發省分補用該員辦理臣處營務兩載以來器識豁達不憚艱險現委辦善後局務實心講求可否仰懇

天恩准令江蘇候補道李榕署理江甯鹽巡道缺隨駐安慶俾臣得收指臂之助所有揀員署理司道兩缺各緣由謹會同安徽撫臣彭玉麟江蘇撫臣薛煥恭摺具陳伏乞

皇上聖鑒訓示謹奏

畱朱品隆攻甯國片

咸豐十一年十一月十六日

再臣國藩承准軍機處贊襄政務王大臣字寄九月十八日奉
上諭瑞昌王有齡奏衢防緊要請飭總兵赴任防剿等語總兵
李定泰已派幫辦徐宿勦匪事宜卽須繞道赴徐惟衢州防務
喫緊浙省並無統兵大員可以前往接辦著曾國藩卽飭新授
衢州鎮總兵朱品隆迅赴本任統領衢防各軍接辦防剿事宜
以便李定泰交卸起程將此由六百里諭令知之等因欽此仰
見

皇上權衡緩急畱意將材曷勝欽悚臣查浙江危急情形在杭
州甯紹而不專在衢州欲拯浙江之危宜以大隊直赴省垣而

不宜僅顧衢防臣現擬左宗棠一軍由廣信進兵以救浙江之
上游鮑超一軍由甯國進兵以分浙中之賊勢同日另摺具奏
想邀

聖鑒至朱品隆一軍兵數不滿三千只可依人而行不能獨當
一路臣已令鮑超由山外循池州進青陽朱品隆由山內循祁
門進石埭然後會合一路以攻甯國該二軍者分支則互爲聲
援缺一則不能獨進一至甯國去杭州僅二百餘里必足以懾
浙賊之膽不必赴衢而後爲救浙也衢州自解圍以後防務較
鬆聞浙督臣慶端奏明卽日赴三衢統兵督勦李定泰似可抽
身赴徐不必待朱品隆前往接替且朱品隆久帶湘勇征皖數

年形勢熟諳畱皖則人地實爲相宜赴衢則統率難期得力審
度情勢自以先赴甯國爲妥所有朱品隆會攻甯國暫難赴衢
緣由理合附片覆

奏伏乞

皇上聖鑒訓示謹

奏

孝和卷十四

五

改題爲奏片

咸豐十一年十一月十六日

再兩江總督關防兩淮鹽政印信已據委員於本年七月初六日齎到臣當將接印日期恭摺

奏報其書吏及文卷等項准署漕臣王夢齡咨會

奏明改道航海至甯波繞赴浙江行走各在案臣查兩江統轄

江安蘇三省地方政務殷繁又兼管兩淮鹽政漕河營制多由臣衙門主政必須詳查例案核明准駁不致遺漏舛誤方昭慎重刻下書吏文卷因浙江路梗尚未到營從前辦過成案章程此間一無所有且蘇常等城未復各衙門案卷亦不齊全值此南北攻剿喫緊籌兵籌餉皆臣親自綜理地方事件尚難兼顧

所有刑名錢穀鹽員補缺武職補缺營汛疎防按期參劾以及尋常事件應由臣衙門主政循例具

題者均請暫行展緩如係萬不可緩卽請改題爲奏以歸簡易統俟書吏文卷到日江南軍務稍定再行照例具題除咨部查照外謹附片陳明伏乞

聖鑒訓示謹

奏

力辭節制浙省各官摺

咸豐十一年十一月二十五日

奏爲欽奉

恩旨瀝陳下情恭摺覆陳仰祈

聖鑒事竊十一月十五日准兵部火票遞到十月十八日內閣奉

上諭欽差大臣兩江總督曾國藩著統轄江蘇安徽江西三省并浙江全省軍務所有四省巡撫提鎮以下各官悉歸節制浙江軍務著杭州將軍瑞昌幫辦並著曾國藩速飭太常寺卿左宗棠馳赴浙江勦辦賊匪浙省提鎮以下各官均歸左宗棠調遣欽此同日承准議政王軍機大臣字寄十月十八日奉

上諭本日已明降諭旨令曾國藩節制浙江全省軍務並令江蘇安徽江西浙江巡撫提鎮以下各官悉歸節制該大臣自不能不統籌兼顧况安慶克復湖北江西將次肅清自不至有顧此失彼之虞著曾國藩卽飭左宗棠帶領所部兼程赴浙督辦軍務浙省提鎮以下統歸調遣至都興阿在江北勦辦粵匪袁甲三在皖北勦辦捻匪遇有緊要軍務已諭令該將軍會商曾國藩辦理其江北皖北地方文武該將軍等諒亦時有調遣之處並著曾國藩諭令該文武等仍遵都興阿等調遣不得因已歸該大臣節制於都興阿袁甲三派辦公事稍涉玩視是爲至要等因欽此仰見

聖主厯念東南擇人任使之至意跪讀之下惶悚莫名臣於未奉

諭旨之先業將左宗棠定議援浙並節制廣信徽州各軍會同

江西撫臣毓科具奏在案伏念臣自受任兩江以來徽州失守

祁門被困竭蹶之狀屢見奏報倖託

聖主威福僅得自全至於安慶之克悉賴鄂軍之功胡林翼籌

畫於前多隆阿苦戰於後並非臣所能爲力江蘇各郡羣盜如

毛乃臣職分應辦之事受

命年餘尙無一兵一卒達於蘇境是臣於皖則無功可敘於蘇

則負疚良深乃蒙

皇上天恩不責

臣

以無效翻令兼統浙江軍務並四省巡撫提

鎮以下悉歸節制此非常之

寵遇

臣

自顧非材實難勝任自九月以來浙省軍情日見危急

臣與毓科左宗棠等往復函咨商謀援救徒以地段太寬兵力

太薄既須援浙又須顧皖又須保江三者有并重之勢一時乏

兼全之策直至十月下旬始定議左宗棠由衢州援浙從正路

以張軍威鮑超由甯國援浙從旁路以掣賊勢大局所係必應

統籌

臣

本未敢稍涉推諉不必有節制浙省之名而後盡心於

浙事也茲欽奉

諭旨令浙省提鎮以下均歸左宗棠節制事權更一掣肘無虞

臣已咨催左宗棠迅速啟行但以臣遙制浙軍尙隔越於千里之外不若以左宗棠專辦浙事可取決於呼吸之間左宗棠前在湖南撫臣駱秉章幕中贊助軍謀兼顧數省其才實可獨當一面應請

皇上明降諭旨令左宗棠督辦浙江全省軍務所有該省主客各軍均歸節制卽無庸臣兼統浙省籲懇

天恩收回

成命在

朝廷不必輕假非常之權在

微臣

亦得少安愚拙之分其浙省

軍事凡

臣

思慮所能到才力所能及必與左宗棠竭誠合謀不

敢稍存畛域如因推諉而貽誤卽求

皇上按律治罪臣不敢辭臣忝任江督三省巡撫提鎮以下各

官例得節制載之會典著之

敕書各文武亦均恪遵憲章不必更加申誡至袁甲三都興阿

各路軍情謹當隨時商辦其江北皖北地方文武臣已嚴飭仍

歸該大臣等節制不得稍涉玩視大抵用兵之要貴得人和而

不尚權勢貴求實際而勿爭虛名臣惟當與各僚屬同心圖治

共濟艱難以慰

先皇在天之靈上佐

聖主中興之業伏懇

皇上俯鑒愚忱允臣所請不勝感激悚懼之至所有欽奉
恩旨瀝陳下情各緣由謹繕摺由六百里覆陳伏乞

聖鑒訓示謹

奏

八
卷
和
名
十
四

三

查覆江浙撫臣及金安清參款摺

咸豐十一年十一月二十五日

奏爲遵

旨查明江浙撫

臣

暨金安清勸捐各情據實覆陳仰祈

聖鑒事竊十一月十五日承准議政王軍機大臣字寄十月十六日奉

上諭有人奏請密查江浙撫臣能否勝任一摺據稱薛煥王有齡曠日持久捷報無聞現在浙省四面皆賊萬一杭城有失上海豈能獨安該撫等雖勢處萬難亟宜謀勇兼資力除凶燄等語薛煥前在蘇州府任內聲譽頗著及升任上海道辦理關稅及外國事宜亦臻妥協惟該省軍務正當喫緊督帶兵勇或恐

非其所長且前據有人奏該撫在上海偏隅自固日享安富又稱上海離城三十里卽有賊壘官吏奔競如常各等語如果屬實卽不能勝此重任浙撫王有齡頗有才具前任蘇藩時雖尙能籌辦軍餉惟於浙撫一缺未知能否勝任以上二員均著曾國藩悉心察看據實具奏等因欽此同日又承准議政王軍機大臣字寄十月十七日奉

上諭本日又有人奏浙省軍務不振請另簡賢員督辦一摺據稱瑞昌樸忠素著惜無智謀王有齡但知理財不嫻將略其所信任屬吏多係貪鄙之徒但以培克夤緣爲事大將如張玉良等擁兵觀望動輒挾制本年四月間金華失守張玉良督率兵

勇恣情搶掠該將軍等一味優容不敢申明軍律各等語王有齡疊被參劾其平日不協輿情已可概見著該大臣仍遵前旨確切查明迅速具奏又有人片奏江蘇巡撫薛煥娛情古玩不理軍務其總辦糧臺之金安清聲名狼籍恃與薛煥拜認師生任意侵蝕糧餉各等語並著曾國藩一併秉公確切查明據實覆奏毋稍徇隱等因欽此又十一月二十日承准議政王軍機大臣字寄十月二十五日奉

上諭茲有人奏江蘇巡撫薛煥自到任後株守上海莫展一籌且收買寶玩性耽麴蘖並將丁憂候補鹽運使金安清違制保奏派伊勸捐金安清於通泰設局煊赫奢侈逐戶搜括怨聲鼎

沸又有人奏薛煥自辦理通商以來廣通賄賂時輦金銀贈遺
權貴軍務則不復一城吏治則不辦一事浙江撫臣王有齡不
以克復爲事惟以暴斂爲能其捐輸之人作爲三分一濟軍餉
一充私橐一爲交結餽遺之用該撫籍隸福建運金歸里輿論
譁然各等語江浙軍務孔亟全賴封疆大吏實力整頓方能維
持危局保衛地方果如所奏情形營私納賄惟顧身家又安望
其奠民生而埽賊氛耶著曾國藩將所參薛煥王有齡金安清
各款彙入前參各款內一併秉公嚴密詳查據實覆奏毋稍徇
隱原摺片著鈔給閱看等因欽此又十一月二十二日承准議
政王軍機大臣字寄十一月初五日奉

上諭茲復有人奏金安清在泰州令人向伊捐資投效方得差
委牟利者爭相賄賂委員及職員生監奉委者各至百數四出
需索民不聊生指捐營私富戶小民均被勒派等語裏下河地
方逼近賊氛豈可復令劣員肆虐居民以致人心時虞搖動著
曾國藩嚴密確查彙併前案據實參辦毋許稍涉徇隱等因欽
此仰見

皇上慎重疆寄整飭官方曷勝欽悚臣查王有齡前任蘇藩其
籌餉之才爲遠近所推許上年升任浙撫適值金陵師潰蘇常
並陷之時敗將逃兵萃於浙省以萬難整馭之卒又素無統轄
之權時勢之難亦爲遠近所共諒然使另練親兵裁汰疲卒亦

未始不可以主而制客轉弱而爲強王有齡不諳軍情但求速效整理尙未就緒卽催令進圍嘉興且言嘉郡卽日可克臣於去夏頗以爲慮曾奏明嘉興師疲恐生他變厥後嘉興果敗王有齡不能嚴參以治罪嚴州賊退又復冒奏以飾功於是將領狎而生玩兵勇敗而轉刁遂成不可制之象矣逮至本年金華之失蘭谿之陷兵團仇殺而不能究弁勇搶掠而不敢問諭旨所詢動受張玉良等挾制係屬實在情形今則賊氛環逼餉項久虧卽使杭省幸而保全而數萬敗軍亦斷非王有齡所能管轄自去夏以來浙餉月需三十餘萬大率取之甯波紹興輸將不爲不盡力紳士不爲不竭誠乃王有齡奏參團練大臣

邵燦立予罷黜其下委紳數人皆革職永不敘用其所參者並非軍旅之大端但爭體制之末節以致甯紹眾紳各懷公憤痛恨次骨外間相傳有杭兵不許守紹紹餉不准入杭之說馴至紹郡淪陷杭省圍困皆由官紳水火之所致

諭旨所詢輿論譁然者或由於此近年蘇浙官場陋習以夤緣鑽刺爲能以巧猾譎詐爲才王有齡起自佐雜微員厯居兩省權勢之地往年曾帶浙員赴蘇去歲又帶蘇員赴浙袒庇私黨多據要津上下朋比風氣日敝其委員派捐但勒限以成數不復問所從來委員旣取盈於公數又欲飽其私囊朘削歛怨勢所不免

諭旨所詢屬吏多貪鄙之徒但以培克寅緣爲事證以臣之所聞殆非無因至鈔閱摺內所稱捐輸之入作爲三分一濟軍餉一充私橐一爲交結餽遺之用該撫籍隸福建運金歸里等語非弔查卷宗明察暗訪不能悉其底細臣處相隔較遠道途久梗尙無所聞此遵查王有齡之大略情節也江蘇巡撫薛煥前在蘇州府任內頗著循聲在上海道任內辦理關稅及外國事宜亦臻妥協及擢任巡撫駐紮上海陸續募勇四萬餘人每月糜餉二十餘萬不能專辦一路之賊江蘇所存地方惟鎮江揚州兩處尙據形勢該撫未嘗親至兩郡一行又不能多濟餉項以聯聲援上年夏間薛煥奏請通飭各路禁用廣勇而該撫信

任之曾秉忠馮日坤等所部多係廣勇縱兵擾掠商民怨憤曾秉忠之勇搶劫洋船釀成巨案馮日坤之勇在金山圍殺紳首團勇多名目無法紀薛煥莫可如何滬城紳民既畏賊蹤之環逼又虞兵勇之肆掠日夕驚惶不獲安處

諭旨所詢帶勇非其所長株守上海莫展一籌三十里外卽有賊壘等語臣之所聞大約相符自蘇常失陷各縣鎮市流離轉徙萃於上海一隅又爲西洋各國交匯之所人民如海財貨如山中外商賈文武員弁肩摩轂擊晝夜喧闐地少員多人浮於事每有差委不能不由營求而得或并無可派之差亦謀爲位置之法輒復添一捐目給一委札其官職較大者如奏派金安

清總辦餉局奏免前藩司蔡映斗首府吳雲失守罪名且委吳雲總辦捐局此數人素工應酬不愜人望其所援引之人類多夤緣之輩

諭旨所詢官吏奔競如常殆卽此類也上海旣繁盛異常蘇州之書籍字畫自賊中販賣而出亦充積市肆之中薛煥設立書畫局多延畫工購買名蹟

諭旨所詢日享安富娛情古玩者與臣之所聞相同至鈔示摺內所稱辦理通商以來廣通賄賂時輦金銀贈遺權貴等語風聞薛煥九年由臬司進京途次有失銀之案在京有餽遺之情此外別無所聞此遵查薛煥之大略情節也丁憂候補鹽運使

金安清聰明過人好覽書籍惟矜銜智術專工揣摩其辦事廣設方略終鮮成效前因勸捐軍餉款目未清經袁甲三奏參赴皖覈算展轉營求始得奏派南北籌餉局自通泰設局大開幕府煊赫奢侈原參摺內所稱令人向伊捐資投效方得差委爭相賄賂委員生監各至百數四出需索民不聊生胥役人夫相望於道或派捐富戶關說餽賂即可免捐或挾嫌誣指一經傳押必至破家等語證以臣之所聞多相符合其有無侵吞實跡非弔查簿數不能確知此遵查金安清之大略情節也以上三員皆與臣無一面之識斷不敢稍涉瞻徇上蔽

聖聰惟

臣

與蘇浙相距甚遠音書梗阻不能詳查參證亦未敢

以臆見概人之生平金安清才略頗優而物議最劣應請

旨卽行革職撤去籌餉差事不准仍畱蘇境以靖民心而息浮
言王有齡辦理杭城防務尙費苦心惟用人或尙巧滑取財間
有怨言薛煥儉安一隅物論繁滋蘇浙財賦之區賊氛正熾該
二員似均不能勝此重任應否降革之處出自

聖主鴻裁所有遵

旨查覆緣由謹專摺附驛具陳伏乞

皇上聖鑒訓示施行謹

奏

保奏周騰虎等片

咸豐十一年十一月二十五日

再臣本年疊奉

諭旨飭令保舉人才茲又欽奉

寄諭令保封疆將帥

臣

自愧無知人之明無儲才之素不足以

仰荅

聖主謙沖之懷惟經濟以歷練而成人才以獎借而出苟有所聞卽當搜羅薦達造就爲他日之用去年常州之陷守土官吏皆去該郡士民尙能嬰城固守與賊鏖戰多日城破之後各村鎮團練拒賊如無錫蕩口等鎮至今尙與賊相持不懈是其中必有二三賢智爲之倡率

臣

聞該郡素尙節義其士子多好讀

奏稿卷一四

書籍古研究事理臣所知者有候選主事周騰虎疎通知遠識趣閱深候選同知劉翰清監生趙烈文博覽羣書留心時事監生方駿謨不求聞達行誼卓然藍翎六品銜監生華蘅芳議敘從九徐壽研精器數博涉多通此數人者若令閱歷戎行廓其聞見必可有裨軍謀蔚爲時望自常州淪陷之後諸人多已遠避周騰虎在浙江劉翰清在山東方駿謨在河南其餘尙在本籍應請

飭下各省撫臣訪求咨遣前來俟到臣營數月之後臣悉心察看再行出具考語奏請

皇上量材錄用是否有當謹附片具奏請

卷和名一

苗沛霖應勦彭玉麟難離水營摺

咸豐十一年十二月十七日

奏爲遵

旨籌商苗沛霖勦撫情形並彭玉麟現帶水師難赴北路請

旨另簡賢員接任皖撫恭摺奏祈

聖鑒事竊臣承准議政王軍機大臣字寄咸豐十一年十月十

六二十二三三十五等日欽奉四次

諭旨以苗沛霖攻破壽州勦撫情形飭臣妥商辦理除咨請湖

廣督臣官文主稿會同臣與李續宜彭玉麟四銜覆奏外臣查

苗沛霖藉受撫之名行謀叛之實已數年矣

朝廷假爵賞爲羈縻而彼卽竊威權以脅眾帥臣以恩義相勸

誘而彼卽挾詐術以要求梟獍之性非可感化徒以長其兇燄
養成尾大不掉之勢今長淮上游險要如霍邱壽州懷遠各城
三河尖正陽關各處苗沛霖均分黨佔踞且欲下窺臨淮上吞
潁州光固人心洶懼逆跡昭彰斷無再撫之理袁甲三兵單餉
絀力實不足制之近亦以該練應剿而不應撫專函徧商臣等
約會楚師併力夾擊且請彭玉麟馳赴潁壽就近會辦臣再四
籌度苗沛霖羽翼已成巢穴已固南勾粵逆西通捻匪一經進
剿羣兇之交必固戰爭之日方長現在楚師剿辦髮逆暫難同
時並舉須俟攻克廬州以後與袁甲三臨淮之軍聯爲一氣乃
可併力剿苗庶局勢順而兵力較厚至彭玉麟身任皖撫自應

親往北路督勦惟穎毫一帶苗捻各股縱橫布滿爲撫臣者須有陸路馬步強兵乃足以立

國威而定民志彭玉麟素統水師並未帶有陸兵亦未在陸路打仗一旦舍舟登陸似覺用違其長穎壽雖原有兵勇驕疲日久殊難得力若另行招募戰守皆不可靠若調撥別部恩信又不相孚且現在得力之軍皆分防最要之地卽抽撥亦不能多彭玉麟隻身前往於事何濟況水師轉戰數年肅清上游千餘里實賴楊載福彭玉麟二人互相維持楊載福現奉

恩准回籍省親明春假滿回營後或陸軍下勦金陵楊載福彭玉麟兩人者當一赴下江一留上江或賊匪回竄楚境兩人者

當一援鄂江一防皖江江面太長實非一人所能照料彭玉麟
一離水營馳援潁壽陸路難收夾擊之效水師實有挫失之虞
是以該撫兩次奏請開缺臣未便勸阻並爲緘商袁甲三勿再
奏催可否仰懇

聖恩俯念北路防剿關繫至重另簡素統陸兵威望卓著之員
接任皖撫俾彭玉麟仍帶水師於南北大局兩有裨益所有遵
旨籌商苗沛霖應剿情形暨彭玉麟難離水營各緣由謹專摺
由驛覆陳伏乞

皇上聖鑒訓示謹

奏

浙省失守徽郡被圍通籌全局摺

咸豐十一年十二月十八日

奏爲浙江省城失守徽州被圍通籌全局力圖補救恭摺條陳

仰祈

聖鑒事竊

臣

連日承准議政王軍機大臣字寄咸豐十一年十

一月十一十二十四十六等日欽奉四次

諭旨以杭州省城被圍緊急飭催左宗棠統師援浙當卽欽遵
恭錄移催左宗棠迅速啓行先是浙江之賊恐我軍進援爲先
發制人之計於十一月十四日分兩大股由淳安開化竄出二
十二日至徽境之街口二十六日至深渡副將張運桂派隊迎
擊大捷一次小挫一次僞輔王楊輔青又率甯郡大股分兩路

內犯欲取徽州休甯各城二十七日僞成天安桂逆率眾萬餘
竄休境之屯溪署總兵唐義訓擊走之二十八日又竄篁墩張
運桂督軍迎剿獲勝楊逆同各股悍賊又由南路逕撲徽郡我
軍撤回守城自十二月初二日後徽州被圍甚急張運桂率勇
堅守屢次出擊獲勝賊於城外分布築壘不少卻退臣思徽郡
爲由浙入江皖第一重門戶我與賊所必爭之地因調總兵朱
品隆出嶺之師兼程回援復函商左宗棠順道由徽發夾擊此
股再進嚴州以援浙省准左宗棠咨稱已派老湘七旗及駐防
玉山之仁右營前赴華埠直隸州知州劉典帶七營前赴婺源
防剿竄逆方冀各軍併力擊退徽賊卽乘勢入浙乃接據江蘇

撫臣薛煥咨稱浙江省城已於十一月二十八日失守又接署
皖南道姚體備稟浙江潰兵紛紛來徽據稱浙省文武大吏殉
難甚多其水陸兵勇約有六萬除陣亡及降賊者外尙有萬餘
人沿途又被逆匪截去多名等語臣疊奉援浙之命赴救莫及
大局決裂應請

旨將臣交部嚴加議處現在浙蘇兩省膏腴之地盡爲賊有窟
穴已成根柢已固賊數號稱五十萬潰勇亂民裹脇日多旣得
逞志於浙勢必上竄皖南內犯江西以擾我後路而分我兵力
東南大局收拾愈難臣謹就愚慮所及妄思補救之策爲我
皇上一一陳之條列於後

一浙東之金華嚴州紹興甯波台州處州等府先後失守温州被土匪竄陷雖有收復之說料難終保惟湖郡與海甯州兩城尙存然皆孤懸賊中亦無倖全之理綜計全浙惟衢州一府可以圖存臣擬令各軍堅守衢州與江西之廣信皖南之徽州爲犄角之勢先據形勝扼賊上竄之路左宗棠應暫於徽衢信三府閒擇要駐紮相機調度總須先固江西皖南邊防保全完善之地俟徽圍旣解立腳漸穩兵餉調齊再籌分路進剿

一閩浙督臣慶端聞已進駐建甯查浙省各郡之賊由分水瀆遂內竄則徽州婺源當其衝由開化江常內竄則廣信玉山當其衝若由遂昌龍泉至浦城而竄江西之鉛山福建之光澤則

浦城當其衝左宗棠以數千人分防徽信兩路斷難兼顧閩防擬請

旨敕下慶端速派勁旅嚴守浦城俾賊不得由閩境而犯江西一浙省將軍巡撫司道各官聞多殉節容俟查明詳晰具奏應請

旨迅賜簡放各缺查有廣西按察使蔣益澧忠勇素著上年經臣奏調帶勇來皖奉

旨允准旋准廣西撫臣劉長佑函稱暫留蔣益澧會攻潯梧現潯梧兩郡均已克復粵西漸就蕩平擬懇

聖恩於浙江藩臬兩司內將該員蔣益澧調補一缺飭帶所部

五六千人迅速赴浙隨同左宗棠籌辦防剿可收指臂之助又江蘇按察使湯雲松久病廢事難期振作可否請

旨飭令赴部引

見查有候選道陳士杰湖南桂陽州人由戶部小京官在籍帶勇歷著戰功洊升道員所部桂勇精悍得力可否請

旨卽將陳士杰擢授江蘇臬司飭令帶勇四千名馳赴安慶聽候調遣出自逾格

鴻慈現在蘇浙糜爛人皆視爲畏途惟有選擇能戰之文員補授兩省之實缺庶可漸漸集事

一浙省兵勇向恃甯紹爲餉源今旣被賊踞全省糜爛無可籌

畫除福建援浙之師應仍由閩省籌款接濟外左宗棠所部及衢州原有各軍月餉無出亟應另籌協款查廣東繁富之區現臻安謐擬懇

恩飭下廣東督撫粵海關按月協撥銀十萬兩或由江西轉解左宗棠營或由海道駛運上海由

臣轉解左宗棠營並請

飭下福建督撫閩海關按月協撥三萬兩交左宗棠轉發衢州各營

臣

與撫

臣

毓科仍於地丁及釐金項下源源協濟以資騰

飽

以上四條均係目前急務至如何進取機宜

臣

當與左宗棠悉心籌商隨時會奏謹將浙江省城失守徽郡被圍通籌全局各

緣由繕摺由六百里加緊馳陳是否有當伏乞

皇上訓示施行謹

奏

裁撤江南團練大臣片

咸豐十一年十二月十八日

再臣承准議政王軍機大臣字寄咸豐十一年十月二十三日奉

上諭前因軍務未竣各省需員辦理團練准大學士周祖培等所奏以毛昶熙杜翻晏端書龐鍾璐王履謙桑春榮劉繹等先後辦理河南等處團練連日有人奏各省設立團練大臣諸多弊竇擾害閭閻請仍責成地方官辦理以一事權等語除杜翻現已回京本日並將桑春榮劉繹團練大臣降旨裁撤外其江北團練大臣晏端書江南團練大臣龐鍾璐聞其辦理團練未能振作是否仍須該員等經理抑或即可裁撤著曾國藩薛煥

體察情形迅速具奏等因欽此臣伏查團練之法只能防小支千餘之游匪不能剿大股數萬之悍賊其練丁口糧若太多則與募勇之價相等不必僅以團名若太少則與兵勇之價迥殊斷難得其死力其團局經費若取之於丁漕釐捐四者之中則有礙督撫生財之道若設法於丁漕釐捐四者之外則更無絲毫措手之處事權既無專屬剛柔實覺兩難晏端書之在江北不設餉局但勸各邑築圩自保龐鍾璐之在江南激勸鄉民俾知同讐敵愾之義辦理極有斟酌惟目下賊數太多逆氛正熾斷非團練所能奏功應俟賊氣漸衰大功將竣兵勇凱撤之際然後辦團以善其後庶幾有益無損晏端書龐鍾璐清操雅望

內任最宜應請

皇上天恩撤去團練差使仍飭回京供職所有江南北應行團練之處卽責成地方大吏督率官紳妥爲經理所有遵

旨體察情形覆奏緣由謹會同江蘇巡撫

臣

薛煥附片馳奏是

否有當伏乞

皇上聖鑒訓示謹

奏

麥利卷十四

七

王開化請卹片

咸豐十一年十二月十八日

再布政使銜花翎卽選道王開化爲已故按察使銜晉贈布政使卽選道王鑫之從弟年甫十七卽從王鑫剿平湖南南路各逆以善戰聞嗣分帶湘勇剿江西臨江吉安撫建諸賊戰功卓著王鑫故後王開化與現任福建按察使張運蘭分統所部旋以病假歸上年左宗棠奉

旨襄辦軍務延其入軍總理營務入江皖後連克德興婺源兩城去冬剿僞主將黃文金股匪今春剿僞侍王李世賢股匪入夏剿劉官方股匪復建德縣城剿婺源德興竄匪均獲大捷王開化之力居多夏間追賊過猛感受暑熱久患瘧痢仍復力疾

從征抵廣信後醫治罔效旋即身故查該員厚重沈毅其用兵每能以寡擊眾雖矢石如雨之中意思安閒不異平常至其摧鋒陷陣颺發電舉賁育不足喻其勇也三月十四日樂平城外之戰賊眾共四十餘起如蟻如蠅聯亘十餘里西門一路尤厚僞侍王賊營所在也左宗棠初擬自當西路王開化當中路老湘營當東路約定同時奮擊王開化忽急起躍馬而馳自出西路而密屬直隸州知州劉典隨左宗棠共出中路蓋以西路賊多慮左宗棠犯此重險而願以身當之耳卒之三路皆捷李逆被重創賊膽由此喪盡望風潰逃竄入浙江實由王開化西路血戰所致該員轉戰八載勞績最多至其器識端偉性行淑均


爲左宗棠所敬服軍中皆倚賴之時事方艱良材倏殞可勝痛惜據左宗棠咨報並請奏加優卹前來可否仰懇


皇上天恩准將布政使銜卽選道王開化照布政使軍營立功後病故例從優賜卹予諡以示褒獎之處出自逾格

鴻慈謹附片具

奏請

旨





PL
2228
.A1
1876
V.16

曾文正公奏稿

卷之十五目錄

遵保皖撫大員摺

同治元年正月初十日

欽奉 恩諭再辭節制四省摺

全日

遵保水師總兵摺

全日

請優卹羅遵殿王有齡片

近日各路軍情片

參翁同書片

謝協辦大學士 恩摺

正月二十二日

金陵未克以前請不再

加恩 臣家片



議覆借洋兵剿賊片

徽州解圍摺

全日

籌辦江浙軍務摺

全日

鮑超軍在青陽大捷片

遵旨通籌全局摺

二月初二日

謝弟國荃補浙臬恩摺

二月初十日

遵議安徽省城仍建在安慶摺

二月十二日

覆奏楚軍不能出洋片

劉于濬未能赴浙片

條陳近日軍情摺

二月二十二日

謝弟國荃升授蘇藩 恩摺 全日

參李元度片

謝京察從優議敘 恩摺 三月初八日

遵 旨議覆請派員辦廣東釐金摺 全日

李鴻章軍改由輪船赴滬摺 全日

近日各路軍情片

旌卹饒廷選家屬片

蕭孚泗陳由立畱原營片

籌議借洋兵剿賊摺 三月二十四日

克復青陽縣城摺 全日

荻港舊縣三山一律肅清片

近日軍情片

查覆閩浙總督慶端事蹟摺

四月初四日

克復石埭太平涇縣三城摺

全日

克復巢含和三城並銅城閘等隘摺

全日

克復繁昌縣城摺

全日

近日軍情片

克復旌德縣城摺

四月十五日

克魯港要隘復南陵縣城摺

全日

遵保皖撫大員摺

同治元年正月初十日

奏爲遵

旨保奏皖撫大員恭摺覆陳仰祈

聖鑒事竊臣於咸豐十一年十二月二十五日承准議政王軍機大臣字寄十二月十二日奉

上諭彭玉麟奏懇陳下情請開缺專意剿賊一摺安徽巡撫現在簡用乏人著曾國藩於所屬司道大員內擇其長於吏治熟悉軍情者不必拘定資格秉公保奏一二員候旨簡放再前任吉南贛甯道沈葆楨前有旨令赴該大臣軍營查看保奏該員於現在時勢應如何任用之處卽著迅速奏聞等因欽此又於

同治元年正月初五日承准議政王軍機大臣字寄咸豐十一年十二月二十日奉

上諭彭玉麟奏皖撫宜帶陸兵該撫難離水營仍懇准令開缺等語著卽會同曾國藩李續宜等籌商人才薦賢自代卽由曾國藩迅速奏聞候旨簡放提督楊載福請假回籍著曾國藩催令該提督迅速回營如彭玉麟可以赴任庶水師不致無人統帶賈臻奏探聞廬州業已克復現在該郡情形若何並著查明迅速具奏等因欽此又同日承准議政王軍機大臣字寄十二月十八日奉

上諭廬州儻已克復多隆阿一軍自必乘勝追剿著曾國藩卽

飭令該將軍渡淮進擊彭玉麟李續宜亦可飭統率楚軍各員繞出賊前迎頭遏剿等因欽此仰見我

皇上慎重要區虛衷博訪欽悚曷任竊臣前因彭玉麟難離水營業於上年十二月十七日專摺馳奏並請

簡員接任皖撫在案彭玉麟疊次奏陳不能赴任係屬實情已

在
聖明洞鑒之中臣前與官文商本有奏請李續宜仍任皖撫之意緣鄂省關係極重一時難覓替人既恐上侵

朝廷黜陟之權又慮轉貽鄂疆未靖之患是以前摺中未敢冒昧瀆陳茲疊荷

溫諭疇咨

臣

反覆籌度所屬司道大員內實無素統陸軍者可

勝皖撫之任查有前任雲貴總督張亮基久任封疆艱險備嘗
威望素著咸豐二三年間在湖南巡撫署湖廣總督任內籌辦
防剿布置得宜輿論翕服湘勇之初招赴省城訓練實自張亮
基發其端故楚軍將弁樂爲之用該員籍隸徐州於穎亳宿蒙
等處地勢民情亦甚熟習又與袁甲三兒女姻親足資聯絡至
湖北撫臣李續宜上年九月曾自行奏請回皖撫本任該員忠
勇沈摯一則感

文宗顯皇帝超擢之恩一則抱伊兄李續賓三河之痛常思奮
身而赴義不願就易而避難其所部成大吉蕭慶衍蔣凝學各

軍皆在皖境可否仰懇

聖恩於張亮基李續宜二員中特簡一人爲安徽巡撫當於大局有裨如

簡授張亮基爲安徽巡撫應請

旨飭令在於湖南募勇數千帶赴六安一帶仍責成湖北專濟餉項如

簡授李續宜爲安徽巡撫亦應請

旨飭令先駐六安一帶責成湖北專濟湘勇全餉湖北有事責成李續宜回顧鄂省全境並請卽以張亮基爲湖北巡撫與督臣官文會辦一切庶足保楚北最要之區張亮基曾任總督以

之補授巡撫於例稍有未符但體制本不甚遠人地實在相宜或可通融辦理沈葆楨迭經檄催尙未到營臣於上年十一月二十五日附片覆奏該員堪膺疆寄欽奉

諭旨簡授江西巡撫計可迅速赴任至賈臻所奏探聞廬州克復並無此事僞英王陳玉成受金陵賊酋僞旨向以皖北爲分地安慶復後該逆卽退守廬郡於近城地方大肆焚掠多擄糧米入城意圖死守抗拒並分遣僞公天安陳姓僞則天義梁成福僞傑天義賴文光等盤踞廬郡北鄉五十里埠與城賊相犄角多隆阿前隊方抵中派河因廬境蹂躪過久人煙稀少軍糧無可采辦仍須由鄂省解運不免輾轉稽延臣現與官文李續

宜等籌派委員速行運濟正月內必可進攻廬州如廬城不復
勢不能繞赴淮北救援潁州除俟如何攻剿情形再由官文等
會銜馳奏並飭催楊載福迅速回營外所有遵
旨保奏皖撫大員恭摺由驛六百里覆陳伏乞

皇上聖鑒訓示謹

奏

欽奉

恩諭再辭節制四省摺

同治元年正月初十日

奏爲欽奉

恩諭再陳下情恭摺仰祈

聖鑒事竊

臣於去年十二月二十七日准兵部火票遞回

臣前

奏瀝陳下情原摺承准議政王軍機大臣字寄咸豐十一年十

二月十四日奉

上諭曾國藩奏接奉節制江浙等四省軍務諭旨瀝忱懇辭一摺覽奏均悉前因江浙等省軍情喫緊特諭曾國藩統轄節制以期事權歸一可以通籌全局茲據該大臣瀝陳各情謂遙制浙軍不若以左宗棠專辦浙事請收回成命各等語謙卑遜順

具見淵沈真摯有古大臣之風深堪嘉尚惟左宗棠業已降旨令其督辦浙江軍務並准其自行奏事江浙軍情本屬相關一氣凡該大臣思慮所到諒無不協力同心相資爲理節制一事該大臣其母再固辭等因欽此臣自顧何人仰蒙

溫語褒嘉委任專壹跪讀之下感悚莫名臣自聞杭州失守後

業將力圖補救各情於十二月十八日條列具奏目下浙省僅

存衢州溫州湖州三府及海甯州一城溫州土匪紛集恐難終

保湖州海甯州孤懸賊中無兵赴援亦斷無倖全之理綜計全

浙惟衢州一府可以圖存然欲保衢州必先守定江西廣信玉

山而後有運糧之路欲復杭省必由徽州以攻嚴州而後有進

兵之路是圖浙之道守衢與攻嚴二者並重闕一不可也臣現
飭兩江總糧臺籌撥餉精軍火接濟衢防兵勇並派員於玉山
設立轉運局飭令李定太統領衢防堅守三月以待援兵至進
攻嚴州則專賴左宗棠一軍必先掃清歙縣婺源之零股攻克
開化遂安之堅城乃能達於嚴郡目前兵力尙單難遽深入而
賊燄方盛亦斷不容我深入計今歲春間必在開遂歙婺一帶
戰爭不休須俟廣西臬司蔣益澧一軍到衢後衢嚴兩路分途
并進庶幾站腳漸穩取勢漸緊臣與左宗棠往返熟商所以規
復浙江者在此所以保全江西皖南者亦在此愚慮所及舍此
別無謀浙之方惟當竭誠合謀斷不敢稍存畛域至於節制四

省之名仍懇

聖恩收回

成命

臣

非因浙事既已決裂預存諉過之意倘左宗棠辦理毫

無成效

臣

當分任其咎所以不願節制四省再三瀆陳者實因

大亂未平用兵至十餘省之多諸道出師將帥聯翩臣一人權

位太重恐開斯世爭權競勢之風兼防他日外重內輕之漸機

括甚微關係甚大區區愚忱仰祈

聖明鑒納無任惶悚懇切之至所有欽奉

恩諭再陳下情緣由謹專摺由驛具陳伏乞

聖鑒訓示謹

奏

遵保水師總兵摺

同治元年正月初十日

奏爲遵

旨保舉水師總兵仰祈

聖鑒事竊

臣

於上年五月間准兵部咨咸豐十一年四月十三

日內閣奉

上諭現在記名水師總兵人員將次用竣著兩江閩浙兩廣總督於水師副將內遴選堪勝水師總兵者各保二三員迅速送部引見候旨記名以備簡用不得以無員可保一奏塞責其水師參將游擊各員如有材藝出眾可備器使者並著核實保奏毋拘資格欽此轉行到

臣

遵於所部水師各營將領中詳加察

看未敢冒濫具奏恐負

朝廷慎簡將材之至意茲查得現保提督銜以總兵儘先題奏之李朝斌總兵銜儘先選用副將喻俊明任星元記名總兵丁泗濱該四員或由行伍或由勇目皆自臣設立水師卽隸部下身經百戰歷保今職現均管帶水師一營防勦蕪湖魯港及東西梁山一帶賊匪臣細察該員等在營多年膽識俱優勇敢沈著實堪勝總兵之任合無仰懇

聖恩俯准挨次簡放總兵以勵戎行目下防勦喫緊實難循照常例送部引

見俟蒙

俞允簡用後再由臣隨時酌量辦理所有保舉水師總兵緣由
謹繕摺由驛馳陳伏乞
皇上聖鑒訓示施行謹
奏

藝文類聚卷十五

并

請優卹羅遵殿王有齡片

同治元年正月初十日

再上年二月間浙江省城被陷前撫臣羅遵殿殉難經杭州將

軍瑞昌奏奉

上諭羅遵殿官聲素好到浙後頗能實心任事著照巡撫例從

優賜卹等因欽此維時臣駐軍宿松適羅遵殿之子候選員外

郎羅忠祐扶柩回籍赴臣處呈稱杭州破後羅遵殿之妻徐氏

孀女陳羅氏族孀姪婦周氏及雇婦金梅氏家丁顧斌均同時

殉節經臣會同前湖北撫臣胡林翼於五月初三日據情奏懇

旌卹奉

硃批已有旨欽此旋閱邸鈔御史高延祐奏參奉

旨將羅遵殿卹典撤銷臣查浙省向來供給甯國一軍恃以堵禦門戶故省城久不設備羅遵殿到任未及三月方思整軍選將自固邊防乃大股賊卽由甯國界內竄入其咎似難獨歸於該撫及至城破身殉妻女眷屬相率就義實堪矜憫軍興以來凡疆吏守城殉節皆得仰邀

卹典卽浙省殉難紳民亦先後查明議卹獨羅遵殿孤忠盡瘁未荷褒崇臣竊惜之該撫由進士知縣外任二十餘年歷著循

績臣駐紮宿松曾赴弔羅遵殿之家見其家無長物環堵蕭然家屬衣食不甚充裕旣歎其清操之過人復欽其臨難之不苟粵匪蹂躪各省有守土之責者才略有短長戰守有利鈍但能

以死報國卽已克盡人臣之道不必更爲苛刻之論高延祐一時憤激持論殊欠公允伏懇

皇上查照

先皇帝初次諭旨仍飭將羅遵殿從優賜卹並將隨同殉難之妻女姪婦及雇婦家丁一併旌卹以彰忠節庶幾是非不淆紀綱常振至此次浙省再陷臣處探聞瑞昌王有齡均已殉難與薛煥咨報相同瑞昌忠勲最著自必仰蒙

恩卹惟王有齡迭被參劾臣於上月二十五日覆奏摺內聲明該撫辦理杭城防務尙費苦心茲以糧盡援絕見危授命臣斷不敢以一眚掩其忠節該撫平昔苛派捐餉嚴劾紳士杭州之

人感其死守紹興之人恨其暴斂難保無身後之訾議應請

聖主憫念時艱表揚忠烈並將王有齡

俯賜優卹爲封疆大臣以死勤事者勸

臣愚昧之見是否有當

伏乞

聖鑒訓示施行謹附片具

奏

近日各路軍情片

同治元年正月初十日

再近日各路軍情僞輔王楊七麻子攻圍徽州環逼月餘斷我
餉道張運桂老湘營一軍堅守於內朱品隆唐義訓二軍援剿
於外臘月初八至二十六日六次大戰屢破屯溪岩市等處賊
壘至除夕止運道已通徽郡解圍又另股賊從徽南馬金嶺而
來冀截官軍援郡之路亦經左宗棠擊退目下徽州全府肅清
如常左宗棠一軍因援剿徽州移駐婺源分紮白沙龍灣等處
鮑超一軍進攻甯國因羣賊麇聚青陽城內不克遽破又朱品
隆回救徽州不克會剿嶺外是以中隔兩城不能速抵甯國曾
國荃一軍現在分守七處應俟新軍募到再行進攻和州巢縣

一帶李鴻章一軍現在趕緊募練應俟二月齊集再行駛赴鎮
江上海一帶除浙江軍情另摺具奏徽州戰狀容日續奏外所
有各路軍事頭緒繁多理合附片略陳梗概伏乞

皇上聖鑒謹

奏

參翁同書片

同治元年正月初十日

再前任安徽巡撫翁同書咸豐八年七月間梁園之挫退守定遠維時接任未久尙可推諉乃駐定一載至九年六月定遠城陷文武官紳殉難甚眾該撫獨棄城遠遁逃往壽州勢窮力絀復倚苗沛霖爲聲援屢疏保薦養癰貽患紳民忿憾遂有孫家泰與苗練仇殺之事逮苗逆圍壽則殺徐立壯孫家泰蒙時中以媚苗而並未解圍壽城既破則合博崇武慶瑞尹善廷以通苗而藉此脫身苗沛霖攻陷城池殺戮甚慘蠶食日廣翁同書不能殉節反具疏力保苗逆之非叛團練之有罪始則奏稱苗練入城並未殺害平民繼則奏稱壽州官紳被害及婦女殉節

者不可勝計請飭彭玉麟查明旌卹已屬自相矛盾至其上年正月奏稱苗沛霖之必應誅剿一摺三片膾炙人口有身爲封疆大吏當爲

朝廷存體制兼爲萬古留綱常今日不爲忠言畢生所學何事等語又云誓爲

國家守此疆域保此殘黎儼然剛正不屈字挾風霜逮九月壽州城破翁同書具奏一摺二片則力表苗沛霖之忠義視正月一疏不特大相矛盾亦且判若天淵顛倒是非熒惑

聖聽敗壞綱紀莫此爲甚若翁同書自謂已卸撫篆不應守城則當早自引去不當處嫌疑之地爲一城之主又不當多殺圍

練以張叛苗之威若翁同書既奉

諭旨責令守城則當與民効死不當濡忍不決又不當受挾制而草奏獨宛轉而偷生事定之後翁同書寄臣三函全無引咎之辭廉恥喪盡恬不爲怪軍興以來督撫失守逃遁者皆獲重譴翁同書於定遠壽州兩次失守又釀成苗逆之禍豈宜逍遙法外應請

旨卽將翁同書革職拏問

敕下王大臣九卿會同刑部議罪以肅軍紀而昭炯戒臣職分所在例應糾參不敢因翁同書之門第鼎盛瞻顧遷就是否有當伏乞

皇上聖鑒訓示謹附片具

奏

謝協辦大學士 恩摺

同治元年正月二十二日

奏爲恭謝

天恩仰祈

聖鑒事竊

臣接准兵部火票遞到同治元年正月初一日內閣

奉

上諭曾國藩著以兩江總督協辦大學士欽此聞

命祇懼感激莫名當卽恭設香案望

闕叩頭謝

恩訖伏念

臣

材識凡庸謬膺重寄從軍數載功寡過多前歲擢

任兩江至今無一將一兵達於蘇境下不克慰萬姓雲霓之望

上不克分

九重宵旰之憂雖寬政之倖邀實悚惶而無地迺於

聖皇御極之初元歲履端之吉

特頒丹詔協贊

黃扉仍領兼圻並司九伐自顧何人膺茲

殊寵竊以大亂未平金陵未復正

國家宏濟艱難之候豈臣子濫邀異數之時臣惟有殫竭愚忱

周咨忠益常枕戈而待旦期作楫而濟川庶以仰答

高厚鴻恩於萬一所有微臣感激下忱理合恭摺叩謝

天恩伏乞

皇上聖鑒謹
奏

金陵未克以前請不再

加恩臣家片

同治元年正月二十一日

再密陳者現在金陵未復寇勢方張軍事反覆無常正恐利時少而鈍時多臣忝膺重任日夜憂惶除浙江已陷苗練已叛難遽補救外卽上而皖南江西下而鎮江上海亦俱有岌岌可危之勢臣分內之事尙未知成敗何若乃自去秋以來疊荷

鴻恩

臣既蒙

賞加太子少保銜又蒙

飭諭節制四省茲又拜協辦之

命

臣弟國荃既蒙

賞穿黃馬褂又蒙

賞頭品頂戴茲又拜浙江按察使之

命一門之內數月之間

異數殊恩有加無已感激之餘繼以悚懼誠恐軍事一旦疏失

卽加倍譴責猶有餘咎臣本擬恭疏辭謝以除授參政大典料

難收回

成命又以甫經兩次辭節制四省之權不敢更疏瀆辭近於矯

情而鈞譽惴惴旁皇不知所措理合據實陳明懇求

皇上念軍事之靡定鑒愚臣之苦衷金陵未克以前不再

加恩於臣家是卽所以保全微臣之功名而永戴

聖主之恩眷矣又前此疊奉

諭旨飭

臣

保薦江蘇安徽巡撫頃復蒙

垂詢閩省督撫飭

臣

保舉大員開列請

簡封疆將帥乃

朝廷舉措之大權如

臣

愚陋

豈敢干預嗣後

臣

如有所知堪膺

疆寄者隨時恭疏入告仰副

聖主旁求之意但泛論人才以備採擇則可指明某缺徑請遷

除則不可不特

臣

一人爲然凡爲督撫者皆不宜指缺保薦督

撫蓋四方多故疆

臣

既有征伐之權不當更分黜陟之柄在

聖主虛衷訪問但求投艱而遺大不惜舍己而從人惟風氣一

開流弊甚長辨之不可不早宜預防外重內輕之漸兼以杜植

私樹黨之端其督撫有任可履者不准遷延不到亦不准他處
奏畱庶幾紀綱彌肅

朝廷愈尊是否有當謹一併密陳伏乞

皇上聖鑒謹

奏

議覆借洋兵剿賊片

同治元年正月二十二日

再臣欽奉

寄諭洋人之在滬者恐不足恃其與我和好究竟惟利是圖一
有事機喫緊之時往往坐觀成敗若欲少藉其力必至要結多
方有情理所斷不能從之處昨因辭煥有據蘇省紳民呈稟請
借洋人剿賊之奏當經從權諭令該撫熟計以期無拂輿情諒
該大臣早能洞悉洋人既不足恃仍須該大臣酌派名將勁兵
前往方可萬全無患等因欽此臣於上年臘月初四日接蘇州
紳士潘曾瑋等信函商借洋兵之事臣比復函言甯波上海皆
係通商馬頭洋人與我同其利害自當共爭而共守之蘇常金

奏稿卷一

七

陵本非通商子口借兵助剿不勝爲笑勝則後患不測目前權宜之計祇宜借守滬城切勿遽務遠略謂金陵蘇常可以倖襲非徒無益而又有害既已借兵守滬則當坦然以至誠相與虛心相待不可稍涉猜疑等語
臣復該紳並咨明撫
臣薛煥在案頃於正月十八日又接潘曾瑋等函牘業已設立公局會同英法二國防守上海惟又稱洋兵調齊之後勢難中止不僅助守上海並將助蘇州等語
臣之愚見借洋兵以助守上海共保華洋之人財則可借洋兵以助蘇州代復中國之疆土則不可如洋人因調船已齊兵費太鉅勢難中止情願自剿蘇州等處我中國當以情理阻之婉言謝之若該洋人不聽禁阻亦須

先與訂定中國用兵自有次第目前無會勦蘇州之師卽克復後亦難遽撥駐守之師事成則中國不必感其德不成則中國亦不分其咎英法二國素重信義一一先與說明或不因見德於我而反致生怨是否有當伏乞

聖鑒訓示除_臣處守滬之兵俟李鴻章到鎮陳士杰到皖另行續奏外理合附片具陳謹

奏

徽州解圍摺

同治元年正月二十二日

奏爲徽州被圍月餘我軍內外夾擊疊獲大捷立解城圍恭摺
縷陳仰祈

聖鑒事竊僞輔王楊輔清率眾圍徽業於上年十二月十八日
具奏厥後破賊解圍又於本年正月初十日附片略陳並聲明
容日續奏戰狀在案先是該逆大股於徽城南北修築營壘意
在挑戰張運桂督老湘營堅守以靜制動十二月初八日密商
各旗先擊南門賊營斃賊甚多又分出西北門誘賊過河我勇
佯退俟羣賊追近齊出大隊分三路進猛戰半時斬擒三四百
名鎗傷千餘名初十日賊眾圍撲城外一二三旗營牆我軍埋

伏夾擊轟斃四五百名是夜復選奮勇縋城燒賊踞房傷賊無數擒殺三十餘名十六日城內外各營同時出攻北門賊壘該逆憑牆死守我軍奮勇齊進一壘既破各壘慌亂連燬賊營五座屍橫枕藉無一得脫南路援賊蜂擁而來彼此猛撲一二十次斃悍賊四五百名生擒百餘其擊敗之賊分股東趨又與嚴州大股併竄屯溪及岩市街潛口一帶以阻徽軍糧路自初八至二十六日運道阻塞文報亦或通或梗張運桂以圍困日緊時時出城攻打以接外援之氣掘濠灌水以防地道之謀雪夜滅燈露立垛口以防扒城暗襲之計二十日復令一二三旗傍城直上四五旗沿河包抄六七八旗及左右營當中布陣餘皆

畱守城圍我勇齊抵賊壘施放火器賊紛紛棄營而遁斃傷約二百名此徽州城內張運桂一軍戰守之情形也朱品隆一軍前經奏明出攻石康與鮑超會剿甯國自聞徽州之警臣調令回軍入援初八日進嶺十三日馳至休甯與署總兵唐義訓商援徽之法以疏通糧路爲急議定先剿屯溪次剿潛口岩市之賊十七日兩軍齊赴屯溪朱品隆自左路進唐義訓自右路進先破街口一卡旋攻毀河邊四壘斬馘約五百人追賊溺斃者尤多賊已退遁是夜復回踞該處十九日朱品隆督隊將石橋潛口賊巢節節掃盪擒斬無算二十二日辰刻岩市大股直撲萬安街是時官軍方派三營護糧赴徽賊占萬安街則歸路已

斷朱品隆立派六成隊分路出擊該逆先由左路抄入朱聲隆迎敵破之山後之賊又換隊衝出敗賊回旗並進朱品隆督飭各營拚命力堵幾不能支適解米各營均回助戰賊始卻止唐義訓亦派隊援助逐賊東去殺斃約三百名此朱品隆唐義訓兩軍援徽力戰之情形也張運桂以岩市街被賊堅踞糧路不通必須合力勦退乃可固軍心而保要郡密飭總兵黃萬友率左營及六七八旗出隊間道馳赴休甯會商朱唐兩鎮兜勦岩市之賊二十四日辰刻抵休連日風雨不息二十五夜少霽張運桂料詰朝必有大戰遂派隊往潛口迎護糧藥並遙爲策應二十六日黃萬友唐義訓由潛口左路進朱品隆由中路進岩

市之賊分路來撲約二萬餘排列五六層分布三四里朱品隆先從街口接仗破堅卡而入唐義訓黃萬友乘勝從街前後包抄連燬賊壘十餘座斬馘三千餘人奪獲旗幟印憑騾馬糧米無數楊逆受傷逃出餘匪退向篁墩追殺數里天晚收隊二十七日以後大雪三晝夜平地深四五尺道路阻絕人馬難行該逆經此重創無糧可擄遂於除夕冒雪向遂安淳安退去徽城各門之賊亦於二十九三十日全行遁去郡城解圍此徽休各軍會勦岩市立解重圍之情形也伏查僞輔王率五六萬悍眾分布徽郡岩市屯溪各處又另股由績溪嚴州繼進欲乘浙省全勝之勢攻陷徽郡由皖入江計甚狡毒仰荷

皇上威福將士用命內守外援連戰皆捷二十六日諸軍會勦尤能大挫兇鋒左宗棠一軍亦於二十六日在婺浙交界之大鱗嶺酣戰獲捷遂使各路悍賊負創遠遁徽圍立解全境肅清實於大局有裨各營於風雪嚴寒之際奮力苦戰著有微勞總兵張運桂係臬司張運蘭之胞弟因其兄抱病離營代統其眾調度得宜應請

賞加勇號衢州鎮總兵朱品隆請

賞加提督銜署皖南鎮總兵唐義訓請交部從優議敘提督銜記名總兵劉松山記名總兵朱紹輝劉光明均請交部從優議敘記名總兵黃萬友易開俊均請

賞加提督銜總兵銜副將葉明瑞賀國秀均請以總兵記名
簡放副將銜參將張添習請以副將儘先選用總兵銜江西推
補副將沈寶成請以總兵記名

簡放記名總兵胡暉堂請

賞加勇號游擊朱步青請以參將畱於安徽儘先補用其餘出
力員弁可否容臣查明擇尤請獎張運桂所部將弁陣亡四十
四員朱品隆所部將弁陣亡二員另行開單請

旨飭部議卹所有徽州各軍獲勝解圍各緣由專摺由驛具陳
伏乞

皇上聖鑒訓示謹

奏

奏
利
名
一
三

三
三

籌辦江浙軍務摺

同治元年正月二十二日

奏爲遵奉疊次

諭旨籌辦江浙軍務恭摺分晰覆陳仰祈

聖鑒事竊咸豐十一年十二月十七日奉

上諭有人奏蘇常淪陷逾年請亟圖克復等語原摺所稱左宗棠抵浙得勝後移兵由嘉興進攻另派一得力之將由太湖進攻加以辭煥由上海進攻爲三路之兵是否可以照行之處著迅速妥籌辦理等因欽此又同治元年正月初九日承准咸豐十一年十二月二十五日

寄諭浙江省城失守左宗棠已授浙江巡撫刻下計已抵浙著

卽會合閩師分道進攻毋令該逆久踞曾國藩飭令鮑超進攻甯國以便進規浙省爲左宗棠後路聲援此時賊中悍匪麇聚杭城蘇常守禦必懈若能分兵直搗蘇常便可由嘉湖以扼杭城之背使該逆應接不暇未始非出奇制勝之策著曾國藩體煥酌度情形妥籌辦理等因欽此臣查杭州未失之先左宗棠由徽境進援中間節節爲賊所阻尙未能速達杭州更何能繞進蘇常至杭州旣失以後左宗棠於十二月杪戰勝於徽浙交界之大鱗嶺甫解徽郡之圍擬由徽郡進攻嚴州以扼杭省之吭上以作衢州之蔽目前謀浙之道舍此別無長策惟行軍自有次第必須攻克開化遂安等城乃有赴嚴之路必須畱守婺

源華埠等處乃無抄後之虞臣於本月初十日奏明須俟蔣益
澧一軍到衢分途進攻非過於持重故事遷延也實因賊數太
多佔地太廣動輒以長圍困我若非左宗棠直擣嚴州恐衢州
終困於長圍之中若無蔣益澧續進常玉恐左宗棠亦將困於
長圍之中反覆籌算不得不審慎而出於此至鮑超一軍與賊
搏戰於青陽城下不能遽克即使克復青陽而尚有石埭涇縣
等城爲賊所踞未能遽抵甯國又安能進援杭湖以臣所聞蘇
常之賊守禦並未少懈似尙無機可乘縱有可圖之機而左鮑
兩軍隔蘇常各八九百里必經過江南十數縣有賊之地前有
堅城後無糧路將軍心之立潰實寸步而難行臣之愚見必俟

左宗棠圍攻嚴州鮑超進抵甯國浙事乃有下手之處此籌辦
浙江軍務之大略也又正月初四日承准十二月十七日

寄諭鎮江逆匪麇聚勢甚危急都興阿雖經派兵赴援一時未
能擊退昨據曾國藩奏稱擬派道員李鴻章統帶水軍並陸軍
六七千名馳赴鎮江已諭令照擬辦理著官文曾國藩迅速會
商如有可籌撥兵勇卽派妥員統帶交都興阿嚴密布置等因

欽此又正月初八日承准十二月二十一日

寄諭翁心存奏力保通泰克復蘇常請飭派一素能辦賊之員
馳赴通泰由江陰常熟進擣蘇常宋晉則請飭都興阿選派勁
旅由常熟丹陽等處分道進攻並先期約會薛煥派員激勵義

團隨同勦賊其單開各條尤爲周密卽著曾國藩都興阿辟煥
按照所奏各情悉心會商曾國藩能否派員前往都興阿辟煥
應如何會合進兵均著迅速籌辦以慰民望以紓朕南顧之憂
至用人爲當務之急翁心存等所稱知府周沐潤知縣劉郁膏
趙秉鎔博士趙宗建等其才是否足資任用並著曾國藩等確
實查明量材差遣等因欽此又正月初九日承准十二月二十
六日

寄諭都興阿奏進攻天長獲勝並江甯逆援渡江一摺都興阿
所部水陸兵勇本不甚厚揚城實江北要區曾國藩自當通籌
兼顧聯絡聲勢前諭令將江南北等處餉需通籌協濟並諭兩

淮鹽務派員整頓諒已設法經理若得此巨款不必專仰給湖北江西餉項自可裁汰疲弱添募新勇撥給都興阿統帶以固揚防門戶至上海關稅每歲可得數百萬兩尤爲餉源所自出該大臣前奏派兵數千人駐守殊未籌及進攻之策昨因諭曾國荃統帶老勇八千名赴滬以爲力保該大臣餉源起見且可進規蘇常現江浙徧地賊氛江南只有鎮江一隅爲進兵適中之地該大臣前奏李鴻章水陸各軍著迅速調撥布置起程抵鎮後卽飛速馳奏遲則此著又恐落後該大臣身任統帥事非越俎亦無旁貸不必稍避嫌怨總期於事有濟江浙等處軍務朕惟曾國藩是賴所有一切布置情形卽著迅速覆奏等因欽

此又承准正月初七日

寄諭現在賊勢趨重鎮江而金陵蘇常各匪復圖竄擾江北李鴻章所統水陸各軍六七千人如能早行趕到不獨鎮城可資保衛亦可壯江北聲勢著曾國藩催令該員迅卽起程無稍遲緩等因欽此

臣查翁心存所奏請
臣派員馳赴通泰乘虛由江陰常熟進搗蘇常如或不能則力保裏下河數百里沃壤遏賊北趨宋晉所奏請都興阿派兵由靖江泰興分進江陰常州各條均屬詳慎周妥惟都興阿一軍須先肅清江北俾後路無牽制之虞現聞天長六合均經克復江北僅浦口江浦兩城如卽乘勢攻克上可通曾國荃無爲運漕各軍之氣下可聯袁甲三

臨淮滁州各軍之援則江北片段旣成根基旣固然後會合上
下游分路規取南岸方不致凌躐無序自古江南用兵以鎮江
爲險要目前局勢鎮江尤屬必爭之地若圖金陵則俟鮑超一
軍攻克甯國後由東壩溧陽進而鎮江卽出兵會之若圖蘇常
則俟揚州一軍肅清江北後由靖江泰興進而鎮江亦出兵會
之是以臣前奏李鴻章統帶水陸下駐鎮江原爲將來進取地
步惟鎮江現有馮子材黃彬等軍如果扼守得力不須添換李
鴻章或移駐通泰或駛往上海應俟該員抵鎮後察看情形再
行具奏其兩淮鹽務亦可就近與喬松年設法整頓但江運未
通未必卽有鉅款可指現催令該員趕緊募練淮勇並酌撥湘

軍數營如有火輪夾板船可雇卽由水路前進否則陸師緣北
岸前進二月杪當可成行曾國荃新募到擬進攻巢縣和州
一路通下游鎮揚各軍之氣仍固上游無巢一面之防未便遠
赴上海顧彼失此至上海餉源所出關係亦重臣已另片陳明
聯絡洋人協力守禦或派陳士杰一軍赴滬應俟陳士杰到皖
李鴻章到鎮以後續行具奏至松滬現有兵勇疲弱頗多應酌
加裁汰以節糜費而收實效上海縣知縣劉卹膏深得民心常
州府知府周沐潤才略頗優並知縣趙秉鎔紳士趙宗建等均
在下游應交李鴻章察看任用此籌辦江蘇軍務之大略也臣
才識素拙仰蒙

聖主信任之專所不敢稍避嫌怨亦不敢坐失機宜惟江浙賊勢浩大盡占富庶之要區廣收官軍之降卒財力五倍人數十倍若非慎以圖之不特蘇浙難克卽皖南江西且有疆土日蹙之虞過求速效以至僨事轉非所以仰慰慈厪所有遵

旨籌辦江浙軍務緣由專摺由驛覆陳伏祈

皇上聖鑒訓示謹

奏

鮑超軍在青陽大捷片

同治元年正月二十二日

再鮑超一軍十二月初進紮青陽城下初七日該逆乘夜撲營經我軍轟退並伏兵追殺獲勝初九日該逆分四路來撲各營分路迎擊斃賊數百詎石埭太平大股賊援齊至築壘十餘座與城賊相犄角十一日鮑超率馬步由東北門進剿逆眾列隊迎拒鏖戰兩時賊大敗倚壘開放鎗礮各營奮勇前進穿過逆壘橫衝賊隊爲數段賊敗而走我軍四面兜剿當將東北門賊壘全行剗平一股入城死守一股往石埭大路逃去鮑超督軍追殺十五里擒斬二千餘名總兵張玉田副將唐仁廉力戰受傷二十一日城外復添賊壘二座二十二日鮑超督軍燬平之

惟青陽爲甯國最要門戶該逆屢次敗衄仍欲併力苦守此城以梗我師攻甯之路除飭鮑超設法攻取外所有陣亡之守備唐泗和韓玉庭千總余三友把總黃明漢鄭崇友杜得勝周光元璩大勝曾有貴外委王爲美鄧必勝等十一員應請飭部照例議卹附片具陳伏乞

聖鑒訓示謹
奏

遵

旨通籌全局摺

同治元年二月初二日

奏爲遵奉

諭旨通

籌全局恭摺覆陳仰祈

聖鑒事

同治元年正月二十四日承准議政王軍機大臣字寄

正月十三日奉

上諭曾國藩左宗棠李續宜等均負時望卓著戰功屢經先後
簡任督撫畀以重任曾國藩節制四省左宗棠雖簡任浙撫並
諭以不必爲地方職守牽制復因皖事孔亟不得已以李續宜
移調皖撫原冀合力通籌力挽東南大局現在江浙賊氛恣肆
亟應設法進兵早圖恢復拯生民於水火前經曾國藩等奏稱

克復漕鎮無爲方冀東征之師可以直下江南乃自去冬以來該督撫等奏報甚稀幾於月僅一至而浙省嚴州紹興甯波杭州等府縣各城迭次報陷蘇省松江上海吳淞口等處警報頻來皖北則苗練與髮逆交乘圍潁甚急賊氛到處蔓延日甚一日朕以冲齡嗣位荷蒙兩宮

皇太后孜孜求治舉賢任能焦勞宵旰日與議政王軍機大臣籌商軍務每於該大臣等奏報到時詳加披覽一切規畫輒深嘉許言聽計從想該大臣等勝算老謀於大局必早有布置惟賊氛日熾而該大臣等章奏寥寥南服睽懷殊深慮念現在曾國荃募勇是否到營李鴻章帶兵是否到鎮鮑超進規甯國能

否得手多隆阿蔣凝學等軍曾否分攻廬壽楊載福何時可以
銷假回營與彭玉麟併圖東下兵貴神速東南之民待救孔急
而軍情變幻靡常總宜趕緊辦理其如何通籌全局緩急兼權
均著將一切機宜隨時馳奏以紓懸系潁郡關北路之防湖州
府海甯州前據該大臣奏稱尙能堅守上海爲餉源所自出吳
淞口守禦尤要曾國藩左宗棠李續宜等如何布置籌畫萬全
之處均著隨時分別迅速馳奏毋再稽延實深殷盼將此由六
百里加緊各諭令知之欽此跪讀之下悚惕實深

諭旨垂詢各條臣於正月初二十二兩次奏報亦已粗陳梗
概惟以

聖主信任之專兩宮

皇太后望治之切而

臣

等章奏寥寥幾於月僅一至疎遲之罪

夫復何辭

臣

忝列戎行歷年以來奏報甚稀其所以硜硜自守

者蓋亦有故一則不輕奏謠傳之言如近日賈臻奏廬州克復

袁甲三奏巢縣克復皆因無稽之探報以爲入告之實據又或

賊蹤未近預相震驚輒以十萬二十萬具奏尤足以惑軍心而

誤大計

臣

處向不憑探報入奏不欲以謠傳之詞淆

朝廷之耳目也一則不輕奏未定之事凡大股悍賊之來其始

常危險萬狀能堅忍支持而後能漸臻安穩如去歲黃文金之

內犯攻陷七縣堅持三月而

臣

僅彙作四次入奏去冬徽州之

被圍苦戰九次堅守彌月而臣僅彙作兩次入奏不欲以未定之狀增

朝廷之憂慮也一則不輕奏預計之說兵事成敗難以逆料咸豐八九年間江南屢奏金陵指日可克十年夏間浙江屢奏嘉興指日可克厥後皆不能踐言臣初督兩江之時奏稱由甯國進兵可達蘇境厥後甯國失守至今不能踐言臣深以爲恥至近日內臣章奏蒙鈔示臣處者或稱援浙之師可由嘉興直搗蘇州或稱揚州之師可由常熟進攻蘇州皆不量兵餉兩窮之苦而預擬萬不可成之計臣不欲以預計之說入奏非特慮大言之難踐亦恐紛亂

朝廷之規畫也因此三者每存敬慎之懷轉蹈遲延之咎前此文宗顯皇帝御宇分任其責於封疆將帥臣猶得以碌碌隨諸帥之後循愚拙之常茲值

聖皇踐阼之初

微臣

尤忝非常之遇倚任彌重

延訪更殷欽奉

諄諭自當變更前轍隨時飛章入告嗣後擬十日奏事一次有急則加班具奏所有此次

諭旨垂詢之件及正月厯奉

寄諭垂詢諸事謹分條一一詳對於後

一曾國荃新募之勇據報正月二十前可以招齊二十四日自

湘起程由水路東來二月底可抵安慶俟到安慶後卽令其進
攻巢縣和州含山等處能破此三城則與下游六合揚州聯爲
一片毫無阻隔矣楊載福本應於臘月銷假回營因辰沅賊警
逼近本地官紳請楊載福代守乾州廳城因此羈延至今尙無
起程確信臣已三次飛催囑其於二月回營張運蘭前因病離
營因徽州被圍催令力疾就道卽日將抵安慶可回徽營矣
一李鴻章一軍於臘底正初招募淮勇五營另撥湘勇數營趕
緊訓練二月可以成軍本擬由水路駛赴鎮江因民船不能直
衝賊中洋船又不肯雇載兵勇不得已仍須從陸路行走由巢
縣和含賊中經過前有堅城後無糧路亦極可危之道應俟曾

國荃一面圍攻巢含李鴻章一面傍城衝過衝至和州以下則出六合江浦以達於鎮江毫無梗阻矣

一去年攻克無爲運漕東關等處本可乘勝直搗巢縣梁山進

圖金陵近日袁甲三一軍攻克天長六合江浦浦口尤有直薄

金陵之機方今東南糜爛臣等孰不思直攻老巢擒渠掃穴惟

用兵之道可進而不可退算成必兼算敗與其急進金陵師老

無功而復退何如先清後路腳根已穩而後進所有進兵金陵

之次第以臣愚計之多隆阿一軍應俟攻克廬州而後可進曾

國荃一軍應俟攻克巢縣含山和州西梁山而後可進袁甲三

李世忠一軍應俟會克廬州守定六合而後可進都興阿一軍

應俟守定揚州浦口而後可進彭玉麟楊載福之水軍應俟攻克裕溪口西梁山而後可進欲拔本根先剪枝葉仍須計算各路游擊之師數倍於金陵圍城之師庶幾無撤回之虞擬卽以

臣議商之袁甲三都興阿等是否有當恭候

訓示遵行

一潁州圍城之賊聞係捻匪與苗黨勾結志在必得潁郡與壽州霍邱爲犄角之勢李續宜業經奏派成大吉蕭慶衍兩軍赴潁救援據報於正月二十六日自霍山起程惟繞道固始計程四百七十里途次無米可買恐到潁不能迅速但求潁城堅守月餘勝保救之於北成大吉等援之於南必可立解重圍李續

宜所部之兵畱三支駐守湖北分防襄陽德安麻城等處以兩支赴援潁州以一支防守六安此外親兵帶來安慶者亦無幾矣

一謀浙之道保廣信之糧路以守衢州保徽州之後路以攻嚴州舍此二者別無良策臣已兩次具奏在案目下左宗棠駐紮開化境內正月十七日在篁岸獲勝仗一次二十日在馬金嶺等處獲大捷一次卽日進攻遂安等縣係從衢嚴之間下手惟徽州歙績二縣羣賊又復麇聚我方圖入浙境賊乃圖犯江皖春夏間必戰爭不休也湖州海甯久無信息鮑超圍攻青陽未下不能遽及甯國之境又豈能遙通湖州之信昨奉

寄諭垂念趙景賢飭赴福建糧道之任

朝廷愛才之心薄海臣民間之生感特無如音問難通徒深憂灼

一江蘇軍務自寶山奉賢南匯川沙失守後上海已岌岌可危至今月餘歸然幸存蓋髮逆畏忌西洋不敢驟樹大敵而目下情勢舍借助洋兵亦實別無良策臣於二十二日曾經附片具奏上海僻處東隅論籌餉爲要區論用兵則爲絕地假使無洋人相助髮匪以長圍裹我官兵若少而弱則轉瞬又成坐困之勢若多而強則不宜置此無用之地再四思維不得所以保全之法擬仍借洋人之力開誠布公與敦和好共保人財將來果

派何軍協同防守之處應俟李鴻章到鎮陳士杰到皖再行察看奏明辦理

以上各條均係近日

諭旨下問之件有業經具奏者有未及詳陳者理合一併臚舉仰慰

慈廑伏乞

皇上聖鑒訓示謹

奏

謝弟國荃補浙臬

恩摺

同治元年二月初十日

奏爲恭謝

天恩仰祈

聖鑒事竊

臣

接准湖廣督

臣

咨開咸豐十一年十月二十一日

內閣奉

上諭官文曾國藩奏水陸各軍克復無爲州城並乘勝攻克運
漕河賊壘勦辦甚屬出力布政使銜記名按察使曾國荃著賞
給頭品頂戴等因欽此又接准兵部火票遞到同治元年正月
初四日內閣奉

上諭浙江按察

使著曾國荃補授卽赴新任毋庸來京請訓欽

此其時

臣弟國

荃募勇在籍

臣

於營次恭設香案望

闕叩頭謝

恩訖伏念

臣

弟國荃管帶楚師隨同勦賊疊邀

懋賞洊擢監司

上年克復無爲州城奪回運漕各隘仰託

聖主之威正席全盛之勢事半功倍豈敢言勞迺褒錄於

九重遽躋榮於極品茲復渥荷

溫綸真除臬使凡此非常之

寵遇實非夢想所敢期

臣

弟國荃募齊新勇六千已於正月二

十三日馳赴長沙買舟東下計日可抵安慶

臣

惟有督率臣弟

申明軍律整肅官方執枹鼓以誓師叶填箴而敵愾响响原隰

願復

國家土宇之常世世子孫永報

高厚生成之德所有微臣感激下忱專差恭摺叩謝

天恩伏乞

皇上聖鑒謹

奏

卷之三
三

Blank manuscript page with vertical lines.

遵議安徽省城仍建在安慶摺

同治元年二月十二日

奏爲遵

旨籌議恭摺覆陳仰祈

聖鑒事竊

臣

承准議政王軍機大臣字寄咸豐十一年十二月

初四日奉

上諭有人奏咸豐三年賊陷安慶並未據守自周天爵等奏請
改建省會於廬州賊窺安慶無備始圖占踞遂致全皖糜爛查
安慶古稱重鎮若省會改於廬州非惟於皖南鞭長莫及亦距
江較遠無從設防今幸安慶克復應將安徽省城仍建該府並
宜添設提督統轄水陸各營其江西九江鎮卽就近歸新設安

徽提督節制查福建廣東兩省均設有水陸提督現在江防較海防喫緊可否於該二省內裁併一缺移設安慶則兵餉均無須另籌等語賊匪據有長江之險以致江皖糜爛現在安慶克復亟應整頓江防所稱安徽省城仍應建於安慶巡撫藩臬如前駐紮並設立提督統轄水陸官兵九江鎮併歸節制則聲勢聯絡江防更爲周密均不爲無見卽著曾國藩彭玉麟毓科就現在地方軍務情形悉心籌畫會同妥議具奏至所請於福建等省裁缺以資移設之處應俟該大臣等覆奏到日再降諭旨等因欽此仰見

皇上睠懷南服慎重江防之至意臣查安徽一省跨乎大江江

以北四府四州江以南四府一州安慶府城處濱江適中之地
實爲形勢所必爭咸豐三年安慶城陷江面悉爲賊有千艘往
來飄忽莫測官軍無一舟一筏可以應敵周天爵等請以省城
改建廬州係屬一時權宜舍此亦別無自全之策是年臘月廬
州復陷官軍屯於郡北定遠一帶於是合肥以南之州縣盡淪
於賊而皖南中隔大江賊氛徧布文告梗阻巡撫不復能過而
問焉咸豐四年

諭旨令徽甯等屬暫歸浙江巡撫兼轄廷臣因上疏請仿前明
南贛鄖陽之例設立皖南巡撫
文宗皇帝飭吏部核議不設巡撫而稍重皖南道之權令其仿

照臺灣道例專摺奏事另添皖南總兵一員數載以來皖南道
一缺例由兩江督臣保薦皖南之錢糧刑名不隸藩臬奏報不
歸巡撫儼若另爲一省而皖北撫藩等官散處於潁壽臨淮泗
州等處幾無定所公事廢閣號令紛歧改建省城之弊此其明
證現在安慶已復江路疏通欲辦蘇浙之賊必自力圖皖南始
欲辦皖南之賊必自守定安慶始臣愚以爲宜如原奏所請安
徽省城仍應建於安慶巡撫藩臬如前駐紮庶足以資控制而
一事權至所稱設立提督統轄水陸官兵江西九江鎮就近歸
安徽提督節制一條查水師陸兵判然兩途猶耕織皆所以資
生而不能使一人而治兩業安徽壽春鎮所轄向係羣捻出沒

之地皖南鎮所轄又係萬山叢雜之區皆與江防毫不相涉應請仍歸安徽巡撫節制江西九江鎮所轄如撫州建昌等處距大江六七百里亦係陸路專政應請仍歸江西巡撫節制該兩省巡撫向兼提督銜均應遵守舊章無庸更改至江防局面宏遠事理重大臣愚以爲應專設長江水師提督一員目下大江水師歸彭玉麟楊載福等統率者船隻至千餘號之多礮位至二三千尊之富實賴逐年積累成此鉅觀將來事定之後利器不宜浪拋勁旅不宜裁撤必須添設額缺若干安插此項水師而卽以壯我江防永絕中外之窺伺其提督衙門或立安慶或立蕪湖等處自提督而下總兵應設幾缺副參以至千把各設

幾缺暨分汛修艦各事宜統俟

諭旨允准之日再由吏兵等部詳覈議奏

臣等如有所見亦必

續行奏咨略參末議至俸薪口糧修補船礮等項當於長江酌

畱釐卡數處量入爲出不必另由戶部籌款其福建廣東原設

水師提督似不必遽議裁缺轉致疎防所有遵

旨籌議緣由謹會同安徽巡撫

臣李續宜署江西巡撫

臣李桓

恭摺覆奏伏乞

皇上聖鑒訓示謹

奏

覆奏楚軍不能出洋片

同治元年二月十二日

再臣承准議政王軍機大臣字寄同治元年正月二十一日奉
上諭逆匪於甯波海口擄掠釣艇沿海地方均形喫緊所有購
買外國船礮覈需銀八十萬兩尙屬力所能辦未可再事因循
現已由總理各國事務衙門札飭赫德赴滬商辦並鈔錄單開
船礮價值飛咨上海等口卽著辭煥督飭該稅務司將應購船
礮軍械等速爲購買其船隻務須購寬兵船不可以貨船信船
充數其駕駛輪船應否雇用呂宋等國之人以免臨時挾制著
辭煥商令赫德相機辦理至酌配兵丁及統帶大員著曾國藩
於水師官兵內遴派得力鎮將並兵丁等聽候調遣一俟船礮

奏稿卷十五

聖

購齊卽行飭赴上海等處以資防剿等因欽此又正月二十三
日奉

上諭昨據總理各國事務衙門具奏購買外國船礮該大臣前
奏稱應行酌配兵勇俟輪船到後再行配用現在上海應川外
洋船礮已催令迅速購買卽著該大臣先行籌備免致臨時貽
誤等因欽此仰見

聖謨宏遠思患豫防敢不欽遵辦理惟查楚軍水勇多係兩湖
土著距江近而距海遠所用師船不過長龍舢板快蟹之類但
能泛江不能出洋上年七月臣覆奏摺內所稱俟輪船駛至安
慶漢口時卽令學習駕駛司放礮位亦言用之於江而非言用

之於海中也江與海雖同一水面而風濤迴別氣候各殊自崇
明出口繞至上海非熟習洋面之人卽有寸步難行之勢臣去
年覆奏之後尙未將學駕輪船之說宣示各營蓋其囿於風土
之習旣遷地而弗良而其疑畏洋人之心尙扞格而難入今強
之試登輪船或可勸誘爲之若強之遽出洋面則難矣髮匪所
擄之人多係江楚山民以臣愚料之必無遽能縱橫海上之事
臣忝任江督本有海疆之責撥兵剿賊亦係分內之事無如所
部勇丁並非生長海隅勢不能遽於重洋用武不敢不據實覆
陳伏乞

聖鑒訓示謹

奏

劉于濤未能赴浙片

同治元年二月十二日

再記名按察使安肅道劉于濤一軍前因杭州危急經閩浙督

臣慶端奏奉

諭旨調赴浙省援剿浙省既失尙屢次檄催劉于濤具稟請示
前來臣查自江西至浙中隔常玉一山陸路八十里過山之後
河小岸高灘淺水急利陸軍不利水師劉于濤所部現在並無
陸軍祇有水師該員自咸豐五年經臣會檄管帶水師六七年
間水軍操練日精威望日著屢次苦戰獲勝有功桑梓厥後兼
帶陸兵不甚得力上年秋間臣以陸兵非其所長檄令全數裁
撤專辦水師且自省河以上至三曲灘水路六百餘里責成劉

于潯嚴防汛地免致賊匪竄江偷渡贛水以西又踰上年之覆轍此時江西本省並無一枝防兵僅賴劉于潯水勇率皆江西土著畱江則駕輕就熟可收指臂之功赴浙則用短棄長必無絲毫之補慶端不知衢河之淺窄不宜水軍而但催令抬船過山抬礮過山係屬毫無閱歷之言所有劉于潯一軍自應仍駐江西分防河面以資熟手而保完區除批飭遵照外謹會同署江西撫臣李桓附片陳明伏乞

聖鑒謹

奏

條陳近日軍情摺

同治元年二月二十二日

奏爲謹陳近日軍情仰祈

聖鑒事竊

臣

於二月初二日具陳嗣後各路軍情每十日奏報

一次近復欽奉疊次

寄諭殷殷以上海鎮江廬州潁州浙江甯國等處爲慮飭催分路進兵所有旬日軍情謹分條具報如左

一曾國荃募齊新勇分立營頭帶赴湖南省城正月二十八日卽先雇輕舟下駛已於二月十五日抵皖所募新營亦次第將到

臣

擬令於二十四日率領各營進攻巢縣含山一帶

一李鴻章新募淮勇暨調撥湘勇均已募練成軍惟因民船不

能直衝賊中洋船又不肯雇載兵勇須由陸路前進且須裹帶
行糧現擬籌給銀米卽令於三月初二日自安慶起程會同曾
國荃攻勦江邊一路於巢縣和州含山三屬但能攻克一城仍
以曾國荃一軍圍攻他城李鴻章卽傍城衝過以期速達鎮江
一多隆阿一軍進攻廬郡自正月二十五至二月初四十日之
內攻破東門外賊壘一座西門得勝門傍城賊壘四座焚燬賊
卡四處奪獲礮船貨船七隻軍械馬匹甚夥共計斃賊三千有
奇收降卒千餘人惟官兵亦陣亡營官二員弁勇近七十名受
傷者約以千計不能不稍事休息再圖進取除一切詳細情形
由湖廣督臣官文具奏外臣謹據來函所稱略陳梗概僞英王

四眼狗堅守廬州令苗沛霖與捻匪連和西圍潁州東援廬州
頃據多隆阿搜獲苗營與狗逆偽函一件苗沛霖又與捻首張
落刑構衅苗黨不得志於潁必將以全力援廬謹將原函鈔呈
御覽

一撫臣李續宜於二月初九日行抵安慶與臣籌商一切卽將
進駐六安其派援潁州之成大吉蕭慶衍兩軍已先後行抵固
始離潁州不過百餘里援剿情形由李續宜自行具奏

一左宗棠一軍自正月二十日在馬金街獲一大捷肅清開化
後初擬赴援衢州江山繼因該兩處稍鬆決意進攻遂安嚴州
蘭谿等處之賊并力來援聚於遂安城西之楊村一帶二月初

九日左宗棠分三路進剿大獲勝仗殺賊近七千人擒斬頭目百餘人克復遂安縣城聞僞侍王將圍衢州左宗棠撥兵畱守遂安自率大隊進援衢州其詳細戰狀應由左宗棠自行奏報一恭奉

諭旨垂詢蔣益澧赴浙較遠是否必應守候抑或別有勁旅可籌目下兵勇不敷分布實無別項勁旅可以調派赴浙仍須俟蔣益澧到後始能合力兜剿頃接蔣益澧來稟尙須親赴廣東索取餉銀抵浙日期殊難預定深爲焦慮

一浙江湖州陷入重圍久無信息頃據江蘇候補知府趙炳麟稟稱湖州沿城一二里四面皆賊音信迄不得通二月初四初

八等日據吳淩晟舍各處探報道員趙景賢尙在湖城極力支
持屢次出城擊賊獲勝並據鈔呈坊天豫曹逆勸趙景賢僞
知該郡實尙無恙孤懸賊中無路赴援徒深憂憤惟聞城中米
糧足支五箇月或者可以保全

一徽州解圍後績溪等處之賊分踞歙縣東南四五十里外時
時窺伺郡城臣以張運蘭一軍人數較多改令朱品隆接防徽
州騰出老湘營五千人爲游擊之師本月十四日石太股匪復
竄入羊棧嶺燒燬民房數處逼犯黟城十五日老湘營馳往堵
剿甫抵漁亭該逆仍退出嶺外不敢深入目前歙休黟婺一帶
必不可少此一枝游兵朱品隆旣換防徽城卽不能出嶺與鮑

奏和卷十五
超合力進剿鮑超久攻青陽爲堅城所阻不能遽抵甯國終難
掣動浙中賊勢

一上海於正月二十三二月初四等日有高橋蕭塘等處之捷
該城當可保全鎮江爲江南必爭之地欽奉二月初三日

寄諭令馮子材仍守鎮江無庸赴滬臣已飛速行知該提督欽
遵辦理

以上各條皆疊奉

諭旨垂詢之件謹分晰條列由驛五百里具陳伏乞

皇上聖鑒訓示謹

奏

謝曾國荃升授蘇藩

恩摺

同治元年二月二十二日

奏爲恭謝

天恩仰祈

聖鑒事同治元年二月十六日接准兵部火票遞到二月初三

日內閣奉

上諭江蘇布政使著曾國荃補授卽赴新任毋庸來京請訓該員係兩江總督曾國藩之弟例應迴避惟該省軍務緊要需員辦理無庸迴避以資得力欽此維時臣弟國荃適自長沙馳抵安慶當卽率同恭設香案望

闕叩頭謝

恩訖伏念

臣

弟國荃隨征六載未立寸功疊蒙

高厚之恩尙乏涓埃之報乃復渥荷

恩綸擢授斯職藩司有表率羣僚之責吳下爲東南財賦之邦

臣弟愚蒙懼弗勝任現在皖北各屬髮捻苗黨三患交熾臣弟

所統新舊各勇除分守六處外尙有萬餘人爲進剿之師自應

飭令攻取巢縣含山和州西梁山等處冀與袁甲三都興阿各

軍粘連一片庶金陵有規復之期大局有轉旋之勢其江蘇藩

司一缺擬商之撫

臣

薛煥仍飭吳煦署理

臣

弟國荃暫不接印

莅事俾地方與軍務各有責成而免曠誤所有

微臣

感激下忱

恭摺叩謝

天恩並附陳_臣弟不克赴任緣由伏乞

皇上聖鑒謹

奏

參李元度片

同治元年二月二十二日

再新授浙江按察使李元度咸豐十年八月徽州失守案內經
臣奏奉

諭旨革職拏問該員並不靜候審訊擅自回籍與浙江候補道
鄧輔綸往返函商求巡撫王有齡奏調赴浙十一年二月初九
日奉

上諭已革徽甯池太廣道李元度著曾國藩飭令前赴浙江交
瑞昌王有齡差遣委用其應得罪名仍著曾國藩查辦欽此李
元度並不具稟請示卽行募勇赴浙名曰安越軍旋於義甯案
內經官文奏奉

諭旨李元度著賞還按察使原銜其失守一案仍著曾國藩訊明分別辦理等因欽此又於奉新瑞州案內經毓科奏奉

上諭李元度著賞加布政使銜其徽州失守之案應否免其查

辦仍著曾國藩酌核具奏等因欽此查義甯奉新瑞州皆臣所

統轄之地係賊匪先自退出李元度並無打仗克城之事臣所

派鮑超一軍與李元度同抵瑞州亦未報曾見一賊曾接一仗

李元度屢報克復冒稟邀功實出情理之外本年正月十四日

皇上棄瑕錄用補授該員鹽運使茲又擢授浙江按察使

諭旨令臣等轉飭該員奮勇立功以贖前愆臣查該員李元度

自徽州獲咎以後不候訊結而擅自回籍不候批稟而徑自赴

浙於共見共聞之地并未見仗而冒稟克復種種悖謬莫解其
故臣所以遲回隱忍不遽參奏者因其軍以安越爲名冀其顧
名思義積愧生奮或能拚命救浙有裨時局也乃李元度六月
至江西八月抵廣信九月抵衢州節節逗遛任王有齡羽檄飛
催書函哀懇不一赴杭救援是該員前旣負臣後又負王有齡
法有難寬情亦難恕所有該員補授浙江鹽運使按察使及開
復原銜加銜之處均請

飭部註銷仍行革職姑念其從軍多年積勞已久免其治罪交
左宗棠差遣該員治軍一味寬縱多用親族子弟平日文理尙
優帶勇非其所長其所部安越軍八千人臣當與左宗棠熟商

或全行遣撤另派差使或酌畱二三千人令守城池俟立有功績再由左宗棠奏請開復仰副

聖朝寬大之意臣奏保在前咎亦難辭應請將臣交部議處所有疊奉

諭旨飭臣酌核查辦之處理合附片覆奏伏乞

皇上聖鑒訓示謹

奏

謝京察從優議敘

恩摺

同治元年二月初八日

奏爲恭謝

天恩仰祈

聖鑒事

臣

准兵部火票遞到同治元年正月二十三日內閣

奉

上諭協辦大學士兩江總督曾國藩督軍勦賊勤勞罔懈於江
皖地方疊復名城戰功卓著甄拔所部將士賢能稱職前經簡
授協辦大學士仍著交部從優議敘等因欽此當卽恭設香案
望

闕叩頭謝

恩訖竊臣材識凡庸謬膺重寄下不能慰兩江雲霓之望上不

能分九重宵旰之憂無補涓埃徒深慚懼迺荷

聖恩稠疊

天語褒嘉以閩外之下臣登

虞廷之上考重邀

甄敘彌切悚惶臣惟有慎簡將才廣求忠益勉已百已千之學

收羣策羣力之功以期仰答

高厚深恩於萬一所有微臣感激下忱謹繕摺叩謝

天恩伏乞

皇上聖鑒謹
奏

遵 旨議覆請派員辦廣東釐金摺

同治元年三月初八日

奏爲遵

旨議覆並請

欽派大員督辦廣東釐金接濟浙江安徽江蘇三省軍餉恭摺

馳陳仰祈

聖鑒事

臣

承准

議政王軍機大臣字寄同治元年二月初五

日奉

上諭前據官文奏議覆侍郎宋晉條陳湖北等省會籌東征請飭辭煥會議曾諭該撫等悉心妥籌尙未據會商覆奏茲據御史朱潮奏統籌東南大局一摺據稱湖北等省全境肅清四川

廣東亦底安靖請飭湖北等省出師會剿四川廣東協餉兵事
責之曾國藩餉事則派督撫大員一人督催各路征輸專司饋
運等語覽其所奏與現辦情形均屬不相符合曾國藩節制江
浙等四省已屬不遑兼顧若再令總制湖北湖南福建兵事則
運籌決策瞬息千里亦恐緩急機宜不能遙制督撫辦理糧臺
從前乾隆年間曾有是例此專爲出師一路而言若自兩楚下
至閩省相去數千里卽因督撫事權較重專司饋運亦恐呼應
不靈湖北湖南邊境尙未解嚴江西福建逼近鄰氛自顧門戶
尙虞不足豈能分兵會剿四川軍務未靖本省餉項頗形支絀
廣東疊諭撥解左宗棠等軍餉爲數已屬不少該御史所籌補

救之方尙不離書生之見惟軍務至重不妨兼聽並觀以廣進
言之路且現在東南大勢賊合而我分兵單餉絀動爲牽制亦
屬實在情形著官文曾國藩嚴樹森毛鴻賓沈葆楨慶端徐宗
幹酌量情形於軍務積弊如何挽救其言是否可採遇便覆奏
不必因有旨飭籌稍涉遷就也等因欽此仰見

皇上好問察言於剖晰精嚴之中仍寓虛衷博訪之意臣維東
南寇氛蔓延日久皖南池甯二府十室九空人爭相食皖北廬
鳳等處白骨蔽野田地荒蕪蘇浙兩省蹂躪亦復相類生靈之
塗炭深矣

聖主之憂勞極矣爲封疆將帥者孰不思掃蕩逋寇一解倒懸

況臣膺茲艱鉅委任尤專豈敢稍涉推諉更分畛域無如賊之
占地過廣股數太多臣之兵餉兩絀才智太短受

命兩年至今無一兵達於蘇境圖皖年餘亦迄無一旅進攻甯
國分內之事不克自效清夜以思愧悚汗下至浙江軍事左宗
棠苦戰衢嚴獨任其難臣不克分兵往助趙景賢困守湖州堅
貞蓋世臣不克設法往援徒有兼轄之名並無統籌之實前此
欽奉正月二十三日

諭旨仍令臣節制四省毋許再行固辭本不敢曉曉瀆奏茲因
御史朱潮奏請六七省兵事責成一人臣既懷大名不祥之懼
彌觸隱微抱疚之端竊計蘇杭安徽糜爛若此以一人而辦一

省之賊無論如何大才如何竭力但覺其不足不見其有餘況以臣之愚陋承乏兩江時虞隕越安能兼顧浙江安能更及兩湖福建該御史朱潮所稱數省兵事責成一人之處固無庸議倘蒙

聖主鑒

臣

愚悃並收回節制四省之

命俾

臣

專力本職稍釋神魂之震懼尤感

聖慈之曲盡矣至朱潮所稱四川廣東協餉派大員一人督催饋運等語其事雖難以盡行其議則實有可采上年侍郎宋晉五省會剿一疏亦係兵餉通籌與朱潮大致相同臣查四川內患未平本省支絀自難協濟外省卽將來蜀賊蕩平尙當先協

雲南之餉不能遽及江浙之遠惟廣東最號殷富其財力爲東南之冠其地勢亦宜供江浙之餉天下之大利除丁漕正賦外約有四宗曰海關曰鹽場曰富戶勸捐曰市鎮抽釐他省或據其一或據其二三惟廣東兼四者而有之而粵鹽一宗行於江西湖南者侵灌淮南之引地佔奪江蘇之大利卽樂桂埠商孔廣緒一戶七八年來擁貲百萬他商之殷實可以類推官項之贏餘亦可想見而淮課因之全失粵課並未稍增釐金一宗如佛山韶關肇慶等處著名繁富咸豐十年間巡撫耆齡於韶關後設一新卡未及一年收稅至五十餘萬藩司周起濱議於肇慶府河設卡每年亦得四十餘萬此外鉅鎮大卡不一而足至

於海關一宗粵海稅項遠出各口之上捐輸一宗粵東富室亦非各省所及斯中外所共見共聞者若使經畫得宜但於四宗之中得其一宗即可養數萬之兵勦浙江之賊溯查庚申五月臣奏請以江西之釐金充臣營之軍餉兩年以來臣軍賴此無飢潰之憂似可援以爲例合無籲懇

天恩采納朱潮之議

特派二三品卿一人馳赴廣東駐紮韶關辦理通省釐金專濟蘇浙安徽三省餉項乾隆年間新疆用兵曾派大學士黃廷桂駐紮肅州綜理兵餉此次江浙軍務較新疆尤爲重大卽派六部卿貳銜

命使粵專督釐餉亦不爲過如蒙

俞允臣當奏派賢員熟悉釐務者隨同星使前赴粵東設卡抽

辦韶關距江西甚近臣當與該使臣往返函商務使籌兵籌餉

一氣呵成或紕或贏隨時斟酌廣東官紳有設立私卡者使臣

會同臣處奏參州縣有暗中阻撓者亦卽奏咨參撤凡釐務所

得之餉先解浙江軍營左宗棠新任浙撫無尺寸之完土無涓

滴之餉源蔣益澧等到後尤覺無米爲炊若以廣東釐金濟之

則前此奏准之協浙月餉十萬兩卽在此中抵除其次則解安

徽軍營臣處如鮑超一軍欠餉八箇半月曾國荃一軍欠餉近

九箇月徽州各軍欠七箇月有奇急思早得粵餉一清積欠李

續宜添募新營亦當另籌接濟袁甲三久處窮困亦應量爲津貼方足以馭強將而撫飢軍又其次則解江蘇軍營聞上海出款太多虧累甚鉅鎮江揚州兩台亟須另籌協餉其廣東應解紅單艇船之費亦可於此中抵除由臣咨商韶關使臣察各軍之緩急定撥解之多寡其運解之法或由贛州送至江西轉解或由輪船搭至上海轉解均聽韶關使臣察酌辦理其廣東本省應用之項與夫京款協款該省除正賦外尙有海關鹽務捐輸三大宗儘足以資周轉不許挪移各卡釐金以清界限數載以來部庫空虛從無京餉解軍之事若特簡京卿督辦粵餉則與自京解出者無異實惠及於士卒利

權操自

朝廷疆臣守其土地不得私其貨財於

諭旨挽救積弊之道或亦不無小補所有遵

旨議覆緣由謹繕摺具奏伏乞

皇上聖鑒訓示謹

奏

李鴻章軍改由輪船赴滬摺

同治元年三月初八日

奏爲恭報李鴻章一軍改道赴滬由水路起程日期仰祈

聖鑒事竊道員李鴻章所部湘勇淮勇募練成軍本擬三月初二日拔隊啟行取道巢縣含山和州一帶前赴鎮江臣於二月二十二日奏明在案拜摺後正飭該員簡料起程旋於二十八日據江蘇紳士潘馥錢鼎銘等自滬來皖稟稱上海一路雖得英法各國撥兵協防有高橋蕭塘之捷而賊氛四逼商旅不通岌岌可危已由滬局籌款十八萬兩雇備輪船陸續入江來迎我軍以期力保要地等情臣查鎮江爲進兵形勝之區上海爲籌餉膏腴之地兩者並重均不可稍有疎失前因洋船不肯雇

載兵勇李鴻章一軍擬由陸路續赴鎮江實出萬不得已之計
臣以道路阻長節節有賊旣憂輜重之難帶又恐行程之太遲
欽奉二月十四二十四日兩次

寄諭亦深以李鴻章陸行紆遲爲慮茲據該紳士等與洋人商
雇輪船來皖經費旣鉅詞意尤摯自宜先赴上海以順輿情已
派數營於三月初七日登舟起行李鴻章於初八日開行不過
四日可到仍俟後至之船循環裝載分三起銜尾下駛不滿一
月可以全隊到防俟抵上海後布置粗定李鴻章親至鎮江察
看情形應如何分兵防守之處屆時奏明辦理其李鴻章暨黃
翼升所部水師仍當由梁山金陵衝過賊中乃可達於鎮江俟

起行有日續行具奏所有湘淮各營改由水路起程先赴上海
緣由恭摺由驛馳報伏乞

皇上聖鑒訓示謹

奏

近日各路軍情片

同治元年三月初八日

再近日各路軍情曾國荃於二月二十四日由安慶馳赴下游其所部各營知府陳湜總兵蕭孚泗等於二十四日在運漕鎮獲一勝仗擊敗銅城閘之賊破其浮橋奪獲礮船七號擒斬甚多殲逆首精天義何雅林於陣俟曾國荃到防再行進剿左宗棠一軍自克復遂安後該逆復以一支圍攻遂城一支由馬金嶺窺伺婺源左宗棠派守遂安之王開來等於二十三二十七兩獲勝仗又派劉典等四千人援剿馬金臣亦派張運桂等四千人會剿馬金嶺遏賊由婺源竄江西之路徽州朱品隆等各軍時有賊黨犯嶺防守尙屬嚴密成大吉等援潁之師已渡

淮北距潁城僅三十餘里因後路苗捻混雜良莠不分尙須添
兵防守浮橋顧全歸路乃敢放心前進多隆阿圍廬州之師鮑
超攻青陽之師日內俱尙平安理合附片具陳梗概仰慰
宸廑伏乞

聖鑒李鴻章一軍改由輪船駛赴上海同日另摺具報謹
奏

旌卹饒廷選家屬片

同治元年三月初八日

再浙江提督饒廷選在杭州苦守兩月有餘糧盡援絕城亡與亡業經閩浙督臣慶端奏奉

諭旨從優議卹並入祀本籍昭忠祠在殉難地方建立專祠在案茲准江西撫臣沈葆楨函開正在本籍起程聞據饒廷選親兵陳大陞由杭州聞道旋閩稟稱上年十一月二十八日杭州城陷饒廷選之妾方氏林氏在省寓聞警仰藥自盡其從弟守備饒廷杰饒廷夔在局運解軍裝飛騎急赴鳳山門力護主將乃馳至中途賊隊大至填塞街衢饒廷夔蒼戰陣亡饒廷杰爲亂軍衝散旋於二十九日與副將繼興戰死於保叔塔下等語

臣查饒廷選忠勇樸誠咸豐六年保守廣信府城厥功甚偉此次臨危授命伊弟伊妾亦於杭垣失陷之時相率殉難孤忠亮節萃於一門深堪嘉憫籲懇

天恩俯准於廣信地方爲饒廷選建立專祠仍請

敕部將都司銜儘先補用守備饒廷杰饒廷夔照陣亡例從優議卹饒廷選之妾方氏林氏照例

賜旌並與該守備等一併附祀饒廷選專祠以褒忠節理合會同江西撫臣沈葆楨附片陳請伏乞

聖鑒訓示謹

奏

蕭孚泗陳由立畱原營片

同治元年三月初八日

再提督銜河南歸德鎮總兵蕭孚泗前經奉

旨簡授今職並因歸德地方緊要飭赴新任提督銜記名總兵

陳由立亦經前河南撫

臣

嚴樹森等奏奉

諭旨飭赴河南軍營敢不欽遵辦理惟查蕭孚泗現帶所部隨同曾國荃籌攻巢縣含山等處陳由立現帶所部隨同鮑超圍剿青陽踞匪皖南北軍務正緊該二員扼守要地均屬萬難鬆勁之時若一經抽調則遷地弗良在豫省未必遽收成效而臨陣易將在皖省深虞盡棄前功實未便飭赴河南轉致顧彼失此相應據實附陳將蕭孚泗陳由立仍畱於曾國荃鮑超原營

竭力圖報伏乞

皇上聖鑒謹

奏

籌議借洋兵勦賊摺

同治元年三月二十四日

奏爲遵

旨籌議恭摺覆陳仰祈

聖鑒事竊

臣

於同治元年三月初七日承准議政王軍機大臣

字寄二月二十四日奉

上諭上海被匪窺伺勢不能不借洋人之力協同守禦曾國藩亦曾奏及至規復蘇浙失陷地方自應別籌良策前據薛煥奏稱江浙紳士殷兆鏞等呈請借助西兵規復蘇常各屬城池當以該紳士等情殷桑梓或非無見諭令薛煥酌度情形辦理茲據恭親王等奏稱江浙紳士潘曾瑋帶同浙人龔橙復由滬航

海來京訴稱鄉閭被陷懇請借用英法等國官兵速籌規復已
諭令總理衙門向各該國駐京公使籌商惟上海爲洋人通商
之地借助尙屬有辭若攻勦內地賊匪輒欲用外國兵力揆度
洋人情形雖不至遽有他慮而軍行餉隨一切供應之煩亦恐
萬難措拄以該紳士等情詞懇切固難重拂輿情亦須顧全國
體此事是否可行卽著曾國藩悉心籌酌迅速馳奏等因欽此
又奉三月初二日

寄諭近復據英法兩國駐京公使聲稱賊匪與洋人構衅此時
在滬洋人情願幫助官軍勦賊並派師船駛往長江協同防勦
等語洋人性情堅執若因我兵單薄借助於彼勢必多方挾

今該洋人與逆匪仇隙已成情願助剿在我亦不必重拂其意
自應姑允所請作爲牢籠之計至該兩國師船駛入長江以後
作何舉動卽著曾國藩都興阿查探情形分別隨時馳奏如該
洋人實係與逆匪尋仇並無他意則事機難得該大臣等務當
飭令沿江上下游師船與該洋人聯絡聲勢冀收速效並當加
意拊循使其樂於助順毋令再爲賊匪所誘此實因勢利導一
時權宜之計諒該大臣等定能悉心體會妥爲駕馭也等因欽
此竊

臣

才識庸愚謬膺重寄受

命二載不能早籌一旅達於蘇境致蘇省紳士迫於火熱水深
爲此不擇之呼籲皆臣治軍無狀之咎誠使商借洋兵卽能救

民之難蓋

臣

之愆豈非至願然

臣

前此奏稱助守上海則可助

剿蘇常則不可者蓋亦有故回紇助唐收復兩京當時亦賴郭

李諸軍挾與征戰縱主兵未必優於客兵要自有爲之主者與

之俱進俱退偕作偕行以今日之賊勢度

臣

處之兵力若洋人

遽爾進攻金陵蘇常

臣

處實無會剿之師如其克復城池亦尙

難籌防守之卒上游如多隆阿鮑超曾國荃諸軍各當要地萬

難抽動下游如李鴻章一軍甫抵上海新集之卒祇堪自守不

能遠征反復籌維竟無大枝勁旅與之會剿假使轉戰內地但

有西兵而無主兵則三吳父老方迓

王師而慰雲霓之望或覩洋人而生疑懼之情至

臣

職分所在

責有專歸譬之人家子弟應試科場稍能成文而倩人潤色猶
可言也若既不能文又不入場徒倩鎗手頂替則無論中式與
否而譏議騰於遠近羞辱貽於父兄矣臣所處之位與報名應
試者無異專借西兵與倩人頂替者無異故他人但作事外之
議論而臣則當細思事中之曲折既以借助外國爲深愧尤以
無兵會剿爲大恥

諭旨以洋人與逆匪仇隙已成情願助剿在我亦不必重拂其
意臣處搜獲僞文亦知金陵洪逆詞意不遜與洋人構衅甚深
在洋人有必洩之忿在中國爲難得之機自當因勢利導彼此
互商嘉其助順聽其進兵我中國初不干求亦不禁阻或乘洋

人大舉之際我兵亦諸道並進俾該逆應接不暇八方迷亂殆亦天亡粵逆之會也惟地形有遠近兵勢有次第仍請

飭下總理衙門照會英法公使目前若進攻金陵蘇常

臣處尙

無會剿之師庶幾定議於前不致貽譏於後其或蕪湖梁山一帶官兵戰守之處恰與洋兵會合

臣當謹遵

諭旨加意拊循勝必相讓敗必相救不敢稍乖恩信見輕外國上煩

宸廑所有遵

旨籌覆緣由謹繕摺由驛馳陳伏乞

皇上聖鑒訓示謹

奏

克復青陽縣城摺

同治元年三月二十四日

奏爲官軍擊退大股援賊悉毀青陽逆壘立將縣城克復恭摺
馳陳仰祈

聖鑒事竊鮑超一軍於上年臘月進駐青陽縣薄城而營四戰
皆捷本年正月二十二日經臣附片奏報在案二月十五日鮑
超飭劉順隆等先平西北門山嘴賊壘濬治長濠爲四面合圍
計城賊勢蹙潛糾浙江死黨三萬餘眾由南陵竄踞銅陵之順
安鎮延擾附近各邨進撲銅陵冀分我軍之勢以解青陽之圍
三月初四初五等日銅陵守將周萬倬等出奇兵禦之賊乃少
卻初六日鮑超由青陽分軍親率夜行潛赴銅陵救援初七日

遇賊於橫塘令顏紹榮熊鐵生段大有三營攻中路黃慶吳騰
芳唐仁廉王衍慶陳得勝譚勝達六營攻南北兩路又令明興
伍華瀚各率馬隊從左右抄擊賊恃眾悍迎拒兩時王衍慶陳
得勝振臂一呼陷陣而入黃慶顏紹榮潛取小徑繞襲賊後伍
華瀚唐仁廉明興譚勝達熊鐵生等分領馬步諸軍四出盪決
衝賊數段斬僞主將洪逆於陣羣賊駭潰仍向南陵而走適周
萬倬劉祥勝水師總兵唐學發亦率隊來會各軍合力奮追遂
將橫塘箬山金山獨山川山西峯鋪隴岡東西王邨直至順安
沿途百餘卡二十六壘一律剷除擒斬無算俘獲賊酋尤多此
三月初七日擊退順安等處逆援之情形也先是僞奉王古隆

賢偵知鮑超分兵而北陰結涇石太等縣悍賊數千在青陽南門外豬婆店地方增築九壘將欲阻我之師以通糧路伺我之瑕以逞狡謀乃結壘甫成鮑超已振旅而還遂於十五日督飭將士分九路齊進古逆親帶龍旂老賊揮令各壘傾巢出敵勢極猛鸞我軍奮勇爭先以一當十明興伍華瀚以騎隊裹賊賊懼返巢仍復倚壘施槍負固死拒唐仁廉譚勝達於煙燄中拔開鹿角躍過濠溝麾軍直上一壘旣破眾壘盡亂馮標婁雲慶王衍慶劉玉堂陳得勝馬勝奎段大有等乘勢薄之不逾時而九壘悉平古逆率餘匪遁往石埭軍士追襲四十里始行收隊此十五日攻毀豬婆店逆壘之情形也維時軍心愈壯賊膽愈

寒鮑超知青陽南路既平利在速攻以西門屬之婁雲慶文九和劉順隆李文益熊鐵生馮標等以東門屬之黃慶譚勝達馬勝奎唐仁廉段大有等以北門屬之王衍慶陳得勝剪炳南顏紹榮劉玉堂吳騰芳等而以楊鎮魁張應超爲游兵十六日天甫向曙各營秣馬蓐食銜枚疾進將近城闌城上萬礮雷轟羣子雨集附城卡壘中亦以火器悉力抵禦諸將弁裹創血戰更番奮攻志在必得該逆自知不敵急退入城我軍毀壘填濠進次城下劉順隆熊鐵生挽盾自障攀堞先登眾軍乘之盡洗城中羣蠻登將縣城克復綜計先後數戰斃賊近萬三千名擒賊近千一百名中有逆首僞游天義周得順僞審天義金阮明僞

順天安余士林僞容天福陳宗保僞匡天福朱汝興僞佐天侯
馬新凱暨燕豫將軍丞相各僞職八十六名悉就擒縛奪獲礮
械旗幟難以數計此十六夜各軍攻拔青陽之情形也臣查青
陽一城淪陷十載繫皖南之門戶據江介之要衝自上年定計
勦辦以來相持四月踞守益堅仰賴

聖主威福諸將用命卒能掃蕩援賊攻拔老巢從此規取甯國
可分浙賊之勢關繫頗大厥功甚偉浙江提督鮑超身先士卒
調度得宜惟係專閫大員應如何

加恩之處未敢擅擬其堅忍苦戰之提督銜記名總兵婁雲慶
應請

簡授總兵實缺並請

賞給二品

封典甘肅涼州鎮總兵馮標請

賞加提督銜記名副都統明興請

簡授副都統實缺總兵銜儘先副將譚勝達王衍慶劉順隆熊
鐵生陳得勝顏紹榮儘先副將唐仁廉均請

交軍機處記名遇有總兵缺出請

旨簡放劉順隆並請

賞給勇號唐仁廉並請

賞給二品

封典記名總兵黃慶宋國永張玉田均請

賞給二品

封典儘先副將劉玉堂李文益段大貴李定貴蕭儀斌蔡得勝
周有勝均請

賞加總兵銜湖廣卽補副將馬勝奎儘先副將吳騰芳文九和
翦炳南均請以副將遇缺卽補馬勝奎吳騰芳並請

賞給勇號卽補知府伍華瀚請

賞給四品

封典副將銜四川卽補參將陳永康請以副將仍畱四川遇缺
卽補儘先游擊段大有請以副將儘先補用其餘在事出力人

員可否由

臣

查明保獎恭候

訓示飭遵至陣亡將弁十七

員名相應片繕清單請

旨敕部從優議卹所有官軍
勦退援賊攻復青陽縣城緣由恭

摺由驛六百里馳慰

宸廑伏乞

皇上聖鑒訓示謹

奏

荻港舊縣三山一律肅清片

同治元年三月二十四日

再三月初二日蕪湖巨逆黃文金賴裕新等糾黨二萬突入荻港延燒房屋初四日復分股竄陷舊縣勢將下伺三山夾初五日水師李朝斌羅進賢兩營在營房背擊賊獲勝遂率所部師船駛上舊縣會合萬化林嚴定國水軍登陸襲賊戰於街心眾勇排礮環轟賊負重創悉向山後潰走初六日我軍乘勝進攻亦多斬獲該逆不敢踞卡專事野掠潛與荻港一股勾結繁昌蕪湖魯港之賊別圖竄伺時曾貞幹陸師近駐三山夾距舊縣祇三十里密諭各營堅壁以待十三十四等日賊果分道來犯將謀大逞曾貞幹卽令曾正明率親兵馬隊會約諸營及螃蟹

磯水師循江岸而進一敗賊於洋夾沙再敗賊於三華山斬黃
巾賊酋一名紅旂悍目十餘名殲獲百餘人水師各營在斗門
教化渡兩處擒斬亦多賊始悉眾遠遁荻港舊縣三山等處一
律肅清查此股逆黨倚順安爲犄角作青陽之聲援牽制之謀
亦甚狡毒幸水陸各軍共籌戰守徐翦其枝葉卒拔其根本實
足使羣兇短氣張我軍威除仍飭嚴密守禦外所有此次陣亡
之藍翎都司曾渭賢柳成九及上年九月間在三山陣亡之花
翎游擊銜都司劉照志藍翎外委王虞廷應請
敕部從優議卹把總劉華泗擊賊過猛登時陣亡並請從優照
千總議卹謹附片具陳伏乞

聖鑒訓示謹
奏

近日軍情片

同治元年三月二十四日

再近日軍情李鴻章所帶頭批陸勇已於三月初七日馳赴上海其二批於十四等日附輪船前往三批亦即可成行計四月初旬全軍皆抵上海淮揚鎮黃翼升乘坐輪船先至下游察看一次回至安慶再行督帶水師全軍乘風下駛曾國荃一軍十五日在巢縣之望城岡苦戰獲勝十八日攻破銅城關賊壘十九日攻破雍家鎮賊巢二十日辰刻克復巢縣午刻克復含山縣城此外尚有裕溪口牛屯河西梁山三處賊巢擬一面攻此三處一面進圍和州多隆阿一軍日內未開大仗廬郡圍逼甚緊聞將有四僞王大股由江浦上援然巢含既克賊已失勢矣

左宗棠一軍與僞侍王大股轉戰於江山南境聞賊有假道閩境轉竄江西之意深爲可慮徽州各軍近尙安謐除銅城關雍家鎮巢縣含山各戰狀另行續報外理合附片具陳梗概伏乞聖鑒謹

奏

查覆閩浙總督慶端事蹟摺

同治元年四月初四日

奏爲遵

旨查明閩浙督

臣

慶端事蹟據實覆陳仰祈

聖鑒事同治元年正月十七日承准議政王軍機大臣字寄正

月初四日奉

上諭閩浙督臣慶端自聞浙警卽飭督師援剿屢次遷延弗進迭經嚴加訓飭諭令該督駐師浦城與左宗棠等軍聯絡第恐該督未必得力其於福建本省吏治官常不能振作早有所聞併著曾國藩詳加訪察如閩省督撫均屬未能勝任卽行據實奏參毋稍引嫌致滋貽誤並將能勝該省督撫之員採訪確實

列名具奏等因欽此仰見

皇上慎重疆寄整飭官方曷勝欽悚

臣與閩浙督

臣慶端素非

相識公事亦罕交涉夙聞其聲名平常莫由得其實際近日悉

心博訪大抵好諛惡直專講私情信任幕友屬吏數員使據要

津卽至奸狀畢露猶復多方袒庇其幕友之結爲心腹者一日

山東卽補道章琮前辦糧臺各營領餉皆有折扣規費現爲翼

長亦好收用私人扶同作弊一日浙江運司莊煥文巧伺意旨

求優缺者必出其門一日山東卽補府李鼐辦理官運鹽局先

銷私鹽後及官鹽稅私人橐畱官運一二分報作正課一日四

川成縣道鍾峻甫出督署卽權首府總領官票局把持市價忽

起忽落罔利無遺該員至江西撫州任內雖有守城之功而不敵其閨幕之過其屬吏之最善逢迎者一曰候補道司徒緒其父以遣戍死聞訃開奠卽免喪以餉頂謁客慶端專摺畱閩奉旨駁斥繼復畱辦吏務亦奉

旨駁斥始行回籍補制去未幾時又列明保一曰署福州府陳謙恩係前任吏部尙書陳孚恩之族弟通省身釐歸其管權贓累巨萬該督每與首府謀事司道莫得與聞一曰候補道秦金鑑官局停止時該道以局票抽換餉票又以餉票抽換現錢爲同事者所訐該督屬令調停絕不追究此數員者或幕或官所處不同而表裏爲奸脗削斂怨慶端或愛之而不察或明知而

故縱屢經御史糾察皆得彌縫開脫

諭旨詢其吏治官常不能振作其故當由於此近年以來各省綠營廢弛尺籍多虛而以閩省爲最甚聞邵武額兵千餘幾無一名可點汎地所懸弁缺多係該處土棍充當往往賄納洋錢百圓卽可到任三數月後別有納者則又易之閩中健將羣推林文察爲最往歲克復邵武近歲克復汀州皆獨力打仗不避艱險該督隨摺奏獎掩抑其功而優保記名道張啟煊論者以爲賞罰顛倒臣昔嘗聞胡林翼語及天下吏治以閩省爲最劣又見慶端厯次公牘類皆支蔓無著證以諭旨指詢之件慶端似不勝封疆之任可否

簡畀賢員赴閩履任後將

臣

摺中所指各員分別甄劾之處出

白

聖主鴻裁

臣

見聞淺陋素相知者實無堪勝該省總督之員不

敢冒昧薦達合併陳明所有遵

旨查覆緣由恭摺附驛馳奏伏乞

皇上聖鑒訓示施行謹

奏

克復石埭太平涇縣三城摺

同治元年四月初四日

奏爲鮑超一軍連破賊壘克復石埭太平涇縣三城恭摺馳陳
仰祈

聖鑒事竊浙江提督鮑超率所部擊退援賊攻拔青陽臣於三
月二十四日奏報在案鮑超在青陽息軍三日休養士卒料該
逆立腳未定利在速攻自應先取石埭太平以固徽州之防繼
取涇縣以達甯國之路二十日徧諭諸將士裹飯傳餐捲旗疾
趨次軍龍口爲詰朝進攻計二十一日由龍口率隊前行直抵
石埭城壘各賊始猶閉關死守伏匿不出鮑超飭令婁雲慶劉
玉堂等攻西門而以李文益一營佐之黃慶熊鐵生等攻北門

而以顏紹榮一營佐之劉順隆段大有等則向東門進唐仁廉伍華瀚等則向大南門進馮標吳騰芳等則向小南門進分軍爲五霎時合圍附郭諸壘穴牆施礮向外猛擊我軍佯卻數武使賊少懈突將火器環壘飛擲燃及哨棚各營乘賊駭亂之時囊土填濠而進刀矛攢刺殪賊無算悉踣十四壘平之將冒刃衝出之賊盡驅入城城上矢石交下猝不可近奮勇猛撲數次將弁頗有傷亡婁雲慶李文益熊鐵生顏紹榮等憤怒填臆帶領眾軍士各負片板直薄城根蕭信春身受數創猶復往來衝突奮力急攻遂從西北二門斬關而入立復城池該逆奪命狂奔追擊二十里殲斃五千有奇俘獲近四百人此三月二十一

日攻克石埭縣城之情形也石埭旣復賊愈惶懼因糾合援賊二萬餘眾由涇縣南陵而來羣集於甘棠鎮阻我師之進路二十一日鮑超率馬步全軍倍道馳往遙見賊隊如蠅如蟻密排十數層勢甚梟悍文九和黃慶吳騰芳等三營先從中路進擊劉順隆王衍慶劉玉堂陳得勝譚勝達段大有等六營分兩翼包抄搏戰數時該逆屢卻屢前馮標伍華瀚唐仁廉明興楊鎮魁張應超等忽由山後揚旗吹角整隊齊出衝動賊陣不復成伍盡棄甘棠賊壘十七座而逃我軍悉力追逐進薄太平縣西門譚勝達文九和段大有等先毀高山四壘引軍齊上俯瞰城中令眾勇以火箭環射延燃藥局煙燄蔽天喊聲動地賊卽驚

潰遂啟東門望涇縣大道而逸當將縣城收復各軍分投掩襲一路積尸若阜流血沒脛俘獲之數較石埭爲尤多并擒僞主將徐國華僞安天義蕭幅勝僞頂天福劉世民僞望天侯徐應超僞中天安何雲龍及檢點參護等逆首三十七人訊據供稱僞奉王古逆已爲亂軍衝散等語此二十二日攻破甘棠收復太平縣城之情形也先是鮑超進取青陽正在圍攻未下忽有僞佐將張遇春率眾萬餘來營乞降鮑超以勁敵在前遽收降眾恐生他變諭令暫駐旌德之三溪俟立功後再議至是太平敗匪遁出黃華嶺外不滿七八千將圖折入三溪潛結張遇春之眾竄併涇縣乃行甫數里見張遇春整隊而來出賊不意縱

橫格鬪賊大錯愕望密箐叢莽中踰嶺急走張遇春入山搜捕殺賊三千擒賊至八百餘名之多古逆一股幾無孑遺時鮑超已回軍甘棠旣得張遇春獻捷之信旋聞涇賊將由灣灘至鳳村上竄二十七日傳集各營並張遇春降卒成軍以進將及鳳村賊已聞風退遁縮入灣灘我軍知賊怯甚奮勇疾馳遂薄灣灘下寨二十八日鮑超先派張遇春擇險設伏乃以所部八營連環進擊使出壘之賊無或少休翦炳南楊鎮魁劉順隆等潛出左路譚勝達張應超梅仁富等潛出右路張遇春伏兵突從後路如牆壓下該逆惶遽失措不能歸壘唐仁廉馬勝奎舉旂縱馬直擣中堅盡破灣灘卡壘躡賊尾追至於城下梅仁富先

拔西門水卡唐仁廉等隨毀東南土壘一擁入城登時克復斬獲甚多此二十三日新收降人截擊太平餘逆二十八日進復涇縣城池之情形也臣查石埭太平南蔽黔歙涇縣東達宣城爲戰守所必爭鮑超一軍自拔青陽而後仗

聖主之威席全勝之勢未逾七日連復三城從此羣蟹喪膽籌勦甯國漸有把握在事出力員弁兵勇可否容臣彙入青陽一案保獎之處出自

恩施至力戰陣亡之將弁二十四員名另繕清單應請

敕部從優議卹所有官軍乘勝克復石埭太平涇縣三城緣由謹繕摺由驛六百里具奏伏乞

皇上聖鑒訓示謹
奏

考
和
卷
十
五

五

克復巢含和三城並銅城關等隘摺

同日

同治元年四月初四

奏爲水陸各軍克復北岸巢縣含山和州三城並攻奪銅城關
雍家鎮裕溪口西梁山沿江四要隘恭摺馳報仰祈

聖鑒事竊自逆匪分踞江岸以北上援廬州下衛金陵全恃分
布堅城據守險要以通上下之氣而阻進兵之路江蘇布政司
曾國荃到防以後與水營總兵李成謀成發翔等熟商以爲欲
制賊命必先從巢縣下手欲攻巢縣必先從銅城關下手因分
撥陸隊會合水軍剋期進取三月十五日曾國荃自率十二營
由林台過河以偏巢縣東北一路令劉連捷副後南後等營赴
望城岡堅修營壘以扼巢縣正南一路復令朱寬義朱惟堂朱

洪章楊鎮南馬步各營助之詎營牆甫築數尺巢城之賊繞出
田埂分股來撲我軍排隊迎戰賊方少卻把總鄭安盛張興富
衝賊過猛歿於陣中朱洪章馳斬賊酋劉連捷朱寬義等揮軍
縱擊斃賊四百有奇餘悉潰走我望城岡之營駐紮既定曾國
荃派原駐運漕之陳湜蕭孚泗周惠堂等往約記名總兵成發
翔帶內河師船暨王東華蔡東祥等帶淮揚師船夾剿銅城閘
之賊維時成發翔先撥數營駛入清溪河而親率所部同淮揚
後營蔡東祥前營賴榮光右營陳東友中營陽利見來會於銅
城閘渡口十八日議以水師攻閘東石壘陸師攻閘西土壘我
軍齊進賊卽出拒戰不逾時成發翔陽利見帶隊登岸繞壘大

呼眾勇抽刃環刺遇者輒斃賊乃棄壘散竄石壘旣破土壘亦平立將該鎮克復銅城關之前則有雍家鎮爲焦湖之鎖鑰亦巢含之外藩水陸兩軍謀於十九日乘勝進取陳湜分制字營趨鎮之南蔡東祥及親兵營分旱隊趨鎮之北仍以戰艦數十密排水次萬礮同轟聲徹天半適總兵李成謀李朝斌彭楚漢羅進賢等帶外江水師由白馬嘴飛槳而來分路登岸四面環攻岸上賊眾悉遁入船河中賊划悉擊入水倖脫之賊十不及一此三月十五日擊退望城岡竄賊十八十九等日攻復銅城關雍家鎮之情形也先是雍家鎮一隘尙在攻而未下曾國荃親率陸師星夜渡河已至巢縣之北連營旂山鼓山放望岡一

帶王東華水師亦由清溪河進攻巢縣之東門外至是成發翔陽利見各率礮划先後駛抵河下併力奮攻時至夜分城上更鼓忽絕城中煙燄橫飛旋獲賊諜訊供逆酋僞顧王吳子孝僞封天義徐同江恐巢北陸師進而合圍歸路已斷焚屋焚糧圖向含山宵遁曾國荃急令劉連捷朱洪章朱寬義朱惟堂等營協同水師於二十日辰刻會復城池而自將張勝祿武明良李臣典等十三營及楊鎮南所部騎卒三路跟追縱軍截勦伏尸數十里乘勝馳抵含山城外該城守賊甫見敗賊之狂奔旋駭官軍之踵至聞風喪膽不敢拒戰相率竄奔各軍遂入含山縣城搜獲賊糧逾二千石撲殺餘匪近三百名會以日暮雨集徹

夜不停次日駐軍少息二十二日曾國荃拔營疾進行未中途
偵知巢含漏網之三賊渠收集醜黨尙在鉞魚觜過江乃以偏
師向鉞魚觜而以正兵進襲和州逆首僞東天義劉惟久僞伺
天安尹賢瑞未及糾眾交鋒各營哨以火毬火箭環城壘而轟
乘賊譁亂克城毀壘立復和州殺斃甚眾得礮械米穀尤多乘
勝追賊至鉞魚觜合軍勦洗江流盡赤此二十日連復巢縣含
山二十二日克復和州之情形也北岸要區悉爲我有所未得
者裕溪口而外尙有西梁山爲第一重險二十三日曾國荃統
全勝之師循江而上將與各水營共設攻取之謀乃師次木橋
鎮忽遇零匪七八百眾排列洲上呼舟爭渡卽派信字仁字嚴

字三營及馬隊一營繞出洲前圍而殺之無一得脫維時李成謀外江水師成發翔內河水師及蔡東祥等淮揚水師早至西梁山下令水勇各執長炬鎔斷截江鐵索飛駕師船環轟不下比曾國荃一軍馳至見該處倚山爲險深溝高壘礮眼層列勢難仰攻商令水師扼江面以擊賊船陸師布長圍以困賊壘籌商甫定適陳湜蕭孚泗亦引軍來助具述彭毓橘周惠堂等於本日會同蔡東祥陳東友成俞卿等水軍攻裕溪口克之隨戰於江心洲殺賊無算賊向北岸下游而竄乃知我軍在木橋鎮洲上圍殺一股卽裕溪口遁出之賊也是夜曾國荃冒雨結營偪壘而陣戶挑銳卒守要路以杜旁竄旋有數賊持書自投詭

稱賊目僞錠天義涂萬起已偷渡南岸餘願舉眾乞降曾國荃
察知情僞姑執之以觀其變二十四日嚮明賊乘雨猛火器不
燃竟悉眾踰壘而出向江洲一路衝走水師陸師爭起搏擊該
逆先有降約後有退志眾心紛亂引頸受誅尸駢洲次罕有脫
者遂奪取西梁山撥軍駐守此二十三日攻取裕溪口進勦江
心洲二十四日旋克西梁山之情形也臣伏查長江天塹久爲
賊踞自進兵北岸以來浹旬之間連克巢含和州三城並克要
隘四處西梁山古稱天險該逆所恃爲金陵門戶茲以輕兵奪
獲此關實足伸

天討而快人心除曾國荃不敢仰邀議敘外此次尤爲出力之

提督銜福建漳州鎮總兵李成謀請

交軍機處記名遇有提督缺出請

旨簡放提督銜浙江處州鎮總兵李朝斌請

交部從優議敘綏靖鎮總兵李濟清記名總兵成發翔左光培均請

賞加提督銜總兵銜副將彭楚漢羅進賢均請

交軍機處記名遇有總兵缺出請

旨簡放儘先副將鄧萬林請

賞給二品封典儘先副將何昌登請

賞給勇號儘先游擊郭仕林請免補游擊以參將儘先選用五

品軍功戴德祥請以千總儘先補用並請

賞戴藍翎加守備銜候補道劉連捷請

賞加按察使銜提督銜記名總兵張勝祿請

交部從優議敘副將蕭開印武明良朱寬義朱惟堂均請

交軍機處記名遇有總兵缺出請

旨簡放花翎副將蔡東祥王東華均請

賞給勇號花翎參將陳東友賴榮光均請以副將歸兩江補用

參將朱洪章李臣典楊鎮南均請以副將儘先推補道銜候補

知府陳湜請以道員歸部遇缺卽補花翎知府彭毓橘請

交軍機處記名遇有道員缺出請

旨簡放花翎游擊陽利見請以參將儘先補用並請

賞加副將銜花翎游擊銜都司成俞卿請以游擊儘先補用並

請

賞加參將銜陣亡把總鄭安盛張興富請

敕部從優議卹其餘在事出力員弁可否容臣開單奏獎出自

恩施所有水陸官軍克復兩縣一州攻奪沿江各要隘緣由謹

會同大學士湖廣總督臣官文安徽巡撫臣李續宜恭摺由驛

具陳伏乞

皇上聖鑒訓示謹

奏

克復繁昌縣城摺

同治

元年四月初四日

奏爲大股賊眾窺撲三山經官軍併力擊敗乘勢攻克繁昌縣城恭摺馳陳仰祈

聖鑒事竊三月十三四等日駐防三山花翎同知直隸州曾貞幹一軍迎擊竄匪迭獲大勝臣於二十四日附片具奏在案僞匡王賴文鴻既被重創遁入繁昌復約該處踞賊僞佐將林有志僞亞天豫吳大觜等於十八日糾黨八千餘人乘夜嘯聚松林口將謀再逞十九日昧爽由松林口分四路迤邐而來一股出汪家橋圖犯張唵所部唵字營一股出月子橋圖犯成東昂所部東字營一股出木雞山圖犯黃潤昌所部崑前崑後兩營

仍分月股從楓樹圩渡河潛至老山一帶冀襲諸營之後曾貞幹升高瞭望見附近村落煙燄不斷旌旗掩映林谷間往來如織或卻或前乘該逆尙未偪營卽令黃潤昌成東昂張陰等各出六成隊伍分道馳勦並令晏恭山恭字營陶保堂保字營抄出三華山麓策應各營兼備老山襲後之賊未幾賊隊齊至更番迎撲時值東北風盛利在火攻我軍以槍礮環轟火隨風猛對陣眯目不能仰視陰字崑字等營先將賴林二逆乘勢擊卻羣賊大亂倉皇欲遁逆渠吳大觜猶恃老山伏賊未發回鞭轉鬪驅眾向前曾貞幹親率曾正明葛東庭各營哨驟馬而至突入垓心槍擊吳大觜殪之縱橫盪決所向盡靡諸路敗匪先後

潰至馬口地方爭渡而溺者無數二十日曾貞幹謀知該逆退踞繁昌城內不敢復議出戰乘此有隙可圖定計潛師以襲之是晚漏甫二下傳令黃潤昌成東昂胡基茂等各撥兩哨攜帶雲梯偃旗息鼓向松林口疾馳而進會抵城下令崑前營趨北門崑後營趨東門東字營趨西門甯南門一面闕而不圍以恭保陰三營爲游兵截擊南路逸出之賊曾貞幹所帶湘恆營及曾正明親兵騎隊設伏於松林口內一應攻城之官軍一防蕪湖之賊援時至五更我營束薪爲炬火光突上礮聲環偪震撼城樓城賊驚起排列垛口亦以火器下擲相持未久天已向曙晏恭山陶保堂張陰等正思引軍助戰瞥見賴逆先率醜黨由

南門拔關而遁急回軍兜截曾貞幹率曾正明馬隊伏兵齊來夾擊賴逆奪路向南陵涇縣竄走維時薄城將士愈攻愈奮成東昂黃潤昌親昌矢石從西北門女牆缺處緣梯先登蹂升而上眾軍一擁盡入合力搜剿林逆率敗殘餘匪在亂軍中乘間潰逃遂於二十一日克復繁昌縣城計兩日之戰擒賊三十四人斃賊一千六百名所獲礮械不可數計伏查繁昌地處濱江淪陷八載上以屏障南陵下以犄角蕪湖此次屢挫逆鋒攻克堅城三山各營將弁著有微勞除曾貞幹係臣胞弟不敢仰邀議敘外所有尤爲出力之兩江補用參將曾正明請賞給勇號並請

賞加副將銜五品銜補用知縣黃潤昌請免補本班以同知直隸州知州補用並請

賞戴花翎補用副將直勇巴圖魯晏恭山請

賞加總兵銜兩江補用參將陶保堂成東昂均請

賞加副將銜參將銜兩江補用遊擊張唵請以參將儘先補用

把總胡基茂請以守備儘先補用並請

賞戴藍翎其餘出力員弁兵勇可否容臣查明彙案保獎以昭

激勸所有擊賊獲勝隨克繁昌縣城緣由謹繕摺由驛六百里

陳奏伏乞

皇上聖鑒訓示謹

奏

奏和卷十日

奏

近日軍情片

同治元年四月初四日

正封摺閒又接曾貞幹函稟三月二十七日水陸會同克復魯港要隘蕩平石壘石卡奪獲賊船賊礮甚多三十日克復南陵縣城其詳細戰狀俟具稟到日續行奏報統計近日大江南岸克復城池六座關隘一處北岸克復城池三座關隘四處均在萬壽前後半月之內多隆阿圍攻廬州狗逆固守不出四面援絕當易得手左宗棠一軍與偽侍王轉戰於常山江山一帶十六十八二十二等日屢獲勝仗掃蕩賊壘無數趙景賢久守湖州歸然尙存其三月初二日發出密信求援甚迫三月十三日發出密信賊勢少退情形稍鬆

臣

飭催鮑超一軍一面進圍甯

國一面派隊由廣德馳救湖州又另派游擊李楚材帶千餘人由績溪閒道援湖二者有一處先到或可保全湖州理合將近日各路軍情附呈梗概伏乞

皇上聖鑒謹

奏

克復旌德縣城摺

同治元年四月十五日

奏爲徽州防軍進攻旌德擊走踞匪遂將縣城克復恭摺馳陳
仰祈

聖鑒事竊自提督鮑超一軍連克青石太涇四縣以來旌德與
甯郡賊勢中斷不能聯爲一氣現駐徽州之福建臬司張運蘭
恐踞旌之賊窮極思竄鋌走徽境遂率所部湘營商同署皖南
鎮總兵唐義訓派強中禮後三營以剿爲防先發制之三月三
十日張運蘭引軍出湯口進次廟首諜聞賊在旌城堅伏未動
並分股在三溪地方往來哨探謹備官軍張運蘭知賊情震懼
乃集各營假旗息鼓乘夜疾進於四月初一日辰刻行抵距城

十里之跳生橋先飭陳玉恆帶中右營列旗兩岸復分舒翰張聲壯潘家麟張兆輝張遵恆各隊作爲游兵以防賊由三溪抄我後路仍親督諸將士懸軍深入一二三旗向北門以唐義謨蔣信玉強禮等營應之四五六旗向西門以張運桂中左營應之七八旗向南門以彭先俊楊道東中軍四壯應之比及城圍賊匿不出張運蘭密遣前敵軍士棄戈釋甲偃臥道旁故亂其伍以誘戰又從山後駐馬瞭望遙見城賊四五千眾陣腳漸動將欲伺隙出巢遂令攻北門之易開俊葉明瑞陳青雲攻西門之劉松山劉光明朱紹輝攻南門之黃萬友賀國秀等麾軍突起排礮仰轟競拔地鉞躍濠直進該逆惶急繞城環走飛石下

擊眾勇雖有傷亡而奮力爭先曾不少卻鼓聲礮聲猛若疾雷
轟塌北門城牆丈許西門城堞十餘處張運桂冒煙突火躬率
士卒螳附而升賊乃搶護堞口急以火器死拒我勇中槍而墜
者四人受傷甚多張運蘭恐有挫失暫令收軍以俟詰朝進攻
初二日昧爽各軍秣馬蓐食再圖決戰忽報城中之賊受創膽
落悉數宵遁一由烏嶺走甯國縣一由梅嶺走竄甯郡張運蘭
入城捕殺餘蟹張運桂會合各旗營馳斬尾股斃賊不少解散
脅從千餘人搜獲米糧數百石卽將縣城克復臣查旌德一城
山徑叢雜攻守非易饋運尤艱此次孤軍進取逾日告克可以
通徽甯之氣而固石太之防除將在事出力及接仗陣亡之員

弁兵勇容臣查明分別奏請獎卹外所有徽州防軍克復旌德
縣城緣由謹繕摺由驛具奏伏乞

皇上聖鑒訓示謹

奏

克魯港要隘復南陵縣城摺

同治元年四月十五日

奏爲水陸各軍會克魯港旋分陸師攻克南陵縣城恭摺具陳
仰祈

聖鑒事竊官軍連下魯港一隘南陵一城臣於四月初四日附
陳梗概聲明俟稟報到日續奏戰狀在案旋據選用同知直隸
州曾貞幹稟報繁昌旣拔之後謀知蕪湖賊援潛在魯港增黨
屯糧以圖抗拒遂商同總兵李成謀李濟清等水陸並攻爲日
後進取蕪湖之地三月二十六日曾貞幹率湘恆營及晏恭山
陶保堂張陰黃潤昌陸師五營進紮螃蟹磯之前李成謀正右
營及左光培彭楚漢郭仕林水師三營李濟清副中營及羅進


賢何昌登水師二營分泊臬磯並螳螂磯之下曾貞幹令各勇多備船筏搭造浮橋以濟陸兵仍由江口決開堤埂將彭楚漢所部舳板飛划從決口盡駛入港李成謀令戴德祥帶旱隊渡過南岸與入港之礮船緊相倚護二十七日曾貞幹黃潤昌張陞引軍渡浮橋而進專攻北岸賊壘晏恭山引軍循魯港隄邊而進陶保堂引軍循江邊大路而進合攻南岸賊壘李成謀督同各營官在江面乘駕師船轟擊水路之賊彭楚漢復從港內率水勇飛槳而出該逆腹背受敵撲水死者甚眾賊船百餘號賊礮數百尊悉爲我有兩岸陸師見賊勢已挫急向石壘石卡盡力奮攻又得水師各營登岸來助賊卽潰退立將三壘十餘


卡一律毀平遂復魯港餘匪悉向蕪湖竄走魯港既克之後所
可下達蕪湖而上蔽甯國者止有南陵一縣則亦以速取爲宜
二十九日曾貞幹飛調分守魯港之黃潤昌張陞等各率五成
隊伍由石碇渡河而南仍親率所部並晏恭山陶保堂成東昂
各營出繁昌山路整軍疾進密約四更時分各挾火具會抵南
陵城下初我軍之將攻魯港也繁昌戍卒抽調一空曾貞幹以
該處密邇南陵恐賊伺隙而動豫遣死士蓄髮易裝先往南陵
附城一帶相度營基暗插標識復揚言大兵卽日壓境以懾賊
心賊多自危不敢外竄至是曾貞幹帶同馬步諸軍乘夜猝至
薄城而營萬炬齊燃光燭數里城賊倉皇驚起疑我軍從天而

下一時呼眾登陴紛如螳旋手顛股栗火器不及燃發曾貞幹
揮令各營環城施礮猛擊逾時豁然一聲轟塌數丈眾軍從城
缺攀躋而入縱橫擊刺所向盡靡賊乃擁至東門望甯國一路
而逃卽於三十日卯刻克復南陵縣城城中捕斬五百餘級搜
獲米穀礮械甚夥臣查魯港爲蕪湖門戶南陵亦甯郡藩籬數
日之間相繼攻克從此分道進兵規取甯蕪可無後顧之慮在
事員弁著有微勞可否彙入繁昌案內容臣查明保獎之處恭
候

聖裁所有官軍會克魯港要隘旋復南陵縣城緣由謹繕摺由
驛馳奏伏乞

皇上聖鑒訓示再臣玉麟現在馳赴下游駐紮銅陵督帶各營
赴前敵西梁山一帶察看進兵形勢合併陳明謹
奏





PL
2728
.A1
1876
v.17

曾文正公奏稿

卷之十六目錄

克復太平蕪湖兩城摺

同治元年五月初三日

議覆王慶雲漕督兼巡撫原奏片

派員辦廣東釐金片

官軍水陸並進疊克要隘駐軍雨花台摺

五月十七日

參革陳由立等摺

全日

查覆馮子材兵勇滋鬧情形片

近日軍情片

鮑超軍進攻甯郡勦平逆壘摺

五月十九日



黃翼升署江南提督片

謝弟國荃優敘貞幹勇號恩摺

五月二十七日

議覆兼攝通商大臣摺

六月初六日

近日軍情片

議覆調印度兵助剿摺

六月二十二日

近日軍情片

江西被害州縣蠲免錢漕分數摺

七月初二日

金陵陸師勝仗張勝祿請卹摺

全日

克復甯國府城摺

全日

懇豁免江西歷案攤捐款項片

童容海投誠片

巡撫李續宜聞訃丁憂摺

七月初十日

近日軍情片

代奏李續宜謝恩摺

七月二十一日

查上次摺片並報近日軍情片

奉旨垂詢各路軍情分條覆奏摺

八月十二日

籌辦廣德受降事宜分別遣留摺

全日

近日軍情片

覆陳河南募勇另派統領片

查覆嚴樹森被參各情摺

八月二十九日

查覆何桂清退守情形摺

全日

查覆薛煥吳煦參款片

近日軍情片

唐訓方駐紮臨淮摺

閏八月十二日

請簡親信大臣會辦軍務片

克復太平蕪湖兩城摺

同治元年五月初三日

奏爲水陸各軍渡江夾剿克復太平府城蕪湖縣城並克金柱關東梁山各要隘恭摺馳陳仰祈

聖鑒事竊自逆匪竄踞金陵以蕪湖爲屏障以東西梁山爲鎖鑰尤以金柱關之僞城爲關鍵官軍旣克北岸之西梁山賊於南岸三處防守尤嚴臣玉麟與曾國荃定計必從金柱關入手則蕪湖與金陵老巢橫中截斷賊勢乃孤遂飭總兵李成謀於四月初五日會督各營師船由鍼魚嘴駛進采石磯江口焚船毀壘率勇登岸突薄金柱關僞城萬礮轟擊幾將得手以東梁山賊援大至整隊而還臣等知該處地險城堅非水陸併攻不

能制賊死命乃將上游水師悉調赴裕溪口以下二十日曾國
荃率馬步十五營自西梁山駕舟南渡近逼金柱關下沿隄結
營臣玉麟恐築壘未固賊將擾我陸師乃派李朝斌帶外江新
右營暨喻俊明任星元王吉內河水師三營從上游奮攻以躡
賊後派成發翔鄧萬林內河左右營暨王明山萬化林郭明鼇
唐學發外江水師四營黃翼升陽利見陳東友張元龍成俞卿
楊宏勝王東華蔡東祥淮揚水師八營從下游環擊以逼賊前
曾國荃立營既定料金柱關之賊有水軍牽制不暇顧及太平
府一路乃率各營哨潛分隊伍捲旂疾馳遙望賊在北門修卡
立即揮軍掩襲斬卡突進賊方駭走入城閉關不及我軍擁進

北門羣逆狂奔驅出南門截殺三百餘級遂復府城蓋賊不料官軍越蕪湖而先攻金柱關尤不料甫抵金柱遽襲郡城此四月二十日克復太平府城之情形也是夜水師眾營輪攻金柱關並未收隊二十一日王明山率外江四營先赴下游鍼魚嘴一帶臣玉麟親率成發翔李朝斌任星元王吉張元龍等循隄周視布壘若垤中峙僞城雄亘數里未易猝攻旋又瞭見曾國荃一軍已繞出三汊河上駟渡對河而陣鏖戰方酣遂相率還營分水師爲三隊以一隊守定江路以一隊衝入內河直逼塔下以一隊輦礮登陸環城壘而轟牆圯棟折屋瓦皆飛賊亦矢石如雨蔽空而下時近夜分黃翼升李朝斌成發翔束草爲炬

指麾督戰陽利見王吉帶同弁勇蛇行而進將越濠溝外委王有章中槍殞命眾軍愈戰愈奮羣以火箭飛射西門哨樓賊於烈燄中衝突而出各水勇躍上隄埂短兵擊刺積骸滿渠卽時攻復金柱關而分撥黃翼升成發翔賴榮光蔡東祥張光泰王東華楊宏勝張元龍等數營乘風上駛往襲東梁山時值曾國荃陸軍擊退內河西岸之賊引軍來助甫將僞城及三汊河上駟渡數十壘一律毀平獲大礮二百七十餘尊旂幟刀矛萬餘件而諜者又報東梁山經黃翼升成發翔等一戰而下已移軍進次蕪湖此二十一日連克金柱關東梁山之情形也先是蕪湖賊目陳星斗沈國萬陳太和黃品來等經選用同知曾貞幹

密令黃潤昌設法招撫本有大兵臨境舉眾內應之約至是金柱關東梁山相繼攻拔蕪賊已成孤注正可乘其自疑而圖之二十二日曾貞幹自率所部將領及周萬倬劉祥勝新後祥後等軍循江而進偪壘立營並會商李成謀決開隄岸駛入小划四面合圍適黃翼升成發翔所統淮揚內河各水師自金柱關乘勝飛槳而來萬礮同轟聲震天半羣賊內亂棄壘潰奔圍而殺之幾無脫者城賊惶懼失措悉向官陡門濮家店而逸維時曾國荃親督部隊躡賊至戴橋地方聞蕪湖已復揣該縣逸出之賊必折竄而東一面令彭毓橘設伏於薛鎮渡口一面以輕騎追及於賈家灣乘賊半濟突起奮截殺斃甚夥生擒近二百

名賊乃轉走護駕墩掠舟偷渡李朝斌帶各哨舢板自小花津橫出截之薄暮鏖戰至三更水師傷亡甚多李朝斌不肯稍退比及黎明賊趨薛鎮渡口適爲彭毓橘伏兵所敗除殲斃溺斃外生擒至七百五十餘名之多釋放面有刺字者餘皆駢誅黃翼升擊賊於清水河俘馘亦以千計蕪湖東梁賊黨漏網無幾此二十二日克復蕪湖縣城並追賊疊勝之情形也王明山所帶四營之赴鍼魚嘴者二十二日抵烏江鎮該鎮對岸有烈山石壘二座斜對九洑洲爲犄角之勢王明山帶各船渡江逼壘攻擊逾時壘中旗亂我師各船分泊上下兩岸俟賊出壘登岸截擊擒斬無算立破堅卡其九洑洲之上面又有大勝關賊壘

一座礮船護之王明山環攻逆壘未遽得手萬化林將江中賊船全行焚燬賊大震奪路狂奔我軍四面蹙之剗平逆壘奪獲鎗礮極多此又王明山等攻克太平以下兩卡之情形也臣等伏查太平府屬莫要於蕪湖一城尤莫重於金柱關一隘自攻奪此關未逾三日上下名城要隘悉爲我有從此全局一振上而甯國下而金陵均有可乘之機除曾國荃曾貞幹不敢仰邀議敘外此次尤爲出力之員相應繕具清單籲懇

恩施以昭激勸陣亡各將弁俟查明另單請卹其餘在事出力員弁兵勇可否容臣等查明奏獎之處恭候

訓示遵行所有水陸官軍連克府縣兩城沿江各要隘緣由謹

會同大學士湖廣督臣官文安徽巡撫臣李續宜恭摺由驛六
百里具奏伏乞

皇上聖鑒訓示謹
奏

議覆王慶雲漕督兼巡撫原奏片同治元年五月初三日

再臣承准議政王軍機大臣字寄同治元年二月二十三日奉
上諭據王慶雲奏江北地當衝要現在督撫分駐鞭長莫及請
就近暫歸漕運總督辦理一摺據稱自蘇常失陷巡撫以下駐
紮上海偏隅與江北各屬道途中梗而守令之升調與夫錢穀
刑名仍須稟詳江蘇巡撫覈辦輾轉需時其公事之棘手不問
可知曾國藩統領全師兼顧浙皖恐不暇注意地方都興阿等
運籌軍務於吏治民生亦無暇講求守令功過不明何以整頓
地方保衛完善現在南糧未能挽運漕運總督公事無多請頒
給敕書令其巡撫江甯布政司所屬地方仍兼辦全漕事務並

於各屬適中之地設爲省會將江甯藩司暫移江北兩淮運司兼辦江北刑名驛傳事件與漕督藩司同駐一城地方公務均歸漕督辦理無須復歸江蘇統轄等語著曾國藩都興阿體察情形悉心會議具奏原摺著鈔給閱看等因欽此臣查王慶雲所奏尚係咸豐十年蘇常初失時情形至十一年春閒上海粗定江北各屬與巡撫衙門文報常通紀綱漸立逮安慶克復以後蘇省官紳紛紛來臣處請兵設立水驛專用輪船遞送文書往返不過旬日李鴻章抵滬以來聲息不隔呼應尤靈凡總督衙門應辦事件臣儘可照常管理未敢將地方公務概行廢閣臣於上年十一月二十五日覆奏摺內卽建議巡撫宜駐鎮江

欽奉

諭旨俞允嗣因蘇人以重價雇船來迎李鴻章先赴上海以答輿情俟料理就緒卽當速移鎮江以符原議論江蘇之幅員蘇州偏於南隅淮安偏於北隅惟鎮江居適中之地而又扼形勝之區於軍務地方兩者俱可攬其全綱自應仍照舊制責成新任撫臣李鴻章統籌兼顧溯查咸豐四年皖江南北賊氛中斷廷臣請設皖南巡撫部議以窒礙而未行該尙書王慶雲請改漕督爲江北巡撫另設省會之處事同一律應請毋庸置議所有遵

旨會議緣由謹會同江甯將軍臣都興阿附片覆陳伏乞

皇上聖鑒謹

奏

派員辦廣東釐金片

同治元年五月初三日

再臣前奏請簡派大員督辦廣東全省釐金解濟江浙軍餉三月二十七日奉

寄諭廣東釐金現派晏端書督辦並諭令由海道前往以期迅速卽著曾國藩遴委賢員隨同赴粵辦理等因欽此又三月二十九日奉

寄諭耆齡奏交卸撫篆調練籌餉一摺該撫遵旨赴閩亦專爲援浙起見所請抽釐濟餉之處自應准其試辦惟同一江浙軍餉同一廣東釐捐而耆齡辦之於始晏端書籌之於後一事兩歧恐有事權不一之患著晏端書恪遵前旨迅由海道馳赴廣

東與勞崇光將一切釐金事宜妥商籌辦其江浙皖省之餉與
耆齡援浙所需應如何分別籌解及歸併報銷之處並著與曾
國藩耆齡面商妥議具奏等因欽此仰蒙

皇上俯念餉需緊迫指示周詳曷勝欽感晏端書何日起程赴
粵尚未接其來信抽釐經始之際諸事紛繁必須廉正明幹熟
悉釐務之員隨同辦理擬派在籍布政使銜江西卽用道黃冕
江西贛南道李瀚章按察使銜記名道趙煥聯補用道蔡應嵩
卽日馳赴韶關創議規條部署一切又派湖南補用知府顏培
鼎前署江西廬陵縣丁日昌前署江西餘干縣陶慶仍隨同前
往分赴各卡妥立章程其廣東官員中擬派糧儲道蔣志章會

商妥辦虎門同知吳贊城隨同經理此九人者類皆才識閑遠
條理精詳總期滴滴歸公無病於廣東商民有益於江浙軍務
其如何分解之處臣已畱商晏端書應由該副都御史於抵粵
後會商具奏謹附片陳明伏乞

皇上聖鑒訓示謹

奏

一

一

十

官軍水陸並進疊克要隘駐軍雨花台摺

同治元年五月十七日

奏爲官軍水陸並進疊復秣陵關江心洲等要隘六處圍逼金陵駐軍雨花台恭摺馳陳仰祈

聖鑒事竊自水師陸師渡江夾剿攻克太平蕪湖兩城江岸數隘臣等於五月初三日會奏在案旋報丹陽鎮大股賊黨因薛鎮戰敗焚糧宵遁江蘇藩司曾國荃於四月二十八日率所部各營乘勝前進破周村卡遂駐江甯鎮之板橋地方熟察形勢必從大勝關三汊河下手陸師乃有運糧之路水師乃有立營之所然橫距三十里外尙有秣陵一關環水巍峙金陵之雄鎮亦大勝關之右輔也賊備未嚴是可襲而取之五月初一日曾

國荃引軍馳抵關下毀壘殺賊轉戰無前守關賊酋汪伍登尙彪周蘭璧等舉眾獻關得驢馬二十一匹收降卒四百餘人餘悉解散仍飛飭前隊十二營進大定坊繞出三汭河後緊逼大勝關編木作橋爲詰朝進攻計初二日曾國荃派撥軍士先伏橋邊而以後隊六營捲旂疾進將謀合圍賊見我軍抄後懼爲長圍所困乘夜縱火棄巢而走公字敏字義字長勝等營踰橋追襲戮賊數百遂奪大勝關三汭河兩壘平之此五月初一二等日攻復秣陵關大勝關三汭河之情形也維時臣玉麟駐師金柱關聞曾國荃懸軍深入恐其爲賊所乘急約提督王明山率水師各營分載和州守卒渡江策應甫由烈山駛近頭關適

曾國荃亦於初三日昧爽整旅而來薄關下寨眾水勇於狂風
巨浪中排礮仰擊無或少休陸軍乘之立拔頭關過此以往則
爲江心洲堅大石壘倚洲雙聳對岸賊眾如麻臣王麟會同王
明山親督萬化林王吉成發翔郭明鼇唐學發陳百嚮喻俊明
彭楚漢等八營直偪洲次飛礮入壘賊亦穴牆還擊羣子蔽天
而下士卒傷亡裹尸更進戰至日晡各勇挾火具登岸蛇行蘆
葦中偪壘縱焚燎及蘆葦一片火光江面人聲喧若鼎沸我軍
振臂齊呼躍入賊牆燒薙羣醜撲火溺水橫塞江流賊船百餘
號賊礮數百尊悉爲我有登岸水勇仍上師船鼓槳飛行並奪
蒲包洲遂泊金陵之護城河口曾國荃由陸路倚護水師驅軍

直入偏紫雨花台距城不及四里城賊數來窺犯輒行擊卻此初三日連復頭關江心洲蒲包洲之情形也臣等查金陵城大而堅未易猝拔前向榮和春等屯兵七萬歷時八年師老無功此次水陸兵數僅逾二萬雖濱江重險先後攻奪尚難遽爲仰攻之策應俟曾貞幹六營多隆阿一軍增調到防再籌大舉所有出力將弁兵勇可否容臣等歸於太平蕪湖案內擇尤保獎出自

恩施所有水陸各軍疊復沿江要隘圍偏金陵緣由謹會同大學士湖廣督臣官文安徽撫臣李續宜由驛陳奏伏乞

皇上聖鑒訓示謹奏

參革陳由立等摺

同治元年五月十七日

奏爲特參私行遠颺之將領請

旨革職以肅軍紀事竊提督銜記名總兵福建延平協副將陳由立前奉

諭旨飭赴河南軍營當以圍攻青陽正緊經臣奏畱鮑超原營
隨同進剿欽奉

諭旨允准轉飭欽遵在案茲據鮑超呈稱該員畱營以來不知
感奮輒因上年有降補守備鄭陽和藉故告假私往湖南投効
統帶多營之事相形見絀遂生觖望竟與記名總兵余大勝先
後託病請假始在大通養病旋赴湖北就醫且甫離營次卽遣

人潛誘哨弁搖惑軍心相率颺去現聞尚在湖南一帶呈請將
陳由立余大勝鄭陽和奏參並將本年隨同陳由立颺去之李
殿華等十六員隨同余大勝颺去之吳太等九員上年隨鄭陽
和颺去之遊擊龍德亮等三十八員一併參革等情前來又疊
准湖南撫臣毛鴻賓來咨鄭陽和已令帶勇千餘防守邊境河
南撫臣鄭元善來函陳由立已行抵河南仍委令赴湘募勇三
千各等因到臣伏查該員陳由立起自勇丁曾不數年保至總
兵加提督銜補授副將實缺職位不爲不崇余大勝鄭陽和亦
均保至總鎮受

恩不爲不渥與鮑超相從日久同甘共苦乃並不具稟候批因

假離營任意遠颺實屬大干軍令若不嚴行懲辦則此風一開以軍營爲傳舍之地以投効爲遁逃之藪流弊甚長關繫極大相應請

旨將提督銜記名總兵福建延平協副將陳由立記名總兵儘先補用副將余大勝記名總兵降補守備鄭陽和一併革職并請

敕下湖南撫臣撤去鄭陽和帶勇差使查明陳由立余大勝等均不許招勇立營不許逗畱境內派員押回皖南原營責令立功自贖其被誘颺去之李殿華吳太龍德亮等受人指嗾從寬免其參革亦令回營効力仍求

皇上通諭各路軍營於外來投効將弁非有統兵大員移咨文
件概弗准畱庶可懲跋扈之風而杜效尤之漸除將陳由立副
將劉付送部註銷外理合恭摺具奏伏乞

聖鑒訓示謹

奏

遵查馮子材兵勇滋鬧情形片

同治元年五月十七日

再臣承准議政王軍機大臣字寄同治元年二月二十二日奉
上諭鎮江防剿最關緊要馮子材在鎮日久熟悉地方情形且
逆匪屢次撲城尙能抵禦是以令其暫緩赴滬仍畱鎮江督辦
軍務若如海全所奏馮子材於所存捐項並不隨時支放口糧
以致兵勇譁然揚言搶掠公署尙復成何事體都興阿駐紮江
北去鎮城甚近自必確有所聞前請將馮子材調赴上海但云
上海無帶兵之將而於馮子材有褒語無貶詞著都興阿將海
全所奏各情先行據實馳奏若果如海全所奏馮子材撫綏兵
勇未能帖服卽著據實指參毋庸有所顧忌知而不言致滋貽

誤並著曾國藩將鎮江兵勇滋鬧情形及馮子材有無存錢不放情事確切查明另行據實具奏等因欽此臣遵卽恭錄

諭旨咨由署江蘇撫臣李鴻章派員前往確切密查茲准查復

該委員常州府知府薛書常馳抵鎮江徧訪商民僉稱賒米搶掠實係鎮營兵勇滋事惟羣起爭奪之時眾口譁噪亦難保無江北兵勇在內迨馮子材派兵查拏海全袒護部下派隊抵禦彼此生隙盡歸罪於江南兵勇係屬實情至都天廟釐金一項經前後各委員收放均屬有案可稽該卡自上年十月起全歸籌餉總局抽收至十二月僅將貨捐一項改歸馮子材派員經收爲數寥寥遠不逮總局全收之多該兵勇未知底細以爲同

此一卡前盈後絀妄生猜疑謂馮子材存錢不放係屬臆度之詞等因前來臣復加察訪自二月以後鎮江餉缺如故而兵勇亦未聞續有滋擾情事則前此謂統帥存錢不放由於妄生狐疑理尙可信所有遵

旨飭查緣由理合據實覆陳伏乞

聖鑒謹

奏

近日軍情片

同治元年五月十七日

再近日軍情自僞輔王楊七麻子退回甯國後浙東之賊勢稍
鬆江西之邊防亦固僞侍王尚在衢州一帶左宗棠分兵畱守
開化馬金街以固徽婺之防親率馬步各營赴衢剿辦劉培元
所部已由玉山入浙仍俟蔣益澧大隊到防方可由衢嚴兩郡
分道而進鮑超一軍於初四日大獲勝仗攻克寒亭管家橋等
處賊壘移營進紮節節阻戰尙距甯郡十餘里據江蘇候補府
趙炳麟稟稱探聞湖州於五月初三日失守鮑超以甯國賊勢
太重萬難抽兵援湖李楚材聞道赴援不知何處梗阻亦未趕
到臣一聞此信且愧且憤俟探明確實續行具奏曾國荃一軍

由太平下逼金陵本得建瓴之勢惟該城前此數年圍師七萬
此次兵僅萬餘屯紮南面一隅洪逆見慣不驚似無恒懼之情
臣擬調多隆阿一軍前往會剿趁此軍威極盛之際四面猛攻
當可得手此時各省多故處處須兵臣愚謂宜以全力會辦江
南先復財賦之區克一城有一城之利拓一里取一里之財究
竟遠勝於他省但使每年能解蘇漕百餘萬石淮課數百萬兩
進京俾戶部稍資周轉

京師根本之地有恃不恐則各省可次第勦辦矣俟函商官文
多隆阿定議行之除鮑超初四之捷另行奏報外理合附片具
陳伏乞

聖鑒訓示謹

奏

卷之六

鮑超軍進攻甯郡剿平逆壘摺

同治元年五月十九日

奏爲鮑超一軍進攻甯郡破賊於寒亭管家橋等處諸壘悉平恭摺馳陳仰祈

聖鑒事竊浙江提督鮑超統率馬步各軍於四月二十五日由青陽拔隊前進甫抵青弋江結筏東渡諜報僞輔王楊逆糾眾十餘萬堅守甯國府城僞對王洪逆一股屯聚團山圖犯蕪湖南陵等縣僞衛王楊雄清一股踞紮寒亭獅子山分擾梅家店管家橋一帶以阻進兵之路鮑超知賊勢方盛未可猝撓其鋒乃於抱龍岡隔河布營濬治牆濠不遽出戰以懈賊心仍帶各營哨循山徑而入勘明地勢於五月初四日先遣劉玉堂吳騰

芳二營黃慶唐仁廉李文益三營潛渡山岡分道設伏復飭周有勝馬勝奎所部進薄寒亭散布隊伍誘賊出壘鮑超親督將士繞越翟村木瓜橋涉淺過河令總兵婁雲慶劉順隆王衍慶諸營突從左路進以韋志俊志字四營繼之令宋國永譚勝達熊鐵生諸營突從右路進以翦炳南段大有兩營繼之維時寒亭之賊方以周有勝馬勝奎孤軍深入絕無後援可吞而取也遂出巢猛鬪益逞梟悍瞥見左右兩路大軍掩至正在旁皇卻顧乃附近村落中羣賊響應擁眾齊出排列山梁數逾四萬鮑超遂令顏紹榮陳得勝楊鎮魁等騰蹕而入直搗中堅縱橫盪決將弁頗有損折明興伍華瀚以騎隊抄出管家橋先翦其右

翼宋國永譚勝達婁雲慶劉順隆王衍慶熊鐵生等橫躍入陣
衝賊數段不復成伍適山岡後伏兵亦發扼斷歸路唐仁廉擒
僞順天安楊民清僞撫天福黎奉民於陣馬勝奎周有勝乘勢
搶過寒亭浮橋徑取護橋二壘毀之賊乃負創驚潰眾軍追襲
二十餘里將寒亭管家橋梅家店直至獅子山賊館數十處賊
壘三十五座同時踣平一路斃賊六千有奇楊雄清糾合零匪
遁回甯郡臣查甯國一城屏蔽蘇浙爲賊與我所必爭之地近
日南岸連克數城敗賊多萃於此聞逆黨聚至二十萬之多臣
深以兵力單薄爲慮自有此捷則已復之數縣賊或不暇復萌
窺伺而我軍節節進攻圍偪郡城亦漸有可乘之隙除仍檄令

速籌攻取外此次陣亡將弁十八員名另繕清單應請

敕部從優議卹所有官軍擊賊獲勝勦平塞亭管家橋等處逆
壘緣由謹繕摺由驛具奏伏乞

皇上聖鑒訓示謹

奏

黃翼升署江南提督片

同治元年五月十九日

再臣欽奉

寄諭署提督曾秉忠於洙涇剿賊挫敗本日已明降諭旨將該員革職飭令赴該大臣軍營効力江南水師提督職任緊要俟曾國藩所派之帶兵大員到後卽令接署以資得力等因欽此臣查江南營務廢弛提督一缺須有久歷戎行威望素著之人前往署理方足以資整頓查有提督銜已保記名提督淮揚鎮總兵黃翼升樸實果敢愛士耐勞自咸豐十年七月間經

臣奏

派與李鴻章共帶淮揚水師蒙

先皇帝簡授今職屢著戰功現在統帶師船於本月十二日駛

過金陵前赴鎮江上海一帶應遵

旨令其接署江南水師提督員缺松滬各軍悉歸節制必能與
李鴻章講求軍事相與有成是否有當伏乞

聖鑒訓示謹

奏

謝弟國荃優敘貞幹加勇號 恩摺

同治元年五月二十七日

奏爲恭謝

天恩仰祈

聖鑒事竊

臣

於五月初一日接准兵部火票遞到同治元年四

月十六日內閣奉

上諭曾國荃等宣力戎行連克要隘洵足以櫛賊魄而快人心
頭品頂戴江蘇布政使曾國荃著交部從優議敘候選同知直
隸州知州曾貞幹著賞給迅勇巴圖魯名號以示鼓勵等因欽
此臣當卽恭設香案望

闕叩頭謝

奏稿卷十六
恩訖伏念臣同胞既翕異數頻叨曾籲金陵未克以前不敢再邀

渥澤豈期

玉陛酬庸之典復蒙疊沛

殊恩錄毫末之微勞

命勲曹以優敘勛庸公之迅奏

賜勇爵以嘉名

天語彌溫臣心增懼曾涓埃之莫報實感悚以交并臣惟有督

飭臣弟等乘勝進攻剋期會勦勤以補拙愼以圖功集四七之

將材同收六代虎踞龍蟠之地宣

九重之

恩德一慰三吳水深火熱之民所有微臣感激下忱理合繕摺

恭謝

天恩伏乞

皇上聖鑒謹

奏

奏和卷一

奏和卷一

議覆兼攝通商大臣摺

同治元年六月初六日

奏爲遵

旨籌議恭摺覆陳仰祈

聖鑒事同治元年五月二十九日承准議政王軍機大臣字寄
五月十七日奉

上諭前因薛煥熟悉外國情形諭令以頭品頂戴充辦理通商
事務大臣並疊諭將洋人協勦諸事會商新署巡撫李鴻章妥
爲經理茲據薛煥奏南洋通商各口事隸將軍督撫監督辦理
若專設大臣統轄地方較多鞭長莫及事勢亦多格礙該大臣
稽察稅務多屬具文而一切辦公經費以及書吏差役等項經

費均需添設稽祿虛糜於事無益請卽裁撤各歸本省督撫將
軍經理並片陳長江通商事屬創始必須平時勦望隆重乃能
聳服遠人請於官文曾國藩特簡一員兼領其事各等語南洋
通商大臣本係道光年間經考英等議定設立以爲交涉事件
在外交辦之計迨英法各國公使駐京後一切緊要之件均由
總理衙門辦理其餘關稅事務則由管關之監督道員會同各
國領事官經理仍由該省將軍督撫稽察已足以資控馭上海
雖爲各國匯集之所而所設祇有領事官若該道辦理得宜巡
撫妥爲稽察則諸務已有責成所請裁撤之處洵爲因時制宜
欽差大臣本係改爲兩江總督兼攝曾國藩威望遠著爲外國

人所驚服長江通商事務由該大臣經畫自能措置合宜惟前
因曾國藩辦理軍務在江面布置昕夕不遑若再任以通商事
務非所以示體諒現在江面肅清應如何妥爲兼籌之處卽著
酌量情形迅速具奏薛煥所稱南省宜以督撫兼領其駐紮之
地須離洋人稍遠辦理方可順手倘李鴻章駐鎮以後能否兼
顧無誤曾國藩從前曾經議及並著一併詳籌奏聞等因欽此
仰見

皇上循名責實因時變通之至意臣才識凡庸於西洋通商事
宜尤未諳究第就各省海口論之則外洋之通商正與內地之
鹽務相同通商係以海外之土產行銷於中華鹽務亦以海濱

之場產行銷於口岸通商始於廣東由閩浙而江蘇而山東以達於天津鹽務亦起於廣東由閩浙而江蘇而山東以達於天津通商之有五口大臣三口大臣猶鹽務之有兩淮鹽政長蘆鹽政也通商之有監督關道猶鹽務之有運司鹽道也通商之綜匯於總理衙門猶鹽務之綜匯於戶部也通商惟長江交易最廣以漢口爲都會亦猶鹽務惟兩淮引地最廣以漢口爲都會也今薛煥請裁南洋通商大臣歸併地方亦猶道光十年陶澍請裁兩淮鹽政歸併總督也以南洋之廣設一大臣統轄江楚蘇浙閩粵六省數千里之遠薛煥所稱鞭長莫及誠屬實在情形所有廣東福建浙江三省應遵此次

諭旨卽由監督道員經理將軍督撫稽察已足以資控馭至長江深入腹地路遠事繁臣竊以爲當分別辦理自輪船入鄂以來洋人蹤迹幾徧沿江郡縣或傳教於僻壤採茶於深山違一言而嫌隙遽開牽一髮而全神俱動關道以洋人恃其凶橫而不敢誰何督撫以洋務非其專責而不肯深究勢必至睚眦小忿皆取決於總理衙門道途太遠後患孔長且立法之初當規久大之計柔遠之事必擇專精之人今日求一二精於洋務者尙難其選而謂此後數十百年沿江兩督四撫一一求精於洋務者而爲之豈可得哉臣愚謂此缺似不可裁宜改爲長江通商大臣專辦濱江四省中外交涉事件或駐鎮江金陵或駐漢

口九江添設官屬書役若干廉俸經費若干應請

敕下總理衙門會同該部核議其漢人洋人之大小詞訟在滬
在鄂之正子各稅何者由通商大臣專決何者歸總理衙門核
覆亦應與駐京公使熟議其北洋三口通商事同一律均宜討
論職掌永定章程區區愚見蓋爲數省計久長非爲一人圖推
諉也至兩江總督一缺統轄三省文武兼管漕河兩端鹽務又
其專責卽在承平之際幹濟之才已覺竭蹶不遑况以微臣迂
鈍之質又值髮逆糜爛之餘夙夜憂懼顛躓實在意中不敢因
偶爾之戰勝倘來之虛名遂自忘其醜陋軍務未竣之前臣實
不能兼辦通商事件署撫臣李鴻章資望尙淺軍事方殷亦於

洋務不甚相宜伏求

皇太后

皇上曲賜鑒諒臣等幸甚倘蒙

天恩另設長江通商大臣則所轄地方有關涉洋務者臣仍當悉心籌畫公家之利知無不爲昔年兩淮鹽政未裁之前江督亦有緝私督運之責湖廣亦有查引督銷之責今於通商推其意以行之官文總理於上游臣則稽查於下游不敢因別有專員遂爾置身事外上負

聖主委任之意所有遵

旨迅速籌議緣由恭摺由驛六百里覆奏伏乞

聖鑒訓示謹
奏

近日軍情片

同治元年六月初六日

再近日軍情嘉定青浦兩城被髮逆巨股圍攻洋兵力不能敵
退至上海逆燄彌熾李鴻章所派湘淮各勇駐紮虹橋者被髮
逆四面圍裹李鴻章親往援救二十一日內外夾擊獲大勝仗
惟賊氛環逼李鴻章目下斷不能移駐鎮江楊載福於二十三
日到皖後旋至舒城與李續宜會晤一次再行駛往金陵籌商
戰守事宜曾國荃圍金陵之師於五月十二十三日在雨花台
獲勝一次惟地面太寬兵力太單多隆阿又統兵入陝不能踐
東下會剿之約近聞偽忠王蘇州大股將援金陵陸路孤軍深
入旁近無勁旅援應頗爲可慮而今年上游兩岸氣勢百倍金

陵失此可乘之機又成持久之局尤爲可惜鮑超一軍於十五日進攻甯國之抱龍岡等處連平賊壘獲一大勝已逾敬亭山三面圍逼甯國賊多糧少當可得手除鮑超曾國荃兩處詳細戰狀容臣彙案續報外謹先附陳梗概伏乞

聖鑒謹

奏

議覆調印度兵助剿摺

同治元年六月二十二日

奏爲遵奉

諭旨妥議具奏事同治元年五月二十九日承准議政王軍機大臣字寄五月十七日奉

上諭總理各國事務衙門奏據崇厚函稱詢據英國領事官吉必勛聲稱青浦嘉定二城髮逆大隊湧至華爾察看情形難以抵禦現在退回上海休息有另調印度兵來秋閒大舉之說崇厚擬請許其興兵約其助剿以收有用之效該王大臣等慮及外國兵入內地攻剿不特得一處代守一處足爲中國腹心之患卽得一處焚燬一處如嘉定青浦二城亦實爲地方瘡痍之

災東南蹂躪不堪何可再受外兵之擾請飭曾國藩等於外國
兵未到之先激勵三軍將蘇杭要地先行收復否則設法防範
或與印度兵同力合作不致滋擾等語借兵助剿之議疊經曾
國藩等先後覆奏僉稱有害無利前因上海喫緊英法兩國幫
同戰守是以姑示羈縻未經阻止該兩國與髮逆仇隙已深若
徑調大兵分路進攻翦除髮逆固屬大快人心惟若盡如嘉定
青浦之勢則利不償害且恐守以西兵運掉不能由我爲患曷
可勝言現在江南之師連克名城已成破竹之勢曾國藩函致
總理衙門擬令黃翼升統帶水師由松滬直入太湖以爲進兵
之路甚合機宜著該大臣卽乘此聲勢督飭各軍進逼金陵迅

圖克復李鴻章將上海事宜布置後亦卽趕赴鎮江由句容一路會師進剿兩路夾攻可期得手若金陵旣拔則蘇常勢必瓦解官軍可一鼓成功各要地均爲我有自可杜外國覬覦之心卽屆時調兵前來見我兵旣已得手則無所更用彼力自必廢然思返萬一金陵尙難遽拔而印度大隊已到應如何豫籌兵勇以備臨時會同攻取不致授柄於彼之處著曾國藩等會商妥議總期防患未然免致臨時失措總理各國事務衙門原摺片均著鈔給閱看等因欽此六月初九日復奉五月二十五日寄諭近聞洋人因官軍近取金陵擬撥輪船前來助剿好勝爭功是其故態若必待西兵會剿將來攻克金陵後必啟其輕視

奏稿卷十一
之心該大臣等務當激勵各軍乘此破竹之勢進逼金陵迅圖克復毋令洋人以助勦爲名轉致另生枝節等因欽此伏查咸豐十年十月蒙

先帝垂詢俄法兩國助勦之事臣覆奏以爲當許其來助而緩其師期本年三月蒙

諭旨垂詢英法兩國助勦之事臣覆奏以爲同防上海則可借攻內地則不可洋人若先攻蘇常臣處無會戰之師若克復城池臣處亦無派守之卒定議於先或不致責怨於後等情奏明各在案茲復欽奉

諭旨以印度兵來秋閒大舉飭令會商妥議臣商左宗棠李

鴻章等據左宗棠復函云青浦嘉定二處髮逆屬至夷兵遽遁
夷人之畏長毛亦與我同委而去之真情畢露斷無起印度之
兵助剿此賊之事島人借助剿爲圖利之計借起兵爲解嘲之
詞耳兵頭縱有此意國主未必允許印度縱有兵來其數未必
能多據李鴻章覆函云官軍自二十一日虹橋大捷之後洋兵
待我兵敬禮有加提督何伯來營會晤詞意和順然窺其中若
有不足者青浦嘉定之退不免羞恚自云須八月後調大英兵
來恢復青嘉該提督始能回國並無調印度兵來之說臣查西
人天性好勝睚眦小忿不肯甘休青浦嘉定之挫旣羞見侮於
髮逆尤慮見輕於

天朝其興兵前來報復係屬意中之事惟英法舊例兵謀會議於眾國兵費征斂於眾商非一人所能爲主青嘉一退之差不至遽觸大眾之怒國主未必因此而大舉商賈未必因此而加征其兵數必不甚多亦可懸揣而知崇厚既有所聞似宜由總理衙門與駐京公使查詢確實然後申大義以謝之陳利害以勸之中國之寇盜其初本中國之赤子中國之精兵自足平中國之小醜姑無論本年春夏連克二十餘城長江上下肅清三千餘里髮逆無能久之理吳越有可復之機即使事機未順賊燄未衰而中華之難中華當之在

皇上有自強之道不因艱虞而求助於海邦在臣等有當盡之

職豈輕借兵而貽譏於後世此所謂申大義以謝之也粵匪行
徑本屬無賴之賊青嘉兩城尤屬至微之事英國若徵印度之
兵爲報仇之役多調則勝之不武少調則不勝爲笑徒使印度
軍士支領英國之餉銀蹂躪中國之土地上不利於國主下不
利於英商不如早議息兵俾松滬免無窮之擾卽英法省無窮
之費此所謂陳利害以勸之也斯二者總理衙門與駐京公使
委曲商榷如俱不見聽則亦別無阻止之法仍當先與議定西
兵進攻內地臣處無會剿之師若克城池臣處無派防之卒區
區鄙見不得不重言申明至於設法防範殊乏良策洋人語言
不通風俗迥異彼以助我而來我若猜忌太深則無以導迎善

氣若推誠相與又恐其包藏禍心觀於漢口焚船等案片言不合戎事立興嫌衅一開全局瓦解臣始終不願與之會剿者蓋亦籌之至熟與其合而復離不若量而後入倘我軍屯駐之處彼亦不約而來寔偏處此臣當諄飭部曲平日則言必忠信行必篤敬臨陣則勝必相讓敗必相救但有謙退之義更無防範之方吾方以全力與粵匪相持不宜再樹大敵另生枝節庶幾有容有忍宏濟艱難愚慮所及不審有當萬一否所有遵旨妥議緣由理合會同浙江撫臣左宗棠江蘇撫臣李鴻章恭摺覆奏伏乞

皇上聖鑒訓示謹奏

近日軍情片

同治元年六月二十二日

再近日軍情鮑超圍甯國之師初八初十等日屢獲勝仗十二日偪紫城根十四日大戰全勝殺賊極多卽於十五日克復甯國府城甯國莖一軍派隊雕剿秣陵關等處兩次獲勝六月初六日援賊數千前來窺營隔濠放鎗各有傷損未經交仗而退聞援賊到金陵者已有數萬計秋閒當有大戰目下甯國已克鮑超之兵儘可援應金陵無孤軍寡助之虞堪以仰慰

宸廑多隆阿將赴陝西慮金陵兵力太單頃接官文多隆阿會咨已調駐守廬州之石清吉十營令其齊赴金陵爲甯國莖一臂之助今甯國已復鮑超之全軍足資游擊南岸之兵力足敷

調撥石清吉十營或可仍防廬州不遽南渡臣當與官文多隆
阿函商妥辦湖州失陷之後聞城中被害不過數百人道員趙
景賢尚未殉節應俟查明實在下落再行具奏除甯國詳細戰
狀俟接到鮑超文牘續行奏報外謹將近日各路軍情附陳梗
概伏乞

聖鑒謹

奏

江西被害州縣蠲免錢漕分數摺

同治元年七月初二日

奏爲查明江西被害州縣蠲免錢漕分數及被劾各員恭摺覆奏仰祈

聖鑒事竊臣於上年十二月間承准議政王軍機大臣字寄咸豐十一年十一月十二日奉

上諭有人奏江西省疊被賊擾亟宜拊循一摺據稱本年二月間逆首李秀成率眾攻陷吉安等郡逼近省垣焚掠愈多殺害愈慘七月間經曾國藩調兵援剿始將逆匪驅除出境現在瘡痍未復民困未蘇亟應查勘被擾情形分別蠲緩等語著曾國藩遴委公正大員前往查勘除完善地方收成豐稔仍照舊供輸

外所有殘破處所及水旱災區卽著分別重輕奏請蠲緩以甦民困另片奏本年七月間逆賊竄踞豐城鮑超統兵來援豐城縣知縣哈爾噶尙阿不肯搭造浮橋以致官軍不能徑渡賊遂將附省鄉村市鎮恣意焚殺玩誤殃民實堪痛恨又南昌縣知縣周成民當賊氛正熾秋稼未登之際該縣並不稍存體恤卽於七月二十二日開征漕折並創爲逐日加增之例逾五日增錢若干逾十日又增若干逾半月一月遞增幾至一倍暮夜追呼民不堪命等語並著曾國藩按照所參該二員劣蹟確切查明據實參辦原摺片著鈔給閱看欽此遵卽恭錄札行江西布政司飭令會同臬司糧道查議詳核去後茲據該司道李桓等

兩次詳稱查上年二月間逆匪李秀成由撫建竄陷吉安佔踞瑞州蔓延各屬逼近省垣旋經水陸各軍併力攻勦次第克復驅賊出境各屬當元氣未紓之際復遭蹂躪或被圍日久紳民協力守城或被擾甚寬黎庶流離失所又九江南康等府屬上年夏閒有被水淹浸之處田廬悉爲澤國人民蕩析離居凡茲受害之區無論兵災水災均堪憫惻該司道等當卽分飭各府委員查勘並酌擬章程請將被擾各州縣應完十一年及未完十年錢漕量予蠲免以期實惠及民如縣城被大股重圍苦守二十日以外者錢漕各免五分或全免錢糧全征漕米如縣城雖被重圍而守禦僅在二十日以內或縣城被賊佔踞一月以

上者各免錢漕三分如縣城被踞一月以內及鄉村被擾雖久而縣城未踞者各免錢漕一二分仍按受害之輕重定免數之等差其被水各縣極重村莊各免錢漕三分次重各免二分再次各免一分以示體恤各緣由於上年九月閒具詳由臣批准照辦在案此外賊所未到鄉村及賊僅過而不畱或縣城旋失旋復並未遭害各屬應徵錢漕照常催徵濟餉不准冒濫請蠲期災黎得沾實惠而賦課不至空虛庶於

國計民生兩有裨益通飭各府秉公確查旋據各府督同州縣將應蠲錢漕分數呈報該司道等逐一核定彙開清摺詳請具奏又查上年七月閒逆匪由瑞郡敗竄豐城縣河西地方記名

提督湖南綏靖鎮總兵鮑超率師追剿該逆渡河而東將渡船
簾筏全行拆毀由總糧台飛飭前豐城縣知縣哈爾噶尙阿迅
速搭造浮橋以備我軍進剿該前縣哈令於上渡口地方綰搭
浮橋河面寬闊水勢湍急搭橋將次完竣突被狂風大浪折斷
橋木散失漂流繼復另備船筏星夜造成我軍東渡趕辦稍遲
尙非有心抗違又查南昌縣應徵漕米從前原係十月開徵嗣
於軍興以後迭奉各憲札飭提前趕辦以濟餉需上年七月間
正值各軍勦賊得手餉需萬緊之際該前署縣周成民開徵漕
折解濟餉需其時各鄉早稻俱已登場花戶輸將並無難色至
按限加價一節緣江省各屬每多疲玩花戶應完錢漕任催不

納是以向有酌量加價限期實爲設法催科起見該署縣係屬
循舊辦理並非創爲此例妄行加增亦無逐日遞增及加至一
倍之事該署縣周成民已於另案奏參革職應請毋庸置議各
等情先後具詳前來臣詳加查覈上年賊竄江西二月入境八
月肅清正值耕耘之際農民失業加以夏末秋初水災與兵禍
相乘鋒鏑餘生轉徙無所僅予緩征尙不足以廣

皇仁自應分別蠲免以蘇民困該司道等所呈清摺計被擾極
重蠲免五分三分者九縣被擾次重蠲免二分以下者十縣被
擾較輕蠲免一分者四縣被水尙輕蠲免一分者五縣及蘆洲
一處於遭害之地確查豁免而於完善之區照舊催征尙屬斟

酌妥善無濫無遺謹將原摺錄呈

御覽仰慰

聖主視民如傷之意其全案銀米細數分年分款另造冊結由撫臣沈葆楨分別

題奏至前任豐城縣知縣哈爾噶尙阿平日居官不協輿論此次於大軍追賊緊急之時搭造浮橋爲風浪所飄毀遲久始成致鄉村被害彌深雖非有心玩誤實屬不知緩急應請

旨卽行革職以示懲儆前任南昌縣知縣周成民開征漕折解濟餉需勒限嚴催均係循照舊章亦無逐日遞增之事業經另案革職應無庸議所有查明江西被害州縣蠲免錢漕及被劾

各員恭摺附驛覆奏伏乞

皇上聖鑒訓示再此案因展轉查詢陳奏稍遲合併聲明謹
奏

金陵陸師勝仗張勝祿請卹摺

同治元年七月初二日

奏爲金陵陸師屢卻撲營悍賊損一良將懇

恩優卹恭摺仰祈

聖鑒事竊江蘇藩司曾國荃一軍在雨花臺秣陵關等處禦賊獲勝臣於六月初六二十二等日附陳梗概在案先是曾國荃督軍東下直逼金陵以地曠兵單添調曾貞幹所部各營駐三汊河江東橋一帶傍水築壘以保西路之糧道仍派長勝副後吉後嘉字等營移紮雨花台以扼東路之要衝五月十二十三等日城壘各賊乘我營寨未成糾眾二萬直前猛撲傷營勇十數人我軍先派馬步各隊伏於山後至是一聲鼓角分左右兩

翼抄出朱洪章率同劉永祥衝入賊隊劉玉春曾昭禮揮兵盪
擊斬獲二百有奇賊乃紛潰劉永祥追躡騎馬賊酋撲近石壘
中槍殞命二十二日探報秣陵關之賊擾及六郎橋一帶大掠
民糧曾國荃潛遣周曰昇等各率騎隊出賊不意邀截於朱門
之外賊見我軍猝至列陣迎敵周曰昇胡良作率各騎自左路
抄之賊黨棄糧思遁楊鉅南又自右馳繞其後縛賊數百悉斬
於陣盡奪米穀以給村民自賊之數爲我敗也闔城惶懼飛書
召援有僞王宗李酉糾集悍黨來自蘇州於六月初六初十等
日兩次窺營火器對轟互有損傷提督銜記名總兵張勝祿中
洋槍子洞穿左足曾國荃旣惜傷一健將而賊計甚狡料數日

內必有戰事豫飭各營密爲戒備果於十六日城賊援賊出四五萬人分二十餘枝以一枝向湘恆等營以一枝向信義等營以一枝向猛惠等營以一大枝包過副後南後長勝公字敏字等十一營之後而中路悍賊猛攻雨花臺一帶長濠我軍堅守營牆憑濠穩擊傷斃極夥賊竟裂旗裹尸昇之而行曾不少卻其犯公字敏字兩營者已焚哨棚而進其犯副後南後兩營者亦將踰卡橋而登劉連捷曾昭禮劉玉春等見有黃衣騎賊指揮督陣猛驚罕匹潛然巨礮一發而殪卽乘羣賊靡亂之時派隊出卡併力掩擊立解重圍維時西南一路賊勢方張鄢蘭亭力戰死之崔文田倪桂李金洲等拔卡而出馳斬二賊目遂與

劉連捷所派之隊合軍追勦計殲賊近二千人擒賊逾二十名
訊據供稱是日之賊實斃僞官數十僞對王亦在其中由是賊
膽愈寒軍心愈奮曾國荃正在冒雨修營徐圖進取乃甯國克
後餘匪竄迸金陵嘯聚於雄黃鎮者數又以二萬計二十四夜
勾合城中之賊捲旗息鼓謀襲我營或以大隊分伏濠邊或以
另股抄出營後天甫向曙一齊揚隊直撲猛惠公敬四營易良
虎易良豹曾豈凡王仕益凌有和崔文田蕭開印等令各勇穴
牆施礮使不得近伺賊稍懈突出擊之倉猝交鋒返奔弗及半
就誅夷而東路圍攻副後南後長勝等營之賊亦經劉連捷劉
玉春曾昭禮朱洪章等引軍擊走俘馘無算據曾國荃四次稟

報前來臣查該軍圍逼金陵地大兵單旁無應援洪逆老奸巨
寇前與圍師八萬相拒數年見慣不驚此次以官兵爲數無多
常挑悍賊前來撲營我軍苦戰苦守盛暑鏖兵雖欠餉日久將
士尙能用命今時歷兩月布置漸周自守有餘即可徐謀攻取
記名總兵張勝祿謀勇兼備轉戰湘鄂江皖以達江蘇五省數
千里之遙疊建殊勳此次克復太平蕪湖案內擬保提督未及
開單彙奏乃搶護營壘猝中鎗子猶復負創強起力籌攻守不
數日因傷殞命實堪憫惻合無仰懇

天恩准將提督銜記名總兵圖爾古齊巴圖魯張勝祿照提督
陣亡例

賜卹並從祀湖南長沙府湘鄉縣各該處昭忠祠俾奠穀魄而
作士氣藍翎游擊劉永祥擬保游擊儘先都司鄔蘭亭應

敕部均照游擊陣亡例議卹以昭激勸所有金陵悍賊撲營疊
獲勝仗並將死事各員分別請卹緣由謹會同大學士湖廣督
臣官文繕摺由驛馳陳伏乞

皇上聖鑒訓示謹

奏

克復甯國府城摺

同治元年七月初二日

奏爲官軍攻勦甯國疊挫賊鋒乘勝合圍遂將府城克復恭摺
馳陳仰祈

聖鑒事竊浙江提督鮑超督率各營在抱龍岡等處毀平賊壘
後屢獲大勝隨克甯郡臣於六月初六二十二等日兩次附陳
梗概聲明續報戰狀在案旋准鮑超先後來文據稱僞輔王楊
逆堅伏城中正在繕修守具一聞寒亭戰敗卽糾逆黨四大股
繞城結壘延亘三十餘里一曰僞保王踞城東之夏家渡孫家
埠一曰僞天將踞城南之綠錦鋪畢冲鋪一曰僞八王踞城北
之圖山廟埠及洪村嶺楊逆自與僞桂王合股由城西之敬亭

山連營至望城岡一帶以圖力拒我軍五月初十日鮑超引軍進駐烏沙鋪暫息士卒周歷形勢必自抱龍岡得手而後可擊散賊黨尤必從望城岡下手而後可俯瞰賊巢十五日嚮明先令婁雲慶吳騰芳伍華瀚翦炳南等潛出碑林岡陳得勝唐仁廉明興馬勝奎等潛出安宜口會伏於望城岡後而以韋志俊所部爲游兵仍令宋國永周有勝王衍慶數隊直取中堅以誘賊賊果輕我兵寡直壓山岡而下甫及交鋒鮑超復令黃慶劉玉堂劉順隆等十營張兩翼抄來羣賊勢沮將圖卻走瞥見旗幟林立掩映山谷間以爲城南城北之賊悉眾來援也回鞭轉鬪洶湧若潮不意婁雲慶陳得勝等兩枝伏軍突從山谷中騰

蹕而前衝賊數段韋志俊率薛金榜等營截斷賊後宋國永周有勝等揮軍乘之短兵擊刺遇者輒殪逸出之賊又爲明興伍華瀚騎隊追及擒獲近五百人殲斃逾八千名遂破望城岡並將抱龍岡安宜口碑林岡敬亭山十數村落逆壘悉平東南北三路賊眾亦卽棄巢紛竄退聚河西河東此五月十五日擊賊毀壘進軍城下之情形也該逆旣受大創略無鬪志乘我未布長圍陰結另股三僞王列隊城根並築堅壘於夏家渡石橋之側以爲負固自完之計鮑超四次挑戰匿不出巢遂於六月初八日統率馬步各軍偪壘下寨賊不能堪由北城出萬餘眾前來迎拒我軍一擊敗之初十日賊復由南城出二萬餘眾悉力

撲犯我軍再擊又敗之十四日僞循王魏超成僞干王洪仁珩
等於南門胡廬山鰲魚山一帶列隊冀襲我後僞襄王劉官方
等於北門廟埠圖山一帶列隊希圖夾攻而西門亦別出大股
靠壘爲陣鮑超見賊已渡河喜告諸將彼有鬪心吾乃可一逞
也遂飭婁雲慶馮標譚勝達唐仁廉伍華瀚等向北門進張應
超楊鎮魁段大有等向西門進宋國永黃慶明興李文益馬勝
奎等向南門進而以韋志俊四營趨南門之左張遇春二營趨
南門之右維時城賊壘賊蜂擁出敵我軍如牆併進搏戰逾時
未遽得手宋國永黃慶躍入陣中縱橫盪決先將中路一股擊
敗明興劉順隆截出夏家渡石橋遏賊歸路賊旂漸亂撲河返

奔馬勝奎李文益遂將石橋二壘踏毀韋志俊張遇春亦自山腰斜衝而出賊眾紛潰將過浮橋周有勝熊鐵生焚橋截住幾無脫者南門旣已獲勝僞襄王一股瞭見南路火發遂棄廟埠圖山而遁婁雲慶馮標唐仁廉奮力尾追伍華瀚吳雲集從旁徑突出乘之適張應超楊鎮魁等亦於西門告捷削平附城三壘三路整軍來會集於小東門外將沿河僵仆之賊補刀殪之十五日楊輔清復出大東門收合餘燼爲背城借一之舉鮑超率各軍驟進勢如風雨該逆一戰卽北狂奔六十里已近洪林橋矣楊逆忽率馬賊二千餘人回陣返撲馬勝奎緊躡賊後中槍而殞將士亦多損折鮑超令諸營徐列圓陣將該逆人馬并

以大圍包之環加勦洗楊逆單騎脫去從馬千餘匹盡爲我有
城賊見楊逆一敗不返倉皇失措有議降者有議戰者有議閉
城再守者紛紜未定我軍已自洪林橋收隊歸來大呼直入東
門除跪降及老弱婦女外一律斬殲無遺立將府城克復前後
斃賊幾及二萬生擒酋目三百餘名得大小礮位六十五尊此
六月十四日大戰全勝十五日克復甯國府城之情形也臣查
甯郡一拔則江浙之門戶已開金陵之機勢漸緊由是略取東
壩會勦下游可無兵單之慮浙江提督鮑超冒暑苦戰屢復名
城厥功甚偉惟係專閫大員應如何
加恩之處恭候

聖裁至此次尤爲出力人員暨陣亡各將并相應分繕清單懇
乞

恩施以昭激勸其餘在事出力員弁兵勇容臣查明專案奏獎
所有官軍勦賊屢勝攻克甯國府城緣由謹具摺由驛六百里
馳奏伏乞

皇上聖鑒訓示謹

奏

懇豁免江西歷案攤捐款項片

同治元年七月初二日

再咸豐四年十一月

臣

於水師勝仗摺內奏稱百姓感戴

皇恩淪肌浹髓我

國家深仁厚澤二百餘年不當此大亂之後不知感人之深一
至於此等語今倏忽又閱八年每當寇賊非常之警尤見民情
愛戴之誠卽至庚申夏秋蘇常之失海澱之變而中外晏然纖
塵不驚耕鑿如故益嘆我

朝人心之固結殆爲亘古所未有顧人心雖如此固結而寇盜
卒不能廓清頻頒蠲緩之

詔書而民困未曾蘇息屢下整飭之

嚴旨而吏事亦未振興其故何哉

臣

嘗反覆尋思竊以爲民生

之困由錢漕浮勒之未革也州縣之困由攤捐款項之太多也

欲振民窮須力除錢漕之弊欲飭吏治須盡豁攤捐之款江西

錢漕一事

臣

與撫

臣

沈葆楨現方設法減征容俟妥議章程另

案會奏其攤捐一事

臣

請爲

皇上先陳其概攤捐云者從前虧空之款無處彌補則令州縣

勻攤以捐補之目下需用之款無處籌給則令州縣勻攤以捐

給之者也目下需用之款不過本省自捐自用苟能另籌經費

即可立停攤捐從前虧空之款則係奏明派攤屢奉部文者約

有四款一係道光二十五年豁免案內查出官墊民欠及攤補

兵差經費等銀一百二十二萬七千餘兩經前撫臣陸元烺奏准部議責成現任州縣自二十九年六月起分年攤補歸款除已完外未完銀九十六萬一千餘兩一係道光二十八年清查案內查出因公挪缺銀三十萬三百餘兩經前撫臣費開綬奏准部議自三十年起分作十二年由巡撫司道府州暨優缺州縣公捐銀十二萬兩津貼瘠缺各縣歸補原挪之款其餘銀十八萬三百餘兩著落各該縣自行按年彌補除已完並巡撫司道府州應捐不計外各州縣共未完銀十八萬一千餘兩一係咸豐元年豁免案內查出清查以前官墊民欠六十六萬七千餘兩經各前撫臣奏准部議飭自咸豐二年六月初一日爲始

隨同上屆挪墊兵差銀兩分年按限帶攤歸補一係清查以後
續墊民欠銀三十四萬三千餘兩部議著落原挪州縣及各該
管上司全數賠補此四者江西各屬奏派攤捐之所由來也往
昔地方無事年穀順成各州縣於丁漕考成之餘間有略解攤
捐之款迨軍興以後地方蹂躪民氣凋殘按年額徵之正賦非
查辦蠲緩卽徵解不前所有應攤前項道光二十五年豁免案
內挪墊兵差及二十八年清查挪缺等兩款已覺完解寥寥其
咸豐元年豁免案內查出之清查前後挪墊兩款更屬力難兼
顧綜計近年解攤款銀兩者按限核計不及十分之一二且或
於攤款少有所盈反於正賦大有所絀譬之盜鈴而掩耳挖肉

而補瘡雖有攤捐之名並無補苴之實溯查嘉慶十八年十月十六日奉

上諭直隸等十四省清查虧欠銀兩等項節經各督撫等將彌補章程奏明辦理此為除陝西一省扣至本年四月限滿是否全數完交現尚未據奏到又廣東省虧短銀兩全完尚有未完穀石亦據奏明分年彌補朕思此項虧短銀兩穀石各督撫奏定分限展限章程責令州縣按限完交而州縣籌補之法仍不能不借資民力現在直豫東三省邪匪滋擾其餘各省亦間有荒旱處而民氣未紓若州縣官藉彌補為名仍科斂於民非所以休養生息也著傳諭各該督撫等即將此次虧缺銀穀確數

查明現已完解實儲在庫者若干其未完者若干據實截數奏明暫行停止彌補等因欽此當經前撫臣先福查明江西未完各款截數奏明暫停彌補嗣後屢奉部催並未報解分釐迄今已五十年是嘉慶

諭旨之所謂暫停者實與永停無異矣然則道光年間攤補之款又可期其有實收之日乎至州縣之稍知自愛者無不以攤捐爲大患履一日之任卽有一日之虧罷官以後回籍尚有咨追身沒之後子孫尙須著賠一經署缺受累無窮其不肖者則又借奏攤之名爲朘削民膏之目毫無益於

國計大有損於吏治

臣不揣冒昧籲求

聖主施浩蕩之恩

錫逾常之典俯准將江西各州縣應攤前項各款共未完銀二百一十五萬四千餘兩概予豁免俾閭閻無科勒之苦州縣無賠累之虞庶幾政肅令行日臻上理仰副我

皇上惠愛黎元勤求吏治之至意倘託

聖主鴻福軍務漸竣歲事豐稔此後江西額賦年清年款何患部庫之不充若虧後此按年之課徒索前此紙上之債亦復何補如蒙

恩旨俞允臣當飭司再查各州縣已完及請免各細數造冊送部查核其本省需用之款向由州縣攤出者臣與撫臣當另籌

奏稿卷一六
一頃永禁攤捐專案奏辦緣奉

諭旨以江西民困未蘇飭臣查辦謹一併附片瀝陳伏乞

皇太后

皇上聖鑒訓示謹

奏

童容海投誠片

同治元年七月初二日

再鮑超攻克甯郡後派兵追剿敗匪隨收復甯國縣城現在進攻建平尚未得手並據呈稱有僞保王童容海驍勇善戰本係石達開死黨上年由汀州入浙轉隸李秀成隊下此次來援甯郡屯眾數萬於孫家埠與官軍未開一仗旋遣人具稟乞降稱與羣賊有隙願取郡城縛輔逆以獻鮑超與之期約許以自新乃撫事未成甯郡已克童容海徑走廣德於二十日襲取州城又稟明鮑超申言率眾六萬就撫速求回文並聲明廣德州爲僞侍王分地恐與浙賊有戰爭之事等語由鮑超專差請示前來臣檢查本年正月間上海搜獲僞文童容海擅殺各酋十餘

人賊中猜忌已深是其自拔來歸情尙可信或不至再有反側
惟人數太多後患孔長已令鮑超酌畱二千人餘則全行遣散
未知該酋童容海果否就我範圍如其撫事有成則賊黨去一
大支皖南即可肅清於大局不無裨益甯邑與廣德建平均在
甯郡左近呼吸相通理合附片先陳梗概伏乞

聖鑒謹

奏

安徽巡撫李續宜聞訃丁憂摺

同治元年七月初十日

奏爲安徽撫

臣

聞訃丁憂恭摺馳奏仰祈

聖鑒事竊

臣

於七月初九日准安徽撫

臣

李續宜咨稱同治元

年七月初六日在六安州行營接到家信親母蕭氏於本年六

月十六日在湖南湘鄉縣原籍病故該撫

臣

係屬親子例應丁

憂飛咨

臣

代奏開缺請

旨另行簡放其前帶赴皖之記名提督成大吉蕭慶衍道員蔣

凝學毛有銘副將王載駟等軍歸

臣

節制調度該撫

臣

卽回籍

奔喪守制等因前來

臣

查李續宜天性純孝內行敦篤咸豐九

年因救援寶慶之便回籍省親其時母病沈重瀝稟在家侍疾

因軍務緊急經臣等催令勉強赴營李續宜私心內疚近日因
自患咯血之症尤時時慕戀雙親或至終夜不寐此次驚聞母
訃自應遵例丁憂回籍治喪惟軍事方殷該撫威望素著關係
甚重溯查咸豐八年前湖北巡撫胡林翼在任丁憂督臣官文
奏請改畱署任欽奉

諭旨胡林翼穿孝百日後仍著署理巡撫如須扶柩回籍再行
賞假兩箇月俟軍務告竣准其補行終制等因欽此維時湖北
巡撫印務係督臣官文兼署臣現擬仿照辦理已咨復李續宜
將巡撫關防派員齎送安慶省城由臣暫行兼署成大吉等軍
臣亦當悉心照護妥爲調遣惟兩淮勦撫事宜頭緒紛繁苗沛

霖及各巨捻深畏李續宜之威而良民名均又感其撫綏之德
皖北及鄂省之兵多係該撫部下勁旅實非他人所能接辦臣
事繁才短深恐照料難周貽誤大局該撫臣奔喪一節應否援
照胡林翼丁憂之例

賞假數月仍令回皖署理撫篆抑或准其開缺守制另行
簡放安徽巡撫之處恭候

聖裁所有安徽撫臣聞訃丁憂緣由恭摺由驛六百里馳陳伏
乞

皇上聖鑒訓示謹

奏

近日軍情片

同治元年七月初十日

再近日軍情曾國荃圍攻金陵之師與賊相持常有零股前來
搦戰小有擒斬未開大仗鮑超克復甯國之後臣檄令進攻東
壩高淳溧陽溧水句容一帶作遠勢盤旋而來然後屯駐於金
陵之東北隅與曾國荃相爲犄角據鮑超呈稱軍士勞苦太久
疾病甚多應請稍爲休息再行進兵其廣德州僞保王投誠一
案亦尚未辦理妥適石清吉守廬州之十營經官文等調令南
渡助剿金陵商之李續宜另撥數營接防廬州臣意李續宜方
以全力經營苗黨自難分撥防廬之師已咨復官文等飭令石
清吉仍守廬州無庸南渡乃李續宜籌辦苗黨甫有頭緒今忽

聞訃丁憂卽須回籍治喪事機未順波折尙多殊深焦灼袁甲
三病狀近日不知何如李續宜旣須離營應懇

聖恩飭畱袁甲三駐紮臨淮庶兩淮上下不至過爾空虛謹將
近日各路軍情附陳梗概伏乞

皇上聖鑒謹

奏

代奏李續宜謝

恩摺

同治元年七月二十一日

奏爲據情代

奏恭謝

天恩仰祈

聖鑒事同治九年七月二十日准安徽撫臣李續宜咨開兵部
火票遞到七月初八日內閣奉

上諭安徽巡撫李續宜著授爲欽差大臣督辦安徽全省軍務
欽此竊續宜現丁母憂例應奔喪回籍守制前經咨請代奏開
缺在案茲奉

諭旨授爲

欽差大臣念

國恩之彌重未報涓埃慟大故之遽喪空懷梧捲於臣爲不忠
於子爲不孝憂傷惶悚罔知所措仍咨臣代陳下悃叩謝

天恩請

旨另賜簡放等因前來臣查李續宜樸忠敦厚威望素著仰蒙
聖主知人善任畀以全皖軍事惟該撫聞訃丁憂臣於七月初
十日奏請

賞假數月回籍治喪計此摺尚未到京茲復渥荷

溫綸飭李續宜接受

欽差大臣關防不受事則上負

君恩遽受事則內虧子職該撫之憂皇失措自是發於至情之不容已前此胡林翼在湖北巡撫任內勝保在

欽差大臣任內先後丁憂均奉

諭旨賞假回籍治喪此次李續宜事同一律應仍籲懇

天恩賞假歸籍俾得少伸哀慕之忱其

欽差大臣關防是否照該撫所請另簡知兵大臣迅赴臨淮督辦軍務抑或飭令袁甲三力疾督師暫緩交卸之處恭候

聖裁所有據情代奏恭謝

天恩緣由謹繕摺由驛六百里具奏伏乞

皇上聖鑒訓示謹

奏

奏和卷十六

五

查上次摺片報近日軍情片

同治元年七月二十一日

再臣於七月十九日接奉初二日

寄諭現在曾國荃等進攻金陵作何布置援賊麇集有無動靜
深爲廑念鮑超進攻甯國已否克復左宗棠久無報到浙省情
形若何著曾國藩探明奏聞又於二十日由撫臣李續宜咨到
七月初八日

寄諭甯國一城何時克復是否的實鮑超一軍作何調遣著曾
國藩迅速具奏各等因欽此同日欽奉

廷寄之件其徑發臣營者未到其由李續宜轉咨者先到蓋李
續宜奏報往返多由徐宿臨淮以達六安故路近而較速臣處

奏報往返常由河南湖北以達安慶故道梗而較遲也甯國府城於六月十五日克復臣於二十二日附片先奏梗概旋於七月初二日具摺詳奏戰狀不知中途果無疎失否茲將上三次所奏摺片各件開單呈

覽以備查核至近日軍情曾國荃金陵一軍自六月十六二十五日兩次大戰後該逆未再出而搦戰我軍亦因疾病過多未能設法攻城浙賊偽侍王李世賢大股本欲與偽忠王同援金陵因恐官軍直逼杭省故以全力駐守金華龍游以拒我師左宗棠定於七月十二日拔營進紮茶圩泉江兩處劉培元進紮歸塘地方規復龍游蔣益澧一軍分爲三幫定於七月初九十

三十六等日自長沙起行赴浙鮑超一軍因童容海投誠之事
人數太多至今尙未辦妥難遽拔營前進臣本應移駐甯國庶
與金陵蘇杭徽州皆在三百里內外既可聯絡一切又可就近
料理各賊目投誠事件無如李續宜現丁母憂卽須請假離營
臣當兼顧皖北六安一帶不能移駐皖南相隔太遠調度不靈
深用焦慮除洋人焚燒紅單船一案俟專員查明另行覆奏外
謹將近日軍情附片具陳伏乞

聖鑒謹

奏

奏稿卷十六

奉 旨垂詢各路軍情分條覆奏摺

同治元年八月十二日

奏爲疊奉

諭旨垂詢各路軍情分條覆奏仰祈

聖鑒事竊臣近曰以來疊奉

寄諭指示各路軍情縷晰周詳其中有臣職分應籌之事亦有非臣力能兼顧之端謹就聞見所及勉竭愚慮分條具陳以備聖明參核

一多隆阿一軍當四月十五日初克廬州之時臣本欲其會攻金陵以曾國荃由南岸進兵先破大勝關圍逼城南雨花臺一帶以多隆阿由北岸進兵先攻九洲圍逼城北紫金山一帶

曾於五月十七日附片具奏意在先復江蘇財賦之區以爲明年籌辦京漕之地不料陝西告警羽檄交馳官文等奏請多隆阿率師援秦而

諭旨亦飭令先保陝西臣雖覺金陵兵單機會可惜然以秦晉爲京師餉源所自出未敢奏調多隆阿西援之師轉而東征也厥後粵逆回竄秦事稍鬆而漢回仇殺望援仍切欽奉六月初七初九日兩次

寄諭以多隆阿應於何地駐紮飭臣與官文會商復奏其時甯國已克南岸兵力足敷調遣臣先已附片奏明矣因咨達多隆阿不必回顧蘇皖或速勦陝省或畱駐河南請其定計由官文

主稿復奏官文是否已奏尙未准咨到摺稿多隆阿旋於七月二十二日覆奏想邀

聖鑒茲復欽奉七月十九日

寄諭多隆阿一軍已阻於賊之南不能赴陝卽著勝保督辦陝西軍務多隆阿旣可無須入陝應於何處駐紮著曾國藩酌量調派迅速具奏又奉七月二十四日

寄諭多隆阿雷正綰等軍祇令其勦辦南陽一帶賊匪亮不久卽可蕆事以後多隆阿等軍或須駐防廬郡一帶或須赴江南會同進勦均著曾國藩酌量調度迅速奏聞各等因欽此

聖懷謙挹殷殷下問曷勝悚感臣查多隆阿軍抵襄陽由光化

荆子關入秦並不爲南陽之賊所阻南陽賊股經鄂軍金國琛等會勦解圍亦尙不至爲楚疆之患勝保此次奏報殊未確實致

朝廷久經派定援秦之局又復中變雷正綰前隊已於十一日起行入關多隆阿後幫亦於二十二日起行繼進中途接奉改派之

旨不知從何處折回若業抵秦境則進退兩難秦人雲霓之望是否籲請多隆阿畱陝臣尙不能懸揣若多隆阿果回鄂境則當遵

旨駐紮南陽一帶食鄂省之餉擊豫省之賊凡捻匪有竄入南

汝兩府者責成多隆阿攔截雕勦痛勦數次聲威必振西可屏蔽秦中不令粵捻續竄關陝南可保障楚省不令鄂北另籌防兵北可聯絡鄭元善葉裕之師東可聯絡蔣凝學潁州之師誠爲一舉而數善皆備勦捻以馬隊爲先僧格林沁撻伐於豫東多隆阿馳騁於豫西當可肅清中原有裨全局至於防守廬州石清吉本係多隆阿部將不須該將軍親往駐守圍攻金陵鮑超已定由東壩前進不須該將軍遽往會勦非謂江南不必添兵也鄂豫秦三省交匯之區不可無大枝勁旅以爲游擊之師也是否有當恭候

聖裁

一裏下河一帶屢塵

聖懷江南之賊若由常熟江陰偷渡北岸之靖江如皋通州海門等處實屬防不勝防前奉六月十四日

廷寄因都興阿奏難民紛投裏下河其情可疑

諭旨飭都興阿嚴密防範飭臣實力稽察不可使一賊偷渡江北又奉六月十八日

廷寄鈔示潘祖蔭請防裏下河一片

諭旨飭令設法兼顧又奉十九日

寄諭亦以江北港汊紛歧飭令臣與都興阿力籌守禦裏下河毋稍疎懈各等因欽此仰見

聖主睠念淮揚各屬刻刻不忘臣秉承

睿謨亦自兢兢在抱惟戰船太單地方太廣鞭長莫及徒切殷憂頃又接李鴻章咨稱據蘇州密探僞普王楊輔清自甯國敗回僞護王陳坤書自揚州敗回均來蘇城與僞忠王商議金陵危急皖浙官軍分路進剿上游已無路可竄欲分大股由江陰福山楊林各口窺竄江北裏下河空虛之處就食於完善之區並先擄有商船一二百號預勾江洋盜匪爲導引乘閒偷渡北岸等語臣查楊輔清陳坤書兩股及青陽古隆賢等一股三支敗賊窮無所之思竄江北係屬意中之事李鴻章業已專案具奏請

飭都興阿黃彬等嚴防以臣愚見都興阿之兵力只有此數紅單船之勇丁不甚可靠其新調之紅單船四十號據勞崇光咨已在廣東省河爲颶風所壞矣是江北應防之要地尙無專汛派防之水師臣現咨商楊載福囑其親赴下游徧歷靖江如皋通州海門數百里江面察看何處最衝何處次衝妥籌布置又擬另辦太湖水師一軍造船百六十號防剿上海松江由澱湖以入蘇州而騰出黃翼升水軍專防淮揚裏下河一帶以符原議星夜趕辦計四箇月可以集事目下太湖水師尙未辦成黃翼升不可離滬所有裏下河之防應請

諭飭都興阿黃彬引爲專責臣亦當力籌兼顧仍請

飭下僧格林沁吳棠萬一賊竄裏下河卽於清江浦嚴兵以待此等敗殘股匪不難一戰殲之雖未必果有其事而究當預備不虞是否有當恭候

訓示

一李世忠一軍前奉

諭旨歸

臣

節制調度頃袁甲三告病開缺又奉七月初八日

寄諭飭

臣

妥爲駕馭又曾奉六月初四日

密諭有人奏李世忠所克復城池皆伊踞守與陷於賊中無異飭臣妥爲駕馭使就範圍各等因欽此臣查李世忠投誠之初勝保奏明准帶一萬八千人實數蓋近三萬以降人而仍據其

地仍統其眾當時辦法本未妥善近聞陸續招收且增至五六萬之多據有城池自爲風氣於長淮五河等設釐卡數處於長江新河口設釐卡一處各縣亦有卡局所獲頗厚又廣運鹽斤自捆自賣上侵公家之利下爲商民之害殊堪隱憂然相沿已久安之若素今欲大振紀綱繩以法律勢必有所不能且去冬今春克復天長六合浦口江浦擊退陳坤書股匪於大局不爲無功未可沒其勞而遽議其後臣擬姑循其舊不設機心釐鹽之利不加禁遏偶有請求亦不拒絕前曾解濟軍火三批米糧兩批近又來請餉銀卽當量力分潤仰副

朝廷寬厚之意但不甚資其力亦不輕調其兵暗銷其予智自

雄非我莫屬之驕志若欲收回

國家利權則須另籌鉅款按月供支足以養彼之眾乃能行吾之法臣於本年三月奏請廣東抽釐一案聲明分濟袁甲三一軍乃能撫馭降將卽係指李世忠言之將來袁甲三去位臣節制此軍亦專盼粵東之釐作滁州之餉聞晏端書到廣東後竭力經營事多掣肘至今尚無頭緒亦未報解分毫若廣東釐金不能大有起色則不特皖浙欠餉無出卽李世忠一軍亦終虞其決裂區區愚慮不敢不預陳其略

一鎮江一軍前奉五月二十一日

寄諭飭臣統籌兼顧頃又准馮子材咨到摺稿恭錄

諭旨有隨時稟請督臣曾國藩指授機宜以期萬全無失之訓
臣之愚陋何足諳悉機宜

寵眷愈隆悚惕無地馮子材專員來皖商一切臣覆函以鎮
江餉絀兵單只宜自守不能出戰待鮑超攻克東壩溧陽溧水
句容等處屯駐金陵之東北能與鎮江聯絡一氣不爲賊氛所
梗屆時馮子材再行撥兵會剿庶幾聲援四應士氣易奮至署
撫臣李鴻章久有移駐鎮江之議無如僞忠王糾率大股悍賊
常在松滬一帶戰爭不休前五月二十一日虹橋之役頃八月
初二日七寶街之役我軍皆竭力血戰始獲大捷觀忠逆之志
似欲甘心於滬上而洋人坐觀成敗極難調護以目下而論

鴻章有萬不可離滬之勢或俟太湖水師辦成李鴻章卽統水
陸諸軍由松滬進兵入蘇亦屬因利乘便之法所有鎮江防務
應始終責成馮子材耐苦堅守不作出勦之計拙謀淺慮未審
當否

以上四條皆兩月內所奉

諭旨因事理重大道途遙遠籌畫難定覆奏稍遲理合併案具
陳伏乞

聖慈垂鑒逐條

訓示謹

奏

籌辦廣德州受降事宜分別遣留摺

同治元年八月十二日

奏爲籌辦廣德州受降事宜分別遣留恭摺仰祈

聖鑒事竊僞保王童容海率眾乞降襲取廣德州城臣擬酌留

二千人餘悉遣散前於七月初二日附片具奏在案旋據鮑超

來文童容海既取州城襲殺侍逆所派守賊僞閻天義馬桂功

並收其眾現在部下一律薙髮不止六七萬人請多留降卒立

爲啟化營以資攻剿呈繳僞印三百五十八顆僞官照九百五

十二張賫送來省並轉據童容海自陳本係洪姓因被脇所改

請卽更正等情臣以洪容海自拔來歸應准復還本姓惟所部

過眾不特野性難於撫馴卽餉項亦難於供億因令挑留三千

人編立五營餘則悉數遣散飭直隸宣化鎮總兵宋國永已革
江西吉安府知府曾詠辦理遣散事件各繳軍械發給護照並
川資錢一千文分遣回籍竭力湊解錢三萬串尙不知足敷遣
資否另製造發被脅良民旗號於降人中擇明幹頭目帶領由
陸路分起行走視各省人數多寡或合數府爲一起或合數縣
爲一起每起少者四百多者不過千人果能沿途約束嚴明一
無滋擾俟該頭目等回營准其錄用酌予保獎以結其心當不
至變生意外至洪容海數年被擄一旦自新乃能計取堅城襲
殺守賊力圖晚蓋非假以虛名恐不足以馭下合無仰懇
天恩賞給降將洪容海游擊虛銜其部下頭目王永虎范長根

陶成有莫志祥汪維新李敦本等均請

賞給五品頂戴熊正玉羅文宓黃廣興蔣合麟朱大椒黃三元
宣鴻猷洪鉅海洪潮海洪青海洪四海洪龍海洪虎海洪富海
洪貴海洪華海洪晏海等均請

賞給六品頂戴仍俟續有勞績由臣分別奏保官階使悔罪投
誠者知

朝廷有倖邀之

寬典無顧惜之功名則東南逋寇或皆聞風知勸民解冰消於
軍事不無裨益如此起降眾辦理或有未妥另生枝節臣當隨
時奏明不敢稍存迴護上煩

宸廑所有籌辦廣德州受降分別遣畱緣由恭摺具陳伏乞
皇上聖鑒訓示謹

奏

近日軍情片

同治元年八月十二日

再近日軍情金陵賊匪未撲官軍營盤曾國荃因營中病勇過多亦未進攻鮑超克復甯國已逾月餘因童容海投誠之事久未就緒又疾疫流行死亡相繼尙未拔營現值天氣稍涼卽當催令進兵左宗棠在浙亦苦營中患病者多不能指擣如意自七月十七日油埠一戰大捷後二十一日與賊遇於青塘斬首百餘二十四日分兵進攻裘家太平祝兩處均未甚得手僞侍逆李世賢現在金華修城治濠並調溫處之賊萃於該郡將爲死守之計龍游縣城雖已檄調劉培元等軍進攻該處地勢平衍難以逼城立營一時未能速下蔣益澧一軍七月十六日已

入江西之萍鄉縣境日內當可陸續抵浙皖北苗沛霖之黨曾稟明蔣凝學願退出壽州正陽關兩處但求不報克復等情似不至遽生他變惟撫臣李續宜聞訃丁憂病久未痊不能治事該撫前在六安患病臣勸令請假醫調李續宜恐勞

聖廕未敢具奏茲於八月初三日行抵安慶省城臣觀其哀毀之餘肌肉全瘦若不令其離營回籍少伸孝思恐難期其速痊該撫於昨十九日具摺陳情臣是以未經勸阻理合一併瀆陳聖聽伏乞

慈鑒謹

奏

覆陳河南募勇另派統領片

同治元年八月十二日

再臣欽奉

寄諭陳由立到皖後著曾國藩卽將該革員及余大勝等分別
審訊嚴行懲辦以肅軍令惟陳由立所募之勇亟須揀員前往
湘省接辦一切事宜豫省將領乏人現無妥員可派著曾國藩
由皖營揀派熟悉湘楚情形堪勝統帶之鎮將一員及營哨各
官飭令速赴湖南接辦募勇事宜飭赴河南以資防剿等因欽
此遵卽於臣部各軍及鮑超所統鎮將中逐一遴選均無可獨
當一面者查有總兵楊朝林久歷戎行曉暢軍事上年冬間准
多隆阿保薦堪勝統領之任者楊朝林王可陞二人臣比令王

奏和卷一
可陞統勇二千七百現守蕪湖聞楊朝林尙在鄂中卽經咨商
湖北撫臣嚴樹森轉飭赴湘接辦陳由立募勇事宜旋准河南
撫臣鄭元善來函有豫中已添李續燾一軍兵力較厚所請派
員赴湘接統之處應卽停止等語臣伏查李續燾所部亦係湘
勇豫省旣添此一支足資防剿所有擬派楊朝林往湘接募成
軍之處自應停止以節糜費除咨嚴樹森查照仍俟陳由立等
到皖審訊奏結外理合附片覆陳伏乞

聖鑒謹

奏

查覆嚴樹森被參各情摺

同治元年八月二十九日

奏爲遵

旨查明湖北撫臣嚴樹森被參各情恭摺覆陳仰祈

聖鑒事同治元年三月十四日承准議政王軍機大臣字寄三月初一日奉

上諭前因有人奏嚴樹森到豫撫任後尙知講求吏治惟督辦
勦匪事宜未臻盡善復有人奏參嚴樹森有膽怯見偏量狹性
愎等情茲又有人奏皖師東下倚全楚爲根本楚撫關係東南
安危非久歷戎行深明將略者萬難勝任嚴樹森戰陣之事實
非所長上年捻撲河南省城該撫一籌莫展豫中人人切齒今

移節湖北安能望其出境滅賊官文休休有容故胡林翼得以
宣勞盡力嚴樹森性情剛愎若官文待之如胡林翼該撫必果
於自用萬一不和楚事必致決裂嚴樹森前在江夏隨州各任
聞警潛逃一旦膺鄂撫重任所統寮屬兵勇必將輕其品行不
遵調遣上游無事曾國藩始無後顧之憂該撫無胡林翼之善
謀又無李續宜之敢戰設布置稍疎賊蹤闌入曾國藩分兵不
暇安望有成各等語嚴樹森操守尙好畱意吏治自涖豫撫任
後尙無大過而人言嘖嘖諒非無因特以辦事尙能認真且仕
鄂有年曾爲胡林翼保奏是以簡調鄂撫冀收駕輕就熟之功
若如所奏各節是該撫非特不諳軍務抑且不協輿情任以封

圻殊於楚事未有裨益現在曾國藩籌畫東征必須後路策應
有人鄂皖連爲一氣方能悉銳前行不至瞻前顧後關係大局
至爲緊要該大臣於鄂中人材兵勢見聞已稔嚴樹森果否能
勝鄂撫之任抑僅長於吏治他務非其所習均著據實詳悉覆
陳毋稍徇隱原摺著鈔給閱看將此諭令知之欽此仰見我

皇上軫念東南慎重疆寄跪讀之餘曷勝欽悚湖北巡撫嚴樹
森春閒由豫還鄂臣前此所聞毀譽參半近來細加詢訪情形
較確大抵人非聖賢難於求備短長互見乃士之常在

朝廷之用才貴節取其所長而糾察其所短在臣子之自飭貴
勉其所已知而增其所不能嚴樹森之所短在負氣自矜計較

過熟負氣則自命過高責人過重稍有齟齬便事吹求處人鮮
畱餘地而人亦攻之甚力計較既熟則利害太明趨避亦所難
免咸豐四年嚴樹森在江夏知縣任內湖北省城被圍餉道不
通巡撫青麐奏委出城勸捐逮六月省城失守嚴樹森以先期
奉

旨任鄉勸捐免其置議五年在隨州任內時督臣楊霽駐軍該
州官兵失利州城淪陷事後查辦因總督有逃奔棗陽之咎而
嚴樹森又奉有調團協勦之札亦得奏明免議厥後遏賊北竄
隨克德安疊蒙保獎嚴樹森本有應議之案而反與於保敘之
列雖機緣所值適有天幸不由人謀而議者因其平日計較之

頗精遂疑此次微倖而獲免原奏所稱江夏隨州兩案恐爲僨
屬所輕殆由於此至其蒞任河南擒匪撲犯省城原奏以該撫
閉門自守不敢出城一步古法稱戰不足者守尙有餘嚴樹森
自度新集之卒未可深恃與其出戰挫衄不如嬰城堅守此蓋
未可厚非惟軍旅之事必有毫無瞻顧之心而後有一往直前
之氣嚴樹森於禍福成敗多涉計較則危急之時難期堅定功
名之地難泯矜爭

諭旨飭其不嫻軍務原摺慮其不明將略參之物論亦均於此
事未敢深信茲其所短也至嚴樹森之所長亦多非時流所可
及才思警敏精神完足胡林翼綜理釐務新改漕章嚴裁各衙

門陋規台局浮費但持大綱其節目周詳經營初稿多嚴樹森贊襄之力逮胡林翼出省征勦凡鄂民之疾苦刑案之出入州縣之積弊皆由嚴樹森悉心察覈往往晝接寮佐夜治文書侵曉從公達旦未寢咸豐十年升任豫撫沿途夫役到省供應概不索之州縣一洗從前惡習其裁汰冗兵參劾劣員亦頗力求整頓

諭旨稱其操守尙好畱意吏治自蒞豫撫任後尙無大過足見聖明垂察之精臣於咸豐九年經過黃州見胡林翼座右同官錄數冊臚列州縣佐雜履歷注載詳明評騭精當知爲嚴樹森手筆聞其接見屬僚詢訪一次歷久不忘胡林翼保薦人材如

閻敬銘李宗壽張建基等皆嚴樹森之所汲引胡林翼晚年多病專以薦賢報

國爲務嚴樹森被其薦達感名卿知己之恩沐

文宗不次之擢祓除舊習力爭上流亦孜孜焉以崇尚正人扶持善類爲己任茲其所長也官文休休有容遐邇共知然昔之待胡林翼事無大小推賢讓能多由撫署主政今之待嚴樹森資有淺深軍政吏治多由督署主政原奏所稱嚴樹森性情剛愎果於自用或致決裂以臣觀之所慮當不在此凡位偏則相忌勢均則相疑督撫同城自昔鮮能和協而善終爲撫者當任勞而不炫己之能爲督者亦當讓善而曲盡人之長庶幾相與

有成如嚴樹森之才

臣愚以為可勝鄂撫之任若得

皇上訓誨常加官文推誠相與當可飭吏阜財蒸蒸日上東南用兵鄂皖本屬一氣呼吸相通利害共之如該撫別有劣蹟鄂事或就隳壞臣當隨時據實密陳不敢稍涉徇隱貽誤大局所有遵

旨查覆緣由專摺由驛馳奏伏乞

皇太后

皇上聖鑒訓示謹

奏

查覆何桂清退守情形摺

同治元年八月二十九日

奏爲遵

旨查明復奏仰祈

聖鑒事竊臣接准部咨同治元年五月初七日奉

上諭刑部奏據何桂清呈出司道公稟請飭查辦等語何桂清
棄城逃避罪名業經大學士會同刑部審擬具奏惟據片稱該
革員呈出司道公稟一件係前任江蘇按察使查文經前任江
甯布政使薛煥前任江南鹽巡道英祿江安糧道王朝綸於丹
陽失守後聯銜稟請何桂清退守蘇州各情該司道等均有地
方之責當常州危急之際應如何幫同總督竭力守禦乃聯銜

稟請退守蘇州顯係見事危急意在同逃徐有王原參摺內亦有何桂清率領地方官退避之語若不從嚴查辦何以肅軍律而飭官方著曾國藩李鴻章將該司道當時如何聯銜具稟及如何退避各情形據實查明具奏其蘇常等處各逃官一併查明參辦殉難各員並著查請議卹以示勸懲欽此臣比卽咨商李鴻章在於蘇境詳查旋據通商大臣薛煥遞到節略一函內

鈔錄

廷寄二件奏稿二件咨稿一件據稱薛煥於咸豐九年十二月補授江甯布政司奉

旨飭令隨同何桂清辦理夷務十年三月奉

命幫辦通商事件閏三月初旬由上海轉棹常州奉

旨飭令單銜奏事二十四日何桂清欽奉十八日密寄

諭旨至所稱薛煥應否豫飭來京此言殊屬非是天津非議和之地該大臣仍當飭薛煥迅赴上海設法挽救等因欽此薛煥旋於三十日拜疏起程摺尾聲明即日前赴上海相機酌辦維時何桂清業已議定移駐蘇州其司道公請之稟係查文經主稿迨何桂清批發後亦係查文經錄批轉咨薛煥嗣於四月十一日撫臣徐有壬奏調薛煥回蘇辦理防務奉

旨著不准行欽此錄送各件到臣皖營臣伏查刑部奏請飭查司道四人中惟薛煥官職最大茲該大臣鈔送案據前既奉有

迅赴上海之

旨後又奉有不准回蘇之

旨則是理應離開常州之員軍機處必有檔案可稽其稟請移駐一節係屬隨眾聯銜並非別有私圖此外如查文經業已革職臣奉五月二十六日

密諭另有交查事件英祿業由吳棠奏參以原品休致王朝綸列銜在末不過隨同畫諾臣在外多年忝任封疆竊見督撫權重由來已久黜陟司道榮辱終身風旨所在能使人先事而逢迎既事而隱飾不特司道不肯違其情卽軍民亦不敢忤其意十年七月嘉興大營將弁聯名數十具呈請畱何桂清在蘇暫

不解京求臣轉奏由王有齡移咨到臣暗加察訪不過通知
軍中數人並非合營皆知是以未及代奏而王有齡已兩次具
奏觀營員請畱之呈則司道請移之稟蓋可類推無庸深究疆
吏以城守爲大節不宜以僚屬之一言爲進止大臣以心迹定
罪狀不必以公稟之有無爲權衡區區愚見不審有當萬一否
除查文經交查之案另行覆奏蘇常等處逃官由李鴻章彙案
會參外所有遵

旨查明緣由謹會同署江蘇巡撫臣李鴻章恭摺覆奏伏乞
聖鑒訓示謹

奏

查覆薛煥吳煦參款片

同治元年八月二十九日

再臣前此承准議政王軍機大臣字寄三月十三日奉

上諭前因有人奏江蘇撫臣不洽輿情玩視軍務各節當經疊諭曾國藩查奏旋據該大臣查明覆奏與所參情節大略相符茲又有人奏薛煥肆意營私於上海城內開設書畫局並與署藩司吳煦等開設錢鋪合夥販貨至各海岸假商人字號掩人耳目該撫之兄薛煥州縣鑽營皆經其手吳煦之子吳宗麟氣燄均極薰灼江蘇逃官如吳雲李翰文等薛煥無不包庇爲之開脫至於練總徐佩璋土棍費玉曾皆經降賊受僞職而薛煥信任二人保舉至道員都司上海縣劉郁膏循聲素著薛煥意

存嫉忌未能盡其所長各等語著曾國藩將所參各款秉公詳查據實具奏毋稍徇隱原摺著鈔給閱看將此諭令知之欽此

臣查薛煥性耽書畫設局收買臣於上年十一月查覆摺內業經陳明未敢稍爲隱諱自被參後此局早經停止至於開設錢鋪假商人之號州縣鑽營經薛煥之手臣處尙無所聞至開脫吳雲等之罪名保舉徐佩璋等之官職乃屬實事現在吳雲已由李鴻章另案參劾徐佩璋與其兄徐佩瑗前以團練得名後以騷擾失望久處賊中形迹可疑爲良爲匪亦復眾論紛歧惟聞該前撫辦理蘇州內應事件曾備銀數萬由徐姓馬姓轉交蘇賊原摺所稱徐費二人受賊僞職濟以火藥糧餉或卽指此

言之劉郁膏雖非拯救時艱之才而崇樸黜華素負民望該前撫未經薦達嫉忌之說或由斯起臣竊以薛煥前爲巡撫則百官之黜陟軍務之興衰措置稍乖關係甚大今僅爲通商大臣無用人理財之責事權已輕關係較淺其前此辦理未善之處應否免予懲究出自

聖主鴻裁至

諭旨垂詢吳煦開設錢鋪販貨至各海岸暨其子吳宗麟氣燄薰灼各情又奉五月二十日

寄諭鈔示殷兆鏞原摺中列吳煦劣蹟亦飭臣等查辦臣查吳煦開設銀號置買海舶牟利營私係屬實情臣與李鴻章久擬

列款參奏惟蘇藩關道二缺一時難得接署之人又蘇常失陷以後上海屢瀕於危吳煦聯絡洋人保全要地具有微勞且其廣交洋商厚結華爾吳煦之進退於華爾全軍略有關係華爾之向背於英法各國略有關係不得不周詳審慎三思後行除俟上海關道一缺遴委得人再將吳煦事蹟會摺參奏外理合將奉

旨飭查薛煥各情先行附片密陳伏乞

皇太后

皇上聖鑒謹

奏

近日軍情片

同治元年八月二十九日

再近日軍情洪容海投誠以後進剿建平小挫而退其部下頭目眾多各爭雄長中懷反側洪容海不能彈壓有僞目張得勝陶子高等帶二萬餘人投歸僞輔王楊七麻處又有僞目朱大椒黃三元等帶二萬餘人在廣德州內亂與洪容海自相仇殺洪容海帶心腹萬餘人奪門而出投歸甯國鮑超營次廣德州遂仍爲賊所佔踞鮑超仍照前議令洪容海酌畱三千人編立五營隨同官兵打仗攻克廣德以贖前愆臣昨於十二日具奏此案摺尾聲明恐其另生枝節今果有此一變目下事局尙未大定是否更有波折殊難預決頃奉七月二十八日

寄諭以洪容海降眾六萬不妨酌量多畱惜

諭旨遲到半月不及欽遵辦理然招降之事古無良策必降將之才足以統馭其黨而後無反覆爭鬪之虞又必官兵之氣足以懾服降人而後無幹弱枝強之患今洪容海歸順之眾雖較前數大減然後患亦較少臣尙不深以爲慮臣之所憂慮者現在楊輔清黃文金賴文鴻古隆賢等諸僞王麇集於廣德建平一帶又有已降復叛之張得勝朱大椒等凶燄彌增又據左宗棠咨僞侍王將由浙境赴援金陵自甯國廣德決戰而往羣賊將萃於皖南而鮑超營中疾疫大作勇夫病者萬餘人死者日數十人張運蘭朱品隆唐義訓各軍亦十人而病其六七張運

蘭之胞弟張運桂亦已病故卽去臘堅守徽州苦戰得全者也
曾國荃金陵營中病者亦逾萬數皆由臣以菲材妄竊高位上
干鬼神之譴莫救厄運之災左宗棠軍中病者亦復過半每次
出隊不滿五成若秋閒有大股惡戰深恐羸卒不足禦強寇中
夜縈思不勝焦灼至李鴻章奏洪首逆已移居蘇州係屬謠傳
並無其事此軍務最大關鍵臣不敢不畱心訪察除俟洪容海
投誠之事大定另案續奏暨張運桂等立功後病故各員彙奏
請卹外謹將近日軍情附陳梗概伏求

皇太后

皇上聖鑒謹

奏

卷一

唐訓方駐紮臨淮摺

同治元年閏八月十二日

奏爲暫署撫臣接辦皖北軍務遵

旨酌度駐紮地方恭摺覆陳仰祈

聖鑒事竊臣承准議政王軍機大臣字寄同治元年八月十七

日奉

上諭李續宜奏瀝陳哀惻籲懇賞假回籍奔喪一摺已降旨賞假百日准其回籍並令唐訓方暫署安徽巡撫閻敬銘署理湖北藩司矣皖省粵逆雖就肅清而徐宿蒙亳等處捻匪屢次出巢肆擾且正陽關壽州各處苗練眈眈虎視亦未必帖耳就撫是皖北軍務未可稍鬆曾國藩節制四省軍務綦繁現值進剿

奏和卷一
金陵調度正當喫緊皖北關係緊要必須得人督辦俾曾國藩
得以專意東征據李續宜奏稱唐訓方久歷戎行熟諳戰守著
官文速飭該藩司前赴安慶接署安徽撫篆毋稍遲延其應否
駐紮臨淮接統袁甲三一軍之處並著曾國藩酌度具奏等因
欽此仰見

聖主慎重巖疆虛衷博訪欽悚曷任臣維皖北形勢以淮水爲
綱領前此髮匪盛於淮南捻匪擾於淮北袁甲三駐紮臨淮跨
兩淮而處其中上年秋間苗沛霖攻陷壽州占淮西之數城據
上游之津要袁甲三勢處孤危旁無應援支撐實屬不易自巢
和廬州次第克復而髮逆掃除殆盡自三河霍邱羣奸效順而

苗黨解散過半頃苗沛霖已將壽州正陽關兩處退出李續宜
令蔣凝學進城防守大江以北長淮以南業經一律肅清地形
之險易視賊勢爲轉移今日臨淮一關似已無甚緊要然唐訓
方暫署皖撫仍應駐紮臨淮乃足以資控制李續宜所部在皖
境者約分五枝一曰安肅道蔣凝學進次壽州分防潁壽正陽
關三處一曰記名提督蕭慶衍駐軍霍邱與正陽三河尖爲犄
角之勢一曰記名提督成大吉一曰道員毛有銘兩軍皆駐三
河尖附近之望岡集並由成大吉分撥一營出駐河南之固始
縣城一曰總兵王載駟畱守六安州爲各軍保固後路接應糧
械淮西各城布置極爲周密若唐訓方進駐臨淮關則西可聯

宋紀卷十六
絡蔣凝學壽穎之師東可聯絡吳棠清江之師南可聯絡石清
吉廬州之師與李世忠滁州之師而北路亦可稍助僧格林沁
之聲援若不駐臨淮則中段空虛恐徐宿蒙毫之羣捻又將窺
伺淮南關係甚大不可不防聞唐訓方擬於閏八月中旬由鄂
起行來皖俟其到省臣當與之熟商卽接統袁甲三一軍汰弱
畱強昕宵訓練楚皖各軍聯爲一氣庶幾防剿兼施首尾皆應
是否有當伏候

聖主裁奪

敕下唐訓方妥籌辦理所有遵

旨酌度緣由恭摺覆陳伏乞

皇上聖鑒訓示謹
奏

請簡親信大臣會辦軍務片

同治元年閏八月十二日

再大江南岸各軍疾疫盛行臣於八月二十九日附片具奏在案近日秋氣已深而疫病未息甯國所屬境內最甚金陵次之徽州衢州次之水師及上海蕪湖各軍亦皆厲疫繁興死亡相繼鮑超一軍據初二日開單稟報除已痊外現病者六千六百七十人其已死者數千尙未查得確數甯國府城內外尸骸狼籍無人收埋病者無人侍藥甚至一棚之內無人炊爨其軍中著名猛將如黃慶伍華瀚等先後物故鮑超亦染病甚重合營將領因其關係至大一面稟明臣處一面用舟送鮑超至蕪湖養病張運蘭一軍駐紮太平旌德等處病者尤多卽求一繕稟

之書識送信之夫役亦難其人張運蘭送其弟之櫬至祁門亦
自患病尙難回營皖南道姚體備至嶺外查閱一次歸卽染病
不起臣派營務處四品卿銜甘晉至甯國一行現亦染病回省
楊岳斌自揚州歸來亦抱重病天降大戾近世罕聞惡耗頻來
心膽俱碎若有大股賊匪撲犯甯國旌太等處鮑超張運蘭兩
軍不特不能出隊迎戰並不能堅守城壘不特不能堅守以待
外援並不能預逃以待再振若撲犯金陵徽州亦深恐病者太
多戰守皆無把握數年來千辛萬苦戰爭之土地由尺寸而廣
至數百里倘有疎虞何堪設想若皖南藩籬一壞則江西內地
空虛毫無足恃興言及此憂心如焚而皖北苗捻兩患時時可

慮袁甲三李續宜皆將回籍唐訓方新來諸事且萃於微臣一

人之身疾疫之災旣如彼責任之重又如此臣自度薄德不足

以挽厄運菲才不足以支危局譬諸擔夫力能負百斤者增至

百二十斤則汗流而蹇增至百五十斤則僵踣矣臣力本不勝

日斤今且增至數十倍之重僵踣不足惜倘遂貽誤大局敢不

祁懌合無籲懇

皇太后

皇上天恩簡派在京親信大臣馳赴大江以南與臣會辦諸務


分重大之責任挽艱難之氣數臣具有天良斷不敢稍存推諉


致誤戎機今年軍事甫順而疾疫流行休咎之徵莫可推測中


夜默思惟求德器遠勝於臣者主持東南大局而臣亦竭力經營而左右之庶幾補救於萬一區區愚忱伏乞

聖慈垂鑒訓示謹

奏







曾文正公奏稿

卷之十七目錄



覆陳皖北軍情並察度苗練摺

同治元年閏八月二十七日

近日軍情片

彙報軍情請調多隆阿軍回皖摺

九月十二日

甯國縣失守片

江西釐務疲乏情形片

彙報近日軍情摺

九月二十七日

水陸迭勝力保蕪湖金柱關摺

十月十二日

近日軍情片

陳明各軍應保之案片

十月二十七日

縷陳金陵各營苦守情形摺

近日軍情仍請簡派大臣會辦營務片

張運蘭回籍養病片

彙報近日各路軍情摺

十一月十二日

審明陳步高等潰走情形分別定擬摺

全日

祁門縣失守片

撤回壽州正陽防兵片

欽奉諭旨分條覆陳摺

十一月二十七日

旌德涇縣解圍克復績溪祁門摺

全日

查明金安清汪曜奎參款擬結摺

全日

鮑超丁憂在營穿孝片

預籌選派員弁管帶輪船摺

十二月十二日

軍營病故人員彙案請卹摺

全日

李世忠在九洑洲戰守情形摺

全日

近日軍情片

恭謝天恩摺

十二月二十四日

迭奉諭旨併案覆陳摺

十二月二十七日

東征局籌餉官紳請獎摺

全日

黃冕惲世臨有功東征片

近日軍情片

奏稿卷十七

二

覆陳皖北軍情並察度苗練

同日

同治元年閏八月二十七日

奏爲欽奉

諭旨恭摺覆陳仰祈

聖鑒事竊

臣

承准議政王軍機大臣字寄閏八月十二日奉

上諭僧格林沁現飭富和並添派之翼長全順會同恆齡卓明
阿馬隊駐紮永城一俟永亳一帶積潦漸消道路可行卽行相
機進剿亳州擒巢該擒等股迭經痛剿一經直擣老巢勢必窮
思鋌走若令東西分竄官軍移向各路往追賊又繞路回巢官
軍又復回攻必致往來周折爲所牽制此等情形總當預爲籌
畫謀定後動方免臨時互相推諉貽誤事機僧格林沁現在夏

邑將由北路進兵將來各路約齊會剿之時賊如竄往北路自應卽由該大臣撥兵追剿其賊竄西路應由唐訓方撥兵追剿賊竄東路應由吳棠撥兵追剿賊若南竄卽行三路合力追剿均著各專責成先期妥爲布置毋得臨事觀望遷延自干罪戾其毛昶熙所部駐紮營廓等處勇營併著僧格林沁酌量隨同官軍應由何路進攻妥爲調遣楚軍應由南路進攻其西路賊竄責令追剿是否足敷分撥有無窒礙難行之處唐訓方署理撫篆甫莅皖軍於進兵情勢未知能否洞悉旣據僧格林沁將督催楚軍進剿捻巢各情移咨曾國藩酌量調度卽著妥爲籌議並將駐紮潁郡楚軍道員蔣凝學是否堪以統帶抑應添派

得力提鎮大員督率之處一併妥籌兼顧並一面咨復僧格林沁辦理吳棠駐軍清淮籌防裏下河一帶於亳州東路靈宿等處亦恐相距稍遠黃開榜派赴徐州代領田在田一軍應令如何酌量進紮袁甲三尙駐臨淮其於亳捻東路防剿應與吳棠等如何各分汛地合力進攻之處均當預爲籌定總之各路責成均須嚴密部勒方能及時同心戮力聲勢聯絡著該大臣等會同詳悉商酌盡善迅卽奏聞鄭元善現赴河洛督辦西路剿匪所統各軍雖難卽時撤回助剿惟亳捻如由西北兩面竄走均係豫境卽著鄭元善毛昶熙嚴飭各屬文武官紳率領兵練協同官軍悉力防剿如有賊由何路竄逸不能實力堵禦該地

方官吏與帶兵將領厥罪維均苗沛霖反覆再三其叵測情狀天下聞知目前歸正仍恐其首鼠兩端第以勝保赴陝失所據依兼之畏懾楚師之威始將壽州正陽等處釐卡交出姑且就我羈縻僧格林沁以現當剿捻喫緊之際勢宜恩威並用以不疑用之剿賊賊平之後苗練勢孤自必盡除傲慢且使苗練安帖則蔣凝學所領楚軍便可專力與僧格林沁之軍合力各由南北進剿捻巢以期得力所籌自是不爲無見此次苗沛霖因僧格林沁札諭該練欲用之剿捻乘機具稟申訴揣其意一則欲借僧格林沁聲威抑制李續宜撤去楚師使彼得以逞志一則欲借剿捻之名冀僧格林沁奏准仍復還其前次占踞之

利藪一面之詞毫無情理而陰鷲之謀時流露於意言之表苗沛霖如果能帶練勦賊爲國出力朝廷屢經明諭貫其旣往子以自新該大臣等何難待之坦白盡釋猜嫌但必須其實心實力悔罪歸誠有殺賊攻城之實據方可加之信任若仍心跡闇昧或陽爲助勦而仍與賊陰相結納或第欲冒官練之名以脅縉民圩希圖煽惑漸成尾大不掉之勢其居心行事朝廷亦必洞見肺肝諒該大臣等亦斷不以欲資其力稍涉遷就致爲所惑而忘後患著僧格林沁曾國藩等會同察度妥籌萬善正陽等處釐卡旣已交出卽該練等果隨同奮勉勦賊心跡已明曾國藩等並當籌給餉需至壽州正陽關等處利源所在斷不得

令該練等藉詞餉需再圖侵佔前次逆首陳玉成就擒壽州其餘賊驍悍之眾尙有二千餘人苗沛霖收隸所部現在曾否遣散其竄擾豫省南陽一股擒逆內有無此項陳逆餘黨並著僧格林沁等查明具奏等因欽此仰見

聖謨閎遠布置精詳

臣

於二十一日接奉此

旨卽與撫

臣

李續宜再三商度逮二十三日李續宜登舟起程

署撫

臣

唐訓方恰到安慶

臣

又與之熟商如會剿亳州擒巢楚

軍應由南路進攻其西路賊竄責令楚軍追剿

諭旨垂詢是否足敷分撥有無窒礙一節查李續宜所部湘勇

在皖境者萬餘人現在分守潁州壽州六安霍邱固始五城又

守三河尖正陽關兩隘皆係最要之區若再令分剿珍巢則防守七處之兵與進剿亳南之兵皆嫌其單湘軍素無馬隊於追逐擒匪本不相宜若步軍太單則更無把握矣屢接官文函咨石清吉防守廬州之十營前已調去三營今又欲再調三營回援鄂省並云髮匪自德安而下欲由安慶境內回援金陵如果屬實皖北腹地空虛處處可慮潁壽之湘勇以分守七處而太單廬州之防兵以抽調六營而亦薄更無餘力可以進剿亳南此楚軍不敷分撥兼有窒礙之情形也

諭旨垂詢道員蔣凝學是否可以統帶抑應添派大員督率一節據李續宜面稱蔣凝學與毛有銘同爲監司成大吉蕭慶衍

王載駟皆爲提鎮勢位相侔才智相等彼此俱難統屬至臣所部各軍如楊載福鮑超張運蘭朱品隆諸統將皆抱病未痊現在皖南軍情十分緊急臣欲求一人支持危局尙不可得又安能另派大員督率淮北剿捻之師此頴壽各軍難相統馭之情形也

諭旨垂詢苗沛霖反覆叵測察度妥籌一節臣查苗沛霖詭譎多端耳目最廣聞凡李續宜離開苗部之密諭勝保參劾湘軍之微詞苗沛霖皆得鈔其全稿卽言官劾苗之疏

廷寄馭苗之法苗沛霖亦多錄其原文蔣凝學等欲陽撫之而陰防之固在苗沛霖計算之中卽僧格林沁欲調苗剿捻並欲

調苗離巢使楚軍得放心。勦擒亦未嘗不在苗沛霖計算之中。
臣愚以爲欲苗之不猜疑，必在我者先有誠，一不欺之道。欲苗
之不反覆，必在我者先有堅定不變之謀。大抵馭苗之策有二：
一曰勦，一曰撫。撫苗之策亦有二：一曰赦其罪而不資其力，一
曰資其力而並予以權。凡良圩之出財出力以從苗者，非心服
也，彼挾

朝命以臨之，不得已而爲所脅耳。自夏間黨羽離散，苗勢漸衰。
今調之會，勦擒巢則必聽其招集，舊部號令羣圩，是予以威權
矣。又必聽其廣收練稻，設立釐卡，是予以利權矣。今日養虎自
衛，他日復欲縛虎歸柙，豈易言哉？臣愚以爲赦其罪而不資其

力猶不失爲中策於徵調之札則吝之使其號令不能遽振於
釐卡之事則寬之使其生計不至遽窮情願假以利權斷不予
以威權俾苗沛霖旣服官軍之足以自立又感疆臣之不與爭
利或可相安無事若旣欲資其力又欲結其心而又不予以威
權利權則斷無是理矣此臣察度苗練但用中策之微意也至
苗沛霖所收逆首陳玉成餘眾曾否遣散是否混入南陽捻股
之內俟訪查明確續行附奏所有遵

旨籌議緣由謹會同署安徽撫

臣

唐訓方由驛覆奏伏乞

皇太后

皇上聖鑒訓示再此摺係與李續宜面商定議李續宜奏明於

二十六日起程回籍因業經交印卽於二十三日行具咨請
臣代奏理合代爲聲明謹

奏

近日軍情片

同治元年閏八月二十七日

再近日軍情僞忠王由蘇州帶大股賊匪上援金陵屯踞城南谷裏村人字橋一帶二十日撲官軍營壘一次金陵將士多病迄未稍愈曾貞幹亦抱病未痊殊爲可慮逆首黃文金胡鼎文等大股由東垣撲犯金寶圩鮑超尙在蕪湖養病宋國永在甯國代統其軍派霆字四副營峯字兩營於距城五十里之新河莊禦之二十日始到營壘未定爲賊所乘官軍小挫退回甯國探聞黃文金等逆將自新河莊犯甯郡之西楊七麻等逆將自建平縣撲甯郡之東官軍病者太多統將鮑超又不在營張運蘭雖已於十七日帶病進城而其部卒亦病莫能興朱品隆於

十四日移守旌德亦上下皆爲病所苦防守尙無把握大疫之後遇此鉅寇皖南全局幾無一處可恃總由微臣德薄位尊莫挽厄運五夜憂灼悚皇無地所幸左宗棠於前月之杪疊獲大勝蔣益澧於十四日克復壽昌將來徽州有急或可調蔣益澧就近救援楊岳斌鮑超病皆漸愈鮑超現發徧身瘡癰邪症全除擬於二十六七日回營其軍縱有疏失尙可徐圖整頓仰賴皇上威福猶當力籌挽救定傾扶危除金陵甯國兩處接仗情形續行具奏外理合附片先陳梗概伏乞

皇太后

皇上聖鑒謹

奏

彙報軍情請調多隆阿軍回皖摺

同治元年九月十二日

奏爲彙報各路軍情請

旨敕調多隆阿一軍回駐皖北恭摺馳陳仰祈

聖鑒事竊僞忠王李秀成救援金陵黃文金等股圖犯甯國各

情形臣於閏八月二十七日附陳梗概在案現計各路局勢可

慮者約有四端李秀成率十餘萬賊更番猛撲雨花台營盤自

閏八月二十至九月初六晝夜不息洋槍洋礮子密如雨兼有

開花炸礮打入營中驚心動魄曾國荃於二十九日面受洋槍

子傷幸尙無礙其得力部將倪桂卽於是日中礮殞命賊現多

開地洞百道環攻並未少休又據蔣益澧來稟僞侍王李世賢

於前月十四日帶賊三四萬由浙赴援金陵我軍以病餘之卒
苦守十六日夜疲乏已極若再添侍逆一股殊恐難支此金陵
之可慮也胡黃諸逆之竄犯甯國者自前月二十日我軍小挫
後未遽攻撲郡城盤踞於廟埠仰賢圩油榨溝新河莊等處綿
亙近百里疊據逃出及擒獲匪黨僉稱該逆不得逞於甯國決
計繞竄南陵青陽上犯江西目下各營病勇未痊缺額未補卽
能竭力保守甯郡而灣沚無陸師駐防該逆若由閒道上趨不
能分兵堵截此甯國之可慮也小丹陽之賊已由東壩拖過戰
船數百號分布固城南漪各湖時圖出江我軍水師自湖口以
至金陵分防二千餘里地段太長兼以營哨弁勇病者過多又

新派李朝斌帶三營馳赴上海兵以分而愈單設賊船乘間衝出則江中糧路俱斷此水師之可慮也連日接湖北督撫臣飛咨豫省大股髮捻竄至德安隨州分擾各屬逆首馬融和卽上年竄踞德安本年由潁入陝者也訊據賊供有取道皖境回援金陵之語自廬州克復以後皖境各城空虛一經逆蹤闌入又將到處糜爛此皖北之可慮也此外如蕪湖金柱關等處亦俱賊多兵寡在在堪虞顧可慮者雖有多端而仰託

皇上威福似尙有可以挽救之機前此疾疫盛行之際臣於八月二十九閏八月十二日兩次陳奏軍中病狀方虞鉅寇一至全局瓦解今賊氛如此浩大而支持業經兩旬已非臣意料所

及從此竭力營救當可勉撐危局仰慰

宸廑於萬一曾國荃營中初三日獲小勝仗一次初五早獲大

勝仗一次臣現飛調駐紮蕪湖之王可陞一軍馳赴雨花臺又

咨調上海程學啟一軍暫棄青浦雇坐輪船趕赴金陵均幫助

曾國荃共守營濠又咨調李世忠一軍於龍潭石埠渡江由孝

陵衛北路而來調鮑超一軍與現駐旌德之朱品隆一軍均由

采石南路而來兩頭夾擊冀解重圍此挽救金陵之拙計也當

羣賊甫集之時鮑超卽力疾自蕪湖回營二十七日已抵甯國

竭力整頓將病者傷者安置城內簡選精銳紮營城外張運蘭

全部登陴主守鮑超所出城主戰初三日在廟埠獲一勝仗

擬於初六日移紮高祖山兼顧西河灣沚等處計日內必有數

次惡

戰臣

與浙江撫

臣

左宗棠商咨商調藩司蔣益澧一軍由

浙境馳赴皖南與張運蘭會辦甯國防剿事宜鮑超能於日內
大破黃胡各賊固爲至幸若不能破賊亦可抽出鮑超一軍馳
援金陵而以蔣益澧接辦甯國軍務至南陵爲內竄之路鮑超
已派總兵婁雲慶駐守該縣其皖南之徽州池州祁門江西之
湖口景德鎮臣與沈葆楨亦均派兵防守各城此挽救甯國之
拙計也至水師防務楊岳斌病已漸愈力疾督守金柱關彭玉
麟分巡灣沚蕪湖各要隘臣又飭駐紮安慶之巡湖副中兩營
趕緊下駛又飛調李朝斌三營由上海折回金陵該逆如欲衝

出大江合各營未病之船尙可與之力戰挫其兇鋒仰仗

聖主鴻福或者化險爲夷不至遽形決裂惟皖北地廣兵單臣

前接鄂賊下趨之信卽調提督成大吉由三河尖馳赴霍山英

山相機防剿現在安慶廬州兩府料理城守事宜一面截留李

鴻章新募之淮勇五營暫駐運漕鎮保守膏腴之地而舒桐潛

太一路非有大枝勁旅不足以資控扼昨接勝保來咨陝西省

城業經解圍附近逆巢亦經掃蕩又接官文李鴻章兩處來咨

已奏請多隆阿一軍回援東南相應請

旨敕下多隆阿迅速東還駐紮舒桐兼顧鄂皖兩省大局幸甚

本年五六月間臣屢思奏請多隆阿一軍會剿金陵因西事方

棘臣

不敢獨擁重兵是以欲進而復止欲吐而仍茹屢蒙

聖慈垂鑒今則軍情萬緊寸知俱窮不得不奏添大枝勁旅保全已復之土地如馬融和股匪不果竄擾皖北多隆阿回軍之後或會剿金陵老巢或會剿蒙毫擒匪再行奏明請

旨定奪除各營戰狀俟守事大定分案具奏及應獎應卹人員續行陳請外所有各路軍情謹

皇太后

皇上聖鑒訓示謹

奏

卷之四

以爲自昔以來，誠恐山中人自地聖廟者，

又曰：血氣者，人之源，若其氣血虧損，則百病叢生。故欲求長生，必先固其本。此固本之要也。

100
50
25
12.5
6.25
3.125
1.5625
0.78125
0.390625
0.1953125
0.09765625
0.048828125
0.0244140625
0.01220703125
0.006103515625
0.0030517578125
0.00152587890625
0.000762939453125
0.0003814697265625
0.00019073486328125
0.000095367431640625
0.0000476837158203125
0.00002384185791015625
0.000011920928955078125
0.0000059604644775390625
0.00000298023223876953125
0.000001490116119384765625
0.0000007450580596923828125
0.00000037252902984619140625
0.000000186264514923095703125
0.0000000931322574615478515625
0.00000004656612873077392578125
0.000000023283064365386962890625
0.0000000116415321826934814453125
0.00000000582076609134674072265625
0.000000002910383045673370361328125
0.0000000014551915228366851806640625
0.00000000072759576141834259033203125
0.000000000363797880709171295166015625
0.0000000001818989403545856475830078125
0.00000000009094947017729282379150390625
0.000000000045474735088646411895751953125
0.0000000000227373675443232059478759765625
0.00000000001136868377216160297393798828125
0.000000000005684341886080801486968994140625
0.0000000000028421709430404007434844970703125
0.00000000000142108547152020037174224853515625
0.000000000000710542735760100185871124267578125
0.0000000000003552713678800500929355621337890625
0.00000000000017763568394002504646778106689453125
0.000000000000088817841970012523233890533447265625
0.0000000000000444089209850062616169452667236328125
0.00000000000002220446049250313080847263336181640625
0.000000000000011102230246251565404236316680908203125
0.0000000000000055511151231257827021181583340541015625
0.00000000000000277555756156289135105907916702705078125
0.000000000000001387778780781445675529539583513525390625
0.0000000000000006938893903907228377647697917567626953125
0.00000000000000034694469519536141888238489587838134765625
0.000000000000000173472347597680709441192447939190673828125
0.0000000000000000867361737988403547205962239695953369140625
0.00000000000000004336808689942017736029811198479766845703125
0.000000000000000021684043449710088680149055992398834228515625
0.0000000000000000108420217248550443400745279961994171142890625
0.0000000000000000054210108624275221700372639980997085571453125
0.0000000000000000027105054312137610850186319990498542785716796875
0.00000000000000000135525271560688054250931599952492713928583984375
0.000000000000000000677626357803440271254657999762463569642919921875
0.0000000000000000003388131789017201356273289998812317848214599609375
0.00000000000000000016940658945086006781366449994061589241072998046875
0.000000000000000000084703294725430033906832249970307946205364990234375
0.0000000000000000000423516473627150169534161249851539731026824951171875
0.00000000000000000002117582368135750847670806249257698655134124755859375
0.000000000000000000010587911840678754238354031246288493275670623779296875
0.0000000000000000000052939559203393771191770156231442466378353118896484375
0.00000000000000000000264697796016968855958850781157212331891765594482421875
0.000000000000000000001323488980084844279794253905786061659458827972412109375
0.0000000000000000000006617444900424221398971269528930308297294139862060546875
0.00000000000000000000033087224502121106994856347644651541486470699310302734375
0.000000000000000000000165436122510605534974281738223257707432353496551513671875
0.0000000000000000000000827180612553027674871408691116288537161767482757568359375
0.00000000000000000000004135903062765138374357043455581442685808837413787841796875
0.000000000000000000000020679515313825691871785217277907213429044187068939208984375
0.0000000000000000000000103397576569128459358926086389536067145220935344696044921875
0.00000000000000000000000516987882845642296794630431697680335726104676723480224609375
0.000000000000000000000002584939414228211483973152158488401678630523383617401123046875
0.0000000000000000000000012924697071141057419865760792442008393152616918087005615234375
0.00000000000000000000000064623485355705287099328803962210041965763084590435028076171875
0.0000000000000000000000003231174267785264354966440198110502098

卷之四

...the

2000
2001
2002
2003
2004
2005
2006
2007
2008
2009
2010
2011
2012
2013
2014
2015
2016
2017
2018
2019
2020
2021
2022
2023
2024
2025
2026
2027
2028
2029
2030
2031
2032
2033
2034
2035
2036
2037
2038
2039
2040
2041
2042
2043
2044
2045
2046
2047
2048
2049
2050
2051
2052
2053
2054
2055
2056
2057
2058
2059
2060
2061
2062
2063
2064
2065
2066
2067
2068
2069
2070
2071
2072
2073
2074
2075
2076
2077
2078
2079
2080
2081
2082
2083
2084
2085
2086
2087
2088
2089
2090
2091
2092
2093
2094
2095
2096
2097
2098
2099
2100
2101
2102
2103
2104
2105
2106
2107
2108
2109
2110
2111
2112
2113
2114
2115
2116
2117
2118
2119
2120
2121
2122
2123
2124
2125
2126
2127
2128
2129
2130
2131
2132
2133
2134
2135
2136
2137
2138
2139
2140
2141
2142
2143
2144
2145
2146
2147
2148
2149
2150
2151
2152
2153
2154
2155
2156
2157
2158
2159
2160
2161
2162
2163
2164
2165
2166
2167
2168
2169
2170
2171
2172
2173
2174
2175
2176
2177
2178
2179
2180
2181
2182
2183
2184
2185
2186
2187
2188
2189
2190
2191
2192
2193
2194
2195
2196
2197
2198
2199
2200
2201
2202
2203
2204
2205
2206
2207
2208
2209
2210
2211
2212
2213
2214
2215
2216
2217
2218
2219
2220
2221
2222
2223
2224
2225
2226
2227
2228
2229
2230
2231
2232
2233
2234
2235
2236
2237
2238
2239
2240
2241
2242
2243
2244
2245
2246
2247
2248
2249
2250
2251
2252
2253
2254
2255
2256
2257
2258
2259
2260
2261
2262
2263
2264
2265
2266
2267
2268
2269
2270
2271
2272
2273
2274
2275
2276
2277
2278
2279
2280
2281
2282
2283
2284
2285
2286
2287
2288
2289
2290
2291
2292
2293
2294
2295
2296
2297
2298
2299
2300
2301
2302
2303
2304
2305
2306
2307
2308
2309
2310
2311
2312
2313
2314
2315
2316
2317
2318
2319
2320
2321
2322
2323
2324
2325
2326
2327
2328
2329
2330
2331
2332
2333
2334
2335
2336
2337
2338
2339
2340
2341
2342
2343
2344
2345
2346
2347
2348
2349
2350
2351
2352
2353
2354
2355
2356
2357
2358
2359
2360
2361
2362
2363
2364
2365
2366
2367
2368
2369
2370
2371
2372
2373
2374
2375
2376
2377
2378
2379
2380
2381
2382
2383
2384
2385
2386
2387
2388
2389
2390
2391
2392
2393
2394
2395
2396
2397
2398
2399
2400
2401
2402
2403
2404
2405
2406
2407
2408
2409
2410
2411
2412
2413
2414
2415
2416
2417
2418
2419
2420
2421
2422
2423
2424
2425
2426
2427
2428
2429
2430
2431
2432
2433
2434
2435
2436
2437
2438
2439
2440
2441
2442
2443
2444
2445
2446
2447
2448
2449
2450
2451
2452
2453
2454
2455
2456
2457
2458
2459
2460
2461
2462
2463
2464
2465
2466
2467
2468
2469
2470
2471
2472
2473
2474
2475
2476
2477
2478
2479
2480
2481
2482
2483
2484
2485
2486
2487
2488
2489
2490
2491
2492
2493
2494
2495
2496
2497
2498
2499
2500
2501
2502
2503
2504
2505
2506
2507
2508
2509
2510
2511
2512
2513
2514
2515
2516
2517
2518
2519
2520
2521
2522
2523
2524
2525
2526
2527
2528
2529
2530
2531
2532
2533
2534
2535
2536
2537
2538
2539
2540
2541
2542
2543
2544
2545
2546
2547
2548
2549
2550
2551
2552
2553
2554
2555
2556
2557
2558
2559
2560
2561
2562
2563
2564
2565
2566
2567
2568
2569
2570
2571
2572
2573
2574
2575
2576
2577
2578
2579
2580
2581
2582
2583
2584
2585
2586
2587
2588
2589
2590
2591
2592
2593
2594
2595
2596
2597
2598
2599
2600
2601
2602
2603
2604
2605
2606
2607
2608
2609
2610
2611
2612
2613
2614
2615
2616
2617
2618
2619
2620
2621
2622
2623
2624
2625
2626
2627
2628
2629
2630
2631
2632
2633
2634
2635
2636
2637
2638
2639
2640
2641
2642
2643
2644
2645
2646
2647
2648
2649
2650
2651
2652
2653
2654
2655
2656
2657
2658
2659
2660
2661
2662
2663
2664
2665
2666
2667
2668
2669
2670
2671
2672
2673
2674
2675
2676
2677
2678
2679
2680
2681
26

甯國縣失守片

同治元年九月十二日

正封摺開又接鮑超文稱甯國縣城於九月初六日失守該縣前派韋志俊洪容海兩降將守之本屬不可深恃而韋志俊又因病就養蕪湖該縣失陷亦係意中之事惟一縣旣失則藩籬已弛現在徽州旌德兩城首當其衝守徽州者爲皖南鎮唐義訓守旌德者爲衢州鎮朱品隆兩處兵力皆單朱品隆又久病未痊缺餉過久據稱旌德百物皆空無可市買並無零錢可辦油鹽驟遇大敵深恐不克支持臣現催調蔣益澧一軍來援徽州旌德若兩城能如金陵甯國之堅守二旬則救兵可至矣該兩城如幸而保全又恐該逆由績溪太平閒道竄犯江西反復

籌思殊無完策臣前調朱品隆偕鮑超援解金陵之圍今旌德
且恐不保鮑超亦三面受敵自不能抽出馳救金陵除甯國縣
詳細戰狀另行具奏外理合附片陳明伏乞

皇太后

皇上聖鑒謹

奏

江西釐務疲乏情形片

同治元年九月十二日

再江西全省釐務於咸豐十年五月奏明充臣軍餉卽經派委督糧道李桓候補道李瀚章綜理嗣於是年冬閒分爲兩局下游南撫建廣饒九南七屬爲省局由李桓經理上游袁臨瑞吉南贛甯七屬爲贛局由李瀚章經理下游各府屬商販行釐本年二月一律加成兩起兩驗收數自應較前倍增乃近數月以來總台解數寥寥計自四月至八月安慶糧台僅收到江西總台銀二十二萬兩錢四萬串若除每月應解之漕折銀四萬兩計此五箇月中連錢折算僅解釐金四萬餘兩每月七府釐金不滿一萬殊不可解臣訪聞江省商民近日頗多怨言究竟釐

金雖已加抽營餉未得實濟前此批定贛局月解八萬省局月解八萬除去吳城湖口二卡僅月責省局六萬當時賊氛在境就釐金極衰之時而立制乃今年全境肅清從無月解六萬之事自河口景鎮樂平三卡由臣撥歸浙江撫臣左宗棠抽收饒州一卡撥歸祁門糧台買米支用彼四卡抽收愈旺而七屬各卡報解愈少目下彼四卡月收已過五萬將來若收過六萬則七屬各卡全無應解之釐總台且有倒欠矣臣提用江西釐金漕折中外通知乃核其所得不特不如湖北湖南之釐而省局尙不如東征局之數並不如左宗棠經收景鎮河口樂平三卡之數臣徒攬江右利權之名全無供蘇皖飢軍之實該藩司李

桓總辦糧合兼管釐局漫不經心玩視餉務如饒州一局八月收冊尙未送到卽據三四五六七八凡五箇月報到收冊除以一
半解祁門買米外其一半劃解省局者已有銀七千九百四十
兩零有錢九萬二千九百四十三串零卽此饒卡業經解省之
項李桓亦未轉解來皖同係近五箇月之事饒州一卡分半解
省者爲數反多七屬各卡全行解皖者爲數反少不知各卡是
何弊竇李桓是何居心又如河口一局本年四月以前係已革
同知向紹先經管每月收數至多不過五千餘兩逮左宗棠委
周開錫經收五月解銀一萬有奇較前卽增一倍六七兩月共
解銀三萬有奇較前並增至二倍李桓果認真察訪向紹先當

早已撤退乃於飭查之案猶且多方袒護僅請停委一年經臣加重奏參革職該司但圖見好屬員不顧貽誤餉需殊屬大負委任自李瀚章奏派赴粵辦釐袁瑞臨三府歸併省局該藩司事務較繁臣已添委甘肅臬司劉于濤訪察商情並派署鹽巡道孫長紱專司月報常川駐局力圖整頓重定規條嗣後江西各局卡上月收數若干坐支局費若干均限下月初三日繕成清摺專差飛送省局由孫長紱彙繕總單專送臣營臣營局四屬由署道王德固彙單驛遞臣營臣每月派礮船赴省迎提釐餉仿照湘省東征局之例其本年八月奏定月解漕折四萬臣亦按月派船迎提所有釐卡大小委員向由該總局委用黜陟此

後改絃更張由臣隨時札撤自皖派員赴江辦釐以資互證而
備觀摩各卡每月報銷冊該局員徑備一分申報臣處商民有
無怨言亦由劉于潯按月稟報臣處相應請

旨飭下江西署鹽巡道孫長紱常川駐局甘肅臬司劉于潯體
察商情均與藩司會同辦理臣統軍過多欠餉太久今歲疾疫
盛行醫藥無資不得不整飭釐章力求補救外聞皆知上海釐
務不實不盡不知江西釐金疲乏若此皆臣平日不能稽核申
徹之咎該司李桓經理不善此次姑免參辦數月後如仍前玩
泄卽當從嚴參奏並提訊經手員役以懲積弊理合附片陳明
伏乞

皇太后

皇上聖鑒謹

奏

彙報近日軍情摺

同治元年九月二十七日

奏爲彙報近日軍情恭摺馳奏仰祈

聖鑒事竊金陵甯國各路軍情

臣

於九月十二日彙報梗概在

案嗣是僞侍王李世賢大股亦由浙江趕至金陵與僞忠王合力晝夜猛撲更番迭進迄未休息至九月十二日未刻兩處地道同時轟發土石上飛賊眾如牆並進前者旣殪後者復登曾國荃督飭諸將竭力堵禦純用火毬拋擲閒以鎗礮搶險三時幸得堵禦缺口擊斃悍賊極多十三以後賊燄少衰白晝不甚環攻夜間仍輪班逼撲連紮百餘壘於官軍營濠之外相距不過二十丈仍再開地道三處據密探稱俟雨夜發火轟裂希圖

一運自閏八月廿日起計堅守已滿一月曾國荃所受洋槍子傷左頰子出之處雖未收口右脅子入之處業已結痂軍心尙屬完固大局可期平穩惟前此病卒未痊近日傷者亡者又添一千餘人疲勞太久損折彌多若無大枝勁旅從外夾擊深恐難以解圍此金陵一軍之大概情形也甯國賊目黃文金胡鼎文等久盤踞於高嶺梅嶺油榨溝新河莊等處時竄灣沚紅楊樹一帶冀圖抄我糧路張運蘭病未痊愈堅守郡城之內鮑超病體全愈屯紮距郡二十里之高祖山九月十八日鮑超派隊搦戰該逆亦排隊於仰賢圩新河莊處處依傍港汊阻水自固不敢過河與我接仗鮑超前因病者太多新愈者亦黃瘦無力

是以回營兩旬未敢進兵今見我之守禦日完賊之怯情日露
卽日擬將高嶺梅嶺之賊痛剿數次以挫兇鋒其前在甯國縣
城失守者爲降將韋志俊洪容海兩部鮑超現亦飭其收集潰
散重整隊伍隨同進剿此甯國各軍之大概情形也自閏月中
旬大股賊至卽分僞護王陳坤書猛撲金柱關又分股上犯蕪
湖自東垣抬過之賊船亦羣聚於金柱關上下官兵守金柱者
陸兵僅羅逢元朱南桂等四營水軍僅彭楚漢丁泗濱等五營
與賊相持月餘眾寡懸殊晝夜嚴防羅逢元等又分兵遠防龍
山橋梅塘嘴一帶往返六十里疲於奔命羅逢元與朱南桂議
以苦守太久不如渡河剿之九月十八日與駐守蕪湖之周萬

倬吳坤修等營由龍山橋暗渡會合水師齊進痛勦陸師自青山包抄而上將羣賊蹴逼落水溺斃極多水師奪賊礮船五十餘號從此賊舟無窺伺大江之慮而內河之灣汊三汊河亦均有官軍戰船扼守此水師及蕪湖金柱關陸軍之大概情形也至_臣處調度有與前次奏摺不相符合者_臣前調王可陞一軍馳赴雨花台幫同防守厥後王可陞帶三營先赴金陵留兩營仍防蕪湖茲因蕪湖事勢已鬆卽將兩營全行拔去又前調上海之程學啟一軍因駐防南渡要區不能抽動李鴻章擬調洋將漢兵之白齊文一軍來援金陵此軍雖非_臣所甚願然亦未便卻其拯急之情阻其圖功之念都興阿未接_臣咨僅接曾國

荃一亩立派楊心純等千八百人渡江協防實屬力顧大局痛
癢相關前調浙江之蔣益澧一軍旋接左宗棠復函因日內正
攻龍游湯溪兩城功在垂成礙難抽撥他往蔣益澧既不能棄
湯溪而換防甯國則鮑超亦不能棄甯國而先援金陵徵兵千
里之外本難處處應手至李世忠一軍臣前咨調渡江由孝陵
衛北路而來夾擊偽忠王一股旋因該提督來文有江防空虛
南賊分股北窺之說臣卽飛咨止調令其專防北岸九洑洲一
帶又因該提督來文有挑選精壯萬餘派員統援金陵之說臣
又咨令自行酌量力難兼顧則專防北岸力能兼顧則分援南
岸聽其自爲裁奪此又微臣調度各軍前後參差之情形也至

鄂省馬融和殷匪現聞將由應城一帶回竄河南或不至遽擾
皖北仰託

聖主鴻福先紓一面之患除金陵十二日之戰金柱關十八日
之戰俟接到稟牘另行詳報應獎應卹人員續行奏辦外所有
彙報近日軍情恭摺由驛六百里馳奏伏乞

皇太后

皇上聖鑒謹

奏

水陸迭勝力保蕪湖金柱關摺

同治元年十月十二日

奏爲水陸各營屢獲勝仗力保蕪湖金柱關要隘恭摺馳陳仰祈

聖鑒事竊自閏八月中旬蘇杭羣賊大舉內犯北撲金陵南擾甯國中犯蕪湖金柱關所有金柱關等處水陸防守及九月十八日之捷臣國藩已將大概軍情兩次具奏在案先是僞護王陳坤書等酋擁眾四五萬突入太平府之張公橋圖犯金柱關橫斷甯國金陵之氣臣玉麟以該隘下達高淳溧水上通灣沚蕪湖爲中段第一關鍵閏八月十三日飭成發翔鄧萬林等於各營中挑集未病礮勇舢板十船會合唐修已外江水師一營

王可陞周萬倬羅逢元朱南桂陸師數營禦賊於花津護駕墩
五戰卻之退踞薛鎮十八日諜報賊以戰艦數百由東壩拖壩
而出布滿固城南漪兩湖臣王麟親率王吉左光培等各駕飛
划入湖迎擊詎薛鎮之賊節節延竄潛約賊船銜尾而西環泊
花津上駟渡之下臣岳斌一聞此警留羅進賢萬化林水軍於
大勝關幫助金陵陸師而自帶丁泗濱彭楚漢等五營力疾赴
援金柱關適羅逢元朱南桂等陸軍先在姚老圩毀賊浮橋獲
勝一次得此水陸依護賊乃數日不敢過河九月初五日賊糾
大股至龍山橋先以排礮拒我師船遂於淺流中結筏偷渡朱
南桂率三哨馳擊戰無逾時羅逢元帶隊突至直搗垓心王明

元力戰死之朱南桂斜刺而入截賊數段縱橫掩殺未及濟者
悉驅入河不謂賊又增黨數千倚河築壘形若貫珠以冀乘閒
再逞初六日賊以大隊進逼金柱關水營各船齊開排礮逆眾
稍退復合管帶親兵前營郭明鼇與副後營丁泗濱等帶勇登
岸奮擊馳逐里許鏖戰方酣郭明鼇突被洋礮子打穿左喉卽
時殞命幸得丁泗濱等奮力衝突殺退賊眾搶護忠骸回船初
八九等日朱南桂張定魁商令駐守蕪湖之周萬倬吳坤修等
各率新後團防等營分巡查家灣梅塘菁一帶而於十二日自
率勇士涉流而渡盡焚隔河諸壘擊斃數十人羣賊始遁往魚
埧此間八月十三至九月十三等日水陸禦賊晝夜嚴防之情

形也臣國藩時以金陵事急調向守蕪湖之王可陞先拔三營往援金陵而調向守廬州之梁美材三營填駐蕪湖水師之由安慶下駛者則有巡湖副中兩營其由上海折回者則有正前副右新右三營兵數較增可以一戰於是諸將弁會商十八日水陸大舉周萬倬帶所部並團防兩營哨由查家灣渡河朱南桂朱寬義帶吉左營羅逢元帶振字營由龍山橋渡河曾泗美以右營戰船扼橋下兼分水勇登岸助陣丁泗濱胡俊友率副後親兵前營水師由星子橋決堤駛入攻賊之後蔡國祥嚴定國彭楚漢率巡湖正左親兵右營水師由三汊河攻賊之前唐修已分船守太平府護定吉左振字老營仍親帶礮划同往三

汧河會剿天甫向曙分道並進遇賊於花山兩鋒相交喊聲雷
動鏖戰數時賊不少挫周萬倬一騎當先所向辟易曾泗美同
團防兩營哨橫躍入陣刀矛環刺賊不能支且戰且走朱南桂
羅逢元帶隊從九山埂上壓下朱寬義張定魁從九山左右兩
路抄出賊益震懼不知所措爭向上駟渡紛紛竄遁殊不料彭
楚漢蔡國祥等攻破三汧河釣魚台賊卡後早與丁泗濱胡俊
友唐修已嚴定國各水營衝入上駟渡斫斷浮橋賊船五十餘
號悉非所有該逆猝見橋折舟沈回戈轉鬪眾軍合力圍殺攫
刃而死者半撲河而溺者半棄尸駢積河水不流自上駟渡至
龍山橋聚賊不下萬餘無一存者奪馬三百餘匹旗械倍之此

九月十八日擊賊大勝之情形也龍山橋上駟渡之賊雖一鼓
翦除而窩頭護駕墩大小花津官圩青山等處袤延百餘里尙
爲賊踞臣玉麟復飭成發翔喻俊明水師梁美材周萬倬吳坤
修陸師暨王可陞留守蕪湖之二營於二十日進次馬音街會
約吉左振字等營及水師李朝斌楊友德李助發等十營於二
十一日裹飯傳餐侵曉出隊先用礮船渡陸師過三汊河毀平
窩頭數壘王可陞梁美材等卽由中路搜剿官圩大龍口朱南
桂羅逢元等復由右路搜剿青山周萬倬吳坤修等同水師逕
取護駕墩各水勇登陸焚橋周萬倬等率隊直進賊乃竄聚花
津我軍緊躡賊後與賊搏鬪移時周萬倬困入重圍適王可陞

梁美材等由官圩聯騎衝至李朝斌喻俊明等率礮隊排擊水
次周萬倬立刃數賊突圍躍出面面夾攻遂破花津兩岸堅巢
獲賊划七十隻焚賊所擄聚之糧數萬石各營還駐馬音街而
朱南桂羅逢元兩隊亦盡洗青山踞賊以歸二十三日周萬倬
王可陞等軍冒雨巡哨襲賊敗之二十四日風雨轉猛至晚稍
霽議於次日攻洞陽象山之賊王可陞梁美材遵陸而進羅逢
元朱南桂周萬倬吳坤修分兩翼傍河而進李朝斌各水營自
太平府東循隄而進甫至小橋望見賊旂數十層掩映林谷閒
周萬倬率哨官洪得勝縱轡衝入往來盪擊賊盡披靡正欲圍
而殲之俄聞鼓角一聲象山後突出大股火機觸發槍子羣飛

周萬倬見洪得勝中槍墜馬馳救不及輒復躍入賊陣右膝受傷裹創猛戰幸王可陞帶隊來助羅逢元朱南桂亦自洞陽振旅而至合軍掩襲旣焚象山賊館並將采石磯另股賊援悉驅出薛鎮小丹陽一路二十八日成發翔喻俊明聞高淳賊船出石臼湖聚泊小丹陽之背以護新市鎮四壘乃於二十九日留會泗美右營堵守塘溝親帶左營定湘營進湖雕剿破壘殲賊成發翔得船十二號喻俊明得船二十八號自是賊舟之由東垣抬來者存留無幾距蕪湖金柱關六十里內無一賊矣此九月二十一至二十九日疊次剿賊獲勝之情形也臣等查金柱關一隘與蕪湖輔車相倚此次僞護王等旣由陸路全力攻撲

復於東垣抬船過湖圖竄出江以截金陵諸營之糧路安危得失關係至鉅幸仗

天威大彰捷伐保全重險江介肅清足寒諸逆酋併力一逞之心諸將士苦戰五旬始終不懈可否俟金陵賊退後容臣等彙案酌保出自逾格

鴻施至花翎總兵銜儘先副將勝勇巴圖魯郭明鼐忠勇性成英毅罕匹咸豐六年投效水營拔充哨官七年埽蕩蘄黃肅清楚境八年克復九江府城進攻安慶大通樅陽等處十年派充營官攻破南陵賊圍十一年攻克安慶省城收復池州本年攻打運漕無爲東西梁山及金柱關蕪湖縣各要地均屬異常出

力戰功最著茲因登岸殺賊中礮捐軀實堪憫惜合無仰懇
天恩追贈提督銜卽照提督陣亡例議卹以昭激勸又花翎游
擊銜都司洪得勝擬保守備藍翎千總王明元擊賊陣亡並請
敕部各照本銜從優議卹以慰忠魂所有水陸各軍迭獲勝仗
力保蕪湖金柱關要隘緣由謹繕摺由驛六百里合詞馳奏伏
乞

皇太后

皇上聖鑒訓示謹

奏

近日軍情片

同治元年十月十二日

再近日軍情北路金陵大營自十二日地道轟發我軍搶堵獲勝之後賊氛稍衰而日夜掘開地道仍不少息曾國荃飭各營添修內牆內濠又募死士乘夜突入賊營塞其地穴擒斬其酋又於內掘地道以迎之前後凡破賊之地道七處羣賊智盡能索至十月初五日出濠大戰破賊壘數十座僞忠王之精銳損折極多又撥賊數萬回救太倉州凶燄彌滅仰託

聖主威福或可解圍以去中路蕪湖金柱關等處十八大捷以後又有二十一二十九等日勝仗賊船焚奪幾盡守局穩固臣已將詳細戰狀同日另摺具奏南路甯國府一帶鮑超於二十

一日出隊小挫一次該逆一面在上游與鮑超相持一面在下
游灣沚方山等處與水師相拒初五日已渡過清弋江之西岸
梗塞鮑超之糧路深恐其內犯南陵三山由池州而竄江西臣
九月十二日摺內所陳可慮者四端今三患稍紓可慮者專在
甯國一路若再支撐一月新募之勇已到病故之缺悉補鮑超
能出營痛剿或可力遏賊氛不令上竄除詳細戰狀另行續奏
外理合附片先陳梗概伏乞

皇太后

皇上聖鑒謹

奏

陳明各軍應保之案片

同治元年十月十二日

再臣欽奉九月二十一日

寄諭此時援逆麇集務當激勵將士竭力固守所有出力各員弁著曾國藩隨時奏請獎勵以示固結士心等因臣查前經奏明奉

旨准保者鮑超有克復青陽石埭涇太等城一案曾國荃有克復蕪湖太平東梁金柱等處一案茲已遵

旨核定開單請獎此外應行奏獎者張運蘭朱品隆等軍有去臘徽州守城一案又有水師克復蕪太一案向歸楊岳斌等請獎者此次亦由臣處出奏又有潁州解圍一案應歸李續宜請

獎者此次亦由臣處代奏統俟陸續開單奏請

恩施惟鮑超等前開單內隨後病故之員不少近因戰守緊急未將病沒人員一一報明臣處不及查核扣除俾逝者邀虛銜以飾終生者亦觀感而圖報理合一併陳明伏乞

聖鑒謹

奏

縷陳金陵各營苦守情形摺

同治元年十月二十七日

奏爲金陵各營苦守四十六日屢獲大捷力解重圍恭摺縷陳
仰祈

聖鑒事竊自閏八月下旬金陵賊援大至官軍堵剿迭勝經臣
四次具陳梗概聲明續報戰狀在案旋據江蘇藩司曾國荃稟
稱僞忠王李秀成在蘇州大會羣酋以僞輔王楊輔清及黃胡
賴等股擾甯國以僞護王陳坤書等股由太平府窺金柱關李
秀成親率十三僞王號稱六十萬眾專注金陵東自方山西至
板橋鎮旗幟如林層層排列閏八月二十日糾合城賊直逼我
營尤趨重於東西兩隅曾貞幹彭毓橘劉連捷張詩日熊登武

朱林桂等縱軍兜擊追賊於小河邊斬級頗多朱林桂搏戰方酣中槍而殞二十一日城賊援賊同時並進曾國荃令各營堅壁固守俟其撲近花籬突以排礮轟之賊乃踉伏在地礮聲絕而殺聲又起日夜環伺無或少休二十二日賊由東路攻副後南後等營西路則犯湘恆恭字等營曾貞幹方率晏恭山力戰西路一股而賊已分黨二萬徑趨洲上抄出猛字諸營之後曾國荃卽派蕭孚泗周惠堂王仕益倪桂李臣典崔文田凌有和楊錚南等分路馳剿賊爲負創卻走倪桂與左傳貴大呼衝入遇者輒殪左傳貴馬蹶戰歿賊遂擁眾回戈留踞數千人於洲上曾國荃以洲上關繫全軍糧路我所必爭乘夜急修十數壘

由曾貞幹撥兵駐之又令劉連捷遣死士縋牆出擊殺賊數十
奪旗數百而還二十三日賊旣攻我猛字各營復昇巨礮轟東
路營壘並駕戰艦擊湖橋營卡曾豈凡搶護礮台受傷幾危而
賊撲益猛易良虎易良豹等正在悉力堵禦適曾貞幹督隊而
前縱橫截殺卽時勦退仍一面會約羅進賢萬化林等移水師
於藕塘護築新營守定隄埂而運道乃可無虞矣二十五日賊
更以西洋火器力攻東路之副後南後嘉字長勝吉後五營而
圍偏西路之仁嚴和智四營者已歷六晝夜彭毓橘張詩日熊
登武李祥和曹仁美等料賊疲乏躍出濠外突破四壘殺斃及
擒獲者三百餘人二十六七八等日夜賊乃悉向東路偏營而

陣洋槍洋礮驟若飛蝗并於嘉字吉後副後營下潛通地道百計環攻劉連捷朱洪章武明良吳光春曾昭禮等率同士卒負牆露立拋擲火毬殲賊無算曾國荃以病卒太多弗耐久戰因派李臣典調防南後營汛地二十九日賊負片板蛇行而進直薄副後諸營濠外開花礮礮橫飛入營烽燧蔽天流星布地羣賊齊聲大譟束草填濠岌岌欲上武明良劉連捷吳光春各以長矛擊刺前者拽尸後者更進曾國荃見事勢危急親率部將倪桂蕭開印前往策應倪桂馳斬悍目轉戰無前中礮死綏曾國荃亦爲飛子傷頰血流交頤仍裹創上濠以安軍心此閏八月二十至二十九等日督軍守禦獲勝之情形也九月初一日

添賊一大枝猛驚無匹謀者曰僞侍王來自浙東其撲東路各營者恃有大援攻吉後礮台益急曾國荃引軍馳救力破賊眾吳光春陳膺福乘勢將吉後營一段堵住而王光勝劉大勝黃升富胡澤仁廖太仙等已相繼傷亡曾國荃恐有蹉跌乃留蕭開印守之維時曾貞幹與諸將謀東路地道甚近曾國荃又創口未平不可不帶兵往助遂飭黃潤昌王廷耀曾正明等堅守江東橋三汊河大勝關諸營自帶八哨疾趨而東商令各營增築內牆內濠以自固自初一以至初四等日我備愈嚴賊計轉狡若蠅若蟻倏往倏來多用箱篋實土於中排砌濠邊明防礮子於上暗鑿地道於下我軍之禦之也先以火箭攢射繼挑銳

卒誘賊近濠突出奮擊幸得少挫其鋒曾國荃熟察形勢惟西路賊陣散漫西南地面遼闊不如先發制之派彭毓橘率張詩日熊登武李祥和劉湘南羅朝雲曹仁美等營擊右路蕭孚泗率張光明周惠堂曾良佐楊西平等營擊中路而以李臣典何玉貴成東昂陳壽武馮盛德朱平海趙清河黃東南等營擊左路初五日齊隊出濠諸道並進戰不逾時焚逆壘十二座殲斃近三千人壘中之賊罕有脫者我軍惟李臣典吳宗國負重傷李正升劉德盛吳發遠等殉焉餘尙無所損折自此西南一隅賊不敢復犯後濠矣此九月初一至初五等日節次堵殺獲勝之情形也初六日以後東路之賊環逼如初未嘗少懈朱洪章

劉連捷武明良蕭開印吳光春陳膺福等且堵且戰屢出焚賊傷斃約七百餘名我營亦折文喜才龍開學彭倫考劉禹祥孫雲亭五人幸有都興阿派楊心純等五營臣由安慶派去之喻榮陞等四百人先後赴援而王可陞所部亦先派三營由蕪湖赴援金陵兵數稍增軍威頗振無如主客相搏不數十武節短勢險仍不能出大隊痛勦而賊之畚插負土者已及濠牆之下十二日瞥見西南一股悉併東路潛伏雨花台後曾國荃知地道之將轟也令各營謹以備之不轉瞬而嘉字吉後兩營外一聲霹靂煙燄上衝石塊土塊飛入天半營牆各崩塌十數丈賊卽乘隙直上萬弩齊發排礮雷轟踴躍爭先呼聲動地兩路悍

黨不下萬餘人擁入塌口者各有數千人我軍寂然不動扼住內濠俟煙障一開塵土落畢武明良率各弁勇從嘉字營衝出有朱洪章楊正彪彭毓橘李祥和劉湘南羅朝雲等爲之援蕭開印胡萬清陳萬勝胡海萬戴明山吳光春陳膺福易光春暨各將弁從吉後營衝出有蕭孚泗張光明周惠堂王可陞謝占春陽華坤楊心純等爲之援亂刀交錯併力搶險陳得月陳敬廷張紹武周在遠劉安邦謝仁本周宗達胡榮祥王芳來鄭元標羅道明雷信義等死之武明良蕭開印等憤怒填臆忍死決戰塌口以內屠戮靡遺塌口以外諸賊渠寨旗督戰更番向前猛撲五六次經我軍同出抄殺賊之精銳摧折無算其地道之

同時迸裂者尙有副後一營劉連捷麾軍勦退侯永清張玉藻
蕭錫珍李修祿李萼南劉星德劉泰合等死之其各軍之同被
賊圍者尙有信字長勝義字堅字從字克字南後七營李臣典
楊玉輝羅雨春武交清何玉貴曾昭禮喻榮陞胡松江楊西平
宋聲平等從內擊出曾貞幹率晏忝山成東昂朱平海馮盛德
陳壽武等從外擊入賊亦敗走是役也殺賊近萬誅僞德王及
僞主將李蔡高范汪羅吉陳等酋我軍陣亡不過百餘人受傷
者蕭開印吳光春李祥和胡萬清曾昭禮陳萬勝武義山張林
芳而外弁勇不過三百餘人此九月初六至十二等日搶救地
道力戰大勝之情形也自有此捷賊之氣燄稍衰而設謀圖我

仍百出不窮十三日旣從東路糾聚賊黨別開地道必欲甘心
一逞仍於西路決長江之水淹往來之路以冀絕我饋運當經
曾貞幹易良虎在高埂增修小營分哨填紮商令水師劉正隆
賴榮光陳東友等各帶舳板數號駐泊雙閘與陸營相依護重
保一綫之路以安萬眾之心而東路之防則有武明良派隊毀
賊一壘一穴蕭開印趙清河於十六夜派隊破賊一壘一穴十
七二十一二等夜劉連捷潛撥勇隊各挾火具焚賊二壘二穴
計三次俘獲三十人斬馘過五百人曾國荃與諸將議制敵之
策尤莫若審賊所向掘地數仞隧而迎焉二十四日副後營劉
連捷令部卒就營外荷鋤開掘不移時而內外洞穿適與賊遇

抽刃迭刺聚而殲之二十五日蕭開印復穿一地道熏以毒煙灌以穢水賊亦無一生者次夜風雨交作劉連捷伺賊無備於四更時帶胡俊升楊致仁分三路冒雨出濠襲破潛挖地道之三壘俘斬數百損我胡俊升楊致仁二人越三日劉連捷營中發土丈許豁然開朗賊不得遁盡瘞於地道之中蕭開印武明良朱洪章等約於三十夜薄壘攻賊蔣仲梅黃禮芳中賊流矢並歿於陣蕭開印催隊猛進立踰堅壘二座斬二百餘級縛五十餘人十月初一日副後營鑿開地道一處初二日曾國荃中軍又鑿開地道一處伐木作薪堵塞洞口賊乃無能爲矣維時王可陞留防蕪湖之兩營至是亦來入濠助守曾國荃見兵力

愈厚可決一戰遂於初三四等日乘賊惛伏進拔十數卡初四夜三更曾貞幹彭毓橘蕭孚泗偵知西路三汊河隔岸之賊將圖宵遁乃整勁隊分道並出曾國荃亦令李臣典朱洪章劉連捷劉蔚昌武明良等徑攻東路前敵四壘以防雨花台及南門之賊抄襲我軍之追賊者天甫向曙縱焚四壘賊逸出悉就誅夷而西南諸壘中瞭見東路火發光燭霄半益無固志棄壘爭竄適曾貞幹率黃潤昌王廷耀步軍同楊鉞南騎隊馳至遂由善橋追賊至板橋周村一帶彭毓橘蕭孚泗張詩日熊登武李祥和胡松江張光明周惠堂等步軍及周日昇彭言志朱雲章趙三元伍維壽等騎隊亦追賊至南路牛首山一帶自辰至

已埽平賊壘數十座擒賊近四百人斃殿後悍賊約七千人王
可陞楊心純武交清何玉貴趙清河等軍搜剿敗匪直出方山
之西詎南門外雨花台兩旁留守之賊勾結城賊齊出大股截
我歸路幸劉連捷副後營並長勝嘉字信字各營隊伍橫擊於
左易良虎曾良佐楊西平羅朝雲晏澧週各營親兵夾擊於右
賊始返奔其在東路者向南門繞城而遁其在西南者向秣陵
關一路而遁是日之戰我軍小有傷折而殺賊殆難以數計此
九月十三至十月初五等日連破地道乘勝解圍之情形也臣
查蘇浙諸賊酋大舉入寇麇聚金陵意圖吞噬我營合犯上游
計甚狡毒仰賴

聖主威福將士同心以病餘之孱兵當非常之兇猷苦守力戰
時閱四十六日以寡禦眾出死入生卒能挽回危機保全大局
在事文武實著微勞除曾國荃曾貞幹係臣胞弟不敢仰邀議
敘外所有尤爲出力之按察使銜江西卽補道劉連捷等七十
三員謹先開單籲乞

恩施以昭激勸其餘出力人員並水師員弁容臣查明彙案奏
獎至副將倪桂等二百七員弁均係立功後力戰陣亡深堪憫
惻相應另繕清單請

旨敕部分別議卹所有金陵各營苦守四十六日得解重圍緣
由謹會同湖廣總督臣官文江蘇巡撫臣李鴻章由驛六百里

馳奏伏乞

皇太后

皇上聖鑒訓示謹

奏

近日軍情仍請

簡派大臣會辦軍務片

同治元年十月二十七日

再近日軍情金陵解圍援賊雖退而尙留悍賊在於秣陵關六郎橋等處多築堅壘層層布置曾國荃以病者未痊傷者太多俟新募之卒到營添補足額再行出隊痛剿目下仍飭各營嚴密防守不少鬆懈僞忠王李秀成回蘇之後分黨留守金陵並分股力攻九洑洲官營圖犯江北提督李世忠親赴九洑洲十七十八十九等日賊匪四面猛撲李世忠竭力堵剿幸獲保全惟皖北廬州兵力不厚而和含巢縣無爲舒桐等屬處處空虛臣實深以爲慮甯國黃文金胡鼎文等巨股於初五日渡過灣汴占踞西河鮑超派宋國永於初八日攻剿西河之賊未能得

手損折勇丁數百人水路糧運被賊梗塞臣派員於繁昌南陵多雇民夫趕辦陸運又派湖北調來之何紹彩等營由南陵前往援助保護陸路又自金陵調出王可陞五營由蕪湖前往援助冀通水路總期能通運道而後能保鮑超之營壘能保營壘而後能守甯郡之城池別有賴古等股攻圍旌德縣城該城係衢州鎮總兵朱品隆駐守十月初十日賊薄城下十二三日猛撲兩次十五日官軍出城迎戰敗挫一次朱品隆以病勇太多米糧太少請援甚迫臣調左宗棠由浙派來之王文瑞一軍自南路休甯前進調駐防蕪湖之周萬倬一軍由北路涇縣前進兩路救援旌德不知趕得及否今歲夏秋以來疾疫大作昔時

勁旅頓變孱軍

臣

已三次具奏閏月中旬而後羣賊環逼應接

不遑今幸仰託

聖主威福金陵解圍忠侍兩僞王鼠竄而去大局尙可支持惟甯國與旌德同時喫緊鮑超張運蘭朱品隆諸軍病餘羸卒萬難遽振自金陵至徽州祁門八百餘里地段太長賊股太眾加以皖北十餘城毫無準備臣反覆籌思實恐潰敗決裂盡隳前功閏八月十二日臣奏請

簡派大臣來南會辦仰蒙

優詔慰問未荷

俞允頊接嚴樹森來咨有皖北各軍統歸

臣

處調度之奏誠恐

聖主誤采外閒浮僞之名不察

微臣

竭蹶之狀直待貽誤事機

再行陳奏則已晚矣查三年以前江南

欽差大臣一人兩江總督一人督辦徽防一人督辦甯防一人管轄李世忠苗沛霖兩軍之

欽差大臣一人

臣

今一身所處兼此五人之職而又新添安慶

池州等沿江十餘城即使才力十倍於

臣

者已有顛蹶之患况

如

臣

之愚陋乎合無籲懇

皇上天恩簡派大臣與

臣

會辦諸務縱不能復前此五人之舊

但能添一人二人俾

臣

責任稍分案牘稍簡更得專精竭慮圖

報涓埃除戰守詳細情形另行具奏外謹將近日軍情及

微臣

辦理竭蹶緣由附片具奏伏乞

皇太后

皇上聖鑒訓示謹

奏

張運蘭回籍養病片

同治元年十月二十七日

再駐守甯國之福建按察使張運蘭病久未痊臣已兩次陳奏在案今歲疾疫之災甯國尤酷如皖南道姚體備署甯國府知府黎福疇營務處四品卿銜甘晉皆一人甯境卽染病不起人咸視爲畏途惟張運蘭不避險難抱病帶兵入城駐守抵防以來病亦日增具稟自陳不支之狀臣因其胞弟張運桂甫卒於軍其左右幫辦文案者物故至十六員之多不待其專稟請假卽批令迅速離營回籍養病頃張運蘭已由安慶買舟歸里所有該臬司部下湘勇十營臣派提督銜記名總兵易開俊提督銜記名總兵劉松山各統五營分守甯國府涇縣兩城惟此外

八營皆其比肩共事之員官職相等可否籲懇

天恩將易開俊劉松山

簡放實缺總兵俾足鈐束各營亦使張運蘭得以安心調養之處出自逾格

鴻施理合附片密陳伏乞

聖鑒謹

奏

彙報近日各路軍情摺

同治元年十一月十二日

奏爲彙報近日各路軍情請

旨敕調江忠義移軍駐守皖北恭摺馳陳仰祈

聖鑒事竊自金陵援賊經官軍擊退後留守秣陵關分攻九洑
洲並甯國旌德等處軍情臣於十月二十七日附陳梗概在案
嗣據諜報僞忠王李秀成並未回蘇諸酋死黨多未遠颺仍在
秣陵關六郎橋一帶修壘堅持俟僞侍王由東垣抬船過垣卽
分向金陵金柱關以圖再逞十月十七八等日忠逆之子及僞
章王對王數股併趨九洑洲一面圍李世忠各營一面晝夜趕
渡先後衝過江浦浦口者五六萬人曾國荃以南岸諸軍節節

牽制北岸郡縣處處空虛抽撥周惠堂等兩營搶紮西梁山先
顧濱江要隘又商令李昭慶帶張樹聲五營自蕪湖北渡救無
爲州產米之區保皖南各營辦糧之路臣亦飛調李續宜所部
蕭慶衍八營移駐廬州毛有銘七營移駐巢縣部勒甫定僞對
王一枝直衝過李世忠各壘從和州之青甸廟斜趨而西於二
十七日陷含山縣二十八日竄踞巢縣十一月初一撲陷和州
查巢縣西北直達廬郡西南近接無爲廬江等州縣以入省垣
略一進步全局俱震張樹聲等五營幸已冒雪渡江駐紮無爲
州廬江一縣亦截留上海新募吳長慶等四營入城駐守廬郡
一城僅有石清吉四營亦截留唐訓方新募之何有能等三營

協守此外衝要之所若店埠若運漕無兵扼防臣所調李績宜部下之毛有銘一軍尙在固始蕭慶衍一軍尙在霍邱現今齊集舒城再行進兵賊蹤颺忽誠恐著著落後此賊竄江北辦理竭蹶之大概情形也甯國悍賊黃文金胡鼎文等自踞西河斷我水路糧運而僞輔王楊逆之眾又時時聲東擊西四出剽掠臣所改辦陸運自三山夾以至南陵數十里內尙無梗阻自南陵以至甯國府城到處阻賊雨雪泥濘艱於饋運城內外各營將士人人以缺米爲慮十月十三日賊乘張運蘭因病離營之際大舉攻城新任統將易開俊劉松山等登陴守禦礮石環擊賊始解退易開俊奉臣調援旌德之檄十一月初三日道出涇

縣適有甯邑另股由晏公堂畫眉嶺兩路而來圖襲涇縣城橫斷徽甯之氣易開俊督同駐涇各營力戰卻之鮑超在高祖山屯營雖多分汎過廣小挫之後未可遽議戰攻前調之王可陞五營及何紹彩四營擬令分駐板橋黃麻渡先保糧路俟赴湘新募之七千人陸續到皖時再行分途痛剿此甯國各軍戰守艱滯之大概情形也其賴古諸逆之圍撲旌德者直薄城下環攻不休朱品隆於十月十五日挫敗一次十月十七日小勝一次十八十九等日大勝兩次毀平二十餘壘賊始退聚九十等都旌德城幸得解圍別有昌化廣德各賊黨突陷績溪縣城分竄歙境駐守徽州之皖南鎮總兵唐義訓會商左宗棠派援之

王文瑞等營於二十八九等日分道馳擊屢有斬擒十一月初
一日王文瑞敗賊於臨溪唐義訓敗賊於孔靈初二日合軍進
攻績溪克復縣城而旌德境內之賊復於初三日闖入太平縣
由焦村度雙阜二嶺初六日進踞黟縣之西遞地方意在竄撲
祁門斷徽州之餉道入江西之北境此股雖非甚凶悍而蹤跡
甚疾關繫極大祁門爲臣數載經營之地引領南顧實用隱憂
此又旌德績溪太平黟縣等處之大概情形也臣竊計本年秋
冬以來羣盜如毛南北環逼非先保皖北完善之區不能辦皖
南之賊自和州以上直至蘄黃十數州縣千里無兵非有大枝
勁旅長駐廬州舒桐一帶不特爲皖北無窮之憂亦且貽鄂豫

兩省之患毛有銘蕭慶衍雖稱健將才尙不足當此一路李續
宜病勢未痊亦難遽來多隆阿本約定進攻九洲會剿金陵
旣而改旆西征臣早料其必有他變夏間亦屢奏及之旋於九
月十二日奏請多隆阿移師東還

詔旨肫切未邀

俞允今則秦人痛深水火

聖主方眷顧西陲何敢更爲再三之請舍此則惟貴州提督江
忠義與安徽藩司江忠濬誼本兄弟又有伊兄江忠源遺愛在
民廬人至今頌之不衰倘調至廬州舒桐之交外事則令江忠
濬主之戰事則令江忠義主之必能艱難共濟屏蔽江淮合無

仰懇

天恩敕下江忠義統率現部三千人馳赴皖北與江忠濬同駐廬境俾已復之疆土不至再就淪夷大局幸甚微臣幸甚除各路戰狀及應獎應卹人員續行分案陳奏外所有近日軍情謹繕摺由驛六百里馳報伏乞

皇太后

皇上聖鑒訓示謹

奏

審明陳步高等潰走情形分別定擬摺同治元年十一月十二日

奏爲遵

旨審明陳步高等潰走情形分別定擬恭摺奏祈

聖鑒事竊

臣

於本年六月間准江蘇撫

臣

李鴻章咨解由浙赴

滬之副將陳步高貴廷芳二員到營欽奉

諭旨著卽審明定擬具奏嗣八月間又准江蘇撫

臣

將吳再升

一員併解來皖先後均發交安徽善後局署司道等會同研訊

錄供詳辦茲據訊取陳步高供稱由廣西武宣縣武生歷保花

翎總兵銜遇缺先選副將咸豐十年遵調赴浙隨同克復餘杭

臨安平湖嘉善諸城十二月管帶浙江新字營勇一千七百名

駐防嚴州十一年六月奉委署理嚴州協副將歷次剿賊獲勝
十月赴援省城在候潮門搶築營盤日與賊戰歸提督張玉良
統轄十月十八日以後歸況文榜統領十一月二十八日正在
督隊進攻遙見鳳山清波兩門火起杭城失陷是日率眾衝突
攻擊至夜二十九日糧盡援絕進退俱窮憤不欲生投水遇救
旋聞總兵況文榜等俱在上海收集潰勇隨搭便船赴吳淞口
今奉押解到皖封繳嚴州協關防一顆呈具親供靜候查辦又
據貴廷芳供稱湖南武陵縣人由行伍歷保花翎總兵銜儘先
補用副將咸豐十年八月帶勇防守新河莊因甯國府城失守
衝圍就近赴浙十二月奉委管帶水師礮船駐防富陽桐廬嚴

州一帶十一年九月遵檄赴援省城十月初六船至錢塘江歸
張玉良統轄十五日帶船至義橋剿賊二十日回省張統帥業
已陣亡改歸況文榜統帶其時江邊陸營盡爲賊陷屢次攻剿
未能解圍十一月二十八日省城失陷二十九日蕭山賊來襲
水營竭力抵禦水勇十損五六舟中米糧已絕因帶所存礮船
馳往海甯詎意是夜風潮大作長龍舢板一時盡覆並被後潮
撞擊船隻均壞隨至黃道關探聞上海收集潰勇遂於十二月
初八抵吳淞口茲奉解皖審訊應請從重治罪又據吳再升供
稱湖南永綏廳人由行伍厯保花翎記名總兵矯勇巴圖魯咸
豐十年五月帶勇進攻嘉興駐防湖郡十一年四月調赴浙東

六月攻克義烏八月移防諸暨因兵勇不敷分布商請回楚添募稟奉巡撫允准九月二十一日將原帶勇丁移交林福祥接管赴省請咨回湘十月十一日省垣事勢日迫奉提督張玉良札飭招集城外潰勇以資戰守維時糧餉軍裝均無所措人心渙散不復成軍十一月二十八日杭城不守力戰負傷昏暈落水遇救至滬十二月滬城喫緊奉飭募勇二百餘名厯防吳淞高橋等處本年三月積傷感發交卸帶勇事件今奉傳訊以前在浙諸事總屬救護不力咎有應得各等供前來臣覆加審核各該員雖非先事逃避而律以謀人軍師敗則死之之義均屬罪無可逭惟統將之與裨將權任有輕重科罪自有等差陳步

高貴廷芳二員於上年十月先後調援杭省初歸張玉良統轄繼歸況文榜統轄省城淪陷該將等均屬救援不力徧查例案並無赴援不力裨將作何治罪明文第統領張玉良雖已殉節統將況文榜現在上海帶勇經李鴻章奏明准其效力贖罪統將既邀寬典裨將自難重議而陳步高曾署嚴州協篆係有地方之責貴廷芳一奔於甯國再奔於杭州竟以逃潰爲將領之常例均未便稍涉輕縱衡情定讞陳步高貴廷芳二員應比照左宗棠奏准之恆起劉齊昂發往新疆效力贖罪至吳再升一員原帶勇丁業於九月二十一日交林福祥接管逮十月十一日奉張玉良檄重招潰卒維時糧械無措不能成軍城陷同逃

厥咎較輕吳再升應發往軍台效力贖罪是否允協恭候

聖裁除陳步高繳到嚴州協關防由

臣

咨送浙江外所有遵

旨訊擬緣由謹會同江蘇撫

臣

李鴻章浙江撫

臣

左宗棠恭摺

具奏伏乞

皇太后

皇上聖鑒訓示謹

奏

祁門縣失守片

同治元年十一月十二日

再正封摺開據署皖南道葉兆蘭稟稱黟縣境內之賊於十一月初七日未刻分數路抄入西武嶺竄陷祁門縣城等情查祁門居徽池兩府之中爲糧台轉運之所該逆未逾四日由太平黟縣突踞要地蓄計甚狡關係甚大唐義訓王文瑞兩軍自克復績溪回軍徽郡未知能否併力速攻以圖克復除續行詳奏外合先附片陳明伏乞

聖鑒謹

奏

卷之九

三

撤回壽州正陽防兵片

同治元年十一月十二日

再前因苗沛霖練圩擄殺尋衅臣擬撤去壽州正陽關湘勇並抽出霍邱防兵南防九洑洲上犯之賊於十月二十七日密陳大概請

旨遵行現在賊由九洑洲衝過北岸疊陷和含巢三州縣軍情緊迫瞬息萬變不及恭候

諭旨已將蔣凝學壽州正陽關各軍撤回以五營守潁州以三營守霍邱騰出毛有銘蕭慶衍所部移駐舒城以備巢縣上竄之賊所遺壽正兩城隘卽經函咨僧格林沁酌撥兵勇前往接防所有苗練各圩旣感僧格林沁撫馭給餉之恩又無湘軍偪

處猜嫌之見目下必不至另生枝節或者感激思奮隨同僧格
林沁竭力勦捻亦屬意中之事合再附片密陳伏乞

聖鑒謹

奏

欽奉

諭旨分條覆陳摺

同治元年十一月二十七日

奏爲欽奉

諭旨恭摺覆陳仰祈

聖鑒事同治元年十一月二十四日承准議政王軍機大臣字
寄十一月十五日奉

上諭唐訓方奏九洑洲逆黨竄陷和州等處廬郡喫緊請留張
得勝帶隊攻剿一摺此次逆匪由浦口屯紮後兩日閒迭陷三
城情形極爲飄忽巢縣距廬州甚近石清吉所部僅祇四營自
屬不敷守禦該署撫新募楚勇已抵舒城雖未經訓練以之守
禦尙屬可用諒已催提到廬曾國藩所調之蕭慶衍毛有銘已

否前進卽著催令迅速前往廬郡以資防剿現在曾國藩所部
兵勇迭次分撥雨花台及堵禦徽甯等處兵力未厚都興阿素
顧大局著派兵沂江而上節節會剿毋任滋蔓九洑洲係李世
忠之軍圍攻何以致令賊匪竄出是否不肯出力抑或兵少賊
眾之故著曾國藩等查明具奏至巢縣之濡須口和州之梁山
地處險要是否未爲該逆佔踞曾國藩尤當設法保全彭玉麟
等水師應酌量駛入巢湖會合攻剿其南岸蕪湖等處爲曾國
荃大營後路更應嚴加防範著曾國藩飭令水師在江面梭巡
毋令逆匪偷渡曾貞幹已赴雨花台大營蕪湖等處防兵是否
尙厚甚爲懸系刻下吳煦等所帶之常勝軍計已行抵九洑洲

務令將南岸之賊截住竄出之賊四路兜擊迅拔各城盡殲醜類惟在該大臣等隨時相機妥爲調度至此次北竄逆匪前據都興阿馮子材奏稱忠侍各逆糾黨七八萬由金陵約同九洑洲踞匪北竄而曾國藩奏稱忠逆已遁回蘇城揆度賊勢似南岸賊匪擊敗輪船擬入江攻剿九洑洲該處踞逆知已無援聞風先遁以致乘虛竄入和州等處故都興阿前奏有該逆均已薙髮之說若上下游官軍會同痛剿必可擊散倘忠侍各逆糾黨北竄必須厚集兵力方能制勝著曾國藩查明實在情形會同都興阿富明阿唐訓方妥籌剿辦此股北竄賊匪究有若干賊目何人如何竄陷和州等處各情唐訓方所奏甚屬疏略著

曾國藩查明具奏李續宜自回湘後已逾兩月諭令毛鴻賓迅
催起程東下並著曾國藩函催以資臂助等因欽此跪讀之餘
無任欽悚查南北兩岸軍情臣於十一月十二日業已彙陳太
概茲蒙

聖主縷晰垂詢無微不至謹就近日軍務情形一一分條詳對
如左

一恭奉

諭旨垂詢廬州守禦及蕭慶衍等進兵一節查渡江之賊前隊
在巢縣屯聚擄糧其後隊於十一月初九日竄聚運漕鎮廬州
城守之兵前有石清吉四營又截留唐訓方所部義字三營足

敷守禦臣所調蕭慶衍八營十四日已到舒城毛有銘七營二十日續到舒城進兵之路若走巢湖之北由柘皋以至巢縣則係用眾之地軍無後繼轉運維艱若走巢湖之南由無爲以進運漕則係用寡之地得水師相輔而行較爲穩著該二軍已於二十二三等日由舒城拔赴無爲州擬攻運漕以截巢縣後路惟北路廬州柘皋一帶尙少一枝勁兵恐難得手前疏請調江忠義一軍伏懇

鴻慈俞允庶皖北不至糜爛

一恭奉

諭旨飭令都興阿派兵會剿並垂詢李世忠是否出力一節查

都興阿駐守揚州自撥楊心純千八百人赴援雨花台後兵力已薄且九洑洲北犯之賊麕聚於江浦浦口可以上竄和州巢含卽可下竄揚州裏下河都興阿自宜專保揚防不必兼顧上游且中隔浦六等城亦難出境會剿此次賊竄北岸係忠酋帶至金陵新渡之賊非僅九洑洲舊踞之賊一面圍撲李世忠營壘一面衝過該營繞越上犯聞該提督部下亦嘗接戰多次屢有擒斬外閒因賊所經過數城數卡皆係李世忠汛地往來自如無傷無礙有疑其部下不肯出力者并有更甚其詞者臣皆付之不聞不問大抵因分汛太廣賊股太眾以致未能堵截該提督尙有數咨具報力戰屢次請獎請卹之案臣卽日當爲彙

案陳奏

一恭奉

諭旨垂詢濡須口梁山是否保全并水師駛入巢湖一節查裕溪口卽古之濡須口近爲彭玉麟駐紮水師之地業經曾國荃抽撥周惠堂等兩營分守裕溪口及西梁山兩處水陸倚護尙可保全惟巢湖在巢縣之上水師又在運漕之下巢縣運漕兩處旣爲賊踞則舳板飛划均不能由賊中衝駛入湖

一恭奉

諭旨垂詢曾貞幹赴雨花台後蕪湖防兵是否尙厚一節查臣弟曾貞幹自五月赴金陵大營秋閒遭病閏月稍愈本擬離營

調養適值援賊大至力疾督戰四十六日解圍後積勞病劇遽
於十一月十八日在營身故皆由臣位高德薄咎積災生疫氣
流於軍中餘殃及於手足所部十營併隸曾國荃統轄尙慮力
難兼任臣擬親赴金陵察看一次又以皖南北賊燄方張未敢
輕離安慶致令人心搖動至蕪湖要地有周萬倬吳坤修等營
守之金柱關有朱南桂羅逢元等營守之防兵尙厚仍時與楊
岳斌水師截擊渡河之賊十一月初八十三十七十八等日水
陸俱獲小勝曾國荃以沿江要隘恐有疏失又從金陵分長勝
兩營赴龍山橋嘉字一營駐東梁山俾作蕪湖之聲援而固金
陵之後路

一恭奉

諭旨飭令常勝軍截住南岸竄賊一節查洋將白齊文常勝軍於九月中旬定議來援金陵屢次愆期厥後奏明十月十九日起程吳煦先帶輪船兩隻赴鎮江齊隊乃白齊文案餉遷延迄未入江十一月十四日在松江閉城滋鬧十五日帶洋槍隊數十人至上海毒毆楊坊刀傷其戚屬搶奪洋銀四萬餘兩而去如此跋扈橫行毫無紀律不特中國不能資其力以剿賊亦爲外國之所公惡應由李鴻章奏明知會駐京公使嚴行懲辦

一恭奉

諭旨查詢李秀成蹤跡及北竄賊目何人一節查僞忠王李秀

成尙在金陵前次所稱遁回蘇城係屬諜報未確業經續奏聲明在案此股渡江賊目爲僞章王對王及忠逆之子據李世忠報實有八九萬人現據巢縣者爲僞對王洪春元只有假冒官軍旗幟頂帶之事並無薙髮之說確由金陵竄出圖犯廬州安慶掣動南岸之兵勢其九洑洲賊巢現仍堅踞如故該洲與金陵城賊一葦可杭朝夕往還不至因無援而先遁

一恭奉

諭旨飭令商催李續宜起程東下一節臣近因事機不順日夜憂灼其望李續宜回營迫切之情百倍於他人惟見其病勢頗重到籍以後亦未痊愈欲借百日之假調養有用之身正月初

三日假期已滿現經兩次函催無論能否病痊屆期決當銷假
東下兼程履營力圖報稱

以上各條謹就奉

旨垂詢之件分晰條對由驛六百里馳奏伏乞

皇太后

皇上聖鑒訓示謹

奏

旌德涇縣解圍克復績溪祁門摺

同治元年十二月二十七日

奏爲旌德涇縣先後解圍徽浙各軍克復績溪祁門兩城恭摺
馳陳仰祈

聖鑒事竊自逆匪攻犯旌德分撲涇縣官軍力解城圍績溪旋
失旋復賊由旌德之九十等都繞竄祁門臣於十一月十二日
略陳大概聲明續報戰狀在案十月初八九等日賊酋賴文鴻
古隆賢等自廣德甯國縣竄入旌德之六都距城僅八九里守
城總兵朱品隆簡病勇中之能戰者禦賊於楊村一戰卻之十
二日賊分三大枝攻撲東南北三城而以一枝猛撲西門外胡
暉堂之營壘魚貫而進直薄濠邊洋礮洋槍密如驟雨胡暉堂

督飭士卒憑營穩擊子藥將盡朱品隆以該營戰久力乏恐有疏失遂率兩哨及朱步青所帶隊伍衝出西門入營助守火器齊發殪賊無算賊乃愈攻愈猛爭拔花籬躍躍欲上朱品隆令胡暉堂悉力守禦仍自出營突陣立斬騎賊四五人從外夾擊賊始返奔其攻城之賊亦退至數里外下寨是夜賊又擁眾進攻越兩日夜竟無一刻休息十五日朱品隆恐賊立營一定糧路不通遂派隊啟城出擊鏖戰兩時破賊三壘而東北各門之賊捲地而來忽以馬隊數百抄我兩翼我軍小卻且戰且走賊勢遂若湧潮攻我北門斬卡競進胡太旂劉永勝奮奪卡隘力戰死之急以全桶火藥轟擲賊乃負創而退十七日賊復大舉

攻城我軍因前一日小挫未經出城迎戰礮石外擊傷賊頗多十八日賊攜長梯數百架擋牌數千張將欲甘心一逞朱品隆令洪德發帶隊由東門過橋牽制東路之賊令易潤壇朱聲隆朱步青由西門排列城下仍親率老營部卒向大北門往來督陣賊見我軍整隊齊出悉銳來犯朱品隆以火箭環射焚賊擋牌易潤壇朱聲隆朱步青等在西門搏戰方酣忽見胡暉堂營中火光突起恐有挫失奮力一衝截賊數段胡暉堂乘勢出壘猛擊賊目羣賊一圍散走而東門南門等股經洪德發等縱橫盪擊亦卽紛紛駭潰次日昧爽朱品隆登陴瞭望知賊已懈復督諸將分路出擊掄斬極多毀平二十餘壘賊向楊村轉遁至

九十等都旌德遂於十九日解圍方旌德之被圍也

臣調易開

俊三營吳廷華二營由甯郡往援十一月初三日馳抵涇縣適

吳廷華二營先一日入城正在料量赴旌旋報甯邑賊黨由漕

溪竄聚埧頭初四日賊由晏公堂畫眉嶺分兩路而來環攻涇

縣易開俊吳廷華各率所部登陴守禦賊但聞涇縣守兵極單

而不知援旌之軍適集於此倉皇遽遁此十月十九十一月初

四等曰旌德涇縣解圍之情形也先是昌化踞賊巢逆陳逆等

股率黨數萬於十月二十四五等曰陸續竄入績溪縣城并在

孔靈分築卡壘意在阻絕旌德糧路二十八日皖南鎮總兵唐

義訓率強中禮後震字等營會合左宗棠派援之王文瑞老湘

七營馳紮臨溪途遇野掠零賊縱軍擊之小有斬獲二十九日賊以千餘眾犯我中路我軍奮勦卻之是夜孔靈一帶烽燧蔽空料有賊至唐義訓王文瑞共議分道進攻十一月初一日唐義訓率所部專攻左路王文瑞率所部攻中右兩路行未半里賊已蜂擁猝至王文瑞飛飭前右後三旗直前迎敵左右兩翼從外斜抄而以親兵爲後應號鼓齊發兩鋒相交楊海泰龔隆貴王明輝等騰蹕而前遇者輒殪左翼羅瑞山右翼郭德馨從山坳抄出陳清泰葛蘭世等從山梁壓下賊眾披靡不復成伍右路曾聚賢亦搜殺而來會敗賊尸駢林谷殆以千計其唐義訓一軍進次孔靈賊正出巢來撲各營併力衝突賊勢大沮縮

入村中唐義訓揮隊猛攻連破村旁四壘並毀堅卡五重軍士
入村勦捕誅夷羣賊唐義訓派強新一營繞出雄路之後天晚
雨甚與王文瑞會師於績溪城外里許時至夜分謀報城賊將
遁唐義訓王文瑞令各營裹飯傳餐嚮明出隊則賊方出城紛
走我軍收復城池一面躡賊尾追直至叢山關而還方唐義訓
王文瑞進剿之時而旌德之賊已於初三日竄至太平遂由焦
村進雙阜二嶺初六日竄黟縣所屬之西遞地方初七日駐祁
門之良字兩營在黟境之西武嶺迎戰挫衄賊已於初七日突
陷祁門維時唐義訓甫自績溪回軍徽郡王文瑞回軍革市聞
祁門之警星夜馳援業已無及初九日兩軍由漁亭進駐花橋

將以次日會攻祁城賊不知大兵之驟至闔城鼎沸遂謀宵遁
我軍於初十日進復縣城僅斬尾隊百餘人而賊之前隊早出
赤嶺從田家樂返竄石埭太平一路此十一月初二初十等日
連克績溪祁門兩縣之情形也臣查賴古諸賊酋圖假徽境就
食江西已非一日乃不得逞於旌涇績溪數縣而繞越祁門蓄
計至狡關繫至鉅幸仗

聖主威福將士用命屢卻兇燄再復名城除飭各營嚴行防禦
外此次尤爲出力之布政使銜卽選道王文瑞可否

交軍機處記名以道員遇缺題奏總兵銜湖南補用副將王開
琳總兵銜副將王品高可否

賞給勇號副將銜參將蔣信玉江西補用參將王華雲可否以副將儘先推補其餘在事出力人員王文瑞一軍可否由左宗棠保獎唐義訓一軍可否由臣酌獎之處出自

恩施記名總兵胡太旂安徽補用參將劉永勝江蘇卽補游擊張仁興擊賊陣亡深堪憫惻應請

敕部從優議卹所有旌德涇縣解圍績溪祁門並復緣由謹繕摺由驛六百里馳奏伏乞

皇太后

皇上聖鑒訓示謹

奏

查明金安清汪曜奎參款擬結摺

同治元年十一月二十七日

奏爲查明金安清汪曜奎二員被參各款分別擬結恭摺仰祈聖鑒事竊已革運使金安清道員汪曜奎承辦皖捐一案及金安清另案參款經前漕

臣袁甲三奏奉

諭旨飭臣提營秉公查辦旋准袁甲三派員帶齊卷宗飭送金安清到省復准勝保派員調取潁局捐冊檄令汪曜奎來皖先後均飭發安徽善後局司道並添派委員會同研訊茲據訊取金安清分款供稱原奏所列杭紹各卡續收七千八百串一款卽在三十萬串總數之內作收如此款須另解則總帳收數應剔出七千餘串至前後借墊歸還之項咸豐九年十一十二等

月漕督袁甲三攻克鳳陽安徽巡撫翁同書到壽未久飭令不
拘何項設法挪解此兩月內收捐僅四萬四千串解至六萬六
千串實墊解二萬二千之多係在杭城錢店借銀一萬兩又向
前浙江藩司徐宗幹借銀五千兩不得不將次年續收捐項陸
續歸清原奏所列吳丙齋等捐錢五千四百串一款吳丙齋係
蘇城第一燒酒業人所共知九年十一月革員開具清摺呈送
袁營卽已註明燒酒業捐五千四百串若有弊混其時蘇城未
陷豈有不懼查究之理且兩項捐數同報五千四百串並無多
寡自係一項惟改戶爲業因事涉瑣屑未便續稟聲明其程二
賢張聚泰二戶前供情節實無捏飾札查原辦蘇捐委員趙秉

鎔自明原奏所列南匯縣知縣鄧賢芬捐銀二千兩一款實因指項挪解在先收捐劃還在後當蘇杭失守時捐戶星散如無此款指墊安能湊解萬金有前後統收統支數目尤無絲毫含混原奏所列部照實收盡在杭局被燬一款當經報明浙江巡撫咨部立案該省司道府文據具在其在前填用各照七百五十九張底簿無存是以號數無從開報但記係典字列字等號至另案所參皖捐數十萬解營不過十之一二餘皆在杭湖上海販運絲茶一款計先後解營二十七萬餘串有翁撫院稟批可驗續經袁大臣飭查各糧台備文申復台之局用著賠二萬餘串所有三十萬之數已相符合如果販運絲茶商夥必有

數十人行棧必有十數處京中既有所聞上海咫尺之地更難掩人耳目應飭傳在滬絲茶各商弔查歷年交易簿據革員曾否販運無難立辨又據汪曜奎供稱咸豐九年五月奉都統勝保委赴江蘇收捐餉票另派道員徐丹桂知州張伯塤在行營收捐餉票三人分辦彙造總冊統歸潁州捐局此原辦章程也十年三月奉漕督袁甲三札令撤局曜奎將蘇收各捐清冊並收捐餉票用剩部照實收於四月閒齎赴袁帥大營當奉面諭此案已歸勝大臣辦理飭赴河南核算適值江南賊氛正熾曜奎聞蘇省原籍失陷急欲折回因將所解各項備具文批交委員由臨淮解送勝帥大營此呈交清冊餉票部照未經親赴情

形也五月勝大臣還京仍將此案移交袁營維時徐丹桂已故
曜奎與張伯塤均經先後回籍該承吏僅將曜奎解到各項移
送潁局未將徐丹桂張伯塤經手各捐總彙入冊以致餉票部
照均不相符迨袁大臣續調曜奎赴營核算又因蘇省已失驛
路梗塞札件並未接到實非有意遲延此奉參交部議處緣由
也十一年七月曜奎由閒道至上海始悉袁帥續調之信正在
起程閒復得勝帥派弁催調之札乃由海道渡天津至直隸軍
營蒙諭此案於五月閒奉

旨交辦飭卽趕緊清算無如底冊各卷遠在潁局無從核對直
至元年三月曜奎隨隊潁州始於解圍後會同局員孫駿猷調

齊文卷督飭原辦承吏詳細查核據檢出徐丹桂經捐清冊一本用剩空白監照八十八套籌餉實收五張常例實收九張又張伯塤經捐抵撥七卯內鍾殿選部撥另獎清冊一本澈底清算除已繳外尙應補繳餉票銀四萬二千五百五十兩此項餉票由徐丹桂寄存親戚處現已專人取到解交潁局並無短少其原領各部照實收亦逐款核對捐出各數與現繳各數相符並無舛錯惟監照一項尙短五十七套詢據該承吏面稱張伯塤回籍時知有用剩監照並曜奎解還截存各照根掣銷各實收一併攜帶在身原防遺失起見詎原籍吳江縣失守張伯塤陷入賊中逃出後旋即病故一時實難查究等語計短前項監

照五十七套應交餉票銀四千五百六十兩曜奎未敢推諉情願代賠卽經如數措繳潁局此曜奎經捐部照餉票均已清晰之原委也至已革運使金安清與曜奎素不相熟惟九年五月甫行試辦潁捐因請領部照未到奉文在金安清皖省捐局借用監照三百套是年八月領到部照後卽行備文移還彼此清楚毫無交涉各等供詳請奏結前來臣復檢齊案據逐一詳查該革員金安清承辦江浙皖捐解過袁甲三翁同書勝保三路軍營共錢二十七萬七千餘串又開銷局用錢二萬三千餘串收解相符另案所參解營十之一二及上海等處販運絲茶並經明查暗訪委無其事袁甲三原參供詞含混計共六款除在

蘇杭所失印照實收咨部有案杭卡續收之捐及鄧賢芬繳款均在已解營餉數內無關弊竇外程愷亭一款書數較多繳捐時託故推諉不能足數者亦屬事所恆有惟吳丙齋一款查九年二月原開清摺內列吳丙齋捐錢五千四百串十年十月原開清單內列燒酒各店捐錢五千四百串顯係兩款該革員化爲一款張聚泰之捐亦係化兩款爲一款均屬有意含混至江北籌餉局經手各款前經署漕_臣吳棠奏派江安糧道王朝綸知府顧思堯_臣亦飭派兩淮運使喬松年逐款行查旋據查覆共收銀一百十七萬五百餘兩錢五十一萬九百餘串又江南團練捐錢三萬九千七百餘串均無虧短挪移情弊其另案婪

賄賣捐賣差拜認師生等情臣已於上年十一月二十五日疏陳大概維時輿論沸騰卽據所聞覆奏聲明有無侵吞非弔查簿數不能確知此次復經逐查簿據並無侵吞重情惟該革員經手銀錢濫支濫應物議紛滋又或意存含混實屬咎無可辭業經奏參奉

旨革職應無庸議正項旣無虧短挪移原抄家產例得給還惟核計應行追繳之款爲數甚鉅江北一案經吳棠奏賠局用銀一萬四千八百十二兩零又團練局用錢二千九百五十二串七百二十五文皖北一案經袁甲三奏賠局用錢二萬三千九百十三串八百文原參片內謂局用卽於公費項下留支不得

開支正項據金安清供則謂全案皆未請獎尙無公費可收是以稟明勝保先在正款內動支其言尙爲近理應酌改爲減半著賠此外又有應賠鎗礮價銀二千兩吳丙齋張聚泰兩戶捐款七千一百串亦應責令賠出統計應賠繳銀二款一萬六千八百十二兩零錢三款二萬二千串零未便任其懸宕該革員泰州如皋上海三處資財前據委員查封僅止數千兩應將抄出物件由江北糧台一併變價備抵其餘所短之數仍勒令分限措繳解交吳棠唐訓方兩處充餉以重款項至道員汪曜奎與金安清查無交涉事件續准袁甲三來咨并據潁州捐局送到底冊該員前次經辦蘇捐短解監照等項業已措齊餉粟如

數清繳應請開復降級留任處分一律辦結所有遵
旨查辦擬結緣由恭摺覆陳伏乞

皇太后

皇上聖鑒訓示謹

奏

三和

三

鮑超丁憂在營穿孝片

同治元年十一月二十七日

再甯國一帶自王可陞五營紮定黃麻渡之後糧路稍通軍心漸穩石埭太平皆爲賊踞恐其再竄青陽斷南陵涇縣之後路糧運仍覺可慮各營病故缺額尙未募補足數仍難大舉進攻鮑超於十一月二十日聞訃丁母憂呈請給假奔喪查武職提鎮大員在軍營勦賊者向無回籍奔喪之例況鮑超係獨當一面又值甯國萬分吃緊之際更未可輕離防次應查照咸豐六年江甯將軍福興在金陵大營聞訃丁憂成案卽在營旁賃屋穿孝二十七日俟皖南軍務大定由臣察酌情形再行請旨准給假期回籍營葬以遂孝思至鮑超本任浙江提督可否

懇

恩循例無庸開缺改爲署理之處出自
聖裁理合附片陳明伏乞

聖鑒訓示謹

奏

預籌選派員弁管帶輪船摺

同治元年十二月十二日

奏爲遵

旨籌辦恭摺密陳仰祈

聖鑒事竊_臣等承准議政王軍機大臣密寄同治元年九月二

十九日奉

上諭總理各國事務衙門奏購買外國船礮明春可到請飭預派將弁水勇以備演習並請妥籌配派各摺片購買外國船礮近以勦辦髮逆遠以巡哨重洋實爲長駕遠馭第一要務曾國藩前次覆奏有駛到安慶漢口時商定奏辦之語第俟該船駛到再行商辦誠恐一時選派難得其人且停泊過久難保洋人

不另出主見流弊不可不防現在既據赫德呈稱此項船礮明
春可到其單內所稱輪船應派官兵及礮手水手水師等兵並
船上當差甚苦須用健壯之人等語雖較之上年所開之單尙
爲覈實惟是否應如此酌派殊難懸揣官文曾國藩久轄南疆
見聞較稔著卽相度機宜參以赫德之言悉心籌酌將應用將
弁兵丁水手礮手等人於該船未到之先一律配齊俟輪船駛
到卽可上船演習免滋流弊至酌留外國水手人等多則經費
太鉅少則教導不敷應如何辦理之處並著屆時與稅務司等
熟商妥辦其赫德單內有水手用山東人礮手用湖南人水師
兵用八旗人之語自係爲膽氣壯實及火器嫺熟起見惟因地

制宜仍在官文曾國藩詳悉籌辦務收實用其應如何選派之處卽著迅速具奏總理各國事務衙門摺片各一件赫德呈單一件均著鈔給閱看將此由五百里各密諭知之欽此仰見皇上慮遠思深先事豫籌之至意臣等遵卽與侍郎彭玉麟提督楊岳斌往返密商適值金陵甯國援賊大至東垣抬來之賊船散布甯太各湖大港小汊一片逆氛水師上下防剿數月以來刻無暇晷茲據楊岳斌彭玉麟密覆前來查有統帶巡湖營提督銜記名總兵蔡國祥勇敢耐勞久隸楚軍水師歷著功績而又籍屬廣東易與洋人熟習堪以統轄七船又查有副將銜參將盛永清參將袁俊參將銜游擊歐陽芳鄧秀枝周文祥蔡

國喜游擊銜都司郭得山年力精壯向歸蔡國祥節制堪以各
領一船此外水手礮手兵丁等項據赫德單內所開人數分列
多寡尙合機宜應如所請辦理惟擬用山東湖南八旗人等雖
係因材器使究嫌參雜不齊臣國藩去秋覆陳一疏有云輪船
駛至安慶漢口時每船酌留外洋三四人令其司舵司火其餘
卽酌用楚勇所有學習駕駛司放礮位等事應請卽由蔡國祥
於所部弁勇中豫爲派定誘掖獎勸以去其畏心委任責成以
程其實效始以洋人教華人繼以華人教華人旣不患教導之
不敷又不患心志之不齊且與長江各項水師出自一家仍可
聯爲一氣不過於長龍舢板數十營中新添輪船一營而已旣

見慣而不驚自堆放而皆準抑臣等更有請者兩湖水勇能泛江不能出海性之所習遷地弗良但可駛至上海不能遽放重洋本年二月間經臣國藩據實陳明旋奉

寄諭現籌購買船礮本擬用於江面並非施之海洋仰荷

聖謨閎遠俯順物情宣示軍中咸知感激倘蔡國祥經管之後由楚勇而參用浙勇參用閩粵之人由上海而漸至甯波漸至山東天津亦未必終不可出洋巡哨觀政海邦惟目下一二年內則須堅守前約不令放洋俾臣等不失信於將士庶幾恩誼交孚號令易行區區愚忱不得不重言申明惟求

聖慈鑒諒所有遵

旨籌辦緣由謹會同兵部侍郎臣彭玉麟福建水師提督臣楊岳斌由驛覆陳伏乞

皇上聖鑒訓示謹

奏

軍營病故人員彙案請卹摺

同治元年十二月十二日

奏爲彙報軍營病故人員懇

恩敕部議卹恭摺仰祈

聖鑒事竊軍中打仗陣亡傷病身故各員

臣於上年六月初八

日奏乞

恩施奉

旨允准厥後徵兵四出續有死亡本年夏秋以來疾疫繁興數
百里內軍營將士地方官吏嬰疾輒殞殆以萬計其中功績卓
著未竟所用遽至徂謝者有九十六員名之多節據各該營稟
請奏卹前來

臣

查該故員等禦侮折衝效命疆場又或勤勞撫

字轉運軍儲均屬有功足錄一旦天降沴戾致令宿將循吏先後淪亡實堪憫惻相應繕具清單籲懇

天恩敕部各照原職原銜在軍營立功後病故例從優議卹其張運桂一員去冬守徽州府城厥功最偉黃慶伍華瀚沈寶成周成南四員戰績較多均請從祀湖南原籍昭忠祠以彰忠藎而資激勸除陣亡傷亡各員弁俟查明另辦外所有軍營病故人員彙案請卹緣由謹繕摺具陳伏乞

皇上聖鑒訓示謹

奏

李世忠在九洑洲戰守情形摺

同治元年十二月十二日

奏爲賊由九洑洲分股上犯李世忠一軍節次堵戰獲勝情形

恭摺彙報仰祈

聖鑒事竊僞忠王李秀成等酋自雨花台解圍後卽遣僞章王對王納王及忠逆次子糾黨渡至九洑洲圍撲官營李世忠於九月間早已偵探明確十月初卽由滁州赴九洑洲親駐前敵力籌防剿十月初十以後該逆陸續由下關渡至九洑洲散布蘆葦叢中帳棚馬匹絡繹北渡十七日分兩枝突出浦口進攻張大本營寨李世忠正欲督隊往援忽有悍賊數千繞過前營洶洶而來負土束薪填濠欲進我軍連發槍礮殲賊頗眾賊爲

少卻乃後隊續至者若蠅若蟻勢益兇猛李世忠出營突陣馳逐於礮火之中傷馬馬蹶步戰搏賊又斬百餘級賊始遁去而張大本營外之賊亦負創撤退十八日賊仍猛犯張大本營又分七八千眾抄撲九洲倪文藻陳映登兩營層層密裹更番迭進維時李顯安楊玉珍劉長發吳文祥陳廣俊薛元誠等六營同被賊圍我軍各以排槍穩擊子藥既盡繼以磚石賊雖傷斃不少知我彼此不能相顧持長矛躍上營牆陳廣俊吳文祥各受矛傷督軍抵禦刃賊前鋒相持竟日卒不敢近十九日賊攻李顯安頭營及倪文藻陳映登諸營益急倪文藻陳映登堅壁不出俟賊近濠縱兵擊之互有損折李顯安簡精銳橫衝賊

陣賊盡披靡我軍乘勝掩襲俘戮二百有奇蹙偪入江者無數
惟汪德喜率隊助戰追近賊壘遇伏死之據擒賊供稱諸賊酋
率八九萬人分股搶渡意在上趨和含直撲巢縣廬郡以截楚
師後路下犯天長來安六合數城以伺裏下河要地李世忠正
飭各營嚴爲戒備賊又於二十夜冒雨麇至一劫浦口張大本
等營一劫九洑洲李顯安倪文藻等營天黑雨猛火器不燃軍
士屏息露立羣以刀矛外刺薄營之賊攖刃輒殪賊乃轉攻程
自有一營牆圯數丈駸駸欲上程自有從牆缺處躍出昏夜搏
鬪裹入垓心刀貫胸腹移時殞命胡學詩搶護營盤亦歿於陣
此十月十七至二十等日九洑洲浦口被圍力戰卻敵之情形

也二十一二等曰賊攻南岸石埠橋營晝夜不息沿江連結八壘並結筏橫亙江心二十四日乘風雪渡江者二萬餘眾旋由九洑洲竄出一股至江浦以北牽制小店各營以大股傍營衝過我營抽隊出擊多有斬擒駐守江浦之軍出城夾勦賊向西路和州一帶竄逸二十五日李世忠見西路喫緊親駐江浦派李顯爵楊玉珍蔡天福等帶隊躡賊之尾二十六日昧爽李顯爵等行至橋林聞前日西竄之賊尚有萬人屯聚新店廟地方我軍鼓行而進猝與賊遇李顯爵攻中路楊玉珍蔡天福抄左右二路橋林守將邱昌良撥軍助之殺賊近二千名生擒逾七百人是夜江面賊船銜尾爭渡九洑洲燈火徹宵不絕傳言忠

逆之子率黨踵至於二十八九等日過小店分隊撲營悉力上竄李世忠令朱元興由烏衣進剿李顯爵由橋林折回戰賊於小店賊眾大潰追擒數百中有僞主將俞元和僞合天安汪成玉僞藍天福陳伯品三人十一月初一日李世忠親督楊玉珍曹玉良蔡天福等自江浦馳赴小店見該逆正在小店過隊西上並排列旗仗以備我軍李世忠揮兵猛擊衝開賊陣截住未過賊隊五千餘人適李顯爵朱元興亦自橋林來會賊卽駭奔我軍分道追剿直至湯泉鎮新店廟而還此二十四以後賊由江浦西犯和含官軍截剿屢次獲勝之情形也初六日賊在石埠橋濱江增壘守營將領何立香督隊毀平壘中之賊無一脫

者初九日賊以全力來撲環營築壘圍攻數日略無退志李世忠乃令李顯發過江南援十三日何立香吳奎森從東面擊出李顯發帶所部從西南兩面擊入另派洋礮隊一枝爲之援應賊猶恃眾抗拒猛鷲無匹李顯發激厲將士內外交攻截賊數段洋礮隊乘勢環轟賊多不及歸壘我軍搶過濠溝斬卡直入一壘旣破眾壘慌亂遂將東面五壘西南七壘一律剷除此又南岸石埠橋官軍踏毀賊壘之情形也其北岸之賊亦於十三日力撲浦口各營又於十四日進圍小店各營均經諸將弁穩守穩戰更得江浦營中撥兵來援賊盡撤圍西去凡李世忠所守各城各營屹立賊中堵剿兼施均獲保全疊准該提督咨報

並將山陝兩省欠解協餉咨請奏撥前來臣查李世忠一軍扼守江北數城分攻九洲賊壘又防南岸石埠橋要隘汛地過寬此次賊渡北岸雖未能遏其上竄而血戰經月路路喫重卒能力保各城屢挫逆氛實屬功多過寡惟該軍部卒甚多缺餉已久雖經臣籌濟銀米礮位火藥等項藉以稍固軍心而積欠過鉅終虞飢潰所請協撥一款仰懇

天恩敕下山西撫臣將應解李世忠營月餉五千兩按月迅解以資接濟陝西一省軍事方殷可否飭部另爲指撥之處出自聖裁至升用總兵副將程自有副將汪德喜知縣胡學詩力戰陣亡均請

敕部從優議卹所有官軍在九洑洲等處節次堵截獲勝緣由
謹繕摺由驛六百里馳陳伏乞

皇上聖鑒訓示謹

奏

近日軍情片

同治元年十二月十二日

再近日軍情金陵大營堅守如常北岸巢縣之賊掠至殷家橋運漕之賊竄至湯家溝十一月二十四日撲近無爲州北門外我軍出隊堵剿金陵派援之劉連捷三營恰至賊卽卻走蕭慶衍毛有銘兩軍亦於二十六七日起至無爲州連日雨雪尙未開仗南岸楊岳斌水師於十九二十二等日在三汊河奪舢板槍划二十餘號二十七日會同陸兵羅逢元等攻破護駕墩兩岸逆壘焚奪賊船二百餘號僞侍王在東堤抬來之船不復能逞志矣周萬倬吳坤修兩軍於二十七日攻剿石埭及三不管地方踹毀兩卡四壘焚其輜重金柱關蕪湖兩路幸皆穩固甯

國鮑超一軍於二十七日進攻馬頭楊柳鋪之賊大獲勝仗踏
毀賊館賊卡甚多惜所募新勇未齊不能乘勝痛剿水陸糧路
仍有梗塞之虞駐守涇縣之易開俊吳廷華等營二十六日擊
賊於晏公堂獲勝一次二十七日追賊於黃村挫敗一次太平
石埭兩縣賊踞如故擾及陵陽鎮初五日竄入青陽縣城臣現
檄調朱品隆一軍棄去旌德而移剿青陽縣城以顧涇縣後路
未知能得手否除各路戰狀容再分案詳奏外合先附陳梗概
伏乞

聖鑒謹

奏

恭謝

天恩摺

同治元年十二月二十四日

奏爲恭謝

天恩仰祈

聖鑒事竊

臣

接准兵部火票遞到同治元年十一月初八日內

閣奉

上諭江蘇布政使曾國荃著賞給江綢黃馬褂料一件小卷江

綢袍料一件白玉喜字翎管一枝白玉柄小刀一把曾貞幹著

加恩以知府用等因欽此

臣

當卽恭設香案望

闕叩頭謝

恩訖伏念

臣

弟國荃親提戎旅進薄堅城幸承

廟算周詳白下之圍迅解迺荷
宮衣寵飾黃中之美榮施備邀

文綺之輝煌並拜

殊珍之璀璨英銜孔翠戴茗華而喜近

天顏采溢舟瑤撫鞞輶而溫霑

聖澤臣弟貞幹猥以末秩參佐戎機效未著乎七禽寵驟膺夫

五馬凡此

恩華之渥被實非夢寐所敢期臣惟有督飭臣弟等勉矢忠勤

力圖克復作我士風雲之氣全收六代江山出斯民水火之中

共沐

九天雨露所有微臣感激下忱理合繕摺恭謝

天恩伏乞

皇太后

皇上聖鑒謹

奏

迭奉 諭旨併案覆陳摺

同治元年十二月二十七日

奏爲欽奉疊次

諭旨併案覆陳仰祈

聖鑒事竊自本年九月以來南北兩岸戰事日亟

臣 歷奉

寄諭殷殷下問有隨時詳奏者亦有未及具覆者茲就關涉軍務各事件分晰條列敬爲

皇上陳之

一恭奉十一月初八日二十一日兩次

諭旨飭令壽州防兵未可輕動並垂詢苗練不至另生枝節是否確有把握又奉十二月初三日

寄諭因袁甲三之奏飭令派兵駐紮壽正二處俾該練有所震懾各等因臣查前此苗沛霖之黨擄殺湘軍樵採勇夫衅端漸

開其時僧格林沁正撫苗勦捻給以餉項苗黨則痛詆楚師大

肆簸弄臣恐因勦撫之兩歧致南北之不和適值北岸和含巢

三城並陷遂將壽正防軍撤出騰挪赴援明示以坦然不疑正

冀其幡然自悔當臣撤兵之際實因廬巢變生倉卒移緩就急

亦未敢必苗練之不另生枝節現在事隔兩月該練尙無據城

以叛之跡且觀其上撫臣唐訓方之稟與鳳台知縣蔡鏐之函

均屬恭順近理或者感僧軍撫馭之恩無湘勇逼處之嫌不至

更生他變此際若另行籌兵駐紮陽撫陰防使反側者無以自

安似不如推誠相待無庸戍守轉可省兵力而免後患如果反覆無常逆迹萌著臣與李續宜之兵自度勦髮匪則不足制苗練則有餘不足深慮

一恭奉

寄諭以李世忠負其沈鷺之氣既能束身歸命總宜因材器使化其桀驁俾爲我用又奉十一月三十一日

諭旨以李世忠之軍漫無稽察恐其勢日形扞格因而生心嗣後相待李世忠可仍照袁甲三之法酌中辦理以安其心等因朝廷撫馭降將仁至義盡臣自當仰體

聖主不得已之苦衷委曲求全惟該軍投誠雖久舊習未改李

世忠頗驕亢任性其部下尤恣橫無狀捆鹽自售場塹避其凶
燄設卡抽釐商民視爲畏途與之相處最近者下而都興阿一
軍上而楊岳斌曾國荃兩軍均以與滁軍交接爲苦往往口角
爭鬧釀成命案卽如本年九月間臣將二起馬隊遣回黑龍江
十月初六日委營總那勒豐阿等行過江浦縣滁軍卡員不准
放行毆斃及推水淹斃官一員兵二名盤費行李全行失去該
西丹等投入揚州營中稍加周卹臣與都興阿均未敢深究此
次賊由九洑洲渡江外間頗騰物議臣亦絕不吹求全其體面
自袁甲三去位以後臣分解滁軍餉銀二萬五千兩火藥三萬
五千斤米三千石及大礮子彈等項陸續接濟冀安其心而策

其力惟該營餉項窮絀臣不能按月供支其捆鹽來上游售賣亦未准免抽江釐在該提督不無缺望目前雖無甚扞格將來弁勇口角太多恐不免激成事端倘有萬難含忍之處或須示以檢制稍加懲究臣當隨時奏明辦理

一恭奉十月十三日

諭旨垂詢楊岳斌彭玉麟二員中能否派撥一員駛赴下游江面駐紮防剿一節查本年八月十二日臣於覆陳摺內奏明楊岳斌親赴靖江如皋通州海門等處察看一次當因楊岳斌行次鎮江抱病而回商令彭玉麟代之又以金柱關告警遂不果行厥後兩岸水師數月防剿日不暇給楊岳斌防守金柱關以

備東壩抬出之賊船彭玉麟駐守裕溪口以備巢湖竄出之賊股且下自金陵上至九江節節皆有師船設防上游方戰爭不息實不能移紮下游江面

一恭奉九月二十六日通飭

諭旨飭派都司以下武弁學習外國兵法臣雖未嘗親見洋人用兵然聞其長處約有二端一曰器械精堅二曰步伍整齊其短處亦有二端不紮營壘不住帳棚人數稍多勢難合併一口糧太重製器太貴用兵稍久國必困窮二也善學者自須用其所長去其所短臣部各軍分駐皖境距海尚遠較之濱海華洋雜處者風氣略近樸實常勝軍之口糧太多臣方深以爲非

若酌挑數人馳赴上海甯波恐未得洋人之長技先染加餉之惡習臣愚以爲有心學習人不在多人多而聚學則學者圖增重餉教者圖侵兵柄人少而竊學則一人可教什伯十人可衍千萬巫臣霸吳其始不過一人教射御之事吳人破越其始不過一客習泝澣之方近聞撫臣李鴻章已派張遇春之勇隨英國兵頭教習炸礮劉銘傳之勇隨法國兵頭教習洋鎗如果步武槍礮一一習熟臣當商李鴻章派員來皖轉教臣軍至外國火器諸臻精巧惟銅冒自來火費錢有限而妙用無窮尤遠勝於中國引藥有畏風畏雨之患臣擬設法推廣用之於烏槍抬槍諸器現飭工匠試造不知可期有成否

一恭奉十二月初一日

諭旨以英國公使信函副領事官可至金陵城內曉諭逆賊投誠飭令酌辦一節查金陵一城袤延百里之遙盤踞十年之久我軍分屯雨花臺僅扼城南其東西北三面並未合圍詎能制賊死命本年九月間賊援大至該逆雖屢受懲創我軍亦迭有傷亡且分僞對王納王等竄擾北岸佔踞三城目下僞忠王雖潛回蘇州而金陵城外各賊壘布置嚴密並不少懈左宗棠雖攻克嚴州而僞侍王一股窺伺太平金柱專圖進取並不回援至甯國楊黃諸酋與鮑超一軍相持雖屢次添兵助剿而糧道迄未通暢各路賊勢尚未窮蹙遽冀其獻城乞降酌理準情未

敢憑信至自拔來歸不得妄加殺戮臣亦嘗納降數次未敢輕
於屠殺此次欽奉

諭旨尤當嚴禁軍士私取財物申明約束以導向化之路
以上各條皆係數月內奉

旨垂詢飭辦之件理合一二條對由驛六百里覆奏伏乞

皇太后

皇上聖鑒訓示謹

奏

孝和卷一

東征局籌餉官紳請獎摺

同治元年十二月二十七日

奏爲湖南東征局籌餉出力官紳懇

恩優給獎敘仰祈

聖鑒事竊

臣

於咸豐十年七八月間會同前湖南撫

臣

駱秉章

飭令藩臬兩司暨道員鄭元璧黃冕等在長沙省城設立東征籌餉局於本省釐務之外另抽釐金以三分之二解江西糧台協濟皖南一軍以三分之一解湖北糧台協濟皖北一軍又派編修黃錫彤員外郎郭徵疇候補道陶枕知府彭汝琮胡鏞黃廷瓚黃芳知縣馮晟各官紳另設分局襄同辦理於十二月二十八日奏奉

硃批著照所請行欽遵飭辦在案旋據該官紳等添派公正紳士分途籌辦各州縣市鎮一律舉行計自咸豐十年八月開局之日起截至本年六月底止共抽收湘平銀一百九萬六千餘兩錢三十萬二千餘串先後解台充餉及回籍募勇製造軍械之用在局人員不遺餘力著有微勞據該總局司道開列清單請獎前來伏查臣前年忝督兩江正值金陵師潰蘇常淪陷蘇皖兩省幾無一片乾淨之區祇有江西一省略稱完善力不能供億眾軍乃湖南官紳於本省釐金之外又爲東征諸軍特設一局殫精竭慮同濟艱危舉辦未及二年解數已逾百萬自七月至今續解又逾三十萬兩維持全局保固軍心其中關係最

鉅者如上年六七月閒安慶援賊大集餉項極絀維時江西境內賊陷吉瑞二府十餘縣湖北境內賊陷黃德二府十餘縣均不能解濟皖餉賴東征局辦餉數萬飛解安慶軍心大定克竟厥功又如本年八九月閒下游各軍疾疫死亡卒伍空虛凡鮑超曾國荃彭玉麟周寬世等回湘添募之勇不下二萬人其費資皆取之於東征局既取攜之甚便乃挹注而不窮又如近月以來皖北有和含巢縣之失皖南有祁門石太之失湖南撫臣毛鴻賓一聞警信立商江忠義募勇萬人星馳援皖此舉辦成費銀當在十萬內外固由該撫臣不分畛域力拯時艱亦賴有東征釐局能籌鉅款乃成盛舉萬一皖南決裂尚有可以再振

之望斯皆關係最大論功不在前敵猛將之後迴非尋常糧台釐局所可相提並論此次敘保各員人數稍多班次稍優惟有籲求破格

鴻施准照所請給獎以示優異此外各台局概不敢援以爲例所有東征籌餉局出力官紳懇請獎敘緣由謹會同大學士湖廣督_臣官文湖南撫_臣毛鴻賓附驛具陳伏乞

皇太后

皇上聖鑒訓示謹

奏

黃冕惲世臨有功東征片

同治元年十二月二十七日

再湖南東征局襄辦各官紳

臣已奏懇

鴻施優加獎勵而主持其事最爲出力者如布政使銜江西卽用道黃冕自前年八月創始設局任勞任怨鉅細不遺又卽署湖南布政使鹽運使銜岳常澧道惲世臨自去年九月會辦局務綜核精密條理秩然

臣

營每當萬窘之時該局常能如期接濟除去年六七月間撥解鉅款卒成安慶之功本年八九月後

添募諸軍藉厚東征之力

臣

已於前摺敘明外其採辦穀米製

造鎗礮亦皆取之不盡呼應極靈又如火藥一項局中原未製

備乃一聞金陵喫緊江皖各軍皆缺火藥該二員稟商湖南撫

臣毛鴻賓借撥三十萬斤飛速分批起解仍由東征局陸續製造歸還他省縱敦恤鄰之誼斷不能如此踴躍蓋其情切於救焚拯溺其力遂能扶危定傾在該司道等受國厚恩雖竭慮殫精非敢有所希冀特微臣忝竊高位一家併

荷

寵榮若以與臣分憂之人不乞恩於

聖主之前於心實有未安該司道等職分已崇臣未敢率行擬保所有布政使銜江西卽用道黃冕鹽運使銜湖南岳常澧道惲世臨應如何從優獎勵之處出自

聖主格外

天恩謹附片具陳伏乞

皇太后

皇上聖鑒訓示謹

奏

易和卷十

卷十

近日軍情片

同治元年十二月二十七日

再近日軍情北岸水陸各營於十二月初九日在運漕上游擊賊獲勝初十日彭玉麟水師攻毀三汊河賊壘蕭慶衍陸軍攻克運漕鎮悉焚賊巢誅戮無算餘匪遁歸銅城閘而去十三日毛有銘一軍在東關小勝一次二十日在芙蓉嶺敗挫一次損鎮將數人目下廬郡無爲廬江各城三河運漕西梁山裕溪口各隘均有勁兵守定臣又調蔣凝學防守舒城皖北或可無虞曾國荃金陵一軍於十二月二十一早攻襲谷里村朱門六郎橋三處賊巢大獲勝仗破賊壘十一座擒斬三千餘人皆忠逆布置以護衛金陵老巢者也金柱關蕪湖兩處近無戰事惟諜

報侍逆又從東壩抬船西來始終窺伺蕪湖要地防務殊難鬆勁甯國一路十二月初五日王可陞於馬港獲一勝仗而小淮窩尚爲賊踞水路運道仍被梗塞曾國荃派劉連捷三營移駐三山保全陸路糧道鮑超及郡城涇縣各軍堅守如常池州一路韋志俊於十八日進攻青陽未能得手現飭朱品隆督軍由池州繼進倘能攻克青陽則太平石埭等股可冀次第掃蕩徽州祁門一路近日防守安謐足慰

宸廑除各路戰狀及應行請卹人員容臣查明續報外合先附陳梗概伏乞


皇太后


皇上聖鑒謹


奏

夢和卷一

三







曾文正公奏稿

卷之十八目錄

官軍攻克運漕並銅城閘勝仗摺

同治二年正月十二日

謝會貞幹追贈按察使恩摺

全日

近日軍情片

委署皖南道缺片

鮑超軍大獲勝仗涇縣解圍摺

正月二十七日

涇縣守城陣亡員弁請卹片

近日軍情並陳親赴金陵察看片

代奏李世忠請贖勝保罪摺

全日



PL
2728
A1
1876
v. 19

查閱沿江各軍並陳近日軍情摺

二月十二日

田金陵回皖沿途查閱並近日軍情摺

二月二十七日

沿途察看軍情賊勢片

祁門知縣唐治建祠片

鮑超軍克甯國近減要隘摺

三月十二日

近日軍情片

李世忠軍營失陷摺

全日

蕪湖金柱關水陸防軍屢勝摺

三月二十七日

保穆其琛補無爲州實缺片

揀調各員畱皖委用摺

全日

近日軍情片

石澗埠六安州廬江等處戰守情形摺

四月十二日

覆陳淮鹽暫難改辦官運摺

全日

近日軍情片

恭謝天恩
瀝陳下情摺

四月二十二日

謝曾貞幹予諡建祠恩摺

全日

克復東關銅城閘兩隘摺

四月二十七日

近日軍情並陳餉絀情形片

五月十二日

金陵軍攻克石城石壘摺

水陸會克巢含和三城摺

全日

近日軍情片

攻克江浦浦口九洑洲江面一律肅清摺

五月二十七日

近日軍情片

官軍攻克運漕並銅城閘勝仗摺

同治二年正月十二日

奏爲官軍攻克運漕鎮後進剿巢縣小挫旋在銅城閘兩次獲勝恭摺馳陳仰祈

聖鑒事竊北

岸官軍攻克運漕鎮

臣國藩兩次具陳梗概聲明

續奏戰狀在案嗣據各營稟報僞對王一枝竄聚巢縣分撲西梁山經周惠堂節次督軍剿退後遂踞運漕銅城閘東關各隘偵知無爲州產米最富守兵又單於上年十一月二十四日擁三四千眾撲近州城北門外李昭慶率樹字等營開城迎戰會泗美帶水師右營從新河口橫出擊之適劉連捷亦自金陵來會賊乃負創卻走越數日

臣

國藩所調之蕭慶衍毛有銘兩軍

先後馳至議以毛有銘所部嚴備巢縣東關之賊蕭慶衍所部專攻運漕銅城閘之賊十二月初九日臣玉麟令右營定湘營師船駛抵運漕上游二里許渡蕭慶衍陸師過河築寨未及盡濟乃該鎮踞賊糾股突出偪營而陣圍裏數重我軍在水次燃礮仰轟仍分舳板數號接渡後濟之軍環起縱擊殲獲頗眾毛有銘正帶馬隊渡黃雒河履勘形勢一聞運漕礮聲飛騎助戰賊知不敵敗遁歸巢初十日我營修築既成臣玉麟飭曾泗美右營喻俊明定湘營護定陸師向運漕自上攻下親督成發翔左營王吉嚮導營唐敏義澄海營向三汊河自下攻上該處有三石卡一大石壘堅峙街心未易攻取成發翔帶飛划由水路

進王吉帶水勇登陸由北岸進唐敏義帶水勇登陸由南岸進
戰不兩時遂斷浮橋悉焚卡壘賊之撓刃墮河而死者不止數
百人臣玉麟自三汊河引軍西上與曾泗美喻俊明遇乃知大
馬頭一橋二壘亦就毀平蕭慶衍督率馬步等營四面縱火斬
隘直入縱橫鈔殺立復運漕一鎮乘勝躡賊直至黃墩誅斬無
算餘匪歸併銅城閘而去此十二月初十日水陸各軍會克運
漕鎮之情形也運漕既復而後毛有銘率親兵馬隊回駐石澗
埠卽於十三日部勒各營出哨東關見賊對河列陣正與曾泗
美礮划往來拒敵急派湘右營渡河夾擊斬賊二三十級賊仍
縮入卡內連日增黨修濠堅伏不出毛有銘知東關之未可遽

圖也不如徑取巢縣以爲攻心之計二十日就各營中抽撥六
成隊伍越芙蓉嶺迤邐前進突有五千餘賊在前面山岡揚旗
吹角張兩翼鈔來毛有銘隨令信中溥左溥右三營禦左路湘
中湘右二營禦右路兩鋒相交會不少卻乃以馬隊橫掠賊陣
賊始披靡我軍奮力薄賊馳逐一里許正思撤隊回營詎林木
間鼓聲忽起巢縣悍賊蠡擁而來徑鈔信中溥右兩營頃刻合
圍彭星占與諸弁勇左右馳突裹入垓心胡得勝陳東祥謝濟
偁呂鴻榜李春生等力戰死之彭星占憤怒填臆負傷決戰手
刃數賊並歿於陣毛有銘飛飭湘中湘右溥左等營合軍併擊
賊漸解退比見劉義勝匹馬衝入中槍而殞該逆仍復回戈轉

鬪且卻且前各軍以抬礮猛擊殲斃前鋒數百人乘賊隊散亂
爭相駭奔之際遂奪獲彭星占尸骸而還此二十日毛有銘一
軍在芙蓉嶺擊賊小挫之情形也其銅城關一路賊於要衝築
四卡以阻我陸師又築一水卡以阻我舟師蕭慶衍先於十四
日移軍黃墩張家渡旋派營勇平渡口土埂俾利戰船駛擊十
九日臣玉麟飭令喻俊明成發翔王吉唐敏義等攻破水旱諸
卡隨結小划爲橋渡過陸師全隊二十一日蕭慶衍令趙太和
率爲左營郭鵬程率毅右營攻陶家觜第一壘洪致祥率亨中
營胡發達率強右營攻陶家觜第二壘復令朱吉玉率爲右營
蕭恆書率爲前營攻大甲村賊壘仍自率貞中營及劉長槐之

元左營爲各路策應天甫向曙諸道並進賊正欲出壘迎拒我軍已環偪濠邊火器飛擲燃及哨棚眾勇於烈燄中躍過濠溝摩肩而上一壘旣破各壘盡亂駢戮盈千并斬僞安燕福文姓諸酋水師亦分隊連毀沿隄數卡乘勢進取岷山岡逆壘賊皆惶遽失措踰牆欲遁蕭慶衍麾軍直進立焚二壘擒斬尤多遂繞出銅城閘後奮攻石壘尋以賊援麇集相持未下二十二日蕭慶衍派趙太和朱吉玉蕭恒書劉長槐四營於近接該閘之黃龍口地方相度營基分隊移紮又派洪致祥胡發達郭鵬程三營親帶貞中一營整軍以爲之備不移時而閘中羣賊糾合陶家廠關門鎖銅城廟洋獅觜新塘街五顯集百旺市東關各

股分三路來犯蕭慶衍率各營縱兵鈔擊少挫兇鋒中路之賊敗過閘口左右兩路之賊退聚閘後眾軍乘之賊又從閘後出兩大股一走閘西堤埂一走岷山岡之東蕭慶衍令蕭恆書朱吉玉堵住東路潛遣洪致祥郭鵬程趙太和等分伏黃龍口村內而以劉長槐胡發達等隊赴閘口誘賊賊果輕我兵寡蜂擁齊出劉長槐胡發達斂軍佯退俟賊撲過村口伏兵突發亂刃交刺該逆無心接仗衝出重圍維時岡東一股聞風竄遁聞西一股亦經水師擊走我軍日暮收隊略有損折此二十一二等曰蕭慶衍一軍進攻銅城閘毀壘獲勝之情形也臣等查賊在巢縣廣聚悍黨距守數隘意在紛竄皖北郡縣冀解金陵之圍

此次克復運漕進規銅城聞苦戰兩日尙屬得手惟蕭慶衍毛有銘兩軍不滿八千人兵單賊眾未能遽期掃蕩現飭諸軍堅守各城隘俟春水稍漲再行水陸會剿恢復要區所有在事出力人員擬請酌保數員附入潁西剿捻案內彙求

恩施外總兵彭星占數年征剿嚴明勇敢艱險不辭臨陣捐軀深堪憫惻應請照總兵立功後陣亡例從優

賜卹都司銜藍翎守備胡得勝藍翎守備劉義勝陳東祥藍翎千總謝濟偁藍翎把總呂鴻榜藍翎外委李春生同時陣亡并請

勅部各照本職本銜從優議卹所有官軍攻克運漕分道進戰

各緣由謹會同大學士湖廣督臣官文由驛六百里馳奏伏乞

皇太后

皇上聖鑒訓示謹

奏

謝曾貞幹追贈按察使

恩捐

同治二年正月十二日

奏爲恭謝

天恩仰祈

聖鑒事竊

臣

接准兵部火票遞到同治元年十二月初六日奉

上諭前因知府曾貞幹擊退援賊後降旨詢問該知府紮營何處茲據曾國藩覆奏該知府自五月馳赴江甯大營秋閒邁病適值援賊大至力疾督戰解圍後積勞身故等語曾貞幹自赴江南軍營屢著戰功朝廷早欲擢用因曾國藩再三懇辭擬俟江甯克復後從優獎勵茲以力疾督戰積勞病故悼惜殊深雖未經曾國藩奏請給卹而曾貞幹係效力疆場戰功卓著之員

著卽追贈按察使卽照按察使軍營立功後病故例議卹以示優異欽此跪誦之下感激涕零適值曾貞幹靈輓經過安慶當卽宣告靈前望

闕叩頭謝

恩訖伏念

臣

弟貞幹秉質愚蒙持躬介特爲諸生時不甚肄習

舉業頗究心搏力技擊之法咸豐三年帶勇六百人隨

臣勦賊

旋以

臣

父年老回籍侍親八年十月因胞兄國華殉難三河蒙

文宗皇帝屢降諭旨褒卹有加痛哭發憤誓出殺賊以雪兄仇

而報

國恩頻年以來會克太湖潛山安慶蕪湖獨克繁昌南陵疊蒙

天恩獎敘聞望漸隆而臣弟貞幹孤懷鬱抑耿耿若不自得常
忠別樹一幟建立奇功以分

聖主宵旰之憂一洗軍營因循之習上年秋閒邁病羣勸出營
調養適以援賊大至力疾督戰精神遽振日夜不倦臣方幸其
病後耐勞志定勝氣人定勝天或者別立尺寸之功一償平生
之願不料其中道損折齋志長終精炯炯而不冥神依依而戀
闕微臣位高德薄殃及手足慟惜之餘彌增悚歎而
聖主優詔褒卹若深鑒臣弟未白之衷而曲體微臣難言之隱
此尤臣所闔門感戢存沒霑戴者也茲已素旄西旋歸從先隴
結草之報縱難索諸幽冥敵愾之情端有資於同氣臣當督率

臣弟國荃益勵丹誠誓除氛祲戰兢以任艱鉅忠信以涉波濤
庶慰季弟未竟之志而答

聖主非常之恩所有感激下忱謹率同江蘇布政使臣曾國荃
恭摺叩謝

天恩伏乞

皇太后

皇上聖鑒謹

奏

近日軍情片

同治二年正月十二日

再近日軍情金陵大營及金柱關蕪湖各防堅守如常均臻穩固青陽賊眾聞朱品隆一軍於二十二日趕到池州卽於二十三日陸續遁歸石埭十二月二十五日官軍收復青陽縣城駐兵守之正月初一日賊糾大股六七萬眾窺犯涇縣繞城築壘分踞黃村大坑一帶初四日涇城守將易開俊吳廷華等擊退撲城之賊鮑超於初五日自甯國疾馳九十里引軍來援遂於初六日會攻附城賊壘二十餘座悉破之乘勝進兵黃村又毀十數壘斬馘盈萬立解涇縣之圍初七日馳歸高祖山老營而羣賊已麇集寒亭清弋江等處勢將圍撲營盤計日內必有數

次大戰北岸之賊分踞和含巢縣東關銅城閘等城隘據守益
堅據搜獲僞文稱僞忠王現赴蘇州因常熟賊目周興隆駱國
忠等投誠忠逆調集羣賊圍攻常熟不久卽率二十萬眾再犯
江北下擾揚州上窺皖楚等語雖未必果有其事而疊次僞文
該逆銳意竄擾大江以北殊可深慮除涇縣戰狀再行詳奏外
合先附陳大概伏乞

皇太后

皇上聖鑒謹

奏

委署皖南道缺片

同治二年正月十二日

再皖南地方賊蹤紛擾徧地瘡痍所有巡道一缺撫字籌防均關緊要前署皖南道姚體備在任年餘頗著勤勞輿情愛戴上年八月閒積勞病故維時實缺道員程鈺尙在潁州畱辦善後事宜未能飭赴本任查有安徽候補道葉兆蘭勤幹廉明最耐勞苦由潛山縣知縣帶勇出力洊保今職以之委署皖南道缺洵堪勝任臣與李續宜商定卽經劄委任事逮署撫臣唐訓方莅皖正需熟悉北路情形之人帶赴臨淮輾轉籌商遲久始克定議該員葉兆蘭卽於十月前赴皖南署任視事理合會同署安徽撫臣唐訓方附片陳明至皖南道與皖南鎮總兵關防二

顯臣於咸豐十一年五月奏請

勅部鑄印頒發欽奉

諭旨允准迄今未准賫到理合一併催請

勅部迅賜頒發以昭信守伏乞

聖鑒訓示謹

奏

鮑超軍大獲勝仗涇縣解圍摺

同治二年正月二十七日

奏爲鮑超一軍破賊於馬頭鎮楊柳鋪等處進援涇縣立解城圍恭摺詳報仰祈

聖鑒事竊浙江提督鮑超上年十一月二十七日在楊柳鋪擊賊獲勝及本年正月初六日涇縣之捷臣兩次附陳大概在案先是西河踞賊分擾小淮審地方與黃麻渡只一河之隔鮑超以該處守兵單薄水陸糧路可虞乃督馬步數營並何紹彩新訓二營於上年十一月二十四日馳赴黃麻渡會合王可陞防軍誘賊過河一擊敗之旋報花旗廣匪六萬餘眾由甯國縣進竄歇建廟直至高橋楊柳鋪吳村馬頭鎮一帶布滿賊館自甯

郡南至涇縣北至鮑超營盤被賊阻隔卽自高祖山老營以至清弋江南陵亦幾爲賊氛所梗鮑超以老營空虛懼有挫失遂自黃麻渡捲旗息鼓振旅還援遙見四面傳烽煙燄紛起訶知僞跟王藍逆一股已對高祖山下寨僞佑王李逆一股已對清弋江下寨另有賊騎數百由寒亭高祖山摩壘而過繞出抱龍岡襲襲我營之後鮑超旣次清弋江先派宋國永守定高祖山二十七日昧爽部勒各營徑從抱龍岡進令周有勝正中營王有慶正左營萬守根正右營孫得友華左營攻中路唐仁廉仁字營劉天勝副後營吳雲集春中營羅國才霆後營攻左路譚勝達新右營李文益新後營洪容海啟化營鄧雲貴霆前營攻

右路賊恃眾悍列陣來拒旌旗一展鼓音若雷我軍以排槍輪
擊多有應聲而殪者賊乃愈聚愈眾密布長圍傷我營哨數人
羅國才衝賊過猛並陷於陣鮑超旋令梁美材王清泉萬鳳書
劉順隆何紹彩唐友勝黃海清等營自山岡後分兩枝鈔入截
賊數段賊隊大亂奪路竄奔諸將士合力薄之遂將歛建廟至
楊柳鋪十數村落中賊卡賊壘一律平毀追襲近六十里殲賊
近八千人擒獲無算此十一月二十七日進攻馬頭鎮楊柳鋪
等處大勝之情形也自有此捷凡附近我營之高嶺梅嶺麒麟
山各賊股伏匿不出者經月十二月二十五日鮑超抽隊出剿
行次中途以積潦未乾泥淖盈尺不利軍行而止正月初一日

偽匡王奉王襄王諸酋糾合花旗股匪竄入大坑黃村進逼涇
縣城南包過城東擁眾六七萬人連營二十餘座各村煙火相
接彌望皆賊初四日該逆架梯蒙絮悉銳撲城城中守將易開
俊吳廷華等率勇登陴以木石下擊賊始斂退維時鮑超在高
祖山聞警恐涇城不支將貽甯郡後路之患計莫如速往擊之
乃簡行隊疾馳九十里初五日抵涇入城少息初六日五更時
裹飯傳餐拔關齊出先遣王衍慶鄧雲貴張遇春唐仁廉李文
益唐得勝六營蹴過山麓分匿叢箐深樹間而以易開俊吳廷
華所部遙爲之應復令婁雲慶羅文宓周德馨何文喜四營依
山而上譚勝達蕭凌雲洪容海陳開用四營循河而上鮑超督

飭梁美材王清泉萬鳳書三營暨黃海清孫得友騎隊直前挑戰羣賊爭相出巢從山梁撲下婁雲慶羅文宓等正當其衝梁美材王清泉黃海清等步馬競進戰逾兩時將弁多有損折羅天順躍入重圍被賊矛抉出右目顛暈馬下王清泉急率步卒挾之而走亦爲飛子所傷約軍佯退引賊將近山麓號鼓一聲伏兵頓發婁雲慶等回鞭轉鬪面而夾擊賊乃大敗正欲歸壘瞥見壘中火起已爲譚勝達等所破我軍乘勝併進盡埽羣壘立解涇縣之圍長驅三十餘里遂入黃村賊不虞官軍之驟至有棄壘欲遁者有閉壘死守者眾軍士擁至濠下搶拔地鍼肉薄而登又平十數壘追二十里至大坑斃賊盈萬初七日鮑超

自涇縣回軍適西河之賊撲近寒亭高祖山老營將圖乘虛一逞南望旗幟蔽空軍容甚盛乃相顧錯愕曰鮑超來矣亦卽一閔散走此正月初六日馳援涇縣力解重圍之情形也臣查甯國境內徧地逆氛鮑超以病餘之將新補之卒四出雕剿得此兩戰軍威可以復振危局可以漸安所有出力人員可否酌給獎敘以作士氣出自

聖恩至參將羅國才等六十七員弁均係前後力戰陣亡相應另繕清單請

旨勅部各照原銜從優議卹所有官軍在馬頭楊柳鋪大獲勝仗並解涇縣城圍緣由謹繕摺由驛六百里馳奏伏乞

皇太后

皇上聖鑒訓示謹

奏

涇縣守城陣亡員弁請卹片

同治二年正月二十七日

再駐守涇縣之總兵易開俊等於上年冬月杪擊賊先勝後挫及正月初閒守城情形臣已兩次略陳梗概旋據先後稟稱甯國縣另股於上年十一月二十一二等日由柿木鋪竄近涇縣東北進踞潘村晏公堂一帶距城僅十五里二十五日易開俊商同吳廷華各帶小隊至三界鋪登高瞭望但見旗幟隱約人數不下二萬餘眾卽於是夜遣死士潛往附近山岡齊舉號火徹夜擾賊天甫向曙吳廷華率所部兩營會合葉明瑞陳青雲兩旗進攻潘村以蕭章開馬隊應之易開俊親率三旗直趨晏公堂王華國賀國楨率兩旗分路包鈔鏖戰逾時奮斬前鋒數

百人賊陣漸亂且戰且走而潘村之賊亦經葉明瑞等擊退吳廷華追過壩頭葉明瑞陳青雲由晏公堂大路斜刺而來會軍夾擊賊負重創餘匪遁入黃村官莊一帶易開俊以賊遁未遠不速除之終貽後患二十七日仍與吳廷華督率各軍分道馳勦略一交鋒賊卽駭走遂復黃村官莊驅賊於十數里外不料山坳伏發遽斷歸路敗賊回戈助戰我軍困入垓心易開俊搏鬪方酣猝傷馬股馬蹶墮地賊以亂刃擬之蕭章開大呼馳救易開俊更騎突圍而出將隊伍連環收歸軍士已多傷折矣二十八日賊黨乘勢撲城見城上守禦謹嚴相率退去正月初三四等日賊以大股環城奮攻晝夜不息競於矢石中駕梯而升

易開俊吳廷華令守垛士卒立斬數人擊毀攻具蕭章開曹義
勝復潛出鈔賊賊始歸巢初六日鮑超引軍來援城中士氣益
奮易開俊與吳廷華蓐食整隊俟鮑超各營轉過山麓引賊入
伏突出盪擊俘斬甚眾既平附城諸壘旋入黃村痛加剋洗俘
執羣醜兼獲賊糧而還臣查涇軍七營久與悍賊相持十一月
二十七日之挫軍心震恐卒能保全危城遮護甯郡洵屬有裨
全局所有節次陣亡之參將倪昌明等五十一員弁均堪憫惻
相應繕具清單附於鮑超請卹單內懇

恩勅部一併從優議卹以慰忠魂合附陳請伏乞

聖鑒訓示謹

奏

奏利名一

近日軍情並陳親赴金陵察看片

同治二年正月二十七日

再近日軍情金陵甯國各營穩守如常太平石埭等股踰伏未動宣城縣屬之金寶圩於上年臘月二十日被偽侍王率眾攻破該圩練丁逃至蕪湖者數千臣爲編營安插聞侍逆在圩中大掠米糧仍圖窺伺蕪湖金柱關一帶該兩處防務暫難鬆勁北岸無爲州原駐樹字五營本係李鴻章新募之卒現因救援常熟進攻崑太兵力不敷飛調樹字等營回滬另撥韋志俊一軍駐防無爲州城蕭慶衍專顧銅城閘一路尙足堵禦毛有銘專顧巢縣一路實形單薄又在六安州酌抽元中瑞左兩營助之惟九洑洲江面續有賊船百餘號晝夜趕渡據搜獲偽文賊

欲先攻浦口江浦以通進兵之路臣恐前敵各防未能穩固亟須親往察看通籌攻守事宜此次拜摺後卽曰由水路駛赴金陵及無爲州蕪湖金柱關等處巡視一次往返約需月餘安慶存城兵勇尙有四千餘人責成司道各員權爲統率暫可無虞萬一巢縣踞匪蓄意西竄臣亦卽兼程旋省以資調度而顧根本所有軍務大概情形併微臣親赴前敵察看緣由理合附片陳明伏乞

皇太后

皇上聖鑒謹

奏

代奏李世忠請贖勝保罪摺同治二年正月二十七日

奏爲據情代

奏仰祈

聖鑒事竊臣接據江南提督李世忠函稱恭閱邸報得悉侍郎勝保被劾各款欽奉

諭旨拏問交部治罪查勝帥性好夸大每於細行不知檢點中外久有物議今旣據實揭陳

聖諭至爲嚴切

朝廷議罰豈能曲示姑容爲臣下者均當以此爲鑒何敢於情真罪當之中妄參末議但勝帥受

先皇帝知遇奉

命討賊時閱十年身經百戰籌辦皖豫兩省軍務雖無成功而其中羈縻駕馭當局者煞費苦心咸豐十年秋

京畿震動幾至全局撼搖

特命勝帥總統援軍力保

畿輔而外國撫議始成

皇上御極之初勝帥因政柄下移無以服眾請

皇太后親理大政一摺孤忠凜凜大義昭彰此雖

國家大臣職分所當爲之事而勝帥之受

恩圖報不避嫌怨亦於此可見矣前此世忠舉眾投誠蒙勝帥

拊循備至老母年近七旬幼子年甫十六均賴保全曾憶其奉
旨回京臨別諄切告誡勉以竭力報

國無或隕越貽羞世忠今日之渥荷

殊恩全家之悉蒙惠澤至於斯極者未嘗非勝帥之提撕激勸
獎掖以成之也今中外眾口一轍交章彈劾

大廷論法自屬罪無可辭第念其數載治軍於無可寬宥之中
似尙有一綫可原之處且凡能任大權者往往廣招物忌此尤
朝廷用人不可不察者也世忠係在勝帥任內投誠例應避嫌
可否代爲陳奏儻蒙

聖主法外施仁准從寬議請先將世忠暫行褫職責世忠立功

代贖不效則併治世忠之罪世忠自當竭盡心力以期仰報

國家斷不致迄無成效剴切上陳不勝悚迫待命之至等情請

奏前來

臣

查勝保係統兵大臣革職逮治豈容閩外下臣一言

瀆請惟該提督李世忠係勝保招撫之人此次籲陳私悃自願

立功代贖

臣

亦何敢壅於上

聞理合據情附驛代

奏伏乞

皇上聖鑒訓示謹

奏

查閱沿江各軍並近日軍情摺

同治二年二月十二日

奏爲

微臣

查閱沿江各軍現抵金陵大營恭報近日軍情仰祈

聖鑒事竊

臣親赴前敵各軍查閱營伍曾於正月二十七日附

片陳明在案次日自省起程乘舟下駛二十九初一兩日行過

池州大通聞蕪湖金柱關軍情喫緊初三日趕至蕪湖初四日

周厯城壘旋赴裕溪口晤侍郎

臣

彭玉麟由東西梁山駛赴金

柱關詢悉僞侍王連日撲犯該處二十四日在僻鎮獲勝一次

初一日在梅塘觜始戰小挫旋獲大勝初三日復獲勝一次初

五日

臣

行抵烏江水

營與提

臣

楊岳斌同至金陵之大勝關初

六入雨花台營盤初七八等日逐段查閱均尙穩固屢據探報

忠逆之黨僞愛王黃崇發僞顧王吳如孝等股續渡九洑洲二十七以後屢撲李世忠部將陳自明營盤至初二夜失陷初三早浦口繼陷該逆遂分撲江浦橋林城壘勢甚猖獗聞將先竄西梁裕溪再犯無爲廬州等語又據甯郡各軍稟報初一日廟埠等處之賊分小股逼近郡城劉松山出城迎勦擒斬多名而大股由敬亭山趨併楊柳鋪圍撲鮑超高祖山老營鮑超督率諸將分路出擊大獲全勝旋即收復西河其小淮壘馬家園等處賊壘亦經王可陞於初二日率師掃蕩由是鮑超乘勝進攻又將紅楊樹高嶺梅嶺竹塘仰賢圩麒麟山各壘全行平毀其灣沚一股經水師於初五日擊退綜計甯郡西南北三面百餘

里之賊一律掃除惟水陽鎮金寶圩尙未克復自去秋以來奇險疊生仰託

聖主鴻福竟得轉危爲安實屬至幸臣以南岸局勢較鬆調駐防三山之劉連捷三營北渡無爲州與毛有銘協守石澗埠調駐防寒亭之梁美材三營北渡廬州與石清吉協守郡城曾國荃亦撥熊登武等營添紮東西梁山以保要隘惟巢含以上地勢寬曠賊數眾多目前兵力單薄未敢浪戰必俟李續宜銷假回任江忠義由湘東來乃能會剿皖北由巢含迤邐而下直至浦口九洑洲除北岸之逆氛復去夏之初議至石埭太平之賊於初一日竄至黟縣旋即退出嶺外於潛昌化之賊初三日竄

近徽郡唐義訓迎擊獲勝此兩股意圖內犯江西不知能堵截
回竄否臣將金陵戰守事宜商定卽赴九洲相度地勢迴舟
西上仍往蕪湖裕溪無爲州一帶詳加察看如果巢賊上竄自
當兼程回省以固根本要地聞李世忠親赴五河所有浦口九
洲失陷情形尙未接其咨報卽甯國徽州金柱關三處大捷
亦未接其詳報除各路戰狀及應獎應卹人員續行具奏外謹
將微臣行程及南北兩岸近日軍情先陳梗概伏乞

皇太后

皇上聖鑒訓示謹

奏

由金陵回皖沿途查閱並近日軍情摺

同治二年二月二十七日

奏爲

微臣

由金陵回皖沿途查閱恭報近日軍情仰祈

聖鑒事竊

臣

行抵金陵曾將兩岸軍情於本月十二日具陳梗

概在案十五日由大勝關赴九洑洲該處江路狹隘與南岸草鞋夾列壘對峙是日風霾蔽塞瞭望不甚明晰卽於次日回舟西上十八日入金柱關小河查閱龍山橋三汊河查家灣等處十九至二十二等日由東西梁山入裕溪口小河查閱雍家鎮運漕石澗埠無爲州等處二十三日由神塘河出江現在舟抵大通不日卽可旋省北岸之賊十六日續陷江浦縣城新河口營壘迤邐西竄徘徊於巢含全椒之間未遽深入其僞忠王蹤

迹據李鴻章函稱該酋因浙東肅清調集羣賊併守杭省而自
畱蘇州未出據蕭慶衍稟稱該逆實已北渡於十三日入巢縣
城據各路生擒賊供僞天王令忠酋力攻西梁無爲州圖取廬
州和州之米令侍酋力攻蕪湖金柱關圖取甯國太平之米欲
還昔歲之舊觀以保金陵之巢穴各等語逆謀詭祕其確情不
得知也臣所調劉連捷三營已到石澗埠與毛有銘共紮十一
營地勢寬曠尙嫌兵單此外如西梁運漕無爲廬州等處亦僅
力能自固非俟李續宜江忠義到皖難以輕進南岸自甯國屢
捷後惟金柱關侍逆一股爭戰不休初一十六等日兩次猛撲
查家灣該逆雖大受懲創我軍亦疊有傷亡正擬令鮑超攻取

金寶圩進勦東壩以固皖南之藩籬而鈔侍逆之後路乃徽州
青陽兩處連日警報頻至石埭之賊黃文金古隆賢等併犯青
陽太平之賊分竄徽州各嶺又有花旗譚星兩股由浙江敗回
麇集徽境唐義訓初三日擊退歙南一路其東北兩路愈來愈
眾繞過郡城之西十五日唐義訓帶隊出勦從富竭橫至岩寺
街頗有擒斬而別股從黃山南來十五日猛撲休甯縣城唐義
訓以休城僅畱三營不敷守禦添派王華雲一營十六日入城
協守至祁黟一帶王文瑞於初十日擊退竄擾石坑南湖之賊
其大洪禾成等嶺時有逆蹤窺伺防不勝防臣本擬令朱品隆
回援徽州因青陽喫緊該軍不能抽動不得已令鮑超暫緩東

壩之行而先從南陵馳救青陽以解目前之急左宗棠肅清浙
東卽慮敗逆回竄皖南亦派劉典一軍援應徽州羣逆皆窮餓
之餘無巢可歸蓄意闌入善地就食江西若徽州青陽等城倖
得保全該逆或由祁西以竄饒景或由歙南以竄婺源均爲江
西北邊之患臣時時兢惕並函告沈葆楨預爲防範合力維持
所有微臣回皖行程及近日各路軍情謹繕摺具陳大概其詳
細戰狀仍俟分案續奏伏乞

皇太后

皇上聖鑒訓示謹

奏

沿途察看軍情賊勢片

同治二年二月二十七日

再密陳者臣巡閱諸軍詳觀賊勢攬南北之形勝察天人之徵
應竊以爲有可懼者數端而可喜者亦有數端自池州以下兩
岸難民皆避居江心洲渚之上編葦葺茅棚高三尺壯者被擄
老幼相攜草根掘盡則食其所親之肉風雨悲啼死亡枕藉臣
舟過西梁山等處難民數萬環跪求食臣亦無以應之二月十
五日大勝關江濱失火茅棚數千頃刻灰燼哭聲震野苦求賑
卹他處蘆棚叢雜亦往往一炬萬命徽池甯國等屬黃茅白骨
或竟曰不逢一人又聞蘇浙之田多未耕種羣賊無所得食故
壹意圖竄江西并窺伺皖浙已復之區平民無所得食弱者轉

徙溝壑黠者則從賊以偷生旦夕黨羽無定數酋長無定謀便
恐變爲流賊更難收拾而諸僞王中如李世賢失金華楊輔清
失甯國黃文金失蕪湖古隆賢失青陽劉官方失池州巢穴雖
破醜類尙多其意怏怏不甚服僞天王忠王之調度其行徑亦
與流賊相近李世忠之心迹中外皆不敢深信頃因捆鹽構衅
親赴五河雖浦口江浦失守尙未聞其回營主持與都興阿楊
岳斌蕭慶衍均有違言親匪類而遠正人逞小忿而忘大局茲
值敗軍失地之際又奉革職畱任之

旨竊恐其轉羞成怒倒行逆施則裹下河先受其災而此次北
渡之賊亦有直犯裹下河之謀鹽場尙有疏失全局愈難支持

凡此皆可懼之端也粵匪初興粗有條理頗能禁止奸淫以安
裹脅之眾聽民耕種以安佔據之縣民間耕獲與賊各分其半
故取江南數郡之糧運出金柱關取江北數郡之糧運出裕溪
口并輸金陵和春等雖合圍城外而賊匪仍擅長江之利掘不
竭之源傍江人民亦且安之若素今則民間賊至痛憾椎心男
婦逃避煙火斷絕耕耨者無顆粒之收相率廢業賊行無民之境
猶魚行無水之地賊居不耕之鄉猶鳥居無木之山實處必窮
之道豈有能久之理而東南要隘如安慶蕪湖廬州甯國東西
梁山金柱關裕溪口暨浙之金華紹興此皆山川筋脈必爭之
地但求此數處不再失守終足以制該逆之死命昔年粵賊所

至築壘如城掘濠如川堅深無匹近亦曰就草率而官軍修壘
濬濠今實遠勝於昔城中羣酋受封至九十餘王之多各爭雄
長苦樂不均敗不相救而官軍仰承

聖謨三江兩湖水陸各營頗能和衷共濟呼應靈通至百姓仰
戴

皇仁淪肌浹髓雖臣等撫綏無術治軍無效斯民久陷水火之
中曾不一聞怨咨之語翹首而望平寇擊壤而謳吾

君意者民心所在天祐孔長凡此皆可喜之端也臣從軍數年
從未敢以賊勢稍衰入奏惟念西北軍興

皇太后

皇上焦勞彌甚故將南中可喜之機陳述一二仰慰

宸廑至可懼之端臣殫竭愚慮勉思補救裏下河若有疏失當

在此兩月之中難亟謀挽回之術若竊號巨股變爲流賊昔

文宗皇帝嘗慮及之但求金陵蘇杭三處有一二克復卽當大

赦羣酋廣爲招撫以庶幾赤眉百萬同日納降之盛軌此中自

有天意不盡關乎人謀至李世忠雖梟桀猜忌而其部卒頗懷

攜貳又不善戰縱或激之生變亦尙不足深慮臣始奉將李世

忠革職畱任之

諭本擬暫不宣示繼思該提督驕恣已久尾大不掉急亦有變

緩亦有變終不能相安無事卽曰當宣示

諭旨待李續宜江忠義軍到由巢含一路東下進攻江浦等處
屆時或將李世忠失守各城嚴參懲究再行相機辦理理合一
併密陳伏乞

皇太后

皇上聖鑒訓示謹

奏

祁門知縣唐治建祠片

同治二年二月二十七日

再前任祁門縣知縣唐治於咸豐四年正月閒賊竄縣境時與大洪司巡檢鍾普塘同時死節當經奉

旨賜卹在案嗣據該縣紳士饒際可陳得荃等以唐治莅任數載凡養士正俗聽訟諸大政遺愛在民逮賊陷祁城猶復勒騎巷戰被執痛詈卒至刳腹屠腸受禍最慘謹摭政績死事狀略籲請奏建專祠等情前來臣國藩前駐祁門聞該故員唐治生前卓有政聲殉節先一日以書遺其家屬誓守孤城早辦一死是其神識堅定晚近所難至今比戶謳思臣覽其遺書尤增感嘆允宜列之祀典應懇

天恩准將已故知縣唐治在祁門縣地方建立專祠其鍾普塘一員並予祔祀以妥毅魄而順輿情是否有當伏乞聖鑒訓示謹附片具奏請

旨

鮑超軍克甯國近城要隘摺

同治二年三月十二日

奏爲提督鮑超攻破賊巢悉復西河小淮審紅楊樹麒麟山諸要隘恭摺馳報仰祈

聖鑒事竊照鮑超一軍會合何紹彩王可陞所部分勦高嶺西河直至麒麟山將賊壘全行平毀臣於二月十二日具陳梗概在案先是僞輔王楊輔清糾約僞隨王跟王堵王孝王佑王等酋嘯聚西河灣汴紅楊樹黃麻渡麒麟山一帶不下十餘萬人以一大枝鈔出高祖山之前潛匿邨落中距我營七八里十數里不等以一小枝繞過高祖山之背橫出楊柳鋪揚言上犯涇縣火光燭天晝夜不滅鮑超見山前賊旗隱約山後煙燄突起

計在誘我赴涇圖襲老營乃令宋國永布置高祖山營寨堅壁
穩守而在板橋寒亭清弋江等營抽隊數成親自督率設伏於
太子廟山坳以伺其變二月初一日昧爽楊柳鋪火光漸息訶
知甯郡守將劉松山督同劉光明賀國楨李芳菲等出城離剿
殲擒數百人李芳菲率前哨躡賊中礮死之楊柳鋪一股旋向
烏沙鋪遁去鮑超料該逆不得逞於郡城必將挾全力以撲我
營自登太子廟山岡瞭望果見烏沙鋪之賊進逼獅子山去營
不遠各邨落之賊分三四萬眾旌旗蔽空迤邐而來將高祖山
八營層層圍裹有擁至濠下爭拔花籬者鮑超急帶太子廟伏
軍向山僻小徑捲旗疾趨行至離營二里許聞營中礮聲轟發

知老營業已出隊接戰卽派譚勝達顏紹榮甘星平徐連陞等直取中路萬守根洪容海羅文宓張遇春等由營後左路進以婁雲慶黃海清唐得勝數隊爲之應王衍慶何紹彩曹志忠等由營後右路進以唐仁廉鄧榮貴孫得友數隊爲之應仍令梁美材王清泉萬鳳書等潛伏茯苓山之旁以斷賊後部勒旣定但聞鼓角一聲譚勝達萬守根王衍慶各軍突分三路包賊霎時合圍宋國永乘勢從各營夾縫中擊出截賊數段鄧訓誥周有勝等張兩翼鈔殺賊隊譁亂不復成伍正思奪路竄走適婁雲慶黃海清唐仁廉等馬步齊至我軍縱橫盪決賊之前鋒鮮有脫者而賊之後隊尙欲抵死來援鮑超揮令諸將士奮力衝

擊迫近茯苓山梁美材大呼突出早斷歸路羣賊駭懼罔知所措紛紛竄入田壠眾軍合力蹙之追襲四十餘里遂平高嶺周家橋諸壘直抵西河賊乃倚水爲險對河列陣意圖抗拒俄而盧榮忠帶霆營礮划由清弋江駛下我軍結筏爭渡水陸夾勦俘戮無算立毀堅巢敗賊始往桃花園灣汊一路而遁此二月初一日擊賊大勝攻克西河之情形也西河以北曰馬家園爲眾賊屯糧之所迤西則曰黃麻渡曰小淮窰爲王可陞進兵之地西河旣復王可陞知羣賊膽寒卽於初一夜派蔣占鼃楊忠楊明貴等會約駐守義橋之楊正彪各率行隊進取小淮窰親督陽華坤謝占春馬承恩數營取道黃麻渡潛襲馬家園逆壘

時已夜分更鼓將絕王可陞令軍士傍壘縱火悉焚賊糧賊不知官軍之猝至在睡夢中披衣急起棄壘狂奔小淮窑之賊正欲聞警赴援蔣占鼇等已斫斷浮橋破卡而入乘勝逐之蹙偪入水者無數沿途卡壘盡毀靡遺維時賊之由西河遁入灣沚者經盧榮忠礮划隨同外江水師日夜轟擊賊不能堪乃於初二初三等日縮入灣沚之後山退聚竹塘旋分大股歸併梅嶺麒麟山意在伺閒再逞鮑超謂賊燄雖衰不速除之終貽後患初四日引軍渡河進次紅楊樹偪壘而陣壘賊匿不出戰我軍相持數時羣以火器環擲延燃哨棚軍士冒煙突火踰濠直進一壘旣陷眾壘盡亂各將弁揮隊盪擊殲獲頗眾直追過桃花

園竹塘灣汴後山賊皆聞風先遁遂焚其巢是夜鮑超遺書劉松山令於初五日白郡城率師來會將有事於梅嶺及麒麟山天甫向曙秣馬蓐食傳令宋國永熊鐵生梁美材等十五營專攻麒麟山婁雲慶唐仁廉黃海清等馬步八營專攻梅嶺而以劉松山所帶各旗營爲斷後行未十數里賊竟糾衆來迎宋國永同各營哨就山麓布列陣勢直前搏戰潛遣銳卒自山後舉旗先登襲破賊壘周麾而呼賊咸驚疑卻顧宋國永等縱兵掩擊積尸若阜麒麟山堅壘悉平是日劉松山亦破廟埠之壘殲賊千餘婁雲慶鄧榮貴等擊破梅嶺之壘並收復仰賢圩各處餘匪分道竄逸一由新河莊敗往東壩一由油榨溝敗往廣德

建平此初二至初五等日疊克馬家園小淮審及紅楊樹梅嶺
麒麟山等隘之情形也臣查西河小淮審爲水路衝要自被賊
踞數月糧運梗阻大爲甯國各營之患仰賴

聖主威福將士同心五日之間悉復諸隘距郡城數十里內一
律肅清在事人員厥功甚偉可否彙入楊柳鋪涇縣各案酌給
獎敘之處出自

鴻施逾格至力戰陣亡之參將李芳菲等二十六員并另繕清
單請

旨勅部從優議卹以慰忠魂所有鮑超各軍連克甯國近城要
隘緣由謹繕摺由驛五百里具奏伏乞

皇上聖鑒訓示謹奏

奏稿卷八

近日軍情片

同治二年三月十二日

再近日軍情金陵駐守如常甯國自二月初屢捷後鮑超派何紹彩一軍守西河王可陞一軍守灣沚洪容海一軍守清弋江其劉松山仍守甯國府城易開俊仍守涇縣朱品隆仍守青陽縣又換調吳廷華守南陵縣逐節布置糧運通暢甯郡應無他虞蕪湖金柱關兩防自前月十六日大戰獲勝該逆至今不敢再逞臣於二十七日過大通聞黃文金等大股由青陽上竄臣卽兼程西旋次日抵省調喻吉三護軍二營赴池州李榕鈞字五營赴東流以截賊竄江西之路乃兵甫渡江賊已由建德闌入彭澤鄱陽境內而譚星及古賴等股又蔓延於徽州各屬兩

路皆有深入江西之計幸浙江臬司劉典與唐義訓王沐等在
休歙兩縣屢獲勝仗徽州一路必可擊退其由建德一路竄入
者實恐貽江西腹地之憂臣正檄令鮑超由青陽赴援景德鎮
冀保江西完善之區旋據北岸各營告警偽忠王大股上竄分
枝牽制廬江無爲州之兵而以全力猛撲石澗埠毛有銘劉連
捷營盤自初三至初七日晝夜圍攻糧路斷絕文報不通臣不
得已又飛檄鮑超改旆渡江以解石澗埠之圍曾國荃亦自金
陵分撥五營救援該處不知均趕得及否又有捻匪一股從河
南竄入湖北之麻城經鄂軍堵剿卽自三里埂竄至蘄水境內
其勢亦將歸併皖境髮捻聯成一片安慶廬州各屬處處喫緊

竄入江西之賊別無大支勁旅可以派往援剿幸撫臣沈葆楨
久調水陸萬餘人分守景鎮樂平兩處或者足資扼堵江之南
岸徽州與江西同警江之北岸下游與上游同警臣調度無方
憂灼實深除石澗埠等處戰守情形續行具奏外理合附片先
陳梗概伏乞

皇太后

皇上聖鑒謹

奏

奏和卷十八

三

李世忠軍營失陷摺

同治二年三月十二日

奏爲賊渡九洑洲攻破李世忠各營進陷浦口江浦兩城橋林一隘恭摺馳報仰祈

聖鑒事竊提督李世忠一軍所駐九洑洲浦口江浦各城隘壘被賊眾攻陷分撲橋林營壘臣於二月十二二十七等日兩次具陳大概在案旋准該提督先後咨稱九洑洲浦口各營自被賊圍前敵糧路梗塞軍火又無接濟與江浦不能互通消息危急萬分二月初三四兩日又增賊黨二萬餘人用牛皮爲幃雜以洋礮隊并令洋人燃放開花炸礮四面環攻我營受傷雖多深知沿江要地不忍輕棄於賊尙各誓以死守無如賊勢過眾

猛撲不休該將弁等曰不交睫手不釋刃竭力堵禦兩晝夜至初四晚勢難再支遂將浦口以西及城南營寨一併撤回江浦城內查浦口一城本毀於賊我軍在西南兩門外分營駐紮此次被圍挫退實因半月來內無糧藥外無援軍以致不能固守至江浦存城將士自初五日而後亦經力守旬餘屢與賊戰傷折不少乃賊眾繞城密圍水泄不通城中食盡糧運又絕日僅一粥尙不能飽餐子藥既罄徒以甌石擊賊而賊攻益急行將就斃該鎮將因於十六夜率領弁勇冒死殺出江浦縣城維時橋林防營已被困二十餘日江浦陷後羣賊悉趨橋林該營守將邱昌良激厲士卒奮勇爭先以守爲戰十八日賊竟愈聚愈

多不下六七萬眾洋礮洋槍子如雨下我軍抵死堅守疊有傷亡賊又以西瓜巨礮轟塌礮台緣梯直上并有踰濠越牆而進者各勇短刃相接眾寡不敵邱昌良身受重創經左右背負出圍退至大勝關查點部卒二千人亦已十傷八九所有各該處失事人員委係力盡援絕可否均邀寬免惟世忠忝襄軍務不能先事籌防無可辭咎應乞奏參請

旨革職撤去勇號不准畱營另行派員接統豫勝營一軍或在本營各將中擇能任使查有遇缺題奏提督記名總兵甘肅安西協副將朱元興堪以勝任卽請奏派該員接統以重軍事而免貽誤世忠罷職後決不任意妄爲致負

國恩等情請奏前來

臣

前在金陵行次據探報賊渡九洑洲屢

撲李世忠部將陳自明營盤至二月初二夜失陷初三早浦口

繼陷卽經據實陳奏茲據來咨稱浦口各營於初四夜撤退日

期稍有不符自係探報未確伏查浦口江浦二城爲濱江絕大

關鍵一經失此重險上可由和含巢各屬進逼廬州下可犯儀

揚各防進窺裏下河表延數百里游衍自如未易勦辦該提督

李世忠悚惶引咎深明大義應如該提督所陳請

旨將李世忠卽行革職撤去勇號不准畱營并懇

聖恩允其所舉卽派遇缺題奏提督甘肅安西協副將朱元興

接統該軍以重防務

臣

自上年十月卽有調度該軍之責未能

先事籌畫又不能設法救援咎亦難辭請

旨將臣交部嚴加議處除陣亡各將弁俟咨到續行

奏卹外所有賊陷九洑洲浦口江浦橋林各城營緣由謹繕摺
由驛馳奏伏乞

皇上聖鑒訓示謹

奏

蕪湖金柱關水陸防軍屢勝摺

同治二年三月二十七日

奏爲水陸各軍在蕪湖金柱關一帶累月苦戰獲勝續報詳細情形仰祈

聖鑒事竊蕪湖金柱關水陸各營自去秋以來戰爭不休金陵解圍以前業經縷晰具奏十一月以後節次戰勝並奪回灣沚一隘臣國藩已將大概軍情先後具奏並聲明續行詳奏在案上年十一月閒僞侍王李世賢自金陵敗遁後糾悍賊數萬人礮船槍划數百號突出東壩將犯金柱關分竄蕪湖曾國荃以該兩隘水涸兵單恐爲賊乘派武明良一營馳紮東梁山朱洪章兩營馳紮龍山橋以爲聲援初八日金柱關守將羅逢元朱

南桂截賊於花津三十五等日復敗賊於上駟渡萬頃湖及
梅塘觜之西岸疊有斬擒十七日朱南桂與臣岳斌商制敵之
策俄報賊之由陸路來者右至魚壩左至太平府由水路來者
已至三汊河環偪我營是日南風大作水師不能助戰朱南桂
羅逢元憑營燃礮一發而殪數酋賊爲少卻我軍出濠縱擊復
以火箭焚賊四船賊始紛紛奔北十九夜羅進賢李助發率水
師潛往襲之奪獲二十餘船擒僞清天安陳緒賓而還二十二
日賊由窩頭率黨護舟復犯三汊河營寨勢更洶湧並有用飛
划登岸者朱南桂羅逢元引軍齊出朱洪章武明良亦率隊來
助併力搏戰追及河千萬化林唐學發等水營乘勢奪船數十

號賊之墮水而斃者以千計二十六日水陸各營會議賊屢來
西岸攻我未得一逞不若我軍東渡擊之是夜五更朱南桂朱
洪章羅逢元整旅渡河分道疾進朱南桂令謝大洲率哨勇先
赴上駟渡以截青山後路而白領所部進次卿家橋有一賊卡
梗道矢石如雨並有礮划密布橋下我軍猝不得前忽聞水際
礮聲自遠而近萬化林彭楚漢羅進賢等已拆賊浮橋自下游
飛槳而來衝開賊划面面環擊一時逢飛檣折尸塞河流朱南
桂見水路得手知卡賊亦將奪氣卽飭潘泗知宋楚懷等躍入
卡內縱橫擊刺駢戮無遺羅逢元一枝沿河勦殺正攻涂家渡
二堅壘未下適朱洪章從青山鈔來哨弁嚴洪賓等鼓勇先登

立破二壘武明良亦帶隊趕至環壘奮擊壘中之賊無一得脫其西岸一卡一壘亦經水軍登陸攻破是日斃賊最多奪獲戰船一百一十號洋礮二百餘尊此十一月初八至二十七等日金柱關水陸疊獲勝仗之情形也自有此捷賊之踰伏不出者幾兩月意謂金柱關防務可以少休不料賊之窺伺愈深蓄計愈狡金柱關之上十里爲三汊河又上十里爲龍山橋又上爲梅塘觜又上爲查家灣新圩角又上爲三里埂清水河則蕪湖水師分防之汛地也賊不得志於下游乃繞竄梅塘觜以上本年正月二十四日在新圩角掠船搶渡朱洪章輕騎馳往誘賊深入一擊敗之朱南桂等謀之水營謂賊方在上游西竄我宜

從下游東渡薛鎮老巢可以襲而取也二十七日羅逢元派兵
伏於花津之下而自從中路進朱寬義從右路進朱南桂從左
路進軍次薛鎮賊錯愕無備閉壘死守堅不出戰各哨隊繞壘
而攻水師以巨礮傍堤轟擊賊棄壘爭竄竄至花津者半爲伏
軍所殺我軍力薄不能分防河東老營仍紮於三汊河龍山橋
而分兵戍守查家灣新圩角以上更番換防二月初一日賊由
新圩角悉眾來撲朱洪章整軍以出搏鬪方酣不知另股由萬
頃湖渡過鈔我卡後朱洪章撤隊急退賊已層層包裹我軍敗
挫朱南桂帶隊馳援朱洪章亦奮力衝出重圍始解而弁勇已
多損折賊猶疾如風雨猛撲不休朱南桂派彭維祥向以田堵

河邊一路向世驥劉紹林等堵陶家灣一路仍自帶大旗親兵
並振字營兩哨衝入查家橋街中苦戰逾時羅逢元朱寬義分
數路截擊斷賊歸路自是轉敗爲勝賊乃奪路竄奔眾軍乘之
多有爭渡而溺者次日羅逢元朱南桂密約蕪湖防兵周萬倬
吳坤修等水師彭楚漢羅進賢等乘賊屢挫共籌再舉初三日
各軍水陸並進行至萬頃湖邊見浮橋一道上下環列賊壘十
五座賊卡賊棚延亙十餘里羅逢元朱南桂朱洪章督隊過橋
直薄賊壘周萬倬劉祥勝等繼之號鼓雷鳴火器飈發沿河斃
船繞擊相持兩時彭楚漢等毀橋登岸縱焚賊棚陸軍爭拔地
鍼蟻附而上悉破卡壘誅夷過半遂搜勦至上駟渡以歸十五

曰賊以小枝排列梅塘觜查家灣對岸而以大枝由新圩角過河專撲朱洪章營卡時李祥和來自金陵十六日率師助防新圩角甫至該處而長勝營守卡哨勇先經挫退賊如潮湧捲地而來李祥和與吉左振字營各哨悉力堵禦且戰且走退保老營羅逢元朱南桂聞警布置一面飛商彭楚漢等水師來援一面自簡精銳倍道進發羅逢元由陸公壩繞河而上朱南桂朱寬義由霍木山前進行未數里聞水營羅進賢與賊戰於梅塘觜已報捷矣又數里旌旗一色彌望皆賊朱南桂羅逢元等分四路衝入萬刃交下槍子橫飛賊乃大潰我軍直追至新圩角河邊水師彭楚漢等適自梅塘觜追賊而至一鼓蕩洗餘賊盡

奏稿卷一

三

溺於河此正月二十四日兩路同捷二月初一初三十五十六
等日兩次小挫兩次大勝之情形也先是周萬倬吳坤修兩軍
勦賊於南新圩三不管等處進踰四壘斬馘頗眾臣玉麟以該
處近逼蕪湖不能專恃陸師乃令任星元左光培等移師船於
清水河爲之倚護正月二十三日賊黨白三里埂循河而下距
蕪湖不遠任星元左光培率各船汴流迎擊王三錫登堤督戰
中賊槍子洞穿右脅仍復揮兵衝突將賊擊退二月初四日灣
沚踞賊將犯我清水河萬化林會商任星元左光培等乘夜駛
船潛往五更卽抵灣沚各船方燃礮轟發適寔營新破西河之
賊派舢板從清弋江而下駛合力猛攻更於晨霧中分水勇爲

早隊在街口積薪焚之賊不及防以爲官軍水陸併至急遽無
措出巢紛竄我軍遂收復灣汴一隘旋值河水漲溢萬化林左
光培任星元等進攻三里埂賊壘日夜不息朱洪章等亦率陸
軍來會賊於三月初十日焚壘宵遁退併黃池萬化林等飛駕
舢板直逼黃池石壘之下該逆自恃岸峻壘堅列礮以待任星
元萬化林二營奮力仰轟左光培帶數哨登岸與水面戰船摩
壘夾擊各賊驚潰我軍立復黃池剗平石壘朱南桂羅逢元等
陸師會約彭楚漢等水營亦於次日盡破伏龍橋護駕墩花津
賊巢擒斬甚夥羣賊遁往金寶圩溧水丹陽一帶此二月初五
日水師攻克灣汴三月初十一等日續克黃池悉收內河要

地之情形也臣等查蕪湖金柱關兩城隘爲江介要衝又爲金陵各營後路上年八九月間賊蹤環伺諸將士五旬苦戰幸獲保全今又屢卻逆氛連克灣沚黃池以通甯國蕪湖之氣實屬始終不懈勞苦功多所有陣亡各員弁另開清單請卹在事出力人員可否彙入前次案內容臣等開單奏保以資鼓勵出自聖恩所有金柱關蕪湖水陸防軍屢獲大勝克復灣沚黃池各要隘緣由謹繕摺由驛五百里馳奏伏乞

皇太后

皇上聖鑒訓示謹

奏

保穆其琛補無爲州實缺片

同治二年三月二十七日

再現在代理無爲州知州穆其琛四川舉人考取教習選授巴縣教諭經前任湖北撫臣胡林翼咨調隨營辦事咸豐十一年八月臣札調來營襄理文案一年有餘精細勤慎臣察其才具堪勝繁劇同治元年閏八月檄令代理無爲州該員自履任後鉅細躬親實事求是釐剔州縣向來積弊據實上達地方應辦之事次第舉行甫有端緒而賊由九洑洲渡江十月二十八日竄踞含山巢縣距無爲州僅數十里次日書役人民紛紛遷避闔城爲之一空該員獨坐署中堅忍靜鎮迨援兵漸至固結民志保衛危城厥功甚偉本年強寇壓境大軍雲集一面支應軍

需一面辦理隄壩工程肆應裕如不形勞瘁現當地方糜爛之時分發皖省人員率皆裹足不前非破格錄用不足以資鼓勵相應據實保奏籲懇

天恩卽以該員穆其琛補授無爲州知州以爲臨危鎮定者勸
是否有當伏乞

皇太后

皇上聖鑒訓示謹

奏

揀調各員畱皖委用摺

同治二年三月二十七日

奏爲揀調各員畱省補用並請多發卽用知縣來皖以資差委
恭摺仰祈

聖鑒事竊惟行政之要首在得人吏治之興廢全繫乎州縣之
賢否安徽用兵十載蹂躪不堪人人視爲畏途通省實缺人員
僅有知府二人州縣二人卽候補者亦屬寥寥每出一缺遴委
乏員小民久困水火之中偶得一良有司拊循而煦嫗之無不
感深挾纊事半功倍如署蕪湖縣知縣劉世墀臣於上年六
月奏明委署斯缺臣此次巡視各軍舟過蕪湖卽聞境內之民
頌聲四起比以母憂去任臥轍攀畱者相屬於道可見民心之

易感而吏治之尤宜亟講也然使拘泥舊章繩以格例不稍示變通之法則目前幾無可委之員不廣開登進之途則將來難收得人之效臣上年所奏委署之二十人旋准部咨分別准駁合例者祇有五人其餘如劉世墀等均在不合例之列臣於奏署後隨時察看其有人地未宜者業經陸續撤委其尙屬得力者雖與例未符亦仍從權畱任溯查湖北省自三次克復後地方彫敝與今日之安慶相同經前撫臣胡林翼羅致賢才多方培養不數年間吏治漸振撫字催科綽有條理咸豐九年胡林翼奏補府州縣各缺大半與例不符奉

旨交部核議均經通融議准在案臣擬此後卽比照湖北章程

辦理聞有才品較優譽望漸著者隨時札調來營試用如其有
裨吏治專案奏請錄用苟非實有過人之才不敢率爲破格之
請縱或稍出定例之外亦不悖乎立法之原查有前任四川巴
縣教諭穆其琛經臣檄令代理無爲州知州該員識力堅定心
地樸誠實屬不可多得之員又前任四川梁山縣知縣曾化南
指分江西試用知縣蔡家馨經臣先後畱營辦事均屬才堪造
就合無仰懇

天恩准將穆其琛曾化南蔡家馨三員畱於安徽酌量補用再
上年臣奏請於新進士新拔貢兩班中各配籤十餘枝分發安
徽補用部臣以業經掣籤未及添配相應請

奏稿卷十八
旨敕下吏部於本年新進士卽用知縣班中籤掣安徽省十六
人並飭令迅速赴省聽候差遣委用該員等初履仕途未染習
氣庶幾拔十得五循吏漸多分布各屬撫卹遺黎仰副

聖主澄敘官方惠愛民生之至意所有安徽調用人員理合會
同署撫臣唐訓方恭摺具奏伏乞

皇太后

皇上聖鑒訓示謹

奏

近日軍情片

同治二年三月二十七日

再近日軍情金陵雨花台一軍撥彭毓橘七營北援無爲州後
兵力稍單守局尙穩金柱關蕪湖甯國等處距賊漸遠防務大
鬆徽州三面皆賊臣僅畱唐義訓一軍防守徽休兩城十分單
薄幸賴左宗棠派劉典王文瑞兩軍沈葆楨派王沐一軍分駐
休甯祁門竭力防剿劉典王沐各營在於長林梅嶺岩寺草市
等處疊次苦戰獲勝王文瑞亦於漁亭七里橋等處屢戰獲勝
十一日大破黃文金股匪於小路口徽休祁門各城或可倖保
然賊思假道徽境內犯江西其謀未嘗一日息也其嶺外石埭
太平等處又有古賴劉藍等股與嶺內黟祁北面之賊粘連一

片縱橫蹂躪

臣

飭朱品隆由青陽進攻石埭冀掣動徽賊之後

路三月二十二日大戰獲勝仍以賊多兵寡未敢輕離青陽之

本防深入石埭之重地鮑超渡江北援之師三月十六日始抵

無爲州正欲進剿石澗埠十七日黎明蕭慶衍彭毓楠會合水

師由黃雒河進兵並約被圍之毛有銘劉連捷等由內擊出大

破賊壘賊卡立解石澗埠之圍鮑超聞重圍已解登舟仍回上

游欲再踐赴援江西之約

臣

聞賊之大股並未退回巢縣悉銳

上竄直撲廬江乃飛檄鮑超急登北岸先援廬江忠酋於十九

日攻撲廬江縣城守將梁美材吳長慶等登陴堅守伺隙出擊

擒斬甚眾賊由界河迤邐而北分竄桐城舒城一帶其由鄂東

竄之捻股在蘄水分爲兩枝一枝回竄黃州一枝下竄皖境十八日攻撲宿松縣十九二十等日越過太湖潛山界上二十二日自青草塢突撲桐城守桐城者爲湖南提督周寬世開城迎擊擒斬頗多賊遂入孔城鎮與廬江之大股髮逆聯成一片矣據搜獲忠酋僞文將由舒城六安而上英霍麻城宋埠一出黃州一出漢口擾犯湖北意欲掣我南岸之兵以援北掣我下游之兵以援上無非圖解金陵之圍臣以該逆規畫甚大蓄謀甚狡湖北爲數省樞紐不可稍有疏失飛咨官文嚴樹森調成大吉回駐灊口撥水師速赴武漢聞李續宜於初十日自湘啟行擬俟其道出鄂疆商請暫駐黃州會籌鄂皖大局當此南岸喫

緊之際臣方恨無力援徽援江乃北岸事變疊生下則江浦浦口和含巢縣一片逆氛上則髮捻巨股疊撲各城兼圖鄂境而苗練復於十八日圍攻壽州並在正陽關毀關擄船叛迹大露徽臣調度乖方艱危百出憂憤何極所幸浙滬兩軍捷書頻至浙軍若克富陽一城杭州卽有可圖滬軍若克崑山一城蘇州卽有可圖仰託

聖主威福但求皖鄂江西不大決裂與各悍賊相持數月俾蘇浙果收成效或者大波特起旋慶安瀾焦灼無地之時輒不勝禱祀微倖之想除各路戰狀分案詳奏外合先附陳大概伏乞皇太后

皇上聖鑒謹

奏

孝和卷十八

吳

石澗埠六安州廬江等處戰守情形摺

同治二年四月十日

奏爲忠逆大股疊撲城營官軍苦守力戰石澗埠廬江桐城舒城六安州先後解圍恭摺馳陳仰祈

聖鑒事竊自石澗埠圍營之賊經水陸各軍合力勦退後進撲廬江分竄桐城舒城與由鄂東下之捻股聯爲一片臣於三月初二日犯石澗埠揚隊焚屋近逼我營該處將領毛有銘劉連捷等密飭士卒穩守營寨以觀其變初三初四等日賊眾數萬圍攻南後營及瑞左溥左溥右元中信中等營束草如山呼聲動地各負片板撲近溥右營濠邊毛有銘以中右營兩後哨前往助守排礮

環擊殪其前鋒賊猶晝夜猛攻相持不下如是者數日初七日
毛有銘挑銳卒潛出濠外突焚積草劉連捷復於初九日派隊
奮擊悉毀攻具賊爲少卻仍於營前營後增壘盈百層層合圍
營中文報不通糧運汲道一時俱絕如是者又數日曾國荃在
金陵聞警卽派彭毓橘率馬步八營倍道而至彭玉麟亦調周
萬倬劉祥勝等渡江來援遂與蕭慶衍會軍於黃淮河十六日
彭玉麟親督水師進次海子口牽制東關一路遣死士溷入石
澗埠營中密約詰朝會戰是夜四更彭毓橘率師進攻釘子壩
皇圖寺各賊壘蕭慶衍周萬倬率各師進攻黃龍岡迎珠塔各
賊壘號礮齊發毛有銘卽於重圍中衝出攻草鞋嶺之壘劉連

捷出攻石澗埠之卡王載駟等亦馳出戰賊於羊虎山瞥見黃龍岡迎珠塔火光突起知黃雒河援軍先已得手遂乘勢猛進併力夾擊俘斬無算彭毓橘亦自皇圖寺來會縱橫盪洗羣壘悉平而東關賊援亦爲水師堵退忠酋各黨乃分向小嶺開成橋而遁此三月十七日力解石澗埠重圍之情形也臣所調鮑超北渡之師十六日抵無爲州未及移營進勦聞賊已解圍以去擬回軍以踐上援江西之約甫及登舟猶未行也賊之另股竄盛家橋者先於十二十三等日逼犯廬江該城守將有吳長慶等三營又截畱梁美材等三營分段繕守乘賊喘息未定一擊卻之十五日王占魁出城雕勦又捷於羅家埠至十九日忠

酋大股自石澗埠而來悉萃廬江圍撲城池臣飛檄鮑超舍舟

登陸轉援廬江而廬江之賊已於十九二十等日經吳長慶梁

美材等堅守得完伺懈出擊賊遂解圍西竄梅心驛二十一日

突攻舒城之西南兩門守舒城者爲安肅道蔣凝學分軍迎剿

賊退七里河是夜設伏誘賊大挫兇鋒執僞天將羽天福於陣

維時捻逆張宗雨髮逆馬融和等由豫而鄂而皖聞道疾馳足

無停趾瞬息而至桐城守桐城者爲湖南提督周寬世出戰於

三里街凌厲無前賊大怖將謀宵遁我軍聯騎追剿該逆遂往

孔城鎮與忠酋合而爲一矣二十三日忠酋前隊衝至六安州

之十里埠該州城大而圯畱守者僅有蔣凝學部下王臨祥袁

秀林兩營及糧台道員曾廣翼知州何家驄而已四人者力籌
守禦二十四日賊以大股繼至自東南迤北而西植旗若林面
面結壘軍士守定垛口各以巨礮環轟曾不少卻二十五日賊
分三路來攻將抵城根東門城垣久爲風雨所損猝傾六七丈
一時塵土蔽空羣賊大呼擁入王臨祥麾兵齊上抽刃攢刺擲
尸城下曾廣翼袁秀林飛騎繼至悉戮進口之賊搶築木城二
道二十六日賊攻小北門旋即擊退二十七日賊眾傾巢而出
自北城以至西城幾無寸隙憚我城上礮火猛烈欲前且卻其
尤悍者挽盾直前誓以死搏我軍屹立不動俟其躍過城濠火
球擲下焚賊無數始各裹尸而退二十八日曾廣翼王臨祥見

城南一二里外掩映賊旗徘徊不進乃令馬士縉城馳擊斃賊
六人三十日又縉死士出襲鮑家圩擄糧之賊斬偽富天豫張
承得擒偽左監議劉朝柱臣以六安州係淮南樞紐恐忠酋與
苗捻勾合愈不可制檄鮑超由廬江往援檄劉連捷彭毓橘毛
有銘由無爲州往援鮑超將至舒城賊遂於四月初二日解圍
遁往廬州一路此廬江桐城舒城防守得完及六安州解圍之
情形也臣查無爲州爲江北之膏腴六安州爲皖鄂之要衝忠
酋以全力圍撲石澗埠冀破無爲旋由廬江舒桐糾結捻股圖
爭六安一城其行蹤爲至疾其蓄謀爲至狡諸將士苦籌戰守
城營均獲保全使賊不敢橫竄鄂畧均屬著有微勞所有固守

石澗埠六安州尤爲出力之布政使銜記名按察使劉連捷請
交部從優議敘記名道毛有銘請

賞加按察使銜並

賞給勇號藍翎江西候補道曾廣翼請

賞加鹽運使銜並

賞換花翎候補副將王臨祥袁秀林均請

交軍機處記名遇有總兵缺出請

旨簡放署安徽六安州事補用同知直隸州何家驄請以知府

補用先換頂帶其餘出力員弁可否容臣查明酌請獎敘之處

出自

聖恩花翎參將黃仁親藍翎都司趙人和藍翎守備蕭淇松守
備劉紹志藍翎千總吳秀高藍翎把總李大材毛昌五謝仁週
藍翎外委李升山沈謙德向慎光外委童景星均在石澗埠接
戰陣亡應請

勅部各照本職從優議卹所有皖北各城營防守解圍緣由謹
繕摺由驛五百里馳奏伏乞

皇太后

皇上聖鑒訓示謹

奏

覆陳淮鹽暫難改辦官運摺

同治二年四月十二日

奏爲淮南引鹽察酌現在情形暫難改辦官運恭摺覆陳仰祈
聖鑒事竊臣承准議政王軍機大臣字寄同治元年十二月初
十日奉

上諭本日據中允錢寶廉片奏請官運淮鹽以裕軍餉等語淮
南鹺務廢弛已久現在運販楚北者劣員奸商居多曾國藩雖
設卡抽釐而所得未多前據戶部奏請飭該大臣酌提成本由
官督運則利權操之自上而於皖浙軍餉必能稍資接濟茲據
該中允所奏與戶部前奏是否可行著曾國藩一併悉心議奏
等因欽此旋於本年正月二十八日接准戶部來咨淮南鹽務

應先試辦官運一案經該部詳晰具奏請

飭臣遴選公正大員實心經理奉

旨依議欽此並鈔錄原奏咨照到臣當卽轉行兩淮運使喬松

年議覆去後茲據該運使詳稱竊繹戶部之意係欲加徵課銀

收回引地以冀漸復舊規又恐商販不前改由官運洵是籌辦

南鹽至要之策無如引地爲鄰鹽侵占日久籌銷極難正課因

釐捐抽納過多加增非易上年江路漸通楚西兩岸亦嘗招商

試辦乃以淮鹽久不到岸所銷盡是川鹽粵鹽蓋川粵之成本

較輕賣價可減淮鹽之成本最重賣價獨昂故淮鹽之疲滯斷

不敵川粵各鹽之旺銷則商旣不前卽官運亦恐無起色至部

文所稱仍以四百斤爲一引令繳正課每引三兩七分三釐零
係照承平時科則而言現在除完課外運司衙門所收釐金及
沿江各釐每鹽一票約共完銀十五兩以上釐捐如是之重是
以試運楚西之鹽止能照稅鹽章程完納稅鹽每票九百斤僅
完課銀一兩八分尙且無利可圖今欲以四百斤鹽完三兩有
零之課其勢更有難行若議減釐增課則各路軍餉處處皆待
釐金接濟豈能遽爲裁減部文又稱令運使嚴禁奸商私行興
販以疏官鹽銷路查私鹽自應嚴緝究辦若因官運而概禁商
人運鹽則恐官運猶未辦成而商販轉先裹足況南鹽運本極
大籌辦官運縱有十萬兩之本尙未足以資周轉亦不能不藉

羣商之力廣爲興販開拓銷路部文又稱勸諭商民捐輸運本雖准按照籌餉例減成給獎而江北捐款林立減折上捐所在多有斷難期其踴躍部文又稱聞內地現已購備輪船七隻於此項船內撥出數隻拖帶鹽船查前購輪船尙未入江且爲水師打仗而設斷難撥爲拖帶鹽船之用至商販公雇輪船報明在案者現有四隻若歸官運卽此雇船之費已不易籌蓋淮南目下情形不患無商之可招而患無利之可獲惟有將楚西兩岸銷路大加整頓仍由運司衙門招來新舊各商運赴楚西銷售以期淮鹽逐漸進步爲得寸得尺之計前經都統富明阿奏請招商旋派知府杜文瀾前往楚北試辦如果辦有成效再當

另議章程詳辦等情具詳請奏前來伏查各軍餉絀是臣之隱憂兩淮鹽務是臣之專政假使官運淮鹽果有大利可圖臣豈不思竭力籌辦謀本分自然之利濟本營非常之貧無如楚西兩岸被粵私川私侵佔太久斷非一蹴所能挽回此時必欲爭回引地非大減賣價則不能敵鄰私非先輕成本則不能跌賣價據現行事例九百斤一引者並鹽本稅課釐金運腳拖費計算幾及四十兩成本已屬極重若如部議減爲四百斤之引加爲三兩有零之課又以重價購買之輪船拖帶試行之官鹽則成本更重安能敵鄰私而暢銷路若將各處釐金概議裁減則下而鎮揚滁州之軍餉上而九江湖北之關釐皆將向臣處索

奏稿卷一
取而臣軍除沿江鹽釐外亦別無可籌之餉實有不能終日之
勢臣悉心酌核官運雖屬良法目前尙多窒礙應暫照該運使
所議俟富明阿派辦之官鹽試行有效再行另擬章程奏明辦
理所有淮鹽現難改辦官運遵
旨議覆緣由謹繕摺具奏伏乞

皇太后

皇上聖鑒訓示謹

奏

近日軍情片

同治二年四月十二日

再近日軍情雨花台金柱關蕪湖東西梁山各營水陸穩固均無戰事甯國附近如南湖新河莊等處涇縣附近如茂林章家渡等處均有賊蹤游弋防務尙難鬆勁然甯郡及涇縣南陵青陽各城灣沚及西河清弋江各隘水陸防守綦布星羅朱品隆在青陽亦於春末夏初疊獲勝仗保甯國之後路足以仰慰宸廑徽郡防兵單薄是臣布置最疏之處去冬甯國之賊今春浙東之賊現在麇集於石埭太平及徽祁饒景一帶實屬防不勝防剿不勝剿幸左宗棠派劉典一軍沈葆楨派王沐一軍先後援徽三月十七日會克黟縣十九至二十五等日搜剿近城

之賊大破盧村黃村之賊王文瑞亦將柏溪金字牌零股一律
擊退黟祁境內甫埽羣氛而賊之竄往鄱陽者已由梘田街進
逼浮梁王沐將回駐景德鎮劉典亦將馳援饒景江西之門戶
可虞而徽州之空虛尤可慮矣現調李榕一軍由北岸馳赴建
德進援祁門調席寶田一軍由湖南馳赴撫州進援徽境不知
能迅速趕到併力驅除否偽忠王自六安州解圍下竄或稱其
回救蘇州或稱其圖犯揚州裏下河或稱其糾合苗黨竄擾濱
淮各屬其確耗尙不得知然悉數東趨并未西犯鄂疆卽屬大
局之幸臣現檄鮑超由廬州追擊忠酋卽從柘皋進兵以攻巢
縣之北檄劉連捷彭毓橘蕭慶衍從迎珠塔進兵以攻巢縣之

東檄蔣凝學毛有銘由六安進援壽州並調成大吉由鄂回皖
會師壽州共討苗黨該州糧缺兵單倘能嬰城固守再過半月
各軍次第趕到合力痛剿而僧格林沁李續宜遵
旨偕來誅屢叛之逆豎保長淮之重險庶足以彰天討而定人
心除各路戰狀分案續奏外合先附陳大概伏乞

聖鑒謹

奏

奏稿卷十八

三

恭謝 天恩瀝陳下情摺

同治二年四月二十二日

奏爲恭謝

天恩瀝陳下情仰祈

聖鑒事竊臣接准兵部火票遞到同治二年三月十八日內閣

奉

上諭浙江巡撫著曾國荃補授欽此當卽恭設香案望

闕叩頭謝

恩訖又恭讀

寄諭浙省係左宗棠兼轄旣兼署巡撫尤責無旁貸曾國荃著仍統前敵之軍駐紮雨花台一意相機進取以圖金陵毋庸以

浙事爲念等因欽此仰見

皇上破格錄用委曲培成之至意惟是受

恩愈重報稱愈難現在髮捻紛乘苗練復叛軍情反覆世變環生祇貽

宵旰之憂曾乏補苴之術每與臣弟國荃寓書微惕慙悚交并本年二月臣至雨花台大營與臣弟共處八日慨兵事之方殷

感

主恩之極渥中夜奮興互相誠勉以大局論之沿江三千里名城要隘皆爲我有加以浙東列郡蘇松各屬次第克復凡山川筋脈之地米糧百產之源該逆一無可恃未嘗不託

聖朝之威福冀功緒之可成而一念夫拓地日廣頓兵堅城戍守之卒太多游擊之軍太少師老餉竭士氣漸疲羣盜如毛飢餓四竄竊號之寇未滅流賊之患或興則又爲之蹙頞歛歔愧臣兄弟謬當重任深恐上辜

君恩下負民望遂陷於大戾而不自知憂灼之餘每思避位讓賢稍分責任又不敢數數陳奏上瀆

宸聰上年正月間臣密陳金陵未克以前不再

加恩臣家誠以功名之際終之始難消長之機盈則必缺曾蒙寄諭嘉許俯鑒愚忱臣弟國荃旋擢藩司已叨非分今又特沛恩綸授以開府之榮專其治軍之責聞

命而後已閱兼旬臣與臣弟兩次面商欲固辭則頗涉矯情思
立異於當世欲受事則不自量力懼貽譏於方來再四躊躇誠
恐治軍無效傾覆尋至不如少安愚拙之分徐圖尺寸之功惟
有籲懇

天恩收回

成命俯准

臣

弟以開缺藩司效力行閒與

臣

隨時熟籌戰守相

臣

機進取或者以勤補拙以恐致福迅克堅城殄除醜類稍答

高厚鴻慈於萬一除由

臣

弟國荃專摺瀝陳外所有

微臣

感激

微臣

下忱理合繕摺叩謝

微臣

天恩伏乞

微臣

天恩伏乞

微臣

天恩伏乞

微臣

天恩伏乞

微臣

天恩伏乞

微臣

天恩伏乞

微臣

皇太后

皇上聖鑒謹

奏

寿和卷八

謝曾貞幹予諡建祠

恩摺

同治二年四月二十二日

奏爲恭謝

天恩仰祈

聖鑒事

臣接准江蘇撫

臣

李鴻章咨稱同治元年十二月三

十日內閣奉

上諭前據曾國藩奏知府曾貞幹積勞病故當經降旨追贈按察使銜照按察使軍營立功後病故例議卹茲據李鴻章奏報曾貞幹力疾督戰情形並臚陳生前戰績懇請逾格優卹一摺已故知府曾貞幹隨同伊兄曾國藩等從事戎行治軍有紀律善拊循戰士履危蹈險堅固不搖咸豐十年克復太湖縣城十

一年克復安慶省城本年肅清江北各城進圍金陵皆曾貞幹之力居多七八月閒大股援賊數十萬人圍撲雨花台大營屢爭官軍餉道該故員從容布置防勦兼施力戰苦守四十餘日使賊卒不得逞被創遁去乃因在軍日久勞苦憂思遂致一病不起以死勤事實屬可嘉可憫曾貞幹著加恩照二品例議卹並准其予諡於本籍及死事地方建立專祠仍宣付史館特予立傳以彰忠藎欽此聞

命之下感泣難名當卽恭設香案望

闕叩頭謝

恩訖伏念臣弟貞幹本無遠略夙抱愚忠十載從戎未酬埽穴

擒渠之願九原齋志空懷渡河殺賊之心仰蒙

褒贈臬司優卹後嗣已沐逾恆之典實爲曠代之榮重壤增輝結草不足伸其報闔門銜感臥薪無以表其誠乃撫臣李鴻章相距較遠聞信稍遲復具疏而上陳荷

恩綸之再賁既增秩以崇班聯更易名以表行誼建祠兩地忝附馨香俎豆之林列傳千秋永垂神化丹青之業死而有知感將何極臣自愧庸愚久膺艱鉅下懷季弟未償之志上戴

聖主不次之恩惟有率同臣弟國荃誓殲醜類規取土疆嘗膽以圖功側身以修行兢兢業業翼竭涓埃報荅之忱子子孫孫無忘

高厚生成之德所有微臣

感激下忱謹會同浙江撫臣曾國荃

恭摺叩謝

天恩伏乞

皇太后

皇上聖鑒謹

奏

克復東關銅城閘兩隘摺

同治二年四月二十七日

奏爲水陸各軍會克東關銅城閘兩隘恭摺馳陳仰祈

聖鑒事竊自僞忠王李秀成在六安州解圍下竄鮑超跟蹤追擊卽從柘皋進兵以攻巢縣之北劉連捷彭毓橘蕭慶衍等從迎珠塔進兵以攻巢縣之東臣國藩於四月十二日附陳大概在案惟是欲圖巢縣必先力取東關銅城閘以毀其門戶初五日臣玉麟商令蕭慶衍彭毓橘等專攻銅城閘派水師曾泗美會合劉連捷毛有銘專攻東關踞東關者爲僞閩天安蕭逆高壘深溝擁眾堅守劉連捷知該隘之未可力爭也乃於初六日夜令師船由蠡子口潛渡陸軍緣堤埂而進伏於九峯山下另

派譚國泰帶勇士數十人從東關近處以木盆偷渡毀柵越濠
突逼壘下肉薄而登賊以礮石外擊密若飛蝗胡德雲石太和
從煙燄中駕梯直上中礮死之劉連捷遂督副後南後兩營奮
力繼進曾泗美從水路列礮環轟聲徹霄半壘賊惶遽欲遁九
峯山下伏兵齊出合軍衝殺立破石壘遂於五更克復東關黎
明七陳村打鼓山南水坳之賊一齊來援劉連捷令譚國泰守
定石壘親率副後等營迎敵毛有銘率湘右等營由九峯山斜
刺而入賊乃卻走我軍以賊未受創必將復至遂於石壘之旁
增修一壘以爲犄角嚴陣以待之俄報賊又從林頭鎮吳家村
揚隊而來毛有銘隨令葛清泰向南水坳進自率湘右營繼之

劉連捷令李瑞二向打鼓山進自率副後營繼之王載駟向九
峯山進劉秉珩向七陳村進分道並進搏鬪移時王載駟等聞
南水坳打鼓山之兵已將得手卽帶部卒搶上九峯山會泗美
率舳板從河曲中出斷賊歸路擒斬甚眾盡焚各賊卡賊館而
還此四月初七日攻克東關并擊退援賊之情形也其陸師之
分攻銅城閘者蕭慶衍彭毓橘等軍於初六日由黃墩渡河過
八角廟下寨會約喻俊明成發翔張錦芳唐敏義水師四營奮
攻一日夜賊但堅修老巢伏匿不出并於南北兩街各添四壘
爲負隅死守計時值河水泛溢圩田皆成巨浸臣王麟於初七
日令喻俊明成發翔等鑿開土埂師船從決口駛入南北兩圩

直薄賊巢之下更番擊之初九日各軍會商畱彭毓橘所部扼守八角廟分蕭慶衍所部移勦百旺市五顯集一帶先清銅城閘之後路分軍爲三百旺市接戰正酣三汊河雍家鎮兩支亦至遂將兩處卡壘一律平毀振旅而旋水師之入南北圩者乘勢猛攻環賊壘之三面皆有舢板小划拋擲火毯陸軍亦萬槍齊放五更時踰毀南街土壘遂攻破銅城閘一隘駢尸塞道幾無脫者而林頭鎮另股亦旋爲水師擊走此四月初十日續克銅城閘之情形也臣等查賊踞北岸以巢縣爲根本以東關銅城閘爲屏蔽橫據重險賊計甚堅仰賴

聖主威福將士同心數日而下兩隘從此鮑超攻其北劉連捷

扼其南蕭慶衍彭毓橘圍其東巢縣必有可克之機此次力戰陣亡之藍翎千總彭勝華藍翎把總曾彩雲把總胡德雲石太和等應請

勅部從優議卹以慰忠魂所有水陸會克東關銅城閘緣由謹繕摺由驛五百里馳奏伏乞

皇太后

皇上聖鑒訓示謹

奏

近日軍情并陳餉絀情形片

同治二年四月二十七日

再近日軍情大江南岸雨花台各營堅守如常蕪湖甯國南陵
數城金柱關灣沚西河數隘水陸布置防務尙鬆涇縣守將易
開俊於四月十八日在章家渡擊賊大勝朱品隆亦在青陽境
內擊賊屢勝徽州自王沐回駐景德鎮後賊又從太平竄入歙
縣之許村唐義訓督軍擊卻追出箬嶺前調李榕南渡一軍十
九日進攻建德未下二十三日再戰克之臣檄令進攻彭澤鄱
陽會合韓進春席寶田等軍由內打出冀埽上游之羣賊而保
江西之完區大江北岸自忠酋下竄賊勢漸衰我軍攻克東關
銅城閘劉連捷進紫望城岡彭毓橘進紫巢縣東門水陸攻擊

一晝夜遂於二十二夜克復巢城現檄鮑超與蕭慶衍彭毓橘
劉連捷諸軍進取和含二浦直達九洲冀驅賊併歸南岸較
易勦辦苗沛霖圍攻壽州已逾一月城中僅有五百人絕糧者
八日署知州毛維翼與民苦守可嘉可憫蔣凝學於十六日自
六安援壽甫抵謝埠又爲羣捻所阻毛有銘自東關援壽以無
餉可領軍行稍滯成大吉白麻城援壽亦以餉缺未能成行今
年兵事之遲鈍半由於餉需之奇絀臣部八萬餘人益以李續
宜部下二萬人欠餉多者十五箇月少亦八九箇月昨鮑超自
樅陽登岸苦無途費其部卒逃散一千餘人毛有銘自東關起
程其部卒逃散數十人并據將倡逃之將弁鄒慶星等稟請參

革臣帶兵九載今年始有餉匱兵逃之事從前徽甯兩防每月額餉二十萬皆由浙江供支臣接辦以來庚辛二年奏撥江西漕折每月五萬至壬戌年奏撥四萬奉

旨允准旋經撫臣沈葆楨奏畱供本省防兵之用戶部議准而臣所統徽甯兩防遂無一毫可恃之餉矣江西通省釐金臣指定河口景鎮等卡協濟左宗棠月約三萬兩指定吳城等卡協濟彭玉麟月約二萬數千又撥給本省水師劉于浚孫昌國兩軍月約二萬數千四處共支去八萬而實解臣台者遂無幾矣湖南東征局釐金今年因米價昂貴畱楚買米而現銀解皖者亦無幾矣廣東釐金奏定專充皖浙軍餉近亦有畱供本省之

議臣力小任重統軍過多每月需額餉五十餘萬而入款不過
十餘萬不敷之數甚鉅且唐訓方近駐臨淮李世忠近駐滁州
索餉之文月凡數至卽赫德所購輪船指日可到亦必向臣處
索餉昔以數人分辨之軍務今專責於一人昔以各路分籌之
軍餉今併萃於一身夙夜祇懼恐微臣之顛踣立見而大局之
決裂尤可虞也臣在軍多年從不敢輕上請餉之奏蓋不欲以
危詞上煩

聖聽又不欲以苦語渙散軍心茲因有勇丁逃散之案不得不
據實密陳可否籲懇

天恩在於九江洋稅項下每月撥銀三萬兩解皖濟餉出自

鴻施仍懇

勅下廣東督撫將釐金全解皖浙本省不得截畱大局幸甚

臣

忝任江督已滿三年前二年事機稍順去夏至今變故紛乘幾蹈大戾目下風波雖定憂悸未忘誠恐積日累年更無成效仰祈

皇上天恩特派大員來南於

欽差大臣兩江總督二篆之中分綰一篆俾

臣責任略輕稍釋

惴慄之懷

臣昨專差進京與

臣弟國荃并辭浙撫之

命亦因識淺才疏恐妨賢路均祈

俯鑒愚忱次第允准不勝感激悚切之至理合附片密陳伏乞

聖鑒訓示謹

奏

金陵軍攻克石城石壘摺

同治二年五月十二日

奏爲官軍攻破雨花台僞城及聚寶門外諸石壘恭摺馳陳仰

祈

聖鑒事竊僞忠王李秀成自六安戰敗率眾東竄紛傳將回救蘇州江蘇撫臣李鴻章商曾國荃囑其力攻上游以分賊勢無令忠酋得以全力援蘇曾國荃以忠賊回援蘇州固屬可慮卽直犯揚州裏下河尤爲可虞計莫如急爭金陵老巢以攻其所必救使城中之賊不暇遠趨蘇郡而北岸之賊亦不敢專注揚州乃於四月二十七日宣諭各軍多備攻具先登者上賞退後者必誅漏甫二下齊隊出濠六路併進每路以一營爲前鋒

委和名

三

兩營爲策應令李臣典趙三元武交清等專攻雨花台石城趙清河黃東南攻聚寶門外南卡石壘晏澧週易春光攻西卡石壘何玉貴張詩日楊西平攻東卡石壘又令陳湜率李定元朱文光羅景集等出中路應之蕭孚泗率蕭致祥李泰山胡松江等出右路應之易良虎禹志鏈等出左路應之前鋒各營於三更時匍伏蛇行偷近石城石壘東草填濠架梯欲上賊遽驚覺燃礮外擊我勇中礮而踣者五人眾勇辟易李臣典立斬二卒舉旗直前軍中無敢少後者羣以火箭火毬盤空飛擲悉入石城天漸嚮明趙三元率中軍親兵從礮台下蟻附而升李臣典武交清各率部卒從中右兩路肉薄齊登維時敵樓火發賊方

爭相奔救不料煙霾中人聲鼎沸亂鋒交下我軍已奪僞城一座該處地高勢險俯瞰東卡西卡南卡九石壘慙慙在目旋見趙清河黃東南晏豐週何玉貴等乘勢猛擊平毀數壘餘卽棄壘竄遁蕭孚泗易良虎陳湜縱軍圍剿將賊迫過長干橋蹙偪入水者無數曾國荃以雨花台地段遼闊近接城圍賊必與我爭此要害乃抽四營駐守石城增修六新壘以接各舊營之氣並調集後路各營以待之未幾城賊出大股潛匿附郭屋舍中以誘敵各軍蓄銳不發俟賊少懈突出奮擊蕭孚泗陳湜易良虎扼其前趙三元趙清河黃東南晏豐週易春光伍維壽等截其後賊不得逞遂繞雨花台乘我新營未定悉銳猛攻抵死不

退李臣典趙三元武交清張詩曰等督隊馳援黃潤昌成東昂
等亦引軍來助搏鬪移時賊乃負創入城是役也俘執逾二百
名殲戮近六千人奪獲礮械尤多軍士亦小有傷折臣查雨花
台及金陵南門外各石壘據險雄峙屏蔽城垣昔年和春張國
樑等屢攻未下茲賴

聖主威福諸將同心克此堅壘不特可分蘇揚之賊勢亦於偪
勦金陵深有裨益此次首先登壘戰功最著之提督銜記名總
兵李臣典請

交軍機處記名遇有提督缺出請

旨簡放記名總兵晏澧遇請

簡授總兵實缺並

賞加提督銜副將趙三元武交清趙清河何玉貴黃東南伍維

壽均請

交軍機處記名遇有總兵缺出請

旨簡放其餘出力人員可否附於巢含和案內容

臣

開單保奏

出自

恩施陣亡各員弁查明另案請卹所有官軍攻克雨花台等處

石城石壘緣由謹會同大學士湖廣督

臣

官文江蘇撫

臣

李鴻

章由驛五百里具奏伏乞

皇太后

皇上聖鑒訓示謹奏

水陸會克巢含和三城摺

同治二年五月十二日

奏爲水陸各營會克巢縣含山和州三城恭摺馳報仰祈

聖鑒事竊自官軍疊克東關銅城聞後遂由望城岡攻復巢縣
臣國藩於四月二十七日附陳大概在案先是銅城聞旣克劉
連捷與蕭慶衍彭毓橘謀欲取巢縣必自進兵望城岡始十六
日劉連捷率所部各營會合彭毓橘陸師成發翔水師分道並
發行不數里詎知箬箕山麓伏有賊股劉連捷恐爲所乘姑駐
軍以觀其變俄而賊已大至一枝由陳村來一枝由斬龍岡來
旌旗迷目布滿原野我軍整隊禦之賊恃眾悍往來猛撲數次
互有損折旋分賊騎掠陣而過劉連捷知有狡謀麾兵稍退賊

已半鈔後路適礮艇連檣駛至彭毓橘亦帶馬步六營從斜徑
刺入三路合圍擒斬頗眾劉連捷乘賊戰敗遂於筍箕山搶築
營牆彭毓橘驅賊至七八里外仍回駐迎珠塔下十八日蕭慶
衍率師來會遂於十九日進次洪家山輕騎至望城岡履勘形
勢遙見賊於巢湖口岸跨水爲壘水際密排賊划阻我進兵之
路咸發翔曾泗美會督澄海清江左右四營決開圩埂灌水人
圩更鑿圩內大隄將移舢板以入巢湖賊乃增壘塞隄百計撓
我卒不得逞二十日蕭慶衍劉連捷兩軍拔赴望城岡未及下
寨賊卽擁眾渡河成發翔俟賊半渡令各水營由決口飛槩進
圩由圩達湖鈔過賊後賊方逡巡卻顧我舟師已橫截圩中萬

礮齊轟斷其歸路成發翔曾泗美等又分水勇乘勢登陸四出
痛勦賊酋蕭主將梟悍絕倫左營裨將李宏試縛而斬之羣賊
奪氣不知所爲我軍水陸交攻襲破二卡一壘壘中壘外積尸
若阜罕有脫者此四月十六日大戰笄箕山二十日偪紫望城
岡堵勦獲勝之情形也望城岡旣紮定則巢縣之南賊無竄路
陸師可薄城而營水師亦可繞湖而陣二十一日彭毓橋由迎
珠塔拔隊進紮東門外之窰廟地方蕭慶衍撥軍護之次日水
師成發翔唐敏義從南隄入五聯圩轉攻西門張錦芳攻五聯
圩隄上之石卡曾泗美喻俊明同攻東門石壘並約陸師彭毓
橋移逼城根揚隊搗戰賊據城壘矢石交下我軍且卻且前相

持竟曰二更後水師環隄猛擊悉焚湖中賊划毀其浮橋火毬橫擲入壘火箭飛射入城喧聲鼎沸劉連捷亦自河南飛騎馳至共破窰廟沿河六石壘賊競向東門進城曾泗美喻俊明卽躡蹤從東門而入成發翔等從南門攻入適鮑超亦派數營自廬郡西來遂於二十二夜克復巢縣二十三日鮑超由柘皋督軍出清溪鎮擊賊勝之略地而東是晚蕭慶衍亦截尾賊於林台圩旋合劉連捷彭毓橘等營渡河前進於二十四日與鮑超會師含山而賊已宵遁鮑超蕭慶衍等以賊去未遠星夜往襲和州比入州境天甫曙也但見賊旗靡亂不絕於道而水師成發翔約駐泊鍼魚觜之楊占鰲已駛入和州港內城賊逃遁

不及半聚壘中鮑超蕭慶衍與水師環壘急攻賊大怖出壘乞降盡釋脅從者而斬其頭曰以徇於是各整部伍入城少息所獲遺穀甚多此二十二日攻克巢縣二十四日連復含山和州之情形也臣等查賊渡北岸由和州而含山而巢縣力爭要地堅踞數月意將西竄鄂省北犯淮甸擊動上游之全局冀解金陵之重圍幸仗

天威大彰撻伐四日之內壘下三城從此進取江浦九洑洲或可翦其枝葉圖拔金陵此次苦戰數月記名提督江南京口協副將成發翔功績最偉應如何優加獎勵之處恭候

聖裁按察使銜記名道彭毓橘請

賞給勇號記名提督蕭慶衍請

賞給提督應得封典記名總兵張錦芳副將李宏試均請

賞給勇號副將會泗美請

交軍機處記名遇有總兵缺出請

旨簡放總兵銜副將劉長槐朱吉玉趙太和均請以總兵記名
請

旨簡放并

賞加提督銜副將唐敏義請

賞加總兵銜其餘出力人員容臣等查明擇尤酌保籲懇
恩施以資鼓勵至力戰陣亡之花翎副將銜參將陳邦榮楊繼

隆傳堂春花翎游擊鄭楨祥藍翎游擊劉春福都司丁文彬藍翎守備張彪藍翎外委屈傳芝顏隆許李連勝及因傷身故之花翎副將黃福田花翎游擊潘宏勝二員均請

勅部分別從優議卹所有官軍水陸會剿疊復三城緣由謹繕摺由驛五百里具陳伏乞

皇太后

皇上聖鑒訓示謹

奏

奏和卷一

近日軍情片

同治二年五月十二日

再近日軍情南岸曾國荃一軍自克雨花台石城及南門外各
壘後汛地愈廣防兵愈單抽調金柱關守兵千人移紮金陵又
調回彭毓橘一軍回顧老營仍畱劉連捷步隊楊鎮南馬隊隨
同鮑超進攻江浦九洑洲等處其蕪湖金柱關甯國灣沚西河
東西梁山青陽南陵池州一帶節節布置均尙穩固五月初三
日太平石埭之賊分竄茂林涇縣守將易開俊督隊迎剿殲斃
盈千徽州自四月肅清後近無戰事其竄江西之黃文金等股
在鄱陽浮梁境內屢爲官軍所敗現在斜趨都昌湖口等屬李
榕一軍於端午日破賊於彭澤之項家山初七日進援湖口綜

計饒州九江各屬水路有劉子潯孫昌國左光培丁義方等營
陸路有段起李榕席寶田王沐韓進春等營而劉典又自徽州
赴饒聞江忠義亦將自湖南赴潯水陸兵力會萃數萬當可驅
賊出境不使深入腹地矣苗逆攻圍壽州繞城築壘數十座周
以長濠城西濱淮一路環列礮船帆檣如織蔣凝學毛有銘援
壽之師於四月二十七日進紮九里溝二十八日之戰雖破牛
尾岡三壘而我軍傷亡頗眾官弁陣亡至二十四人士氣稍沮
臣已飛催成大吉由湖北迅赴三河尖爲西路之援應並檄周
寬世由桐城馳赴六安分紮州城及謝埠馬頭集保蔣凝學等
之後路又以長淮千里並無得力水師飭派李朝斌帶太湖師

船十營赴滬調現駐滬上之黃翼升帶淮揚師船六七營由洪
澤湖入淮一則各歸本汛仍符奏設水師之初議一則駛至五
河以上掃清滄渦淮肥汝潁諸巨川俾苗逆不得盡收水濱之
利惟壽州城中僅五百饑疲之卒無升斗續進之糧累月苦守
危在旦夕赴援之陸師既不能併力衝入續調之水師又不能
剋期來會誠恐要地難保無以慰州牧毛維翼等倒懸之望憂
灼之餘彌增愧歉除各路戰狀分案續報外合先附陳梗概伏
乞

皇太后

皇上聖鑒謹

奏

奏稿卷十八

攻克江浦浦口九洑洲江面一律肅清摺

同治二年五月二十七日

奏爲水陸各軍會克江浦浦口二城草鞋夾燕子磯等數隘并力破九洑洲一關江面一律肅清恭摺馳報仰祈

聖鑒事竊自巢含和三城相繼攻克旋破雨花台等處石城石壘臣等於五月十二日陳奏在案厥後鮑超與蕭慶衍劉連捷等在和州息軍數日正擬席捲東下疊據探報賊中以雨花台連破石壘恐官軍大舉攻城又以崑新旣克恐滬軍大舉圍蘇李秀成與諸僞王紛紛改圖議由江北返援近救金陵遠救蘇州於是天長六合來安等處次第解圍羣醜南渡而賊之分踞橋林小店者亦於五月初五日冒雨掠舟紛紛搶渡江面人聲

喧闐不絕蕭慶衍度江浦浦口各賊股將無固志矣乃遣騎隊襲之行未中途聞浦口之賊先已棄城遁走江浦之賊獻書詣營乞降鮑超劉連捷察知其詐於初九日引軍疾進蕭慶衍出烏江與各水營會師約戰適李朝斌統太湖水師將赴滬上亦於是時道出金陵初十日李朝斌派部將鄔桂芳李助發江福山等師船由大江衝卡先駐浦口以扼忠酋餘黨之未渡江者臣玉麟自率定湘澄海清江三營臣岳斌自率親兵左後護衛等營並調正中副後副右親兵前四營同入內河詎師次江浦而賊又聞風宵遁遂會合陸師將江浦浦口一併收復仍沿途追勦鈔過逃賊之前賊正竄併九洲洲上偽城之賊不納我

舟師截江圍擊賊不得渡爭向蘆葦中駭竄不知叢葦密處水深丈許或數丈昔道光年間備夷之濠張國樑禦賊之濠又羣賊歷年添修之濠溝港縱橫人馬紛逐一蹴卽溺死者駢積以數萬計至十一日餘賊飢啼江邊旣爲新開河所隔不得仍回北岸又爲大江所阻不得徑渡南岸各水師分隊登陸盡日輪攻撾刃就戮者半墮江自沈者半惟新中營副將鄔桂芳飛槩前驅徑奪洲隘中礮死之此五月初十日克復江浦浦口兩城之情形也二浦旣復我軍將有事於九洑洲曾國荃乘夜至新江口與臣玉麟臣岳斌會勘該洲在驚流急湍之中高峙僞城巨礮層列對岸有攔江磯中關諸石壘又有草鞋夾下關七里

洲燕子磯十數堅壘賊艦賊划與爲倚護斷非陸師所能飛越亦非水師所易猝攻計莫如先取南岸數隘庶撤其藩籬而九洲洲乃有下手之處十二日派丁泗濱許雲發楊明海胡俊友等四營爲頭隊從下關進派喻俊明唐敏義陶樹恩嚴定國羅宏裕楊占鼇等六營爲二隊從草鞋夾進更派彭楚漢傅敏才顏海仙張錦芳等爲三隊以應之臣岳斌仍與李朝斌往來督戰臣玉麟親督成發翔任星元兩營據九洲洲上流作欲攻不攻之勢使洲賊不暇兼顧南岸調派既定十三日天未嚮明丁泗濱喻俊明彭楚漢等乃循南岸飛駛而下將逼賊巢賊竟萬礮齊轟猝不得近其壘我軍預以枯荻灌油縱火江上先焚其

舟數百賊艦一時俱燼眾勇乘勢薄壘有緣牆而上者有從礮眼中搶險而入者遂平下關草鞋夾八賊壘移師轉向中關該關內倚小河外濱大江水流箭急師船不能上駛胡俊友舍舟遵陸突出壘下方將一躍而登忽爲槍子洞腹遽殞於陣陶樹恩許雲發憤極搏戰復裹重創士卒亦損折過眾回軍暫息乃於次日分兵襲破燕子磯殺賊毀壘而還此十三十四等日疊克下關草鞋夾燕子磯三隘之情形也先是臣岳斌詢諸土人知江濱叢莽中有隄埂一道可達九洲賊濠之外至是商令陸軍劉連捷楊鎮南數隊由隄埂缺處鳧水而進派彭楚漢傅敏才顏海仙三營從洲尾攻上派張錦芳成發翔任星元三營

由洲頭攻下派喻俊明唐敏義嚴定國等及李朝斌所部之李
助發周正林江福山等營各駕舳板繞洲奮擊另飭丁泗濱羅
宏裕楊占鼇等由南岸分領水師直趨中關十五日昧爽兩岸
並舉人人皆殊死戰賊之在中關者自恃附城爲壘卒不稍動
其堅踞九洲者下有賊划上有偽城千礮環轟片刻不息又
於東西南三路分伏洋槍悍隊伺閒出擊損我精銳幾不可以
數計彭楚漢唐敏義負創角戰誓得此隘而甘心戰至日晡賊
少怠矣乃於初更時謀之成發翔喻俊明顏海仙張錦芳等乘
月色昏暗中移船潛近賊壘會西南風大作眾軍以火箭攢射
立焚水中拖呂數隻風引火猛燃及洲上卡房喻俊明李朝斌

麾軍直上成發翔任星元張錦芳在左彭楚漢顏海仙唐敏才
在右各率弁勇大呼升岸丁泗濱亦自中關鼓槳而來躍過重
濠肉薄齊登前鋒旣殪後者更進踰者被戕踐尸復登竟以二
更後越牆撲入聚殲羣醜無一脫者遂奪九洑洲僞城一座并
獲大礮數百尊牛馬旗械無數此又十五日力克九洑洲之情
形也臣等查九洑洲爲大江關鍵與金陵相犄角實逆首所必
爭之地幸賴

天威震疊奪此要隘北岸盡爲我有長江一律肅清從此圍攻
金陵較有把握諸將士酷暑鏖兵血戰至五晝夜之久傷亡至
二千餘人之多實亦可嘉可憫此次尤爲出力之提督銜浙江

定海鎮總兵喻俊明浙江黃巖鎮總兵丁泗濱記名總兵彭楚漢楊明海均請

交軍機處記名遇有提督缺出請

旨簡放彭楚漢一員臣國藩曾於堪勝水師總兵案內特保應

請

先擢總兵實缺記名提督浙江處州鎮總兵李朝斌因赴滬之便竭力助攻應如何

加恩之處恭候

聖裁記名提督江南京口協副將成發翔前於克復巢縣案內推爲首功此次應如何酌獎仍候

聖裁總兵銜副將楊占鼇李助發嚴定國副將顏海仙羅宏裕
傳敏才周正林李宏試均請

交軍機處記名遇有總兵缺出請

旨簡放楊占鼇並

賞加提督銜李助發顏海仙羅宏裕傳敏才並

賞給勇號記名總兵張錦芳請

賞加提督銜已保總兵銜副將唐敏義請

賞給勇號副將銜參將許雲發陶樹恩均請以副將儘先補用
並

賞給勇號許雲發並加總兵銜游擊江福山請以參將儘先選

用並加副將銜其餘出力人員可否由臣等專案奏獎出自
天恩至總兵銜副將鄔桂芳副將胡俊友力戰捐軀深堪憫惻
均請照總兵陣亡例從優

賜卹以慰忠魂此外陣亡各員弁容俟查明彙案奏卹所有官
軍克復各城隘及九洑洲緣由謹會同大學士湖廣總督臣官
文江蘇巡撫臣李鴻章浙江巡撫臣曾國荃恭摺由驛六百里
具奏伏乞

皇太后

皇上聖鑒訓示謹
奏

近日軍情片

同治二年五月二十七日

再近日軍情壽州一城苗逆圍攻如故蔣凝學毛有銘等於五月十三日毀東皋峰逆壘數座該逆續調悍黨增修多壘意在以長圍久困城內米糧久罄殺馬食士聞苗黨有夜棹小舟運麥八石以濟城中者可知從苗之心亦不甚堅臣現檄周寬世四營紮迎河集及四十里鋪保蔣凝學等之後路成大吉於十四日在麻城之宋埠拔隊亦令併援壽州以厚兵力其濱江一帶自九洑洲攻克後畱蕭慶衍駐江浦浦口以固北岸之防派鮑超渡江進紮孝陵衛以合金陵之圍十四日吳坤修萬化林等水陸勦賊破楊四渡六壘王可陞何紹彩周萬倬等併在裴

公渡雁翅斗門連破七壘遂收復金寶圩距蕪湖金柱關百里
內已無賊蹤西河灣沚各防亦均穩固甯國守將劉松山先於
初八日赴涇縣與易開俊會剿灣灘大坑之賊獲一勝仗十六
日僞襄王奉王等股一由章家渡擾及丁村一由大坑逼犯涇
縣易開俊分隊出擊力戰卻之其青陽守將朱品隆旣破梅林
兩卡又毀陵陽鎮四壘直薄石埭城下屢攻未克回軍仍駐青
陽徽州嶺防近無戰事饒州景德鎮一帶劉勝祥於十二日獲
一勝仗劉典席寶田於十四十五日各獲勝仗李榕抵湖口後
因病卒太多賊勢太眾尙未接戰俟江忠義到湖口與饒軍兩
路并進江西各賊股必可悉就驅除

臣

當檄江忠義李榕席寶

田等各率所部自石太漸進東壩則攻取金陵老巢較有把握

矣然金陵城大賊眾諸酋目眷屬資財萃聚於斯洪逆老於戎事又畱僞忠王不援蘇州共守金陵斷無輕棄之理必須力斷接濟仿照昔年攻九江安慶之法嚴防江路禁截賊糧則百餘里之城數十萬之賊專恃肩挑陸運勢必不給數月以後當有因飢內訌之事查前此長江上下輪船與紅單師船均不免暗中濟賊除紅單船一項由臣設法查禁外輪船往來剽疾稽察尤難應請


旨勅下總理衙門照會英法各國公使於金陵未克以前不得在該城外停泊輪船庶該逆城孤糧絕不至又成持久之局所


有近日各路軍情合先附陳大概伏乞

聖鑒訓示謹

奏







曾文正公奏稿

卷之十九目錄

覆陳金陵壽州軍情摺

同治二年六月十二日

覆陳南洋通商大臣無庸改設摺

全日

同治元年下半年淮南徵課數目摺

全日

彙報各路軍情摺

六月二十七日

彙報近日各路軍情摺

七月十二日

催調黃翼升赴臨淮片

覆陳淮鹽不能赴陝片

湖口防軍勝仗摺

七月二十七日



近日軍情片

江西遵辦茶葉落地稅片

覆陳籌援臨淮摺

八月十二日

丙丁戌三綱淮北鹽課奏銷摺

全日

金陵軍攻克上方橋江東橋石壘摺

八月二十七日

近日軍情並調金國琛回皖片

調回派辦粵釐各員片

青陽援師大捷解圍摺

九月十二日

近日軍情片

京倉需米照部議妥籌摺

九月二十二日

近日軍情片

甯國涇縣防軍勝仗摺

九月二十七日

查辦革鎮黃彬參款訊明擬結摺

全日

恭謝天恩摺

九月二十八日

金陵軍疊克八隘并復秣陵關摺

十月十二日

古隆賢率眾投誠收復三縣摺

全日

近日軍情片

聲明石太旌甯四縣失陷緣由片

克復水湯東垣等隘高淳等四縣摺

十月二十七日

李世忠軍破苗圩復懷遠縣摺

十一月十二日

近日軍情片

十一月二十七日

李續宜病故遺書代陳摺

近日軍情片

欽奉諭旨覆陳四條摺

十二月十二日

恭謝天恩並陳近日軍情摺

十二月二十七日

覆陳金陵壽州軍情摺

同治二年六月十二日

奏爲欽奉

諭旨恭摺覆陳仰祈

聖鑒事同治二年六月初四日承准議政王軍機大臣字寄五
月二十七日奉

上諭曾國藩前奏鮑超等軍追賊已至江浦飭令攻克二浦後
卽進攻九洑洲茲據都興阿等所奏江浦浦口已於本月初九
日攻破七里洲於十二日攻破九洑洲於十五日攻破九洑洲
爲江中要地賊踞堅壘數年之久官軍此次攻克竟能敏速如
此都興阿等所奏諒係實情曾國藩奏報是否業已在途著卽

將詳細情形迅卽馳奏都興阿等摺內所稱忠逆帶隊渡江援浦爲梁正源截擊於寶塔根賊遂敗竄現在竄往何處下關七里洲之賊向中關回遁其九洑洲踞賊斃溺而外是否尙有餘匪紛竄均須確切查明妥籌堵剿曾國荃業將雨花台賊壘攻克茲九洑洲又爲鮑超等乘勢埽除金陵勢成檻穽其機大爲可乘應卽如何相機進擣及會商左宗棠李鴻章進攻蘇杭使賊應接不暇以圖進取之處曾國藩諒必成竹在胸惟窮寇必思鋌走江路水陸寬廣備禦宜嚴裏下河一帶尤應嚴密設防等因欽此又於初八日續奉六月初一日

上諭二浦九洑等洲克復情形迄今尙未據曾國藩奏報前據

都興阿等奏到當經寄諭該大臣迅將詳細情形及水陸進取
機宜迅速馳奏此時諒已奏報在途其馮子材等規復丹陽進
兵機宜並著該大臣妥籌指示策應調度以期互相犄角毋誤
戎機唐訓方前奏爲苗練所困情形甚爲急迫連日總未得其
奏報塵系殊深疊經諭令曾國藩設法撥兵馳援現在臨淮壽
州蒙城等處該大臣曾否派兵前往救應如何布置及各該處
現在情形如何著曾國藩迅速馳奏等因欽此仰見我

皇上軫懷南服須臾不忘竊二浦九洑洲等處距揚州較近而
去安慶甚遠揚州距京較近而安慶又稍遠臣於二十一日聞
九洑洲克復之信二十五日始接各營公牘卽於二十七日馳

奏郵路阻長不得與都興阿同時奏到早慰

宸廑致

朝廷殷殷晷念無任慙悚各軍戰狀臣已詳細馳報其金陵近

日布置與苗逆近日情形理合縷晰覆陳

諭旨垂詢餘匪紛竄安籌堵剿及嚴防裏下河一節臣查三月

之杪僞忠王銳意犯鄂自攻撲石澗埠廬舒六安等城連不得

逞折而東趨又聞其銳意以犯揚州并犯裏下河厥後李鴻章

之兵攻破崑山進逼蘇州曾國荃之兵攻破雨花台各石壘而

巢縣和含次第克復於是逆謀大亂紛紛南渡遠救蘇州近救

金陵天六來安瓜洲之賊不擊而自退江浦橋林浦口之賊不

攻而自破在忠酋之意收回江北羣賊以全力保守江南僅留精銳分守九洲七里洲等壘與金陵相犄角爲堅拒不拔之基不料我軍大舉進攻正值羣賊甫渡中洲未達南岸之際凡競渡之賊與守壘之賊蟻聚於濠汊蘆葦之中各礮船繞洲圍攻登岸搏戰數萬悍寇悉數聚殲縱偶有倖脫者亦不過逃歸金陵老巢實未嘗紛竄江北致貽裏下河之患此臣自去冬以來所深慮至是始稍釋隱憂者也

諭旨垂詢如何相機進搗會商滬浙攻取蘇杭一節九洲洲甫克以後臣卽檄鮑超南渡檄蕭慶衍防守二浦旋接楊岳斌會國荃來函請調蕭慶衍同渡南岸紮駐神策門一帶而以鮑超

一軍繞過鍾山直達孝陵衛漸圖合圍爲持重之謀者則以城垣太廣兵力尙單不宜遽求合圍恐大股援賊齊至一隙可乘全局俱震爲制敵之謀者則以浙攻富陽滬攻蘇州金陵亦宜迅速合圍使該逆備多力分不遑兼顧或者致力於金陵收效於蘇杭三處有一得手兩處可期并下臣亦主合圍制敵之說與

諭旨所示使賊應接不暇者暗相符合特勁旅無多不足以斃深根之寇擬俟江西邊境蕩平再調江忠義李榕席寶田等軍由皖南漸趨東垣會剿金陵一面咨請揚州鎮江防兵前來協剿亦非旦夕所能集事此籌剿金陵老巢之大略也

諭旨垂詢壽州蒙城近日情形一節苗逆復叛以後臣先後飭派蔣凝學毛有銘周寬世成大吉等援救壽州壽州三面環水僅南門一面可通又以賊寨林立與水際礮划相爲倚護四月二十八日之戰毀牛尾岡三壘五月十二日之戰毀東皋峯數壘二十六日猛攻城外賊壘未下而我軍三次苦戰已損精銳二千餘人之多據署知州毛維翼遣死士晁水出城稱城中野草雜蔬摘食俱盡道殣相望勢將不支蔣凝學毛有銘以重金啗苗圩潛運米麥進城冀再堅持數日成大吉趕至必可合解重圍不謂六月初二日運米者甫入而下蔡外委邱維城旋於初四日四更舉城獻賊毛維翼力戰死之臣以壽州旣陷皖北

與豫鄂三省震動乃檄蔣凝學暫駐三河尖辦足米糧移紮潁
州以保要郡而衛豫境檄成大吉仍紮三河尖以蔽鄂疆檄周
寬世退紮六安州以固皖省毛有銘暫駐六安爲諸路游擊之
師亦因傷亡過多難遽進剿也苗沛霖旣得壽州凶燄彌熾勢
必窺伺臨淮臣現飛調何紹彩四營由甯國北渡馳赴臨淮歸
唐訓方調遣前調之黃翼升淮揚師船須俟李朝斌抵滬後始
得交替防務上駛入淮輾轉需時尙恐緩不濟急又飛咨彭玉
麟楊岳斌選派舢板八十號星赴臨淮援剿苗逆待黃翼升到
淮仍令各回本汛臨淮能否保全尙不可知其蒙城一軍則更
無兵撥鞭長莫及憂愧徒深此壽州失陷後力圖補救之情形

也伏查去冬今春危險疊生自巢含二浦九洑洲次第克復長江數千里盡爲我有江北髮逆一律肅清方幸大局旋轉澄清有日不謂苗逆煽亂壽州被陷是皆微臣治軍無狀調度多乖愧憤曷已運同銜署安徽壽州知州毛維翼忍飢撫士扶病登陣以練丁五百人苦守七十六日民皆效死弗去卒至食盡力竭城陷同殉亮節孤忠一時覓絕惟有籲懇破格恩施准將毛維翼追贈道員照道員陣亡例從優賜卹仍於原籍及死事處所建立專祠以彰忠盡其餘在城文武員弁俟查明另行辦理自李續宜丁憂回籍臣卽兼統其部下四軍去歲賊竄江北驟失三城臣調蕭慶衍毛有銘兩軍南

援遂將防守壽州之三營移駐六安等處今歲苗逆既叛又不能以全力撲滅苗黨仍留蕭慶衍會剿巢縣調成大吉回援鄂省實有顧此失彼之咎應請

旨將

臣

交部嚴加議處至各軍救援不力均有應得之咎布政

使銜安肅道蔣凝學首先調援初到壽城稟請破苗解圍確有把握厥後一戰失利自悔輕敵貽誤匪淺應請

旨革去布政使銜記名提督成大吉在湖北接到飛檄久不成行五月十四日在麻城之宋埠拔隊遲至二十四日始抵固始又復逗遛數日竟未趕至壽州實屬遲延玩誤請

旨將成大吉撤銷勇號以參將降補稍示懲儆仍各留營帶隊

以觀後效按察使銜記名道毛有銘同辦一事厥咎維均惟該員前在石澗埠苦守半月終解重圍克復東關之後馳驅數百里赴援六壽瀕行之時其缺餉與成大吉相同而拔隊迅速不敢稍誤師期功過尙足相抵應請免其置議所有遵

旨覆奏緣由恭摺由六百里馳陳伏乞

皇太后

皇上聖鑒訓示謹

奏

覆陳南洋通商大臣無庸改設摺

同治二年六月十二日

奏爲南洋通商大臣一缺籌度現在情形仍請無庸改設恭摺
覆陳仰祈

聖鑒事竊

臣

於上年六月初六日奏改長

江通商大臣一案經

總理衙門議將駐紮處所及廉俸各款請

旨仍飭

臣

會同薛煥酌定具奏

臣

遵卽與薛煥往返函商悉心

籌畫統計通商大臣廉俸一項添設官屬書役等項每歲約需

銀四萬餘兩目前卽無庸另建衙署而於長江各口租備行館

僱用輪船所費亦屬不貲數年後漸推漸廣勢必有增無減濱

江四省中外交涉事件果能一一取決於專設之大臣誠不敢

爲

國家惜此帑項惟事有粗論之而僅得其端倪細審之而始盡其曲折者薛煥奉到會議廉俸之

旨又經專函與 縷商具道長江通商使臣所以可裁之故蓋有數端其大意以爲自各國公使駐京一切裁決於總理衙門凡各口洋人偶違條約有時可與力爭則可就關員結辦卽臨以督撫而有餘有時爭之不服則動向公使陳訴雖臨以大臣而無濟大臣巡歷各口督撫近駐本省洋人性急弗耐守候不能不由本省就近辦理有時督撫奏咨未及到京而公使早已周知郵遞之稽遲尙不及輪船之迅速況由大臣輾轉覈咨更

恐貽誤事機至華洋商民爭鬪搆釁關涉刑名案件事隸地方
有司尤不能不資督撫之力庶飭辦易而呼應更靈通商縱有
專員在內仍不能免總理衙門之煩瀆在外仍不能減各省督
撫之責任虛繫一官有名無實各等語剴切見商臣比致覆書
深服其言之精當然猶以蘇皖羣盜如毛臣專謀軍事恐難
兼顧洋務厥後李鴻章奉

命兼領通商大臣數月以來秩然就理益信華洋交涉之事均
係置吏必不可省之事是五口大臣固屬可裁卽長江大臣亦
同虛設相應請

旨仍照薛煥原奏裁撤通商大臣一缺歸併本省督撫及將軍

經理以節糜費臣於中外撫馭機宜向未諳究而因時權變又何敢以奏設在先堅持初議曲爲迴護所有南洋通商大臣仍請裁缺緣由謹繕摺由驛具奏伏乞

皇太后

皇上聖鑒訓示再此案前經臣咨請薛煥主稿會奏逮薛煥定稿寄皖卽已束裝北上近始接其到京來函是以覆奏稍遲亦不復會銜矣合併聲明謹

奏

同治元年下半年淮南徵課數目摺

同治二年六月十二日

奏爲查明同治元年下半年淮南徵課數目仰祈

聖鑒事竊查淮南試行稅鹽奏明按半年一次造報前已報至同治元年上半止茲查同治元年七月起至十二月止共徵收稅課銀十三萬六千九百八十兩三錢九分八釐又外江鹽釐銀十一萬七千七百七十九兩七錢八分二釐又外江內河鹽釐錢十三萬六千七百九十九千三百六十四文除隨時解支江皖軍需水陸營餉並支銷鹽屬養廉外計存外江鹽釐銀二千四百四十六兩九錢一分七釐一毫錢六千三百三十二千六百五十三文已彙入二年分徵收銀錢分別湊解軍需核計

下半課釐比較上半所收數目均屬有盈無絀據運司喬松年
詳請具奏前來臣覆核無異除冊送部科外理合恭摺具陳伏
乞

皇上聖鑒敕部查核謹
奏

彙報各路軍情摺

同治二年六月二十七日

奏爲彙報各路軍情先陳梗概仰祈

聖鑒事竊金陵與壽州等處軍情

臣

於六月十二日馳奏在案

近日探報僞忠王侍王均隨洪逆堅守金陵搬運蘇州之糧接濟老巢曾國荃一軍自五月十五十八等日攻破金陵南城角長干橋一壘二卡後圍逼如常別無戰事鮑超至鍾山築營將竣本擬移紮孝陵衛旋因自染暑瘧又以軍中疾疫大作死亡相屬恐前敵爲賊所乘遂平毀鍾山營基仍駐神策門沿江一帶金陵城下暫難合圍

臣

亦以江西未靖皖南方棘恐鮑超須調剿上游不敢令其遽爾合圍也蕪湖甯國南陵涇縣各城金

柱關灣沚青弋江各隘雖抽調何紹彩西河一軍而水陸防守
幸均完固僞輔王楊七麻等股在於東水陽新河莊結卡踞守
亦未敢伺隙內犯二十至二十六等日甯國守將劉松山會約
涇縣守將易開俊剿賊於黃村北貢里曹村考坑蕎麥灣等處
四戰四捷朱品隆亦自青陽會剿於木竹潭順安鎮黃柏嶺等
處獲勝三次斃賊極多前據搜獲僞文忠酋欲調黃李古賴各
賊回援金陵近則并無其事古賴劉藍等逆仍在太石涇旌之
交黃李等逆則麤聚於湖口都鄱一帶數月以來江西官軍與
左宗棠派援之師苦戰苦守屢獲勝仗景鎮鄱陽之賊次第退
竄沈葆楨又咨調江忠義專剿湖口滿擬卽日全境肅清六月

初二日韓進春在洋塘挫潰凶燄復張目下賊勢趨重湖口一路六月十七日猛撲江忠義堅山營寨李榕部將陳由立援勦獲勝旋以追賊致挫十九二十三等日復來堅山圍營攻撲甚猛江忠義雖係宿將而所部老勇較少新募居多李榕則全係新立之軍未經大敵殊可危慮由湖口下至彭澤馬當東流上至屏峯南康都昌濱江濱湖一片逆氛臣現咨商彭玉麟多帶礮船親赴湖口援勦江西

寄諭所示廓清江境然後併力皖南規取金陵誠爲確不可易之理卽當欽遵辦理苗逆旣陷壽州北圍蒙城益力又遣黨至汪家集西伺霍邱蒙城勢尤危迫臣與唐訓方均無兵可撥鞭

長莫及憂灼徒深霍邱居三河六安之中迤東北曰溜子口密
邇正陽最據形勝臣令蔣凝學暫不赴三河尖就駐防溜子口
令周寬世撥三營駐防迎河集該二處皆賊所必爭兵力過單
未知能穩守否毛有銘所部則守六北壽南之老廟集以杜野
掠而保米糧且令良圩有所依附不致盡叛歸苗指日水師入
淮或者大舉會討較有下手之處除各路戰狀分案續報外所
有近日軍情合先由驛具陳大概伏乞

皇太后

皇上聖鑒訓示謹

奏

彙報近日各路軍情摺

同治二年七月十二日

奏爲彙報近日各路軍情恭摺仰祈

聖鑒事竊自大江南北兩岸軍事孔亟歷奉

寄諭指示周詳殷殷以金陵江西及淮上各防爲慮其大概情

形臣於六月二十七日具奏在案茲復就近日戰守事宜分晰

條列續陳於左

一金陵各軍疾疫過半鮑超所部霆營爲尤甚僞忠王侍王輔
王章王等糾率悍黨堅守老巢時復伺隙出戰以圖一逞六月
二十二日突分兩枝一出儀鳳門直撲鮑超霆字右營一出太
平門繞撲劉連捷南字等營我軍轟擊竟日負創而遁七月初

一日又以西瓜炸礮猛攻劉連捷下關營寨勢更兇悍得水師協力苦戰擊退而李成謀與劉連捷各受槍傷幸不甚劇聞白齊文投人賊中以重金廣置礮礮分解金陵現在劉連捷營外明掘直濠暗開地道計日內必有數次惡戰又准李鴻章鈔送忠酋等僞文新調僞護王潮王同援金陵展王爲王改守句容但願羣逆畢萃金陵或者蘇常等處有機可乘未始非官軍之利也

一毛鴻賓請調張運蘭入粵欽奉

諭旨垂詢所部老湘營能否調往飭臣酌量辦理張運蘭自上年十月間因病回籍所部湘勇十營卽派部將易開俊劉松山

各統五營分守甯國府涇縣兩城甯國當廣德建平之衝涇縣
當太平石埭之衝易聞俊等內防外勦屢卻賊氛城垣賴以保
固所駐皆係最要之地臣處別無換防之師接據毛鴻賓來畱
亦以該營欠餉過多一時恐難抽動已令張運蘭另募三千人
帶赴粵中則原部湘勇自應仍留皖南以資得力

一太平石埭之賊堅踞如常六月十七日分股進章嶺羊棧嶺
竄入黟縣意將由上溪口衝出婺源就食江西十八日王文瑞
自祁門督軍會合劉典留守漁亭之各營併攻黟城一戰克之
驅賊至嶺外十數里擒斬甚眾此次幸仗

天威勦辦極速不使徽州更增一患卽免江西再設一防

一江忠義李榕兩軍駐守湖口六月十九日堅山之戰僞堵王黃文金實負重傷二十八日剿賊於陳兵馬水車港等處二十九日追賊於梧桐嶺太平關等處分道馳擊均獲勝仗七月初三夜堅山營中俯瞰文橋賊巢火光隱約江忠義知賊將宵遁約李榕於將曙時引軍襲破諸壘賊乃敗過黃沙嶺分竄都昌彭澤境內湖口已無賊蹤江忠義等加派隊伍裹帶乾糧馳追三日尙未收回前奉

聖諭速由湖口與饒軍並進將江境各賊悉力驅除由石太進取東壩有此一捷賊鋒稍挫如江西一律肅清臣卽當催令江忠義李榕等欽遵

前旨妥速辦理

一恭奉六月初五日

諭旨垂詢李世忠作何動靜臣隨時奏聞李世忠之心跡中

外皆不敢深信臣於二月二十七日亦經密陳及之乃二浦並

陷深感

聖主之不加嚴譴九洑洲既克又畏楚軍之難與抗衡臣察其

愧悟漸生頗知斂抑亦復推誠相待事事示以不欺近接該提

督來函有五河地方爲臨淮後路倘苗逆下竄誓必堅守五河

決一勝負等語李世忠與苗逆積怨甚深其欲發憤勦苗旣伸

公義又報私讐似屬出於至誠近曰臣處餉項極絀數月以來

並無銀米子藥解濟滁州李世忠亦無怨望之意若坦然相處當不至別生枝節

一苗逆圍陷壽州後遣黨在正陽關增壘浚濠尚未蠢動何紹彩陸師四營於六月二十六日取道廬州前進彭玉麟楊岳斌所派舢板八十號亦於二十二二十五等日由九洑洲先後開行計此時均已趕到臨淮得此水陸倚護唐訓方之老營可期穩固惟蒙城糧路將絕危殆萬分恭讀六月十九日

諭旨命臣另籌一軍赴潁上擣苗逆老巢能否於江北陸路防

軍內抽調勁旅或徑援蒙城或由定遠馳抵懷遠等因查江北陸營如蕭慶衍所部駐防江浦浦口周寬世所部分防桐城六

安迎河集等處蔣凝學所部分防潁州霍邱三劉集等處大吉所部扼防三河尖一帶毛有銘所部扼防老廟集一帶各守要區萬難抽撤此外實無一枝勁旅可援蒙城並赴潁上無以仰慰

宸廑曷勝愧悚以上六條均係

諭旨垂詢之件及各路布置情形除戰狀分案續報外合先逐條詳列由驛五百里馳陳伏乞

皇太后

皇上聖鑒訓示謹

奏

催調黃翼升赴臨淮片

同治二年七月十二日

再臣前調黃翼升淮揚水師由洪澤湖赴援臨淮須俟李朝斌太湖水師到滬後交替防務始得自上海拔營渡江西上誠恐輾轉需時緩不濟急因飛商彭玉麟楊岳斌等在長江各水師營中暫派舢板八十號先赴臨淮日內計可趕到而太湖師船陸續入滬李朝斌亦可卽日抵防上海戰船足敷分布相應請旨敕下署江南提督黃翼升親統淮揚水師之半刻日駛往臨淮仍分一半留滬助剿責成該署提督往來布置兼顧淮滬兩防俟克復蘇州後卽將駐滬各營分紮洪澤湖以下巡防淮揚通泰等處駐淮各營分紮洪澤湖以上巡防淮潁澮渦等河至

江南提督一缺黃翼升既赴臨淮未便攜印入皖應懇
天恩卽令浙江處州鎮總兵李朝斌就近在滬接署以重職守
其黃翼升一軍所需糧餉子藥目下應由李鴻章全數供支將
來唐訓方事機漸順餉項漸裕卽由蘇皖兩省各支一半臣處
鹽務稍有起色亦必多撥鹽稅供支該軍以期與淮揚二字名
實相符理合附片陳請伏乞

皇太后

皇上聖鑒訓示謹

奏

覆陳淮鹽不能赴陝片

同治二年七月十二日

再臣欽奉四月初九日

寄諭瑛榮奏請飭兩淮籌撥陝餉等語據稱陝省司庫空虛自上年四月以來有出無入羅掘已罄各屬糜爛耕種盡廢偶有麥秋徧地萑苻難期收穫錢糧既無從徵收捐借更難以彙集窘迫萬分查淮鹽北課向充皖省軍餉而江運八萬積引本在淮課之外上年勝保奏請江運改湖八萬引改撥陝省業經奏准在案此時陝餉缺乏已極請江運八萬引仍撥陝省等語西安省防各營兵勇欠餉纍纍鄰封所撥協餉又均未解到若非量爲接濟勢必譁潰堪虞瑛榮所請飭下兩淮鹽運使照舊將

江運八萬引仍撥陝省派委道府大員前往接濟招商捆運以充軍食之處是否可行著會國藩督飭兩淮鹽運使體察情形妥籌速奏等因欽此遵卽前行前運使喬松年妥籌議去後茲據詳稱前大臣勝保奏撥淮北餉鹽十五萬包一案初議在臨淮營及撫營滁營各分半成協濟嗣奉續奏在江運改湖積存餘引項下撥出領運又經查明江運八萬餘引係在淮北奏銷額行二十九萬餘引之中有歷年造報冊籍可稽若於額引內提出江運引數皖餉愈形短絀當將未能遵辦情形通詳奏停在家今陝西撫院奏稱本在北課之外已屬與案不符且目下情形亦與上年冬季大不相同上年淮河通行餉鹽可以出

湖銷售故勝保奏撥之鹽雖有礙於皖餉猶可酌濟秦中現在
淮河有苗逆梗阻鹽船被劫萬難上駛皖營應提之餉鹽尙且
無可運銷何能再爲陝省籌計原奏內所稱派委道府大員前
往接辦招商捆運當此咽喉梗塞無商可招無路可運卽皖餉
亦自顧不遑勢難兼顧陝餉等情請奏前來臣查苗逆復叛淮
河梗阻皖營之鹽疏銷無路若使撥鹽濟陝亦屬無處銷售該
運使所議委係實在情形應請無庸置議所有遵
旨妥籌緣由理合附片覆陳伏乞

聖鑒謹

奏

卷之七

七

湖口防軍勝仗摺

同治二年七月二十七日

奏爲湖口各軍疊挫賊鋒遂毀文橋堅巢羣賊悉遁恭摺彙報
仰祈

聖鑒事竊自江忠義李榕督軍進次湖口擊賊屢勝臣於六月
二十七暨七月十二等日節次具陳大概在案先是僞堵王黃
文金糾合諸賊酋於二月由皖入江分擾鄱陽浮梁祁門都昌
境內屢爲劉典段起席寶田韓進春等軍所扼不得深入江西
乃折而西竄趨重湖口分爲三路上路曰文橋中路曰梧桐嶺
下路曰太平關袤延三十餘里而文橋賊勢最重凡堅壘七座
黃逆親踞其中浙江鹽運使李榕自彭澤頂家山一捷後聞湖

邑告急於五月十四日移營湖口之三里街越十數日江忠義亦率所部自九江東渡會師於馬影橋六月初九日雕勦殷家山徐家嶺之賊展旗一進不戰而卻江忠義旋紮堅山以偪之十七日賊由文橋出大股三萬餘眾分道來犯江忠義留兵守定老營隨令徐士巍徐生德王順慶等直前迎敵而以李祥松劉光文林志金等爲左翼江忠寬黃仁遺權光燦等爲右翼仍親督陳鳴志江忠華馬步各營從後繼進戰不兩時李榕部下鄭陽和楊春華兩營前來會勦突出堅山之右列陣裏賊李榕以賊方眾悍勢恐不敵飛騎止之而鄭陽和已衝過曹均橋與賊戰於田壠一馬中槍而逸羣馬卻後幾亂步隊李榕抽刃壓

定陣腳江忠義麾軍驅殺至數里外賊乃回戈轉鬪且卻且前
哨弁黃忠勝李光明李士青江忠修鄧在仁黃守和等縱橫盪
擊各負重創李榕部將陳由立大呼陷陣殲悍賊百餘人盡力
窮追深入敵境誤爲伏賊所鈔急引軍躍出重圍士卒已傷亡
九十五人十九日賊以大枝匿於酬山張天社一帶乃以小枝
薄營誘戰江忠義戒諭將士堅壁不動賊始計沮悉衆來攻排
列五六層猛撲十數次官軍但以槍礮外轟遇者輒殪忽有一
酋指麾衆賊賊無敢反顧者江忠義詢之降卒知爲逆渠黃文
金俟其撲近花籬聚羣槍同時並發應聲而仆賊遽譁亂爭昇
以行餘亦相率竄走據生擒賊供逆酋黃老虎實受重傷而奔

此六月十七十九等日賊犯堅山各營合戰獲勝之情形也自黃逆負創後賊爲氣奪悉屯文橋壘後匿不復出江忠義李榕周厯形勢共籌進取必以一營斷梧桐嶺來賊二三營防文橋壘賊而以全力注陳兵馬地方庶有下手之處二十八日江忠義率精捷九營進陳兵馬中左兩路李榕率鈞字五營出左路之左進水車港鄭陽和策馬當先手刃瞭望二賊楊春華麾隊繼之轉戰而入江忠義遙望樹林陰翳中賊旗隱約卽督中軍親兵鼓行疾進兩鋒相交火器燃發槍子雨飛何明立鄭長來聯騎齊驅將賊蹙逼出林直薄陳兵馬賊館賊復增黨決戰陳由立正在傍山搜剿見鄭陽和楊春華從左路橫躍入陣急催

部卒併赴前敵與江忠寬陳正珀猛進猛擊賊乃大潰但以呂
股繞出縱焚邨舍徹夜擾我次日李榕率偏師突出擊之由太
平關一路打散刈稻之賊數百小有擒斬江忠義分軍爲二一
出花尖山一出毛家店所向辟易張寶鑑橫槩直入殪騎於陣
旋以中賊三矛逾時殞命各營奮力馳護數路並進林志金江
忠倬亦自花尖山移軍來助賊不能支敗過梧桐嶺惴伏不動
者數日適會劉典席寶田等有南路青山橋之捷賊於是有退
志矣七月初三夜江忠義在堅山營中俯瞰文橋七壘火光熒
熒若隱若現度賊將遁約李榕部隊於五更時出營會剿仍先
遣勇士潛至壘下鳴號鼓以驚賊賊不虞官軍之猝至惶遽不

知所爲各勇乘勢踰濠蟻附而上比江忠義李榕全軍踵至眾壘已平遺棄米穀相望於道於是各整隊伍裹四日糧越黃沙嶺馳斬尾股足無停趾直出建德所屬之羅家畝上下房等處殺賊二千有奇積尸塞路始於初八日整旅而還此六月二十八九等日擊賊疊勝七月初三夜攻奪文橋及連日追勦之情形也臣查皖南各賊圖竄江西邊境不得逞於饒州景鎮遂欲佔踞湖口徐擾腹地經江忠義李榕等擊傷悍目攻毀老巢使賊不敢駐足江境次第肅清實屬有裨大局其應獎應卹人員除江忠義一軍應由沈葆楨奏請外李榕一軍可否容臣查明酌獎之處出自

聖恩至花翎守備張儀卿楊友和藍翎守備劉喜祿王俊傑沈
克明藍翎千總汪春旺金家見張先亮藍翎把總夏楚寅譚正
與韓得勝馮玉峯外委楊興隆等十三員弁均係力戰陣亡應
請

敕部各照本職從優議卹以慰忠魂所有湖口防軍屢獲勝仗
各賊全遁緣由謹繕摺由驛五百里馳陳伏乞

皇太后

皇上聖鑒訓示謹

奏

嘉和卷十

近日軍情片

同治二年七月二十七日

再近日軍情會國荃一軍派劉連捷駐營下關自六月二十二至七月初六該逆猛撲數晝夜洋鎗礮礮多而且悍經劉連捷竭力擊退會國荃因北路喫緊力攻南路以掣賊勢七月初八九日大戰獲勝攻毀印子山賊壘調蕭慶衍由江浦南渡分守要地鮑超病體尙未全愈其將卒雖亦多病然較去歲則已少矣蕪湖守將吳坤修於十七日約會水師迎擊於雙斗門破其二壘乘勝追至水陽金柱關蕪湖兩防均可鬆勁甯國南陵涇縣灣沚清弋江各防近亦均無戰事惟湖口肅清之後江西羣賊悉數東趨行走剽疾二十日已繞過池州進撲青陽縣城守

將朱品隆督軍固守二十一二等日賊又以全力來撲四面合圍環城而營朱品隆所部七營營官病者四人其胞弟甫經病故朱品隆亦抱病甚重昇疾登陴未知能否堅守待援現在劉典一軍回駐徽州江忠義李榕席寶田三軍臣檄令作爲潯饒徽甯池五郡游擊之師李榕已抵東流江忠義席寶田亦以病多夫少尙未拔營入皖但願青陽保守無恙各軍陸續前進則皖南大局不至決裂苗黨之據壽者跽伏未動蔣凝學毛有銘周寬世成大吉所部各駐要區防守尙穩蒙城解圍以後賊聚懷遠普承堯張得勝等攻懷之師已被該逆截斷後路糧運梗塞臣所派赴援臨淮之何紹彩陸師二千人王吉丁泗濱舢板

八十號已據先後到防十三日水陸並進水師攻奪宋家灘礮
划數十隻惜河洲一壘未破前敵糧運仍爲賊阻其留守臨淮
者兵力過單別無可濟之師殊少自全之策北顧淮甸殷憂曷
已除各路戰狀分案續奏外合先附陳梗概伏乞

皇太后

皇上聖鑒謹

奏

卷之二十一

三

Table with 10 columns and 10 rows of text.

八	十	二	三	四	五	六	七	八	九
十	二	三	四	五	六	七	八	九	十
二	三	四	五	六	七	八	九	十	二
三	四	五	六	七	八	九	十	二	三
四	五	六	七	八	九	十	二	三	四
五	六	七	八	九	十	二	三	四	五
六	七	八	九	十	二	三	四	五	六
七	八	九	十	二	三	四	五	六	七
八	九	十	二	三	四	五	六	七	八
九	十	二	三	四	五	六	七	八	九

江西遵辦茶葉落地稅片

同治二年七月二十七日

再咸豐十一年十二月接准戶部來咨廣東巡撫覺羅耆齡奏抽收茶葉落地稅一案經該部核議具奏請

旨飭下湖南湖北江蘇安徽江西浙江福建各督撫詳細查明各本省產茶及設立茶庄處所妥議章程奏明辦理奉

旨依議欽此並鈔錄原奏咨照到臣查江西自咸豐九年詳定章程分別茶釐茶捐兩宗每茶百斤除境內抽釐銀二錢出境又抽釐銀一錢五分有零外向於產茶及設立茶庄處所勸辦茶捐每茶百斤捐銀一兩四錢或一兩二錢不等填給收單准照籌餉事例彙齊請獎歷經分別辦理在案臣於咸豐十年五

月將江西全省釐務奏明充臣軍餉仍照舊章辦理因捐釐銀數既多如再徵收落地稅民力恐有未逮此遲遲未辦之緣由也本年三月二十二日據九江關署監督蔡錦青詳稱遵照戶部奏准飭將鹽茶竹木四項統徵關稅已於三月二十日啓徵等情前來臣查江西茶葉運至九江有洋商華商之分洋商既完子口半稅固不抽釐華商既納潯關正稅亦未便再令完釐而茶捐一事多不請獎全係移獎戚友流弊百出是釐捐二者均不能不改弦更張應照戶部奏准章程徵收落地稅臣卽於六月初一日刊發告示於義甯州開辦落地稅新章惟原奏內稱大箱淨茶六十七斤徵收稅銀一兩四錢二五箱淨茶二十

五斤徵收稅銀七錢未經揉細之茶胚每百斤徵稅銀一兩四錢等因科則稍重臣復分別核減參酌茶捐向章定以每茶百斤義甯州等處徵銀一兩四錢河口鎮徵銀一兩二錢五分概充臣營軍餉由臣刊發稅單護票委員經收或業戶自行完納或茶庄代爲完稅領單及至茶葉發販時統由茶庄繳銷稅單華商換給護票洋商卽憑運照販至各處銷售除華商完納九江關稅洋商完納子口半稅外經過江西安徽各釐卡驗明放行概不准需索絲毫費資如此辦理與戶部之原奏總理衙門之條約一一符合稅單雖係茶庄經手稅銀實係業戶所出與商販絕不相干洋商不得藉口於子口半稅而禁中國之業戶

不完中國之地稅華商既免逢卡抽釐亦免致紛紛私買運照
冒充洋商似不失爲持平之道所有江西遵辦茶葉落地稅緣
由謹會同江西撫臣沈葆楨附片覆奏伏乞

皇太后

皇上聖鑒飭下總理衙門暨戶部知照謹

奏

覆陳籌援臨淮摺 同治二年八月十二日

奏爲欽奉疊次

諭旨恭摺覆陳仰祈

聖鑒事竊臣承准議政王軍機大臣字寄同治二年七月初十日奉

上諭昨因彭玉麟赴援江西諭令曾國藩迅催楊岳斌督率水師駛赴臨淮藉資援救此時苗逆勢極猖獗援兵早到一日庶得早救一日之倒懸仍著曾國藩遵旨嚴催毋稍遲玩唐訓方仍就現有兵力妥籌守禦以待援師並飛催蔣凝學周寬世毛有銘等軍迅速進紮溜子口等處約期會剿不可稍有鬆勁等

因欽此又奉七月二十四日

上諭臨淮地方關係皖北全局豈容稍有疎虞現在危急情形迥異尋常非有陸路援軍速行馳救大局將不堪設想曾國藩所部各營雖不敷分布亦當於無可籌撥之中勉力抽派一軍星馳援應等因欽此又奉七月三十日

上諭李世忠既欲出力報效與其駐勇五河專俟賊至何如督飭所部由五河星馳前進以拯臨淮之急并著曾國藩卽行札調該提督迅速進兵毋稍遲誤曾國藩接奉此旨後察看李世忠近日情形如果私讐公憤發於至誠卽將此旨摘錄傳諭並須坦白相待使之不疑令其知感知愧樂爲我用李世忠是否

可資其力此次可否摘錄傳諭並著曾國藩酌量辦理隨時覆
奏等因欽此伏查濱淮之要區有五北曰潁上曰懷遠南曰壽
州曰鳳陽曰臨淮皆緊傍淮水者也距淮稍遠之要區有四北
則濱潁河者曰潁郡濱渦河者曰蒙城南則濱淝河者曰六安
濱史河者曰固始皆匯於淮水者也自潁上懷遠壽州悉淪於
賊九處已失其三曰下唐訓方所置守者爲臨淮爲蒙城爲鳳
陽三處臣所置守者爲六安爲潁州爲固始三處情形雖稍分
緩急而皆苗逆必爭之地臣前派何紹彩陸師二千人及彭玉
麟楊岳斌所撥舢板八十號先後抵淮亦嘗戰勝一次因苗逆
徒黨日眾夾淮而軍懷遠蚌埠糧路已斷七月二十二日唐訓

方將各營撤退卽長淮衛小蚌埠一帶亦被苗逆佔據臨淮一軍危如累卵

臣

本思續撥援兵挽救全局况又疊奉

諭旨責無旁貸無如近淮諸軍如周寬世蔣凝學毛有銘成大
吉等皆扼守最要之地不能抽動周寬世所部分守六安迎河
集二處尙嫌單薄頃又調桐城一營併紮迎河矣蔣凝學所部
分守潁郡霍邱三劉集三處七月十七日攻破黃梁集西南二
圩十八九日疊平數圩該處在溜子口之南苗黨尙貫金嘯聚
其間蔣凝學派隊出劉家台湖口焚其米船盡毀羣圩遂於八
月初一日襲破倘逆老巢嚴防河路爲將來進兵溜子口之計
毛有銘所部駐守老廟集七月十七日攻破陶家三圩旋又分

紫板橋集凡壽南六北之良圩賴該軍以自保成大吉所部分
駐固始三河尖近以爲潁郡之聲援遠以爲鄂省之屏蔽而潘
塏等圩首鼠觀望亦須有該軍維繫其閒庶不至堅其公然從
苗之志凡此皆近淮諸軍難以調動之情形也至大江南岸諸
軍自江西肅清後黃文金等股七僞王圍撲青陽守將朱品隆
病勢日篤不能登陴將士病者過半苦守兩旬兵單糧絕寔寔
可危李榕之由水路赴援者甫抵離城十八里之銅埠江忠義
席寶田之由陸路赴援者現尙未至池州青陽之能否保全殊
無把握縱青邑倖保無恙而賊意在圍魏救趙將徧擾皖南最
要之區以掣金陵官軍之勢凡甯國蕪湖南陵涇縣灣沚青弋

江必將處處喫緊臣以金陵各軍新破上方橋河西二壘城賊水運已斷不得已檄令鮑超引軍西上以剿由江回皖之賊以救甯國蕪湖之急方今滬軍極盛江陰新克已將蘇浙之賊截爲數段正在得手之際本宜加功於金陵收效於蘇郡臣分金陵之兵以救皖南已屬失算若再遠救淮上所失尤大此江南諸軍不能赴淮之情形也

諭旨命臣剴調李世忠迅速進兵毋稍遲誤並垂詢是否可資其力一節李世忠中心感愧與苗爲讐是其可信之端而將弁驕恣士卒攜貳又其不可恃之端該部所駐江北州縣惟滁州五河兩城稍有關繫數年之儲蓄各營之精銳畢萃於斯論守

局則自顧身家或有堅忍之力論戰陣則向無紀律難操必勝之權果其該提督迫於公義私憤併力勦苗自未便阻其敵愾之心致啟其猜疑之漸若必調勦以資其力則臣能保該提督之無他不能必該部眾之用命萬一軍心不固前敵挫失恐五河後路又蹈二浦覆轍欲拯臨淮之急轉貽全局之憂此又臣所不能不過慮者也竊計臨淮各營何紹彩歐陽勝美等之陸師丁泗濱王吉等之水軍尙無損折普承堯張得勝挫退以後已逾半月當可收集補綴次第成軍臣處解銀二萬及子藥槍礮以資整頓倘得陳國瑞援軍迅達臨淮或者勉力支持保此危疆臣俟皖南軍事稍鬆仍當另籌一旅馳往會勦斷不敢稍

存膜視上煩

宸厪所有疊奉

諭旨緣由謹繕摺由驛五百里覆奏伏乞

皇太后

皇上聖鑒訓示謹

奏

丙丁戊三綱淮北鹽課奏銷摺

同治二年八月十二日

奏爲恭報丙辰丁巳戊午三綱淮北鹽課錢糧奏銷仰祈

聖鑒事竊據兩淮鹽運使新授江甯布政使喬松年詳稱淮北
引鹽先經前督臣奏准先儘奏額二十九萬餘引飭販領運其
溢運之十六萬餘引俟銷路通暢再行察看情形接續配運除
乙卯綱課前已照儘奏額造報外所有丙辰等綱引課自應趕
緊造報近年淮北鹽課多以鹽抵淮河通塞靡常銷市暢滯無
定不能拘定年限造報而歷年所抵鹽課自應截清數目按綱
奏銷以昭核實查丙辰開綱以後河路通行趕運趕銷解鹽抵
課濟餉所抵之課除抵足丙辰綱造報額課外餘卽歸入下綱

額數分算併報計自咸豐十年五月二十一日開辦丙辰綱起
截至同治元年十二月十五日止已足三綱造報所有丙辰綱
奏銷舊管銀無項新收咸豐六年分淮北綱食正襍各課銀二
十九萬三千三十九兩四錢八分七釐開除銀無項實在存庫
銀二十九萬三千三十九兩四錢八分七釐又丁巳綱奏銷舊
管銀無項新收咸豐七年分淮北綱食正襍各課銀二十九萬
三千三十九兩四錢八分七釐開除銀無項實在存庫銀二十
九萬三千三十九兩四錢八分七釐又戊午綱奏銷舊管銀無
項新收咸豐八年分淮北綱食正襍各課銀二十九萬三千三
十九兩四錢八分七釐開除銀無項實在存庫銀二十九萬三

千三十九兩四錢八分七釐以上三綱存銀俱經分別提解業
於冊內登註扣除實存候撥銀無造具冊揭詳請會核奏咨并
據另詳聲明造報後原冀卽開己未新綱崇上年十二月十五
日截數以後卽有江南提督臣李世忠營內封鹽之事販情惶
惑停頓三月有餘又因苗練復叛淮河梗阻以致新綱未能開
辦應俟道路稍通擇期開辦各等情前來除飭司一俟路通卽
行趕開新綱運鹽濟餉並將冊揭咨移部院科道外所有丙辰
丁巳戊午三綱淮北鹽課奏銷緣由理合會同漕運總督臣吳
棠合詞恭摺具奏伏乞
皇上聖鑒敕部查覈謹

奏

奏和卷十

金陵軍攻克上方橋江東橋石壘摺

同治二年八月二十七日

奏爲金陵陸師擊賊屢勝將上方橋江東橋諸堅壘一律毀平恭摺馳陳仰祈

聖鑒事竊本年七月初間官軍在金陵城外堵剿獲勝并克印子山賊巢業經浙江撫臣曾國荃會報戰狀在案自昔年賊據金陵逆酋楊秀清布置最密城外如九洲洲七里洲中關下關雨花台紫金山秣陵關江東橋上方橋等處類皆築壘如城掘濠如江爲堅不可拔之基曾國荃一軍今年攻克數處聲威頗震又以江東橋爲西南隅要隘飭陳湜督軍圖之上方橋爲東南隅糧路飭蕭慶衍進兵圖之七月二十日蕭慶衍率七營出

印子山之東偏賊壘而下寨城賊與七甕橋之賊竭力來爭曾國荃令蕭孚泗張詩曰李臣典等分隊堵禦俾蕭慶衍牆濠逾時而成二十二派李祥和凌有和等滾營而進更紮蕭慶衍新壘之前賊擁眾猛撲我軍力擊卻之壘成後昇巨礮晝夜環轟賊爲堅壁不出者數日曾國荃於二十九日潛遣熊登武胡松江陳壽武等繞過上方橋五里許搶築六小營以截賊後賊懼糧路阻絕乃糾數大枝悉銳來撲蕭孚泗李臣典等麾軍迎戰小有擒斬伍維壽周日昇復以騎隊從右路遠來包鈔賊始駭潰合軍追及秣陵關破十餘卡盡奪河下賊船而河西之接濟斷矣蕭慶衍知壘賊計窮傳令郭鵬程蕭恆書等營會合李祥和

和所部於夜半時各負秫桿擁至濠邊競拔地鉞大呼猛進比賊驚覺前鋒軍士半已躍入壘中曙色朦朧各軍抽刃環追悉殲羣醜罕有脫者此七月三十日攻毀上方橋河西堅壘之情形也其江東橋一路石壘高峙環繞木城外隔水二道賊以有險可倚負固拒守陳湜率吉後兩營及平字盛字恭字三營設法進攻數月不下阮明德等力戰死之陳湜積憤填臆乃置攻具建浮橋將制死於敵人而諸將未之喻也八月十一夜風霾蔽月咫尺莫辨陳湜選銳卒數百涉流而渡潛匿壘下特製絕大噴筒望空飛擲賊方驚眩不已陳必友朱載武等已衝過浮橋徑拔花籬晏恭山劉定發從右路鈔出壘後吳隆海陳汝俊

從左路鈔至旱西門陳湜旋督大隊繼進賊恃牆堅礮利連環轟擊我軍所挾藥筒爲該逆素所未見焚及木城朱載武膝壽春引死士肉薄齊登先登者負傷輒蹶陳湜率吳隆海陳汝俊抽刀壓陣士卒不敢卻顧有緣梯而上者有向礮眼中蛇行而人者賊皆惶遽失措奪路爭竄次日昧爽遂拔石壘並將眾壘一鼓下之而城中出援之賊適遇蕭孚泗張詩曰黃潤昌羅逢元趙三元各營隊伍自賽拱橋突出搏鬪移時受創而遁此八月十二日攻克江東橋各壘之情形也臣查上方橋江東橋均占形勢經諸將士悉力攻克俟上游軍事稍鬆大集新舊各軍徐圖合圍較有把握此次出力人員可否附於克復雨花台案

內酌請獎敘之處出自

聖恩陣亡員弁俟彙案開單請卹所有金陵各軍攻破上方橋
江東橋兩隘緣由謹會同大學士湖廣督臣官文江蘇撫臣李
鴻章浙江撫臣曾國荃由驛五百里具奏伏乞

皇太后

皇上聖鑒訓示謹

奏

近日軍情並調金國琛回皖片

同治二年八月二十七日

再近日軍情青陽一城黃文金等僞王圍攻已歷一月零六日
文報不通米糧久斷八月十二日李榕部將鄭陽和等至距城
十里之袁橋紮營旋被該逆攻陷喻吉三率三營繼進十八日
紮營徐家村二十一日攻破袁橋賊壘小有斬擒二十二日江
忠義席寶田兩軍繼進將合謀力戰以解重圍得朱品隆密稟
城中草根樹皮採食俱盡能否忍飢爲數日之守殊不可知青
陽迤北爲銅陵縣突有藍逆另股竄入彭玉麟派在防水師一
戰卻之其迤東爲涇縣賊股分擾劉松山自甯郡督隊至涇會
同守將易開俊剿賊於金村李村鳳村茂林章家渡等處屢獲

大勝又有花旗廣匪窺犯甯國郡城劉松山引軍回郡力戰卻之目下皖南羣盜如毛幾與去冬相似幸劉典王文瑞王沐等議由徽州分道出嶺進規石埭太平二縣而臣所調鮑超一軍亦由金陵上援先赴蕪湖甯國或可力保皖南支持全局至壽州苗逆之黨自前月破我懷遠圍師後復攻蒙城凶燄益熾八月十二夜渦河南北各營全數潰退撤至小澗集守城者僅李南華等練勇千餘人斷難倖全臨淮一路有都興阿派二千人赴援

諭旨又飭富明阿帶兵繼進李世忠亦親督五千人來會夾淮分屯尙足自固苗逆若不得逞於臨淮則上游六安潁州固始

三河尖處處喫緊周寬世成大吉蔣凝學毛有銘等各守一方
勢鈞力敵不相統屬臣曰夜憂灼深恐心志不齊調度舛錯貽
誤大局查前任湖北安襄鄖荆道降補同知金國琛與成大吉
蔣凝學毛有銘等同出李續宜部下周寬世亦出自李續賓部
下該數軍分駐皖豫之交須有人維繫其閒庶得聯爲一氣李
續宜病勢日深暫難東下臣擬親赴六安察看一切又因皖南
事急不敢遠離江濱所可調護湘營籌剿苗逆者惟金國琛能
勝此任該員疊奉

諭旨飭赴河南軍營因傷疾舉發羈留湖南尚未成行臣思皖
豫邊境同以苗逆爲鉅患潁州雖屬安徽疆土而實爲河南所

必爭之地固始三河尖雖屬河南疆土而實爲安徽所必爭之地并爲湖北所必守之地形勢雖判爲三省事權宜歸於一線現聞金國琛舊疾漸愈赴豫則須另募新軍難求速效赴皖則可通四軍之氣而固兩省之防惟有仰懇

天恩准將金國琛一員改赴皖北責令綜理周寬世等四軍營務仍往來固始三河尖等處會辦皖豫交界剿苗事宜實於兩省均有裨益除各路戰狀分案詳奏外所有軍情梗概及調金國琛會辦皖豫交界剿苗事宜理合附片陳請伏乞

聖鑒訓示謹

奏

調回派辦粵釐各員片

同治二年八月二十七日

再_臣於上年五月初三日遵奉

諭旨奏派黃冕等九員隨同晏端書辦理廣東釐務當蒙
恩准飭派前往在案現在晏端書奉

命內召粵省抽釐事宜歸於新任督撫兼辦仰蒙

聖慈垂厯殷殷以江浙軍餉爲慮

諭飭毛鴻賓郭嵩燾等經理粵釐解濟皖餉

諭旨傳宣雖末弁賤卒亦知感激圖報以毛鴻賓等兩臣之公
忠必能妙選賢俊籌濟東南是廣東釐金不患無人妥辦_臣所
原派各員如黃冕趙煥聯當時因撫_臣咨留並未赴粵李瀚章

已升授廣東臬司蔣志章吳贊誠本係廣東實缺人員此外尚有江西補用道蔡應嵩應卽調回江西當差湖南補用知府顏培鼐應卽調回湖南當差江西候補知縣丁曰昌陶慶仍等應仍調回臣營當差惟該員等隔省籌餉眾志未孚委曲勸導苦心經營始克集事均屬著有微勞除李瀚章蔣志章業經擢升三司不敢再邀議敘外其蔡應嵩一員久任江西府縣卓著循聲內方外和條理精密臣本思專疏保薦仰副聖主旁求之意目下江西需才孔亟可否籲懇

天恩遇有江西司道缺出特予升補之處出自

聖裁其顏培鼐吳贊誠丁曰昌陶慶仍四員可否容臣會商晏

端書酌予保獎恭候

鴻施臣

一面札飭蔡應嵩等次第銷差理合附片陳明伏乞

聖鑒訓示謹

奏

孝和錄
卷之十

青陽援師大捷解圍摺

同治二年九月十二日

奏爲青陽苦守三十八日援師大捷立解城圍恭摺馳報仰祈
聖鑒事竊逆匪由江入皖圍撲青陽官軍水陸進援先挫後勝
臣節次附陳大概在案初僞堵王祜王等七悍酋擁十數萬眾
在都昌湖口彭澤一帶戰敗而東遂略池州直薄青陽城下七
月二十日守將朱品隆派隊迎敵挫賊前鋒斬忠盼朝將洪逆
以徇俄而賊分兩大枝一由廟前而來偪我西南兩門一由茅
坦而來偪我東北兩門蟻聚蜂屯爭營巢窟不數日閒近城半
里環築六十六壘又數里更築七十餘壘濱河設有木城河岸
堅卡林立悍黨守之自是城中糧運斷絕文報亦阻矣二十三

四軍分道擊賊毀東門三卡西門二壘二十六七日又在
北門毀賊數卡然皆隨毀隨修不經宿而立就八月初旬以後
無日不戰戰或小勝而朱品隆病莫能興部將亦多嬰疾病漸
不可支時江忠義席寶田兩軍尙在東流李榕先率所部於初
六日由水路駛抵距城十八里之桐埠安營築堙成軍以濟初
十日李榕揚隊至洪山口該處左水右山路狹如綫馬不得上
乃令左右兩營覓民划分載陸勇約柳壽田水軍乘溪水未落
夜襲袁橋賊卡五更後李榕駕小舟從後策應少頃礮划銜尾
而上袁橋卡破盡殲據卡之賊遂於十二日派鄭陽和陳由立
各將三百人進紮袁橋守城將士遙望援兵初進亦出隊應之

奮擊西北兩門卡壘冀通內外之氣詎鄭陽和牆濠甫成被賊
撲陷水師柳壽田亦挫敗而歸陳由立以背水孤營被賊層層
圍裹封壁不動自未刻至四更苦戰固守逮賊之環攻少懈始
得振臂一呼引軍突出自是外援絕而城中飢憊益甚矣幸
所調之喻吉三陸師彭玉麟所派之喻俊明水師已達茅坦十
八日進紮徐家村城中始知援兵營壘已定眾心稍安江忠義
席寶田亦先後踵至駐軍於石壘鋪二十一日喻吉三等有袁
橋之捷越三日席寶田更進五溪橋踰嶺破卡賊遽驚潰堵逆
黃文金白刃數賊轉鬪而前席寶田撥隊鈔入卡後黃文金從
亂軍中逸去我軍併進伍家村土地壇屠戮無算而軍勢爲之

一振此七月二十至八月二十四等日賊圍青陽苦籌戰守之情形也疊據朱品隆遣死士易服而出蠟書隱語言軍中米糧既盡食及牛馬牛馬既盡食及草根樹皮閱者爲之隕涕適彭玉麟來自池州周歷形勢見董家村路口對峙二卡右枕高岡左臨溪隴卡後地稍平衍結壘者四將以拒我援軍乃與諸軍熟商議定江忠義精捷八營出董家村山後爲攻卡正兵喻吉三護軍三營出陳家村後包過田隴爲攻卡鈔襲之兵李榕先派鈞前副右兩營守定糴子店烏魚潭後路而自率鈞中左右三營徑渡西岸由獅子山頂壓下會於董家村口爲護軍接應之兵並以喻俊明柳壽田水師分進夾山洪山兩口專攻袁橋

陳家村大小羅村各賊壘爲陸師依護之兵二十七日五更尋食水陸大舉江忠義親督黃仁遺江忠寬徐生德鄭長希等行近董家村從山後榛莽中揮隊緣巖而上賊在巖腰燃發洋槍先登者中槍輒蹶黃仁遺率王高來身先禦之江忠寬自右路鈔上巖腰遇賊卽砍無一脫者徐生德乘勢躍過濠溝撲卡直入而護軍旗幟出自田隴喻吉三涉水而前水深及腹盡焚路口二卡遂合黃仁遺鄭長希等擊退援賊移軍轉攻賊壘相持逾時堵逆突糾大股數萬環布壘外圖鈔我後我軍少卻江忠義壓定陣腳誓不返顧各營哨衝入賊叢縱橫盪決哨長鄧新維身中數矛猶復裹創力戰喻吉三正在麾軍助陣乃賊隊忽

亂敗若湧潮中路堅壘既破左路二壘俱下李榕適由獅子山繞至村口賊眾惶駭奔北聲若頽牆維時水師亦自袁橋棄舟登陸攻破陳家村逆壘席寶田在五溪橋相距稍遠疾馳來會行次中途遙望西北附郭一帶烟燄蔽天知守城之軍自內擊出卽約諸援軍一鼓猛進悉掃賊巢直抵城根而青陽之圍立解計平一百三十餘壘殲擒實逾萬人餘賊遁歸石埭一路此八月二十七日會師青陽城下力解重圍之情形也臣查青陽一城陷賊十年經鮑超用兵數月始得攻克此次黃文金各賊股以全力爭此要區意將大擾皖南掣我金陵兵勢幸託聖主威福諸將士忍飢扶病內守外援歷三十八日之久卒能

拔出重險力保垂陷危城實屬有裨大局在事尤爲出力人員應先另繕清單仰懇

恩施以昭激勸其餘出力員弁可否容臣查明專案奏獎之處出自

聖裁至陣亡花翎都司許和山藍翎千總李席珍藍翎把總余才勝李華崑周玉祥楊元成劉受一把總張修胡承初謝見章鍾登高藍翎外委李得勝周新喜賀宗修張良才等十五員弁應請

敕部從優議卹已革參將李殿華於湖口堅山之戰身先陷陣最稱得力此次力戰捐軀尤爲憫惜並請開復原官照副將陣

亡例從優

賜卹以慰忠魂所有青陽援師大捷共解城圍緣由謹繕摺由
驛六百里馳奏伏乞

皇太后

皇上聖鑒訓示謹

奏

近日軍情片

同治二年九月十二日

再近日軍情臨淮一路穩守如常陳國瑞於八月二十四日至小澗集會合英翰所部四日內疊破賊圩蒙城文報漸通重圍可期迅解唐訓方亦派何紹彩再進蚌埠一路以掣賊勢前此蔣凝學攻克黃梁集逆首倘貫金適赴下蔡乞援致令漏網近聞該逆在蒙城勾結苗黨萬人至壽州分竄余家集三覺寺等處意在擄掠或不至遽謀深入大江南岸青陽解圍後太平石埭旌德甯國四縣尙爲賊踞劉典王文瑞王沐等軍正議由徽州出嶺會剿適因太平之賊竄入簪嶺延擾許村石門一帶雖經劉典會商唐義訓擊退而浙江富陽新復左宗棠札調劉典

回浙該臬司去後徽州防兵單弱勢難再圖嶺外現今江忠義席寶田李榕朱品隆喻吉三分兵兩路進攻石埭太平等縣惟該數軍轉戰數月尙多嬰疾未愈朱品隆亦因大病過久請假回籍調理鮑超一軍已至南陵擬令搜剿新河莊水陽金寶圩之賊由建平直達東壩其甯國守將劉松山涇縣守將易開俊自八月初九十一日大捷後十七日賊圍甯國郡城劉松山力戰卻之二十二日賊至廟埠又卻之而易開俊亦於八月二十四九月初三日先後破賊於涇縣之茶坑平垣等處但求將皖南各股悉數驅除東接浙師之氣北絕金陵之援則事機漸順矣除另摺詳報戰狀外合先附陳大概伏乞

皇太后

皇上聖鑒謹

奏

卷之九

五

京倉需米照部議妥籌摺

同治三年九月二十二日

奏爲京倉需米甚殷遵照部議悉心妥籌恭摺覆奏仰祈

聖鑒事竊臣接准戶部咨開三口通商大臣崇厚籌備京倉一摺經該部議奏請

旨飭下

臣

與官文沈葆楨惲世臨嚴樹森等會同籌畫將鹽課

漕折兩項實能籌撥若干妥籌辦理等因於同治二年七月初一日奉

旨依議欽此並鈔錄原奏咨會到

臣

查咸豐十年以來蘇浙

淪陷南漕運京爲數寥寥上年全漕竟未興辦僅賴李鴻章勸辦商捐米九萬石於夏間次第解京在上海經營甚苦而在

天庾則裨益甚微本年東南應徵之漕自應設法多解本色上供

京師至急之需然江蘇淮揚通海之米已由漕臣吳棠奏准仍

徵折色撥充揚州軍餉湖北之米已由撫臣嚴樹森奏准萬難

改征本色江西之米亦由撫臣沈葆楨具奏仍難改征本色此

三臣皆素抱公忠絕非不顧京倉根本之人其所以難於解米

者蓋爲時勢所迫成例所拘殆非一二言所能罄目下欲運江

楚之米入京卽百餘年之成憲與近數年之事例均不能不大

爲變通臣請爲

皇上縷晰陳之向來三江兩湖皆有官製漕船分幫編號水次

受兌各有定所今則漕船盡壞將欲全數修復需銀約近三
萬兩既難籌此巨款又值黃河北徙運道久淤之後又值泰西
就撫海道暢行之時由江浙閩廣以達天津出入洋面如履戶
庭揆之天時人事自須全廢河運概行海運而兩湖江西安徽
向未辦過海運成案江湖之遠雇船之費若非由部臣先爲定
議疆臣頗難措手自前明以屯田養衛軍以衛丁運糧船我
朝因之改爲旗丁行之既久屯戶不能耕田而鬻與平民動倚
衛官以抗糧衛軍不能使船而另募水勇動倚旗丁以滋事名
實相舛既已不勝其弊矣而旗丁每次領運需索幫費視州縣
若魚肉聞壩之委員通州之倉書又視旗丁若魚肉臣歷觀道

光年閒諸臣之奏疏

奏稿卷一

四

宣宗之諭旨言及州縣浮收旗丁幫費未嘗不深恨次骨終以積重難返莫可如何今則局勢大變日月重新漕船既可全廢旗丁亦可全裁頃者兵部議覆嚴樹森裁兵一案飭臣等酌量辦理郭嵩燾在糧道任內因之詳請盡裁屯兵以屯田改隸州縣以衛官改隸綠營其說甚爲詳明臣以戎事倥傯尙未據以入奏茲旣議廢漕艘自應并革衛軍臣所謂百年成憲不能不大爲變通者此也道光二十七年王大臣戶部會議以京師少現銀太少南中之浮收太重請將南漕改征折色以實部庫而蘇民困旋經督臣李星沅奏駁不行

文宗登極撫臣傅繩勛痛陳浮收幫費之弊民不聊生又請改
徵折色旋經部科議駁不行逮咸豐三年粵匪竄陷金陵長江
梗塞不得已改收折色定爲每石一兩三錢當時銀價每兩換
錢二千餘文米價每石不過一千餘文故一兩三錢民猶病其
重也今則情形迥異價值懸殊銀價每兩不過換錢千三百餘
文米價雖各省不同然大致相類李鴻章嚴樹森奏稱四兩以
外係就夏閒荒歉言之吳棠沈葆楨奏稱三兩上下係就秋閒
收穫言之臣處目下所買之米其價亦近三兩若如崇厚原奏
含米價運腳僅及二兩則近年絕無此事米價既費三兩加以
由內河而出江由江而海而津船價耗米等費計亦不下二兩

是南省解到天津之米約計需銀四兩九錢而南省所收民間之漕部價僅算一兩三錢若解米十萬石即有三十六萬金無著之款部臣不准銷疆臣不能賠此中空礙情形實乏彌縫之術即臣以江西而論辛酉年之漕折臣與毓科出示每石徵錢三千王戌年之漕折臣與沈葆楨出示每石徵銀一兩九錢以一兩三錢之部價計之則所納並不為少以目下穀米之市價計之則所納之數斷不能購米一石而船價耗米各費更無所出以臣愚見必求部臣奏請

特旨米價運腳均准據實報銷不拘原定一兩三錢之數庶江楚本屆之漕尚可設法解京臣所謂近年事例不得不大為變

通者此也兩淮鹽務與漕政本不相涉然崇厚議撥鹽課以購南米亦權宜救時之一策臣忝任鹽院三載有奇而淮鹺未嘗竭力經畫非敢置爲緩圖也沿江上下各軍釐卡至十餘處之多均以鹽釐爲大宗臣若驟議變革則各軍皆向臣處索餉若全不變革則官鹽斷不能逐卡完釐而楚岸引地久爲川私粵私侵佔西岸引地久爲浙私粵私侵佔民間藉此以免淡食鄰省藉此以籌釐餉江路未通豈能禁鄰私之盛行且輪船拖帶流弊百出既可授洋人侵奪鹽利之權又恐啟私梟假託洋商之漸種種窒礙無處著手故吳文錫之呈詞錢寶廉之奏疏雖奉

諭旨飭辦臣尙因循未及興辦職此之由仰託

皇上威福九洲既克長江一律肅清臣始與郭嵩燾重立新

章先辦江西一岸現在規模初定稍遲再行專案具奏大約緩

納逐卡之釐金由臣處總收而分送各處禁革餉鹽之名目以

商運爲主而輔以官運庶幾收回利權漸循軌轍此又當變通

近年之事例而返諸昔年之成憲者也斯二者皆當今之急務

而漕糧關係尤重更張尤大相應請

旨飭下王大臣戶部悉心集議據臣愚見復南漕之舊章定海

運之全規縱使軍務大順亦須俟諸同治五六年以後目下二

三年內祇可作試行之局難遽爲永定之章米石不必徵諸民

閒民折銀而官購米亦可商捐米而官代解亦可米色不必拘
守成例江廣而參用白糧亦可蘇浙而不盡粳米亦可數不必
其如額全解不厭其多三四萬石不嫌其少價不必其盡同此
省與彼省可以參差前批與後批可以增減但求有米到京一
切不爲束縛聽東南各督撫因地制宜從容展布試行一二年
後自然漸講漸精中外皆有把握惟今日之試行卽爲他日之
成案如漕船應否另造屯衛應否速裁沙船應於何處受兌上
游應於何處匯總何條應用厯年海運之例何條應用本年商
捐之例均須由王大臣戶部預爲議定庶幾可暫可久得所遵
循至鹽務係

微臣

專政目下實無鹽課銀兩可以撥充漕費抱

媿殊深所幸湖南撫臣惲世臨籌畫精詳擬解米十萬石進京除新舊漕折外另籌巨款以作運費將銀兩先解臣處商所以運津之法又奏派巡東道黃冕察看長江剝運事宜黃冕因創爲米鹽互市之議稟請於皖省設互市局招徠湖南商賈運米至皖由皖省設法運滬運津並招淮商運鹽至皖與楚中米商交易而退此局若成不特湖南漕米可以中途交兌卽江西湖北之漕亦可酌量由皖遞運淮鹽如有起色旣可清軍餉之積欠亦可補京米之不足與崇厚之原奏戶部之議覆均相符合卽與華祝三請提江廣之銀交吳棠買米解京之奏其用意亦復暗合實屬因勢利導兩有裨益除由臣商江楚三省詳議

各行具奏外所有京倉需米遵照部議悉心妥籌緣由恭摺由驛五百里復奏伏乞

皇太后

皇上聖鑒訓示再郭嵩燾請裁衛兵之詳謹鈔呈

御覽以備發交王大臣戶部一併集議臣卽不另案具陳矣謹奏

考和卷十

三

近日軍情片

同治二年九月二十二日

再近日軍情金陵雨花台各營及金柱關蕪湖各防均無戰事
鮑超一軍由蕪湖進攻建平東壩須先剿新河莊水陽金寶圩
之賊日內計當接戰石埭太平之賊窮蹙已久本無固志惜江
忠義席寶田等軍病卒甚多尙未進兵九月初七八等日涇縣
守將易開俊剿賊於晏公塘風坑琴溪橋一帶又獲大勝賊乃
遁往甯國縣境其黃文金各股由青陽迤邐下竄意在併入浙
江左宗棠調劉典旋浙或足以資防剿北岸臨淮六安諸營防
守尙穩惟蒙城糧盡援絕恐難持久又有陳大禧捻股由豫入
鄂歷竄隨州棗陽應城麻城以達黃州勢將闌入皖境皖北祇

奏和卷十一
此兵力別無迎擊之師殊爲可慮除甯國涇縣各戰狀另案詳
報外合先附陳梗概伏乞

聖鑒謹

奏

甯國涇縣防軍勝仗摺

同治二年九月二十七日

奏爲甯國涇縣防軍疊獲勝仗恭摺馳陳仰祈

聖鑒事竊總兵易開俊劉松山等各統湘勇五營分駐甯郡涇縣屢遏內犯之賊經臣三次奏陳梗概在案本年七月下旬太平逆酋古隆賢石埭逆酋賴文鴻等乘青陽被圍官軍不暇兼顧之時各糾大股蓄意犯涇以古逆一股踞聚茂林潘村等處以賴逆一股踞聚丁家渡章家渡等處附近村落布滿賊旗甯國守將劉松山督隊於八月初八日馳抵涇城與守涇之易開俊會商以章家渡距城較近必須先清此路而後可徐圖茂林初九日部勒各營侵曉卽發劉松山令章瑞璿率各旗從右路

進易開俊令陳名鈺喻先達率各旗從左路進仍自率陳青雲
王華國蕭章開繼之道出丁家渡斬守卡賊數人不數里枕山
依水賊館羅列我軍甫進各賊已紛紛縮入章家渡易開俊劉
松山等催軍猛擊斬馘頗多突有花旗一股自金村來援章家
渡敗賊亦復回戈轉鬪勢殊驚悍陳青雲率隊斜刺而入章合
才易德麟併力乘之王華國蕭章開等從鼓箐中鈔出賊後賊
乃錯愕敗往水南都而去易開俊以該處去茂林尙十七里勢
難同日進勦謀之劉松山於十一日馳擊茂林至則鳳村李村
之賊聞風悉遁乃以六旗攻茂林四壘以二旗攻潘村三壘茂
林之賊踰橋來拒鄧光武雷國英急起乘之偏賊過橋退至村

口章合才率眾追之樟樹下一壘出千餘賊互爲之援適易德
麟騎隊橫出邀截之而章合才王華國等亦從村後鈔來賊隊
散亂不能歸壘壘中守賊亦靡然潰矣其攻中壘者爲歐陽廷
易致中仰攻逾時忽見古酋出巢督戰歐陽廷以一旗往來掠
陣易致中舁巨礮轟之古酋負創返奔易開俊亦自將勁隊馳
至火箭火球齊擲賊中立燔巨壘二座而潘村三壘亦爲陳青
雲張恆舟兩營所破於是合軍追逐又踰二壘於潘村之後餘
黨向太平老巢而遁此八月初九十一等日會剿涇縣之章家
渡及攻破茂林潘村等處七村九壘之情形也甯國北路曰水
陽曰馬山埠爲羣賊所嘯聚一聞劉松山赴涇甯郡空虛潛謀

襲我郡城十四日劉松山引軍馳回傳令各門繕修守具戒備以觀其變十七日諜報賊至油榨溝將以詰朝來襲劉松山令章瑞璿舒翰楊玉迪等夜出南門繞過敬亭山擇險設伏又令張聲壯易德麟等在西城嚴陣以待天甫向曙賊數千人沿河蠡擁而至一悍曰繞城大呼以令於眾我將士伏於女牆寂若無人注視良久見賊布勢漸寬號鼓一發爭拔鹿角踰濠競進劉松山令張聲壯等迎勦西門之賊並分擊街後一路陳世隆出勦南門之賊而自督胡文高章合才等突啟北門鼓譟而出賊不及備死於濠下者三四十人遂驅賊至北門街賊翻身猛撲抽刃巷戰賊正倉皇欲遁張聲壯易德麟等適從西門追賊

而來勢若奔濤遂將北門兩股一併擊退賊之在南門者聞信
惶懼將望敬亭山折竄而北詎料我軍正設伏該處橫斷歸路
賊乃東趨廟埠併股狂奔劉松山又遣章合才等遮擊於前陳
世隆章瑞璿等緊躡於後伏尸盈路賊走陳卻灣濱河一帶爭
舟舟覆蹙偪入水者無數劉松山又於二十二日率楊玉迪章
合才等迎賊於廟埠不戰而退楊玉迪進軍油榨溝河奮擊忽
爲飛子傷鼻血流交頤猶復單騎突陣賊不敢犯始相率循河
下竄此八月十八日賊襲甯國府城力戰擊退之情形也維時
涇縣之水南都尙有踞匪糾黨麇聚丁塘延及茶坑田坊四頁
村其勢復張二十四夜易開俊密諭各營出奇兵以雕勦比曉

進圍四頁邨執先鋒賊數百斬之隨分二旗撲入茶坑二旗馳入田坊又破之會師轉向丁塘乘賊無備攀卡齊入短兵巷戰賊盡披靡一時潰出雲嶺越數日仍踰嶺而西竄至水南都旋踞平垣九月初三日易開俊軍次平垣五里許以蕭章開曹義勝擊中路以陳青雲王華國擊左右兩路賊競踰崖而逸初七日我軍搜剿晏公塘零匪未及交鋒遽與壩頭漕溪合股併退風坑易開俊卽於初八日出隊琴溪橋下設伏誘賊賊自風坑悉眾來撲曹義勝張恆舟接戰佯卻引入伏中歐陽廷陳青雲等突出包圍亂刃交錯賊不能支敗往甯國縣而去此八月下旬至九月初八等日涇縣分剿獲勝之情形也

臣查甯國涇縣

地居皖南數屬之中自上年張運蘭因病回湘易開俊劉松山等接統所部分駐兩城屢卻大敵復能馳驅援應往往日行百里實屬勞苦功多保全大局藍翎把總鄧光武藍翎外委雷國英均係力戰陣亡應請

敕部從優議卹所有官軍駐守甯國涇縣擊賊疊勝緣由謹繕摺由驛五百里具奏伏乞

皇太后

皇上聖鑒訓示謹

奏

查辦革鎮黃彬參款評

擬結摺

同治二年九月二十七

奏爲審明革鎮黃彬被參確情科罪擬結恭摺仰祈

聖鑒事竊

臣

承准議政王軍機大臣密寄同治元年閏八月二

十五日奉

上諭有人奏幫辦軍務水師總兵黃彬安坐瓜洲不理營務專以收取沿江釐金侵吞肥己爲事并縱容所部艇師攔劫商民貨物誣稱盜賊慘殺無辜上年六月閒游擊郭定猷帶兵在劉河地面擄劫商船殺害良民數百人瓜分貲財十餘萬捏稟勦賊大勝由黃彬入奏請獎疊經被害家屬周姓等在巡撫衙門控告本年三月有人見黃彬在船宴客聞卽粵逆渠魁五月內

石埠橋甫經投誠之賊在儀徵縣楊鍾琛公寓晏飲門外擁進多人詢係黃彬水勇來尋賊目索取米帳並有接濟賊米之船經民團查獲該鎮輒藉詞搶案懲辦民團現在長江南岸之賊時思偷渡江北正水師防剿喫緊之時若委任此等劣員駐防江面必致與賊潛通消息勾結竄越於江防大有關係著曾國藩李鴻章按照所參各款嚴密查辦務得確情如果通賊屬實卽著於審明後以軍法從事等因欽此又奉十一月初六日上諭浙江黃巖鎮總兵黃彬自幫辦江北軍務以來總統水師從未見其於沿江賊匪所踞各城及附近口岸痛剿一次攻克一城迨經訪查該總兵專以設卡圖利爲事縱容兵勇攔劫商

民藉圖肥己僞奉檄飭焚燬沿江村莊擄殺難民捏報勝仗跋扈橫行肆無忌憚黃彬以微末武弁不數年間擢至專閫派令幫辦重任宜如何整頓營伍奮勇剿賊乃竟敢恃恩驕恣肆意妄行以致民怨沸騰若不從嚴懲辦何以肅軍律而飭戎行黃彬著撤去幫辦軍務總統水師各差卽行革職并著都興阿解交曾國藩軍營聽候查辦欽此旋經都興阿恭錄

諭旨遵將黃彬咨解到皖當卽飭發善後局司道收審取供又添派咨調來營之刑部員外郎范泰亨會提覆訊茲據訊得黃彬供稱革鎮於咸豐十年蒙

恩賞加提督銜總統水師幫辦都興阿軍務計是年至同治元

年三次解鎮江城圍兩次在揚州府境會合陸軍痛剿江皖竄匪暨渡江悍賊又派上下游將領郭定猷等各帶礮划督同靖江如皋兵團擊退江陰壽星沙之賊此外在小河魏村焦山各口岸屢次獲勝經歷任將軍巴棟阿都興阿查明會奏有案實無擄殺難民捏報勝仗及劉河打仗之事亦無村民向水營喊訴之案惟水師船隻大小僅三百餘號分防江面七百餘里南北港汊紛歧髮逆出沒無常各處險隘均須分船駐守未能攻克一城職是之故嗣蘇杭失陷逃勇遣勇廣匪土匪入江劫掠疊經革鎮嚴拏遇案卽辦又何敢縱容水勇攔劫商民至沿江設卡抽釐實因水師餉竭革鎮先後稟商提督李若珠將軍都

興阿准與吳全美賴鎮海並委員梁傳黃立偉在沙漫洲試辦其時上下商船每幫或數十號或百餘號水師派船彈壓巡查局員抽釐湊發軍餉所收銀錢均係局員主政迨沿江各港辦齊旋由北台通歸南台收放復由台改歸江北籌餉局局撤仍歸南台收放節經漕督王夢齡吳棠分別奏咨案據確鑒委無罔利肥己情弊又軍務倥傯何暇宴客或路過同鄉官及奉差事將弁偶爾留飯固屬事所恆有豈有於眾人屬目之地公然招飲粵逆渠魁革鎮雖愚亦愚不至此若兵勇接濟賊米一節各路水師革鎮不時親往巡察都興阿亦隨時派有差官查探並未查有此事但江路綿長蘇杭游兵散勇各處商船往來不

絕或有冒充兵勇擾害商民或有牟利之徒裝米潛行濟賊革
鎮巡視不周有失覺察實屬咎無可辭各等供議詳請奏前來
臣逐核原參各款水師將佐實未在劉河打戰前於會奏郭定
猷案內業經聲明巡撫衙門並無周姓控案卽沿江卡釐旣歸
台局經理亦無侵吞實據惟在船宴客索取米帳兩事案關通
賊情節較重反覆推勘派員密訪均未查有確證是所供各情
尙無遁飾然於游匪潛濟賊米未能覺察恐其部卒亦不免參
錯其中以致物議沸騰實非尋常失察可比自應從重比例擬
結查例載茲徒偷運米穀接濟奸匪者絞失察汛口各官照例
議處此案已革黃巖鎮總兵黃彬雖訊無通賊重情乃以幫辦

軍務總統水師大員既不能攻克城池肅清江面又不能禁
奸匪接濟賊糧科以失察議處之例殊覺過於輕縱業經革職
在先仍擬請

旨將黃彬發往軍台效力贖罪以肅軍政所有查辦總兵大員
參款訊明擬結緣由理合繕摺覆奏是否有當伏乞

皇太后

皇上聖鑒訓示謹

奏

恭謝

天恩摺

同治二年九月二十八日

奏爲恭謝

天恩仰祈

聖鑒事同治二年八月十九日接准兵部咨稱奉

旨頒發

文宗顯皇帝御製詩文全集一部共六冊驛遞到

臣當卽恭設

香案望

闕叩頭祇領訖欽惟

文宗顯皇帝聰明天直

聖敬曰躋

見知聞知紹道統於二千餘歲

心法治法契真源於三五六經無日不在憂勤之中無時不念付託之重

大孝備矣故得萬國之懽庶事康哉猶恐一夫不獲是以
幾餘翰墨悉本敬

天法

祖之誠

御製經筵聿宣內聖外王之學金穰水毀察六府而

睿藻攸廩畢雨箕風占庶徵而

宸章屢注虞陛之羽千未格每

咨羣牧以徂征

鼎湖之弓劍莫攀尤切

終身之孺慕金剛感應披貝葉以成詮

寶鏐宣威眷棟華之協力布在方策發爲詠歌

詩錄三百餘章雅合駟篇之旨

文分上下兩卷適符義易之經揭日月以齊光與球圖而並壽

皇上緝熙念典宥密單心適追而

見羹見牆

紹述而肯堂肯構虹光下照異書賁於石渠雞次遠浮鉅典來

於江介臣受

恩深重矢報涓埃益地開圖未埽欃槍之氣

在天成象驚瞻

奎璧之輝恭賡

盼信之詩亟思克捷謹繹

開誠之諭痛戒因循庶冀呼韓來賓效於甘露河湟恢復見於
大中崑崙渤海之波濤不驚鉤陳太微之星緯咸若慰

先皇十一載未竟之

志大告武成願

聖主億萬年有道之長誕敷文德所有微臣感激下忱理合繕

摺叩謝

天恩伏乞

皇上聖鑒謹

奏

金陵軍壘克八隘并復秣陵關摺

同治二年十月十二日

奏爲金陵陸師壘克東南沿河八隘并復秣陵關僞城恭摺馳

陳仰祈

聖鑒事竊本年八月間官軍攻克江東橋上方橋後金陵城東
尚有數隘未下夾河而壘戒備甚嚴近城者曰中和橋曰雙橋
門曰七甕橋稍遠者曰方山土山曰上方門高橋門迤南則爲
秣陵關以至於博望鎮亦金陵之外輔也曾國荃以東路未平
不能制城賊之死命遂令蕭慶衍彭毓橘蕭孚泗等擇小河紆
曲之處架橋結筏謀分隊伍東渡立營詎賊已先據河東築數
壘以拒我蕭慶衍壘用巨礮隔河迎擊旋於九月十八日派朱

吉玉李祥和更在西岸上下游各修三營爲進兵之計賊復列
洋槍數千枝於隄埂下與我軍盡力對轟相持不下者兩日夜
二十日四更時李祥和王仕益蕭開印吳次漢等率銳卒從下
游過河蕭慶衍率朱吉玉劉長槐等營從上游過河破五土壘
殲賊頗眾俄而城賊壘賊蠡擁來爭蕭慶衍一面搶築營寨一
面麾軍環進挫賊前鋒逾時卻走而東岸之營壘已成二十二
日賊又諸道并出銳不可當陳湜彭毓橘蕭孚泗會督趙三元
武交清駐兵其中使雙橋門以東不能通城賊之氣蕭慶衍更
率所部各營徑取中路戰入垓心曾輝曰王棲鳳蕭有致等死
之各將士憤甚相排競進賊乃靡然返竄蕭慶衍以騎隊邀斷

歸路遂克上方門高橋門雙橋門諸石壘而右路方山土山之賊經熊登武胡松江陳壽武等分道馳剿亦各棄壘而奔於是七甕橋踞賊惶遽欲遁蕭孚泗彭毓橘帶熊登武等八營扼定東岸之左李臣典帶吳宗國等五營遮擊西岸之前正謀前後合圍一鼓併下城中忽出大股抵死來援兩軍相搏張毓明劉開傳章盛南蔡典隆羅得升喻得輝等又死之蕭孚泗彭毓橘急督各軍擊退援賊仍復偪壘環攻至二十四夜令死士潛往縱火賊眾冒煙突出乃克斯壘屠戮無算此九月十七至二十四等日連克上方門高橋門雙橋門土山方山七甕橋二十餘壘之情形也方山以南爲秣陵關關以南則爲博望鎮賊在該

鎮設卡者二築壘者七上可以應水陽而旁可以控金柱關守關者爲朱南桂亦曾國荃之部將也九月十八日聞鮑超等軍將有事於水陽朱南桂卽會約朱洪章武明良等五營進次小丹陽潛察形勢議襲博望鎮使不能爲水陽之援夜漏四下朱南桂率黎冠湘等銜枚疾進以武明良爲右翼朱洪章等爲左翼十九日昧爽各軍前鋒齊抵博望卡下卡賊負固死守槍礮橫飛猝不得近朱洪章俟賊少懈昇巨礮至左卡一發而殲數賊武明良又用火箭攢射燭及右卡哨棚羣賊駭懼撲火爭竄我軍正乘勢殺入燬其堅卡而壘中之賊傾巢驟至朱南桂往來猛撲未能略挫其鋒朱洪章武明良陰率哨勇繞出頭壘踰

牆而登賊聞後路人聲若沸返顧羣壘已易官軍旗幟錯愕不知所爲朱南桂等遂縱兵夾剿驅賊至長流背地方墮河而溺者強半乃引軍回駐博望奪獲米穀近二千石此九月十九日金柱關防軍攻破博望鎮二卡七壘之情形也曾國荃以博望旣得則秣陵關之勢孤七甕橋旣得則中和橋之勢孤二十五日派趙三元伍維壽共帶馬步九營南略秣陵關又派陳湜黃潤昌分帶八營出七甕橋之西與熊登武胡松江等會師於中和橋一戰克之而秣陵關之賊見我馬步馳至卽棄金奔潰各營追及河干深不可涉僅斬尾股二百餘人而還自是紫金山西南無一賊巢矣二十七日曾國荃親督蕭慶衍蕭孚泗彭毓

橋李臣典陳湜等往勘孝陵衛地勢將欲分營移駐賊自朝陽
太平兩門突出二枝前來搦戰蕭慶衍陳湜率所部各當一路
蕭孚泗李臣典率所部傍城鈔入鏖戰方酣俄有一酋指麾督
陣曾國荃知爲巨目乃匿洋槍隊於山麓伺其近而擊之該酋
中槍墜馬賊陣遽亂有敗往城中者有不及回城轉向淳化鎮
大路而逸者蕭慶衍陳湜等率騎兵追至三十里外俘執百數
十人訊據供稱中槍之酋僞護王陳坤書也章順二僞王仍退
入城殆不敢復出矣此二十五至二十七日疊克中和橋秣陵
關及大戰城下獲勝之情形也臣查金陵一城面面布置據有
重險爲洪逆堅不可拔之基自克九洑洲江東橋數隘而西南

一面已爲我有茲又克七甕橋秣陵關等隘而東南一面並爲
我有現今蕭慶衍全隊進紮孝陵衛經營城北漸成合圍之局
此次出力人員應俟續立功績彙案請獎其力戰陣亡人員俟
查明另行開單請卹所有金陵一軍疊克要隘緣由謹會同大
學士湖廣督臣官文江蘇撫臣李鴻章浙江撫臣曾國荃由驛
五百里具奏伏乞

皇太后

皇上聖鑒訓示謹
奏

占隆賢率眾投誠收復三縣摺

同治二年十月十二日

奏爲降人占隆賢舉眾就撫收復石埭太平旌德三城恭摺馳陳仰祈

聖鑒事竊僞匡王賴文鴻竄踞太平一縣僞奉王占隆賢分踞石埭旌德廣德等城聚黨出掠久貽皖南之患自賴文鴻爲涇軍所敗遁入甯國縣而太平遂爲占隆賢分地本年八月下旬青陽解圍後該城守將朱品隆疊據占隆賢遣人通款請以四城獻部眾之在石太者四萬有奇其在旌廣者亦三萬有奇悉願反正乞貸一死朱品隆察其窮餓歸誠情詞肫切知非挾詐僞而來也卽呈明

臣

處議將廣德撫局以鮑超任之旌德撫局

以易開俊任之石埭太平撫局則請自任之九月十九至二十
三等曰朱品隆兩派營弁馳赴石埭宣諭降眾先繳軍械次令
薙髮分屯城下以待命二十八日親督易潤壇梅錦源等分帶
四營入城受降並調踞守太平之江老三二千餘眾歸併石埭
詳加簡閱挑留馬步千人編立營哨仍交古隆賢管帶責令立
功贖罪餘則由臣籌發萬金視原籍之遠近定給資之多寡概
予遣散是日旣復石埭縣城遂於次日飭喻志業前往太平併
復城池調喻吉三所部三營守之初江老三方以太平來獻僞
天將江會義率黨背盟殺古朝將以叛取道三溪竄往廣德二
十七日涇縣守將易開俊突由馬渡橋橫出截擊斬馘頗眾乃

引軍進次旌德城外守旌德者爲僞崕天義申法喜早已聞風
先遁餘黨盧旺有汪泯珊長跼道左舉城歸降易開俊安撫城
中盡遣降卒三千餘人卽分所部兩營守之據總兵朱品隆易
開俊歷將籌辦情形呈報前來臣查古隆賢爲賊巨擘本屬罪
不容誅一旦翻然悔悟自拔來歸不煩一兵而三城並下亦尙
有寸功足錄不邀寬典則無以開羣盜自新之路而廣
聖朝如天之仁合無籲懇

天恩准照上年洪容海投誠成案

賞給古隆賢游擊虛銜頂帶以昭激勸其部下頭目及經辦招
撫各將士可否容臣查明酌加獎勵之處出自

聖裁所有古隆賢率眾來降疊復三縣緣由謹繕摺由驛具奏
伏乞

皇太后

皇上聖鑒訓示再廣德一城臣飭鮑超部下宋國永往辦招撫
事宜旋有叛黨江會義申法喜等下竄尚恐事多中變現在水
陸各軍已克復東壩鮑超卽將由建平進剿廣德該州之或撫
或剿已檄令相機辦理續行具奏合併陳明謹
奏

近日軍情片

同治二年十月十二日

再近日軍情臨淮一路穩守如常富明阿於九月二十六日親赴蒙城督剿李世忠進軍姚家灣以圖下蔡直擣苗逆老巢唐訓方亦分軍大小蚌埠以圖懷遠聲勢頗爲聯絡潁州兵練攻破朱滑孜圩郡西漸靖陳大禧捻股亦經鄂軍擊敗由麻城境內竄歸河南無慮旁延皖境矣湖南道州有警孫長紱以江西南邊空虛咨調席寶田一軍赴贛州防守臣又令江忠義一軍回駐饒州境內江西設有緩急添此兩軍足資防禦大江南岸甯國太平以東久爲賊藪彭玉麟親督水師會合王可陞吳坤修等陸師於九月杪攻克密灣金寶圩水陽新河莊塘溝滄溪

各賊壘駐師高淳湖口高淳守賊楊友清遣人乞降十月初二日收復高淳縣城東壩賊黨黎立新等亦卽具稟納款願爲內應彭玉麟知東壩一股已無固志商同鮑超率師疾進楊岳斌亦帶師船來會旋於初七日攻克東壩留黎立新降眾三營餘則誅夷殆盡此次幸仗

天威得此東壩要隘不特皖南可冀肅清卽東至蘇州北至金陵攻取亦較有把握除水陸勦撫各情形另摺續報外合先附陳大概仰慰

宸廑伏乞

皇太后

皇上聖鑒謹
奏

聲明石太旌甯四城失陷緣由片

同治二年十月十二日

再臣欽奉

寄諭太平石埭旌德甯國四縣城於何時失陷現在是否均淪
於賊著曾國藩查明具奏等因欽此臣查上年六月十五日甯
郡克復後臣於宣城涇縣南陵甯邑皆置守兵以其爲邊圉距
賊近也於石埭太平青陽池州皆未置守兵以其爲腹地去賊
遠也厥後七八等月疫疾盛行鮑超游擊之兵與各城防守之
兵均岌岌不能自保甯國縣城於九月初六日被賊攻陷守將
韋志俊洪容海皆係降人臣故未嚴參也十月中旬羣賊圍攻
旌德守將朱品隆苦戰苦守幸得保全十一月初三日賊從旌

德闌入太平并由太平繞越祁門初十日出赤嶺趨田家樂竄入石埭十二月初五日青陽不守臣於是調朱品隆一軍舍邊圍而先顧腹地棄旌德而移勦青陽雖旋即克復青陽而旌德一城無兵駐守又爲賊踞矣該四城失陷原委臣經四次奏陳在案現在古隆賢投誠石埭太平旌德三縣並復惟甯國縣尙爲賴文鴻所據一俟廣德勦撫辦有端倪則該縣勢孤或亦不難於攻取所有奉

旨飭查緣由理合附片覆奏伏乞

聖鑒謹

奏

克復水陽東壩等隘高淳等四縣摺

同治二年十月二十七日

奏爲水陸各軍勦撫兼施疊復水陽新河莊東壩等隘高淳甯國建平溧水四城恭摺馳報仰祈

聖鑒事竊官軍攻克水陽新河莊並復高淳東壩等城隘臣國藩於十月十二日附陳大概在案方鮑超進軍仙人橋王可陞進軍東門渡出金寶圩之南將并攻新河莊臣玉麟以該處地窄勢險未可以用眾也因率喻俊明唐敏義水師兩營並約吳坤修劉祥勝傅家桂等陸師六營出金寶圩之北將有事於水陽臣岳斌亦率李濟清羅宏裕王仁和等戰船來會師次審灣見有堅大石壘礮眼層列能越水陽等壘而遙擊我軍九月二

十六日風雨蔽天賊備少懈喻俊明唐敏義乘夜運礮過河密排洲次徹夜環轟比曉石壘半圯遂合劉祥勝等鼓噪而前李濟清吳坤修亦駕小划入亮隄門平圩堦數壘併攻水陽破之其南路則有成發翔張錦芳等帶舳板進南湖毀夾岸兩卡卽於次日衝過新河莊從油榨溝倒擊而下時鮑超浮橋未成弗克東渡王可陞偏師獨進正與眾賊相持各水勇升岸大呼踰濠競入力攻新河莊又破之水陽迤北曰滄溪距滄溪十餘里曰塘溝爲直達高瀆之要路臣玉麟於二十九日合吳坤修萬化林往取滄溪親督水師及傅家桂等陸師襲陷塘溝進塘溝數里曰高瀆湖口東西兩壘萬槍齊發阻我陸軍進步十月初

一曰唐敏義王仁和於槍子如雨之中會合各舟師疾駛而進拔其堅壘又數里曰長樂鎮街市之中賊築石城礮台旌旗迷目我軍略不停槩衝入湖心忽梗一橋洋槍集於橋下喻俊明羅宏裕李濟清傍兩岸悉力衝擊唐敏義王仁和爭拔椿木斫斷橋梁一躍而上舉火立燔石城該鎮既克劉祥勝傅家桂亦渡旱隊來助吳坤修萬化林亦自滄溪戰勝而還乃合軍謀進高瀆先是高瀆賊目楊友清乞撫不許至是該賊目遣人通款伏地涕泣自陳臣玉麟察其情詞可信令與僞輔王餘黨自相攻鬪始許之降初二日率師前往受降及至西門外煙燄上騰殺聲未絕楊友清率眾扣馬告曰僞輔王府餘孽有變頃已計

斬之矣於是入城安撫悉遣降眾是夜略地而東並取固城一鎮此九月二十七至十月初一日水陸連破七隘初二日收復高淳縣城之情形也自太平旌德背盟叛去之江申二酋下竄東安鎮圖與僞匡王賴文鴻合股易開俊以旌城初復賊未遠颺利在速戰而又慮廣德撫議未成仍爲該二酋挾之以叛也乃遣降人彭國鈞閒道入廣德馳諭招之一面部勒營伍於初三日度環雲嶺將抵東安鎮市口賊館如雲散布村落間歐陽廷易致中步隊及蕭章開騎隊騰蹕而入所遇輒殪隔岸賊援涉水來爭又得陳裕英等渡河鈔擊陳名鉅等沿河兜剿賊受大創闐然而潰維時甯郡守將劉松山方揚隊於白菓樹湯村

何村一帶訶知株木店增賊四五千眾悉自東安鎮戰敗而來
乃引軍突出截之賊正傳餐將發不虞我兵猝至悉無鬪志棄
釜駭奔劉松山親督各勇驅出廣德大路旋即移師東嚮將攻
甯國縣城賊賴文鴻先經聞風宵遁而易開俊所派之陳裕英
等旗適至遂與劉松山會復城池初四日彭國鈞返自廣德引
降將鄭魁武部眾萬餘人詣東安鎮軍前乞降易開俊曉以大
義簡留一營餘則概予資遣惟鄭魁武舉眾來歸廣德一城又
爲江會義申法喜叛黨乘虛竊據矣此十月初三日收復甯國
縣城之情形也初新河莊旣克尙有東夏四壘爲建平東壩之
樞紐初八日鮑超令馮標周有勝王衍慶等屯軍曹塘進攻東

夏賊恃牆闊濠深堅伏不出馮標摩壘而進手刃悍酋周有勝
王衍慶率眾爭抽鹿角齊登一壘平而眾壘俱下自是東壩守
賊黎立新等上書水營請爲內應建平守賊張勝祿等上書陸
營請獻城池定議建平撫事使馮標任之東壩之戰事則鮑超
與臣玉麟同任之初七日臣玉麟率水師八營及吳坤修劉祥
勝等旱勇六營鮑超亦率馬步十三營合趨東壩見上壩高峙
三大壘壩後築有僞城橫亘數里正義分軍立寨僞隨王楊柳
谷馳告壘賊梗命楊輔清爲謀主乞速進兵以踐黎立新之約
鮑超卽令譚勝達李文益熊鐵生黃海清孫得友等繞壘圍攻
臣玉麟亦令喻俊明唐敏義等五營依護吳坤修劉祥勝各隊

直出壘下適臣岳斌飛槩而來督令李濟清王仁和羅宏裕等
專向水路助陣戰不逾時殲賊盈千賊多踰壘而逸者楊輔清
從亂軍中敗往溧陽而楊柳谷立獻僞城乃克東壩要隘東壩
復而建平之捷書亦至自馮標入境宣諭張勝祿等十二人感
激涕零矢志不貳卽於是日斬僞跟王藍仁得舉城以降建平
復而溧水之降書又至踞溧水者爲楊英清黨眾萬餘願繳軍
械各散回籍十二日臣玉麟會同臣岳斌帶隊進城溫詞撫慰
盡資之行不復稍留降眾另立新營此十月初七至十二等日
剿撫兼施克復建平溧水二縣及東壩一隘之情形也伏查江
皖接壤之區以東壩爲最要關鍵仰賴

天威震疊讐服羣酋旬日之間收取四城并奪東壩重險臣國
藩現檄鮑超全軍駐守東壩保此三省扼要之地卽爲附近游
擊之師檄派王可陞守溧水李榕守建平洪容海守高淳朱品
隆喻吉三兩軍分守青陽石埭太平三城易開俊劉松山兩軍
分守甯郡旌德涇縣三城此外無兵可撥以故廣德一州未能
進剿甯國一縣未能置守致皖南不能一律肅清愧歎實深諸
賊曰革面自新有裨全局似宜宥其罪而并錄其功合無籲懇
聖恩准將楊柳谷鄭魁武張勝祿等三人
賞給都司虛銜頂帶楊仁義黃儒繡李明魁黃勇發江元泰陳
永爵董明玉湯桂風陳世青周珍金汪保發等十一人

賞給守備虛銜頂帶以昭激勸其餘大小頭目可否酌給虛銜
此次在事出力人員可否容臣等查明併案保獎之處出自
鴻施逾格至陣亡各員弁均俟一併確查彙案請卹所有官軍
勦撫並籌疊復各城隘緣由謹繕摺由驛五百里具奏伏乞

皇太后

皇上聖鑒訓示謹

奏

孝利名

李世忠軍破苗圩復懷遠縣摺

同治二年十一月十二日

奏爲提督李世忠率師入淮疊破苗圩會復懷遠縣城恭摺

陳仰祈

聖鑒事竊自苗逆倡亂連陷壽州潁上懷遠各州縣圍撲蒙城
分伺臨淮李世忠以臨淮爲中原樞紐未可爲賊所伺乃由滁
州馳檄討苗誓師前進派朱元興李顯發等各帶數千人先後
赴援臨淮仍親督大隊移駐五河以爲之繼九月二十三日我
軍循淮河南岸而上道出劉府考城灰溝一帶旋據姚家灣練
總姚紹珍率眾來助李世忠卽令徧諭各圩許以自新於是淮
南北之聞風反正者百有餘圩惟壽州中心渡之東鄉有柏家

圩尙爲苗黨死守十月初三日李世忠由石頭埠催隊猛進逾時平之初八日行次中心渡自東迤南引軍繞圩而過不料圩中槍礮突發損我軍士二十餘人李世忠詢知該數圩悉皆壽城賊渠李萬春之黨卽飭各營分道圍擊使賊不能相顧盡舉十四圩又平之次日我軍所至且勦且撫計毀八圩收十數圩並於十一日攻克小古墩集六圩該集之西曰夏家寨寨中悍賊所聚濠深牆峻猝不易攻李世忠先令陳自明李顯安等率隊直前誘賊出寨俄見賊負長槍爭先迎拒火機所觸發無不中乃令李顯發鈔出賊後朱元興蔣立功等分兩翼斜刺而人賊知不敵返奔入寨我軍追至濠邊緣牆欲上詎賊守禦益嚴

先登者中槍輒蹶十二日各勇填濠縱火煙塵蔽天守寨之賊
不及燃礮眾軍已舉旂而登鋒刃環加鮮有脫者夏寨旣破壽
東附苗十一圩亦皆不戰而潰矣二十二日李世忠旣派李顯
爵帶礮艇出蚌埠擊賊獲勝尋聞蚌埠守賊張士端舉眾就撫
計懷遠一城必可襲而取也遂於二十七日督同李顯發朱元
興蔣立功陳自明李顯安等舍壽州而轉趨懷遠與唐訓方會
師於城下未幾城賊自亂喧聲突起我軍知其內變乘勢急攻
賊卽拔關出降長隄道左各軍整隊而入立將縣城收復節據
江南提督李世忠呈報前來臣查逆練苗沛霖稱兵復叛疊陷
城池據有長淮形勝屢以甘語詭詞煽誘李世忠乃李世忠亦

心報

奏稿卷十

國作嚴檄以誅苗申大義而誓眾毅然以討賊爲已任親率萬數千人削平四十餘圩收復名城此次僧格林沁大兵南下苗逆立刻授首誠如疾雷破山無堅不靡而李世忠剿平各圩能使苗黨紛紛返正實亦有裨大局除該提督部將李顯發李顯爵業由撫臣唐訓方另摺奏請獎敘外應懇

天恩俯准開復李世忠革職留任處分以昭激勸其餘出力員弁可否容臣查明酌保之處出自

聖裁所有李世忠一軍勦撫諸圩收復懷遠縣城緣由謹繕摺由驛五百里馳奏伏乞

皇太后

皇上聖鑒訓示謹

奏

孝和卷十

平

近日軍情片

同治二年十一月十二日

再近日軍情會國荃雨花台一軍於十月初五六等日攻克淳
化解溪隆都湖墅三岔鎮五隘破賊二十餘壘金陵城東百餘
里內一律肅清遂於十五日進紮孝陵衛城賊運糧之路業已
斷絕惟城內賊數尙多其氣尙固我軍於四月閒開挖地道直
至十一月初五夜始得挖成用火藥轟陷十餘丈該逆內築月
城下穿橫洞竟能搶堵缺口我軍陣亡三百餘人傷者更多蘇
州克復而後聞僞忠王之計將入金陵挈洪逆首以出竄臣觀
洪酋之堅悍未必肯棄金陵而竄他處目下當以全力謀破堅
城一面布置各軍分堵上游事機愈順圖謀愈不可不慎長淮

一帶蒙城解圍苗逆授首蔣凝學成大吉等進取潁上於十月初二三等日攻毀近城七圩該城頭目方長華乞降不許乃斬苗景和苗景花以獻次日遂復縣城毛有銘初四日進攻正陽關苗黨朱萬隆遣人乞降適僧格林沁遣將康錦文富明阿遣將程文炳前來招撫遂會同納降收復正陽關城又據李世忠咨報二十九日派何璜收復下蔡獲苗逆妻子五人二十日派朱元興收復壽州等語臣查壽州下蔡去僧格林沁大營最近當已遣將先行招撫除俟接到僧格林沁唐訓方來咨另案續報外合先附陳大概馳慰

宸廑伏乞

聖鑒謹

奏

孝和卷十

李續宜病故遺書代陳摺

同治二年十一月二十七日

奏爲前任安徽撫

臣

病故遺書節錄代陳恭摺奏祈

聖鑒事竊

臣

接據湘鄉來函前任安徽撫

臣

李續宜於十月二

十八日在籍病故其前一日該撫自作遺書寄

臣

中有云伏枕

自揣決無生機續宜死何足惜所最難安者

兩朝之恩未報老父之養未終髮逆蔓延苗逆猖獗敝部二萬

人分駐皖省一切全賴主持續宜卧病家山奄奄待盡心事未

了死不瞑目前數日原擬將未了事宜力疾爲一遺表乃構思

未就遽爾病革一息尙存遺憾何極伏懇具疏代達鄙忱上謝

聖朝高厚之恩略表圖報來生之意等語

臣

查該故撫李續宜

以書生從戎咸豐三四五年幫辦其師羅澤南營務六七八年
幫辦其兄李續賓營務戰勝攻取無役不從臣與胡林翼皆知
其才足以獨當一面勸令召募新軍別樹一幟李續宜堅不允
從故數年功績爲其兄所掩未予優獎直至八年之冬李續賓
殉節三河李續宜始涕泣誓師代領其眾九年夏閒逆酋石達
開擁數十萬眾圍攻寶慶九十餘日李續宜自鄂馳援一戰而
解威望由此大震恩遇因之曰隆未及一歲由道員洊擢巡撫
回援湖北連克兩府五縣李續宜猶以驟膺重任不克上酬
國恩下雪私仇爲恥

聖主臨御李續宜調任鄂省再撫皖中旋授

欽差大臣異數稠疊

密諭肫誠李續宜每與臣言自以新進之臣謬受腹心之寄

恩重報輕惶悚無地逮丁憂以後

賞給治喪銀兩派地方官經理

詔許回籍屢次展假受

恩愈渥圖報愈切而病亦愈深不可爲矣自李續賓帶兵以來兄弟皆以潔清自矢廉俸薪資悉供軍用家無長物環堵蕭然李續宜每謂區區介節不足以言報稱古有沒而結草以酬恩遇者李續宜臨終遺書殆出至誠臣蓋於其平日信之也李續宜之入皖也與袁甲三志同道合皆以銳意討苗爲己任袁甲

三彌留之際亦嘗有書遺

臣囑

臣慎益加慎勿輕苗逆爲易剪

勿視淮地爲易收等語有荀偃付託士句死不瞑目之風今苗

沛霖伏誅淮甸澄清該兩

臣

齎志以終不克親歷行間一抒生

前之忠憤尤爲可悲可憫除袁甲三業已

加恩褒卹外李續宜應得卹典例由湖南撫

臣

入奏臣不敢妄

有陳請特其臨終遺函悱惻哀痛理合專疏馳報代達勞

臣戀

闕之忱所有接據前撫

臣

病故遺書節錄代陳緣由伏乞

皇太后

皇上聖鑒訓示謹

奏

近日軍情片

同治二年十一月二十七日

再近日軍情僞忠王李秀成自蘇州逸出統眾數萬分布丹陽句容龍潭石埠橋等處初十日忠逆率數百騎由太平門入城曾國荃令蕭孚泗李祥和等在附城一帶修一月牆十三日賊出大股來撲我軍力戰卻之賊亦傍城增壘防我地道我軍復於十六夜力攻破之壘據降賊供稱忠逆既至金陵勸洪逆棄城同逃洪逆不從忠逆有向甯國縣繞越開化玉山入江西之議臣已咨商左宗棠沈葆楨嚴防東路其西路爲羣賊上犯之熟徑處處可通臣於徽甯池三屬派兵分守十城江西之東北邊境如石門洋塘景德鎮等隘亦經沈葆楨逐段設防惟尙欠

大枝游擊之師頃因贛南防務已鬆臣南商沈葆楨檄調韓進
春一軍回顧饒景重地以期有備無患理合附片具陳梗概伏
乞

聖鑒謹

奏

欽奉 諭旨覆陳四條摺

同治二年十二月十二日

奏爲欽奉疊次

諭旨恭摺覆陳仰祈

聖鑒事竊自本年入冬以來苗黨就誅蘇垣克復東南軍事大有起色惟劇寇未除反側難安可慮之處尙多屢蒙

詔誡精詳指示機要計十一月十一至二十二等日奉

旨飭查及垂詢各事宜謹一一分晰條列詳對如左

一恭奉十一月十一日

諭旨壽州收復之後李世忠所部進城擅殺守門勇丁五名又於圍攻下蔡時因宋慶不肯讓給調隊攻打爭功起釁寔屬不

成事體飭將啟釁根由秉公查辦一節臣查陳國瑞與李世忠構衅彼此各執一詞據陳國瑞稟稱派副將康錦文帶同苗景開等於初一日攻克壽州初三日有李世忠營將領進城卽殺守門勇丁五名康錦文整隊迎敵立將李營隊伍逐出城外生擒五十餘名內有已保提督之蔣立功一名等語據李世忠呈稱派朱元興等前往收復壽州不料被苗景開將記名提督朱元興杜宜魁二員同時殺斃尸在壽州月城之內又派蔣立功前往收復正陽行過壽州被人誘入城內宋慶康錦文將提督蔣立功鎖押等語僧格林沁初次具奏稱李世忠所部擅殺守門勇丁其時但據陳國瑞之稟尙未接李世忠之稟厥後接到

李世忠稟件知陳國瑞部下宋康二將有鎖押蔣立功之案其所帶之苗景開又有殺斃朱元興杜宜魁之案情節尤重僧格林沁寄臣一函謂兩造各執一詞已咨唐訓方查辦矣唐訓方旋亦寄臣一函謂朱元興杜宜魁與宋慶康錦文先後同入壽城彼此互爭互有殺傷今李世忠咨稱朱杜死於苗景開之手應卽殺苗景開以議抵先了此案等語以臣愚見觀之苗景開本係苗沛霖親屬死黨卽無殺朱杜二人應抵之案亦在萬不可赦之列宋慶雖稟訴蔣立功擅殺門卒然互爭之時殺傷實亦相當又於李世忠部下之提鎮擊斃二人鎖押一人當不至更有餘怒李世忠不敢歸咎宋慶等而指名係苗景開所殺又

恐其部下滋事急急帶隊回滁是尙無尋仇生衅之意若果殺苗景開以慰之必且感而兼畏不至更有後言此案由唐訓方悉心查明僧格林沁就近判斷自可處置妥善兩得其平至下蔡之役係李世忠部將何璜先入苗眾雖降而尙未獻寨逮宋慶康錦文挾苗景開而來賊始舉寨以獻當時互爭鬪殺在所不免何璜旋即退至龍王廟尙無始終爭執情事謹就微臣所聞覆陳梗概其詳細情形應由僧格林沁唐訓方查明擬結

一恭奉十一月二十二日

諭旨垂詢正陽收復之時道員蔣凝學何以有爭奪開礮致傷兵勇之事飭令查明據實奏聞一節查正陽關城本係毛有銘

會同康錦文程文炳於十一月初四日前往收復維時蔣凝學
成大吉兩軍尙在潁上未知朱萬隆先已獻關投誠初六日移
師至正陽隔河立營正擬搭造浮橋而關上陸軍河下礮划已
羣起轟擊蔣凝學等但知朱萬隆尙在城內以爲苗黨之出拒
官軍也不得不開礮還擊蓋康錦文自壽州而往在正陽之東
毛有銘自六安而往在正陽之西南蔣凝學自潁上而往在正
陽之西北三者各不相謀當彼此互擊之時不持康錦文官兵
在關城之內蔣凝學不得而知卽毛有銘湘軍在關城之旁蔣
凝學亦不得而知也旋經毛有銘飛騎馳告彼此各自收隊究
竟浮橋未成並無一人渡河蔣凝學所稟傷亡六十餘人康錦

文所稟傷亡二十餘人臣竊以爲皆不可信頃據唐訓方來咨有親赴正陽細加訪察實因兩下未及知會並非有心尋衅等語揆厥情形尙屬可信唐訓方業經咨呈僧格林沁免其查辦臣卽日亦當具咨詳述一切

一恭奉十一月十五日

諭旨鮑超全軍現紮東壩此時溧水已復自應進圖句容以斷忠逆救援金陵之路一節查溧水迤北爲句容而迤東則爲溧陽該處去東壩較近實僞侍王李世賢之老巢十一月十二日侍逆糾黨五六萬眾分屯梅渚距東壩建平各四十餘里十四日進犯建平守城將士一戰卻之又轉趨周城社渚一帶於二

十五日猛撲溧水守將王可陞徹夜登陴力戰卻之近據諜報忠逆由金陵退入句容旋由句容潛入溧陽與侍逆合股意在分擾溧水建平奪我東壩一關併圖上竄東壩爲江皖浙三省關鍵鮑超正須以全力爭此要區暫不能進取句容以合金陵之圍自句容而外論者又謂宜急取廣德肅清全皖扼賊上犯之路臣以廣德易取而不易守鮑超既力扼東壩更無他軍可當廣德一路句容廣德之不能早爭先著臣益臣之力薄而心彌歉耳

一恭奉十一月二十二日

諭旨壽潁各城均已收復現祇剿辦零星股匪可以無須大兵

屯聚張得勝蔣凝學成大吉諸軍均可移緩就急分撥赴陝一
節查湘營之在皖北者有四一曰蔣凝學駐軍潁州及三劉集
進取潁上縣城者也一曰毛有銘駐軍老廟集會復正陽一關
者也一曰周寬世駐軍六安州分防迎河集者也一曰成大吉
駐軍三河尖與蔣凝學同進潁上者也此外又有石清吉一軍
駐防廬州係多隆阿舊部亦歸臣處調遣臣以皖北苗黨就滅
羣圩悉平而忠逆又有上竄江西之議皖南別無大枝游擊之
師乃檄毛有銘所部移駐皖南並調周寬世回守省城而換出
安慶防兵與毛有銘同赴南岸爲江皖交界游擊之師其成大
吉一軍已准官文來咨調赴鄂省防剿三關一帶石清吉一軍

亦赴鄂省防勦小河司一帶將來此二軍者或久留湖北或漸
入陝西應由官文酌度辦理臣所轄皖北之兵除調出四軍外
僅留蔣凝學數營分防潁州六安等處暫時未可輕動

以上四條均係近日奉

旨查詢之件理合逐款條對由驛五百里馳奏伏乞

皇太后

皇上聖鑒訓示謹

奏

恭謝 天恩並陳近日軍情摺同治二年十二月二十七日

奏爲恭謝

天恩並陳近日軍情仰祈

聖鑒事竊臣接准江蘇撫臣咨開李鴻章奏克復蘇州一摺同

治二年十一月初四日內閣奉

上諭協辦大學士兩江總督曾國藩遣將助兵克復名城著交部從優議敘等因欽此當卽恭設香案望

闕叩頭謝

恩訖伏念臣忝督兩江才識短淺庚申辛酉兩年方以經營皖

事愧不能調將分兵早達蘇境以慰吳人雲霓之望而紓

朝廷宵旰之憂逮壬戌年疏薦李鴻章率師赴滬又愧不能多
撥得力之營同履危險之地維時所遣之將陸軍僅程學啟一
人係曾國荃拔諸降眾之中信其謀勇寡儔水軍僅黃翼升一
人係臣奏統舟師之員信其忠誠可恃此外如潘鼎新劉銘傳
張樹聲吳長慶張遇春等皆臣與李鴻章商同遴派之將自李
鴻章抵滬以後臣卽未續撥一將續助一兵今夏派李朝斌太
湖水師東下滬中之局已大定威已大振矣蘇州功績之成乃
由李鴻章秉承

聖謨獨攄忠悃每當艱險之際恆匹馬以當先或遇絕續之交
持孤注以爭勝用能轉危而爲安遠攻而近守臣自愧謀略之

不如亦並爲始願所不及更復何功可言何勞可錄不圖

聖澤旁敷優加甄敘聞

命之下感悚交併縱愚忱之勉竭覺報稱之彌難自蘇州克復
僞忠王卽帶數萬人援救金陵到城已近五十日尙未猛撲官
軍營壘近據李鴻章來函聞忠逆以溧陽至饒景數百里處處
乏食頗以裹糧急趨爲難又據鮑超來牘探報侍逆將親率悍
黨裹二十日糧蓄意由長興廣德甯國一帶上犯江西先據產
糧之區以俟忠逆續至各等語臣竊計忠侍二逆旣不能各保
分地又不欲苦援金陵誠非自皖人江別無圖存之策從廣德
甯邑上竄江西約有兩路西路由旌德太平石埭以竄饒景東

奏稿卷十

路由昌化瀘安開化以竄玉山西路之防臣已派兵堅守涇旌
太石青池六城東路之防必由浙境經過臣已飛咨左宗棠沈
葆楨分別扼守以期節節堵遏力保上游完區其金陵洪逆老
巢賊氣尙固糧食未竭臣第曾國荃日夜憂灼臣囑令不求速
效但求穩慎以期仰副
聖主廑念南畝謀出萬全之至意所有微臣感激下忱並近曰
軍情謹繕摺由驛具奏伏乞

皇太后

皇上聖鑒謹

奏



